

六十華嚴

大方廣佛華嚴經

【下冊】

佛陀教育基金會 印贈

大方廣佛華嚴經卷第四十一

東晉天竺三藏佛陀跋陀羅等譯

離世間品第三十三之五

佛子。菩薩摩訶薩有十種業。何等爲十。所謂世界業。悉能嚴淨一切世界故。如來業。奉給供養一切佛故。菩薩善友業。善根同故。眾生業。教化成熟一切眾生故。未來世業。攝取一切盡未來際故。神力業。不捨本處而能遊行一切世界故。淨光業。放無量無邊色光。

一一光端悉有七寶清淨蓮華。一一華臺各有菩薩結加趺坐。悉顯現故。三寶不斷業。一切諸佛滅度之後。受持守護佛正法故。變化業遊行十方說法化眾生故。持業隨所發心。示現眾生令滿一切諸大願故。佛子。是爲菩薩摩訶薩十種業。若菩薩摩訶薩安住此業。則得一切諸佛無上大業。佛子。菩薩摩訶薩有十種身。何等爲十。所謂菩薩不來身。於一切趣不受生故。菩薩不去身。一切趣求不可得故。菩薩不實身。

如一切世間之所得故。菩薩不虛身。如諸世間解眞實故。菩薩不盡身。未來際不可斷故。菩薩堅固身。一切眾魔不能壞故。菩薩不動身。一切眾魔及諸外道不能動故。菩薩相身。示現清淨百福相故。菩薩無相身。法相究竟無眾相故。菩薩普至身。悉與三世如來等故。佛子。是爲菩薩摩訶薩十種身。若菩薩摩訶薩安住此身。則得一切諸佛無上無盡之身。佛子。菩薩摩訶薩有十種身業。何等爲十。所謂以一身充徧一

切世界菩薩身業。於一切眾生前悉爲現身菩薩身業。於趣趣中悉現受生菩薩身業。遊行一切世界菩薩身業。往詣一切佛所及諸大眾菩薩身業。以一手掌悉能普覆一切世界菩薩身業。一切金剛圍山。能以手摩悉如微塵菩薩身業。於已身中示一切眾生一切佛刹成壞菩薩身業。能以一身徧覆一切眾生菩薩身業。於已身中普現一切嚴淨佛刹。一切眾生究竟成就無上菩提菩薩身業。佛子。是爲菩薩摩訶

薩十種身業。若菩薩摩訶薩安住此業。則得一切諸佛無上大法。悉能開悟一切眾生。佛子。菩薩摩訶薩有十種身。何等爲十。所謂波羅蜜身。正向菩提故。四攝身。不捨眾生故。大悲身。代一切眾生受無量苦無疲厭故。大慈身。救護一切眾生故。功德身。饒益一切眾生故。智慧身。一切諸佛金剛身故。淨法身。遠離諸趣生死故。方便身。普能示現一切眾生故。神力身。示現一切自在力故。菩提身。隨一切時成菩提故。佛子。

是爲菩薩摩訶薩十種身。若菩薩摩訶薩安住此身。則得一切諸佛無上大智慧身。佛子。菩薩摩訶薩有十種口。何等爲十。所謂柔軟口。安樂一切諸眾生故。甘露口。清涼一切眾生故。不虛口。說真實故。如實轉口。乃至夢中無虛言故。尊重口。一切釋梵四天王等恭敬尊重故。甚深口。顯現真實法故。堅固口。說無量法不可盡故。正直口。一切音聲具足辯故。莊嚴口。隨時隨業報普示現故。一切智口。隨其所應度眾生故。

佛子。是爲菩薩摩訶薩十種口。若菩薩摩訶薩安住此口。則得一切諸佛無上清淨妙口。佛子。菩薩摩訶薩有十種清淨業。莊嚴菩薩口業。何等爲十。所謂樂聞如來清淨音聲。淨菩薩口業。樂聞菩薩清淨音聲。淨菩薩口業。不說一切眾生不樂聞語。淨菩薩口業。於過去世。離口四過。淨菩薩口業。歡喜讚歎如來淨菩薩口業。於如來塔廟高聲讚佛如實功德。淨菩薩口業。一向普施眾生正法。淨菩薩口業。音樂歌頌讚

歎如來淨菩薩口業。於諸佛所。不惜身命。聽受正法。淨菩薩口業。一向不捨菩薩法師。聽受正法。奉給供養。淨菩薩口業。佛子。是爲菩薩摩訶薩十種淨業。淨菩薩口業。出生菩薩清淨口業。佛子。菩薩摩訶薩出生如是清淨口業。則得十種守護。何等爲十。所謂諸天王及諸天守護。龍王夜叉王。乾闥婆王。阿修羅王。迦樓羅王。緊那羅王。摩睺羅伽王。梵王及諸梵天王。一切諸佛法王所共守護。佛子。是爲菩薩摩訶薩出

生清淨口業。得十種守護。若菩薩摩訶薩。出生如是清淨口業。得十種守護者。則能成辦十種大事。何等爲十。所謂令一切眾生界皆悉歡喜。一切刹界無不聞知。悉能發起一切諸根。悉能清淨一切性界。拔出一切諸煩惱界。遠離一切諸習氣界。明淨一切諸直心界。長養一切諸深心界。充滿一切諸法性界。照明一切大涅槃界。是爲十。佛子。菩薩摩訶薩有十種心。何等爲十。所謂大地等心。持一切眾生諸善根故。大

海等心受持無量無邊諸佛智慧大法海故。須彌山王等心。令一切眾生安住無上善根故。摩尼寶心。遠離煩惱淨直心故。金剛心。決定了知一切法故。堅固金剛圍山心。一切諸魔外道不能壞故。蓮華等心。一切世法不能染故。優曇鉢華等心。於一切劫難值遇故。淨日等心。除滅一切眾生愚癡瞋障閼故。虛空等心。一切眾生無能量故。佛子。是爲菩薩摩訶薩十種心。若菩薩摩訶薩安住此心。則得一切諸佛無上清

淨大心。佛子。菩薩摩訶薩有十種發心。何等爲十。所謂發度脫一切眾生心。發拔出一切眾生煩惱心。發斷除一切習氣心。發斷除一切疑惑具足清淨無疑惑心。發除滅一切眾生苦惱心。發除滅一切惡道諸難心。發隨順一切諸佛教心。發一切菩薩所學心。發覺悟一切諸佛菩提現一切眾生非凡愚所入心。發擊大法鼓音聲聞于一切世界。普照一切眾生諸根心。佛子。是爲菩薩摩訶薩十種發心。若菩薩摩訶

薩安住此心。則得一切諸佛無上業心。佛子。菩薩摩訶薩有十種心滿。何等爲十。所謂滿一切虛空界。眾生無邊故。滿一切法界。深入無量無邊故。滿一切三世。於一念中悉解脫故。滿一切佛降神受胎。出生捨家。得道轉正法輪。乃至大般涅槃。悉明了故。滿一切眾生界。決定了知。希望習氣及諸根故。滿智慧光。隨順了知一切法界故。滿無量無邊。解一切法如幻網故。滿無生。一切諸法無自性故。滿無礙。自心他心無

障礙故。滿自在於念念中現成菩提故。佛子是。爲菩薩摩訶薩十種心滿。若菩薩摩訶薩安住此心。則能成滿一切佛法。無上無量莊嚴。佛子。菩薩摩訶薩有十種根。何等爲十。所謂歡喜根。於一切佛信不壞故。樂菩薩根。覺悟一切佛菩提故。不退菩薩根。究竟一切事故。住菩薩根。安住一切菩薩行故。甚深根。覺般若波羅蜜巧方便故。不休息根。究竟一切眾生事故。金剛等根。決定了知一切法故。金剛光明燄根。普照

一切佛境界故。不雜根。一切如來同一身故。無礙際根。深入如來十種力故。佛子。是爲菩薩摩訶薩十種根。若菩薩摩訶薩安住此根。則得一切諸佛無上淨根。佛子。菩薩摩訶薩有十種直心。何等爲十。所謂不染一切世間法直心。不染聲聞緣覺直心。隨順菩提直心。不違一切智道直心。一切眾魔及諸外道不能沮壞直心。不染如來圓滿清淨智慧直心。隨所聞法。悉能攝取受持直心。於一切受生處無所選擇直心。

深入細微智慧直心。善巧修習一切佛法直心。佛子。是爲菩薩摩訶薩十種直心。若菩薩摩訶薩安住此心。則得一切諸佛無上清淨直心。佛子。菩薩摩訶薩有十種深心。何等爲十。所謂不退深心。長養一切諸善法故。離疑深心。解一切佛微密語故。正持深心。不捨菩薩大願行故。無上正直深心。深入一切諸佛法故。了達深心。於一切佛法得自在故。殊勝深心。深入種種方便法故。爲首深心。於一切境界悉究竟故。自

在深心莊嚴一切三昧自在不斷絕故。具足深心攝
取本大願故。不捨深心教化一切羣生類故。佛子是。
是爲菩薩摩訶薩十種深心。若菩薩摩訶薩安住此心。
則得一切諸佛無上清淨深心。佛子。菩薩摩訶薩有
十種方便。何等爲十。所謂布施方便。悉捨一切不求
報故。學持一切戒。具行頭陀威儀清淨方便。不輕他
故。離一切纏顛倒瞋恚我慢。忍一切眾生諸惑方便。
遠離一切彼我想故。精進不退方便。究竟身口意業。

一切境界不忘失故。一切諸禪三昧解脫諸通方便。遠離一切五欲諸煩惱故。正向智慧方便。長養一切功德心無厭足故。大慈方便。說一切眾生無眾生故。代一切眾生受諸苦惱不捨大悲方便。解一切法無自性故。十力覺悟方便。決定無礙智示現一切眾生故。轉不退法輪方便。轉至眾生心故。佛子。是爲菩薩摩訶薩十種方便。若菩薩摩訶薩安住此法。則得一切諸佛無上大智方便。佛子。菩薩摩訶薩有十種樂。

修何等爲十。所謂樂修最勝。尊重方便。諸善根故。樂修莊嚴。出生種種。諸莊嚴故。樂修廣事。心彌廣故。樂修寂滅。深入甚深。方便法故。樂修無邊。發無量心故。樂修善持。一切諸佛。所護念故。樂修不壞。一切魔業。不能壞故。樂修決定。解了一切諸業報故。樂修現在。隨意能現。自在神力。大變化故。樂修聽受。於一切佛。得受記故。樂修自在。隨意隨時。成菩提故。佛子。是爲菩薩摩訶薩。十種樂修。若菩薩摩訶薩。安住此修。則

得一切諸佛無上樂修。佛子。菩薩摩訶薩有十種解脫。深入世界。何等爲十。所謂一切世界入一世界。一世界入一切世界。一蓮華座一如來身。充滿一切世界。示現一切世界。皆悉虛空。諸佛莊嚴莊嚴一切世界。一菩薩身充滿一切世界。於一毛孔中安置一切世界。一切世界入一眾生身。一佛道場。一菩提樹。充滿一切世界。一妙音聲。充滿一切世界。隨其所應。無不開解。皆爲歡喜。佛子。是爲菩薩摩訶薩十種解脫。

深入世界。若菩薩摩訶薩安住此法。則得一切諸佛
出生佛刹無上解脫。佛子。菩薩摩訶薩有十種入眾
生性。何等爲十。所謂一切眾生界入無身性。一切眾
生界悉入一眾生身。一切眾生界悉入菩薩身。一切
眾生界悉入如來性藏。一切眾生界悉入一眾生界。
一切眾生界悉入諸佛法器。一切眾生界悉入帝釋
梵王隨眾。生形類而普示現。一切眾生界示現入一
切聲聞緣覺不轉威儀。一切眾生界入菩薩功德莊

嚴莊嚴一切眾生。一切眾生界入如來相好莊嚴色身寂靜威儀示現眾生。佛子。是爲菩薩摩訶薩十種入眾生性。若菩薩摩訶薩安住此性。則得一切諸佛無上自在性。佛子。菩薩摩訶薩有十種習氣。何等爲十。所謂菩提心習氣。善根習氣。教化眾生習氣。見佛習氣。於清淨土受生習氣。菩薩行習氣。大願習氣。波羅蜜習氣。出生平等法習氣。種種分別境界習氣。佛子。是爲菩薩摩訶薩十種習氣。若菩薩摩訶薩安住

此法則能除滅一切眾生煩惱習氣。得佛無上大智。習氣。佛子。菩薩摩訶薩有十種熾然。何等爲十。所謂熾然一切眾生界教化究竟令成熟故。熾然世界悉嚴淨故。熾然如來究竟菩薩一切行故。熾然善根積集如來功德諸相好故。熾然大悲除滅一切眾生苦故。熾然大慈令一切眾生安住如來無上樂故。熾然波羅蜜積集菩薩諸莊嚴故。熾然巧方便隨其所應。悉示現故。熾然菩提得無礙智故。略說菩薩皆悉熾

然一切諸法。明達了知一切法故。佛子。是爲菩薩摩訶薩十種熾然。若菩薩摩訶薩安住此法。則能究竟不斷菩薩諸行。除滅一切煩惱熾然。則得一切諸佛無上熾然正法。佛子。菩薩摩訶薩有十種趣。何等爲十。所謂趣波羅蜜。趣學趣智趣實義趣正法趣出生善根趣見佛趣菩薩諸行門趣無上菩提趣轉法輪。佛子。是爲菩薩摩訶薩十種趣。若菩薩摩訶薩安住此趣。則得一切諸佛無上趣法。佛子。菩薩摩訶薩有

十種事。則能具足一切佛法。何等爲十。所謂深信善知識。具足佛法。深信佛教。具足佛法。不謗正法。具足佛法。離放逸行。摧滅憍慢。巧妙方便。回向善根。具足佛法。深信諸佛境界。無量具足佛法。深入一切世界。具足佛法。安住法界。具足佛法。離諸魔界。具足佛法。正念一切佛。具足佛法。深信如來成就十力。具足佛法。佛子。是爲菩薩摩訶薩十種事。則能具足一切佛法。若菩薩摩訶薩安住此法。則得具足一切諸佛無

上大智佛子。菩薩摩訶薩有十種退失佛法。應當遠離。何等爲十。所謂於善知識生憍慢心。失佛法道。畏生死苦。失佛法道。厭菩薩行。失佛法道。厭惡受生。失佛法道。樂著三昧。失佛法道。於諸善根起疑惑心。失佛法道。誹謗正法。失佛法道。斷菩薩行。失佛法道。樂求聲聞及緣覺乘。失佛法道。起瞋恚心。失佛法道。應當遠離佛子。是爲菩薩摩訶薩十種退失佛法。若菩薩摩訶薩遠離此法。則得一切菩薩正趣離生聖行。

正道佛子。菩薩摩訶薩有十種離生。何等爲十。所謂
出生般若波羅蜜。菩薩離生。觀察一切眾生。遠離一
切邪見。斷一切縛。度脫一切眾生。菩薩離生。不念一
切相。亦不捨離著相。眾生菩薩離生。不著三界。亦復
不著一切世界。菩薩離生。永離煩惱。而親近眾生。菩
薩離生。於諸法中得離欲法。常以大悲哀念眾生。菩
薩離生。現處眷屬。令樂寂靜。菩薩離生。離世界生。現
此沒彼生。行菩薩行。菩薩離生。行一切世閒事。而不

染世法菩薩離生。決定了知無上菩提而亦不捨菩薩行願菩薩離生。佛子。是爲菩薩摩訶薩十種離生。永離世間大聖正法。不共一切眾生及聲聞緣覺。若菩薩摩訶薩安住此法。則得一切菩薩十種決定法。何等爲十。所謂於一切如來種姓中生。深入一切如來境界。深解一切諸菩薩行。正向一切諸波羅蜜。出生一切諸佛善根。安住一切如來無上姓中。安住一切諸佛淨力。隨順一切如來菩提。與一切佛共同一

身與一切佛同住而無有異。佛子。是爲菩薩摩訶薩十種決定法。佛子。菩薩摩訶薩有十種出生佛道法。何等爲十。所謂隨順善知識出生佛道法。同善根故。深信一切佛法出生佛道法。樂求如來無盡自在故。於一切大願得正希望出生佛道法。修習廣心故。決定了知己身善根出生佛道法。所行諸業無虛妄故。於一切劫修菩薩行出生佛道法。盡未來際無疲厭故。於阿僧祇世界諸處受生出生佛道法。善巧方便。

教化一切眾生故。修習不斷菩薩所行出生佛道法。
長養大悲故。以無量心出生佛道法。於一念中充滿
一切虛空界故。深入甚深諸大願行出生佛道法。本
生善根不壞不失故。善持守護一切如來種姓出生
佛道法。令一切眾生發菩提心。志常樂求無上菩提
長養一切善根故。佛子。是爲菩薩摩訶薩十種出生
佛道法。若菩薩摩訶薩安住此法。則得善男子十種
名號。何等爲十。所謂菩薩名號。菩提智身故。摩訶薩

埤名號。住大乘故。第一薩埤名號。最第一無閒道法。故。勝薩埤名號。覺勝菩提故。無比薩埤名號。智慧無比。故。上薩埤名號。上精進故。無上薩埤名號。開示顯現。無上法故。力薩埤名號。廣知十力故。無等薩埤名號。一切眾生無與等故。不思議薩埤名號。隨其心念。覺菩提故。佛子。是爲菩薩摩訶薩得善男子十種名號。佛子。菩薩摩訶薩有十種道。何等爲十。所謂一道是菩薩道。不捨菩提心故。二道是菩薩道。出生智慧。

方便故。三道是菩薩道。空方便無相際無願三昧。三界無染故。四行是菩薩道。悔過除罪隨喜功德恭敬勸請無量諸佛善知回向故。長養五根是菩薩道。住有信根不可沮壞發大精進究竟一切事而不退轉。安住正念除滅亂想三昧方便。決定了知智慧境界。善巧分別故。六通自在是菩薩道。天眼悉見一切世界。有色眾生生死此生彼。天耳悉聞一切諸佛所說經法。皆能受持。廣爲一切眾生解說。出生無礙。知他心。

智悉知一切眾生心念。宿命智通悉知過去一切阿
僧祇劫長養善根。身通自在隨其所應現大神變。漏
盡智通知見實際。生菩薩道不斷絕故。七念是菩薩
道。念佛於一毛道見一切佛教化眾生。念法不離一
如來眾於一切佛所對面聞法。悉能受持。隨應眾生
諸根希望而度脫之。念僧見不退轉菩薩大眾。令一
切眾生常見菩薩大眾。念施。行一切菩薩布施。正念
長養菩薩布施功德。念戒。不離菩提心。一切善根回

向眾生念天念兜率陀天一生補處菩薩念一切眾
生善巧方便智慧教化悉令安隱隨順無上菩提故
入正道分是菩薩道所謂正見遠離邪見正思惟正
念一切智遠離虛妄正語隨順聖教離口四過正業
饒益教化一切眾生未曾失時正命安住四聖種成
頭陀功德具足淨威儀遠離一切惡正精進勤修一
切菩薩苦行修佛十力無所罣礙正念悉能憶持一
切音聲除滅世間一切亂想正定善巧方便於一三

昧出生菩薩不可思議法門一切三昧故。九次第定是菩薩道。所謂離欲惡不善法。因覺觀起一切口業無所障礙。說法教化一切眾生。令得一切智喜悅。遠離退過。休息喜悅。離世苦樂。常見諸佛。逮得無上菩提快樂。不動三昧。出生四無色定。亦不離欲界色界受生。正受滅盡三昧而亦不息。菩薩行故。如來十力是菩薩道。所謂巧方便。善知是處非處。善知一切眾生去來現在業因果報。善知一切眾生種種諸根。隨

彼諸根而爲說法。善知眾生無量諸性。善知一切眾生種種欲樂。隨應說法。菩薩淨身皆悉充滿。一切眾生一切剎一切世一切劫。普現如來具足威儀而亦不捨菩薩所行。善巧方便。知一切禪三昧解脫垢淨起。知時非時。出生菩薩無量法門。善知一切眾生死此生彼。於一念中。善知三世一切阿僧祇劫。善知一切眾生除滅一切煩惱結使及諸習氣。而亦不捨菩薩行故。佛子。是爲菩薩摩訶薩十種道。若菩薩摩訶

薩安住此道。則得一切諸佛無上巧方便道。佛子。菩薩摩訶薩有無量道。無量道具。無量修道。無量莊嚴道。何以故。菩薩摩訶薩有十種無量道。故何等爲十。所謂虛空界無量。法界無量。眾生界無量。無盡無量。世界無分齊無量。阿僧祇劫無盡。究竟無量。眾生語法無量。如來身無量。佛音聲無量。如來力無量。一切智無量。佛子。是爲菩薩摩訶薩十種無量道。何以故。如虛空界無量。菩薩積集道具。亦復如是。如法界無量。無

邊菩薩積集道具亦復如是。如眾生界無盡無量。菩薩積集道具亦復如是。如世界無分齊無量。菩薩修習道具亦復如是。如一切劫算數不可盡。菩薩積集道具亦復如是。一切眾生悉共算數所不能盡。如一切眾生語言無量。菩薩積集道具出生智慧諸語言法亦復如是。如如來身無量。菩薩積集道具充滿一切眾生一切刹一切世一切劫亦復如是。如佛音聲無量。出一言音皆悉充滿一切法界。一切眾生無不

聞知菩薩積集道具亦復如是。如如來力無量。菩薩積集道具長養如來力亦復如是。如一切智無量。菩薩積集道具亦復如是。佛子。是爲菩薩摩訶薩十種道具。若菩薩摩訶薩安住此法。則得一切諸佛無量無邊智慧。佛子。菩薩摩訶薩有十種修道。何等爲十。所謂不著。不出修。身口意無忘失故。無增減修。知諸法真實故。非有非無修。入非有非無性故。如幻如夢。如電如響。如鏡中像。如熱時燄。如水中月。修於一切。

法無所著故。空無相無願修。見三界不捨長養諸善根故。不可言說修。不著法施設故。不壞法界修。決定了知一切法故。如實際不可壞修。如虛空際平等。至一切故。菩薩智修。不捨勇猛精進力故。如來十力。四無所畏。一切智平等修。於一切法悉除疑惑故。佛子。是爲菩薩摩訶薩十種修道。若菩薩摩訶薩安住此法。則得一切諸佛無上一切智巧方便修。佛子。菩薩摩訶薩有十種莊嚴道。何等爲十。所謂菩薩摩訶

薩不離欲界。悉能正受色無色界禪定。解脫亦不因
此於彼受生。是爲第一莊嚴道。菩薩摩訶薩入聲聞
道。亦不乘此道出於三界。是爲第二莊嚴道。菩薩摩
訶薩入緣覺道。亦不捨大悲。是爲第三莊嚴道。菩薩
摩訶薩雖百千天女眷屬圍繞。端嚴殊特。顏容無倫。
技術悉備。音樂巧妙。菩薩聞此妙音。未曾暫捨諸禪
解脫三昧。是爲第四莊嚴道。菩薩摩訶薩與一切眾
生設眾伎樂。共相娛樂。乃至一念不捨諸禪解脫三

昧。是爲第五莊嚴道。菩薩摩訶薩不著一切世間諸法。究竟世間。得到彼岸。度脫眾生。是爲第六莊嚴道。菩薩摩訶薩安住正智。修習正道。趣於邪道。欲令眾生遠離邪道。於此邪道不取真實清淨之相。是爲第七莊嚴道。菩薩摩訶薩遠離身口意惡業。常持淨戒。一向正求如來淨戒。示現一切凡愚童蒙眾生持戒威儀。爲教化成熟犯戒眾生故。菩薩具足成滿一切清淨功德。正趣菩薩趣。而現受生地獄畜生餓鬼閻

羅王及諸難趣。令彼眾生離惡趣。故而實菩薩不攝。彼趣是爲第八莊嚴道。菩薩摩訶薩於一切佛法不由他悟。得無礙辯。明淨智慧。普照一切諸佛正法。安住一切諸佛自在。共一切佛清淨法身。具足成就一切堅固大人明淨正法。安住一切平等諸乘。向一切佛境界法門。一切眾生所應讚歎恭敬供養。爲一切眾生作無上師。專求正法。未曾捨離。示現於法有疑。示現師受恭敬供養和尙阿闍梨。而實爲一切天人。

無上法師。何以故。菩薩摩訶薩。善知方便。住菩薩道。隨其所應。方便示現。是爲第九莊嚴道。菩薩摩訶薩。具足成就甚深智慧。究竟菩薩一切無上法行。一切如來以甘露法而灌其頂。究竟一切法自在彼岸。離垢無礙清淨法。繒以冠其首。於一切世界普現如來。無礙法身。轉不可壞清淨法輪。清淨法身。於一切世界無處不至。究竟一切法自在彼岸。具足成就一切菩薩自在之法。巧妙方便。於一切刹示現受生。與三

世佛共一境界。而亦不斷菩薩所行。不捨菩薩法。不轉菩薩業。不捨菩薩道。未曾廢捨菩薩威儀。不捨菩薩熾然。不捨善巧方便。不離菩薩事。修菩薩行。心無疲厭。不離菩薩受持法行。何以故。菩薩摩訶薩欲速成阿耨多羅三藐三菩提故。不捨菩薩行。觀察眾生。是爲第十莊嚴道。佛子。是爲菩薩摩訶薩十種莊嚴道。若菩薩摩訶薩安住此道。則得一切諸佛無上道寶莊嚴。而不捨菩薩道。佛子。菩薩摩訶薩有十種足。

何等爲十。所謂淨戒足。積集成滿。一切大願故。精進足。積集一切菩提枝。至不退轉故。諸通足。隨眾生願。令歡喜故。身通足。不離一坐而能悉詣一切佛刹故。深心足。究竟一切勝妙法故。堅誓足。所求諸事悉究竟故。攝善法足。不違一切尊重教故。聞法無厭足。聞持一切佛所說法。無疲倦故。如法資生具足。入一切眾諸根無異故。正向菩薩行足。離一切惡故。佛子。是爲菩薩摩訶薩十種足。若菩薩摩訶薩安住此足。則

得一切諸佛無上勝足。能一舉足皆悉徧至一切世界。佛子。菩薩摩訶薩有十種手。何等爲十。所謂信手。於一切佛所說正法。一向信心究竟受持故。不著財施手。有來乞者令歡喜故。先意善來問訊手。右掌相顯現故。恭敬供養一切佛手。長養無量功德無疲厭故。善解多聞手。除一切眾生諸疑惑故。遠離三界離生寂靜手。拔欲汙泥眾生類故。安置彼岸手。救濟四流漂沒眾生故。離吝法手。盡能開說一切法故。一切

世間離世間諸論智手。除滅一切身心病故。智慧寶手。除滅一切煩惱癡暗。示現一切不可稱說法光明。故佛子。是爲菩薩摩訶薩十種手。若菩薩摩訶薩安住此手。則得一切諸佛無上之手。能以一掌普覆十方一切世界。

大方廣佛華嚴經卷第四十一

誦補闕真言

南無三滿哆沒馱喃。阿鉢囉帝。喝多折。折捺彌。唵。雞彌雞彌。怛塔葛塔喃。末瓦山。矺鉢囉帝。烏怛摩怛摩。怛塔葛塔喃。末瓦吽。發莎訶。

舉字母讚

華嚴字母。眾藝親宣。善財童子得真傳。秘密義幽玄。功德無邊。唱誦利人天。

娑	頗	娑	迦	也	娑
○	○	○	○	○	○
桑	滂	思	岡	亦	桑
僧	溯	思	拒	亦	僧
蝶	徜	蘇	公	亦	蝶
甦	補	蘇	孤	亦	甦
甦	胞	蘇	高	亦	甦
腮	龐	思	該	亦	腮
腮	披	思	雞	亦	腮
西	粉	西	斤	亦	西
辛	潘	西	千	亦	辛
珊	○	思	今	亦	珊
心	○	思	甘	亦	心
三	惝	思	勾	亦	三
鞞	頗	思	迦	也	鞞
娑	娑	娑	娑	也	娑

唱

娑 頗 娑 迦 也 娑

字

時普願法界眾生入般若波羅蜜門
四十二字妙陀羅字字包含義理多。
婆功德大法界沐恩波。

娑 也 迦 娑 頗 娑

梵韻滿娑

四生九有同登華藏玄門。八難三塗共入毘盧性海。
南無華嚴海會佛菩薩

三稱

大方廣佛華嚴經卷第四十二

東晉天竺三藏佛陀跋陀羅等譯

離世間品第三十三之六

佛子。菩薩摩訶薩有十種腹。何等爲十。所謂離諂曲
腹。直心清淨故。離幻偽腹。身口意業皆真正故。不爲
事腹。離藏惡故。無窮盡腹。於一切法無所著故。滅煩
惱腹。智明淨故。清淨心腹。離一切惡故。觀察一切食
想腹。正念真實法故。觀察一切行腹。善覺緣起故。善

覺一切道腹具足成就正希望故。離一切煩惱諸邪見腹。令一切眾生得如來腹故。佛子。是爲菩薩摩訶薩十種腹。若菩薩摩訶薩安住此腹。則得一切諸佛無上之腹。悉能容受一切眾生。佛子。菩薩摩訶薩有十種藏。何等爲十。所謂不斷如來種。姓是菩薩藏。廣說佛法。長養無量諸善法故。受持守護如來正法。是菩薩藏。開示眾生大智明故。長養僧寶。是菩薩藏。攝取不退正法輪故。覺悟正定眾生。是菩薩藏。度脫眾

生不失時故。教化成熟不定。眾生是菩薩藏。善根相續。因不斷故。發大悲心。救護邪定眾生。是菩薩藏。起彼未來善根。因緣故。滿足如來十力。不可沮壞。是菩薩藏。降伏眾魔。具足成就。不退善根。故住四無畏。大師子吼。是菩薩藏。令一切眾生悉歡喜。故得佛十八不共法。是菩薩藏。一切智慧無不至。故平等覺悟一切眾生。一切刹一切法。一切佛。是菩薩藏。於一念中。深入平等。故佛子。是爲菩薩摩訶薩十種藏。若菩薩

摩訶薩安住此藏則得一切諸佛無上善根大智慧藏。佛子。菩薩摩訶薩有十種心。何等爲十。所謂勇猛心。所發事業悉究竟故。無懈怠心。積集相好諸善根故。勇健力心。摧伏一切諸惡魔故。正思惟心。除滅一切煩惱垢故。不退轉心。往詣道場究竟菩提故。性清淨心。覺心無所至無所著故。知眾生心。隨眾生性。令彼覺悟得解脫故。入大梵天住。住佛法心。種種眾生性。悉救護故。空無相無願無行心。遠離相見不著三

界故。金剛莊嚴心。眾生數等。魔乃至不能動一毛故。佛子。是爲菩薩摩訶薩十種心。若菩薩摩訶薩安住此心。則得一切諸佛無上金剛藏心。佛子。菩薩摩訶薩有十種莊嚴。何等爲十。所謂大慈莊嚴。救護一切眾生故。大悲莊嚴。堪忍一切苦故。大願莊嚴。所可發願。悉究竟故。回向莊嚴。建立一切諸佛功德。妙莊嚴故。功德莊嚴。饒益一切眾生故。波羅蜜莊嚴。度脫一切眾生故。智慧莊嚴。除滅一切眾生煩惱。愚癡暗故。

方便莊嚴出生普門諸善根故。一切智心堅固不亂。莊嚴不樂異乘故。決定莊嚴於正法中滅疑惑故。佛子。是爲菩薩摩訶薩十種莊嚴。若菩薩摩訶薩安住此法。則得一切諸佛無上莊嚴。降一切魔。佛子。菩薩摩訶薩有十種器仗。何等爲十。所謂遠離慳吝。惠施心仗。除滅一切慳貪垢故。持戒仗。拔出一切諸惡戒故。平等觀察一切法仗。遠離一切虛妄法故。智慧仗。除滅眾生諸煩惱故。正命仗。遠離一切諸邪命故。方

便仗一切示現故。略說貪恚癡一切煩惱是菩薩仗以煩惱門化眾生故。生死仗不斷菩薩行教化眾生故。說實法仗一切無著故。一切智門仗不離菩薩行門故。佛子是爲菩薩摩訶薩十種器仗。若菩薩摩訶薩安住此法。則能除滅一切眾生長夜積集煩惱結使習氣。佛子。菩薩摩訶薩有十種頭。何等爲十。所謂涅槃首。無見頂故。恭敬尊重首。一切世間天人恭敬供養故。深妙首。於一切三千大千世界最第一故。一

切善根首。三界眾生應供養故。荷負一切眾生首。得無上金剛頂故。無量無邊首。攝取一切最勝法故。般若波羅蜜首。樂法王法故。方便首。示現一切眾生平等首故。教化成熟一切眾生首。爲一切眾生無上師故。守護如來正法首。不斷三寶故。佛子。是爲菩薩摩訶薩十種頭。若菩薩摩訶薩安住此法。則得一切諸佛無上智頂。佛子。菩薩摩訶薩有十種眼。何等爲十。所謂肉眼見一切現色故。天眼見一切眾生死此生

彼故。慧眼見一切眾生諸根故。法眼見一切法真實相故。佛眼見如來十力故。智眼分別一切法故。明眼見一切佛光明故。出生死眼見涅槃故。無礙眼見一切法無障礙故。普眼平等法門見法界故。佛子是爲菩薩摩訶薩十種眼。若菩薩摩訶薩成就此眼。則得一切諸佛無上大智慧眼。佛子。菩薩摩訶薩有十種耳。何等爲十。所謂聞讚歎聲斷除貪愛。聞毀訾聲斷除瞋恚。聞聲聞緣覺聲不起求心。聞菩薩道聲發起

歡喜奇特之心。聞地獄畜生餓鬼閻羅王阿修羅一切難處貧苦音聲。發起大悲莊嚴而自莊嚴。聞天人趣勝妙音聲。觀一切法皆悉無常。聞佛功德音聲。勤修精進究竟滿足一切功德。聞波羅蜜四攝菩薩經藏音聲。發究竟心。到於彼岸。聞十方世界一切音聲。悉了如響。菩薩摩訶薩從初發心。乃至道場。常正受法耳。而亦不捨教化成熟一切眾生。佛子。是爲菩薩摩訶薩十種耳。若菩薩摩訶薩成就此耳。則得一切

諸佛無上大智慧耳。佛子。菩薩摩訶薩有十種鼻。何等爲十。所謂所聞穢氣觀察不臭。所聞香氣觀察不香。所聞香臭觀察平等。聞非香非臭觀察捨離。聞衣服牀褥臥具及身支節香。則知彼人貪恚愚癡等分煩惱。聞大寶藏諸藥草香。悉能了知一切寶藏。聞下至阿鼻地獄。上至非想非非想處眾生之香。悉能了知諸根本行。聞聲聞施戒聞慧香。住一切智心。未曾散亂。聞一切菩薩行香。攝取如來智地。聞一切佛智。

境界香不斷菩薩所行。佛子。是爲菩薩摩訶薩十種鼻。若菩薩摩訶薩成就此鼻。則得一切諸佛無量無邊無上清淨鼻。佛子。菩薩摩訶薩有十種舌。何等爲十。所謂分別解說一切眾生無盡行舌。分別解說無盡法舌。讚歎諸佛無盡功德舌。無盡辯舌。演說無盡大乘法舌。普覆十方虛空界舌。普照一切佛世界舌。平等讚歎一切眾生舌。隨順諸佛令歡喜舌。降一切魔及諸外道。除滅一切生死煩惱。悉令眾生至涅槃。

舌。佛子。是爲菩薩摩訶薩十種舌。若菩薩摩訶薩成就此舌。則得諸佛無上大金剛舌。普覆一切世界。佛子。菩薩摩訶薩有十種身。何等爲十。所謂人身。教化成熟一切人故。非人身。教化成熟地獄畜生餓鬼閻羅王故。天身。教化成熟欲界色界無色界眾生故。學身。示現學地故。無學身。示現阿羅漢地故。緣覺身。教化令入緣覺地故。菩薩身。積集大乘故。如來身。受如來智記故。摩菴摩身。巧方便出生無量功德故。無漏

法身以少方便普現一切眾生身故。佛子是。是爲菩薩摩訶薩十種身。若菩薩摩訶薩成就此身。則得一切諸佛無上法身。佛子。菩薩摩訶薩有十種意。何等爲十。所謂上首意。出生一切善根故。隨順佛教意。如說修行故。深入意。解一切佛法故。內意。深入眾生希望故。不亂意。不爲煩惱所亂故。清淨意。不受垢染故。善調伏意。不失時故。正思惟業意。遠離一切惡故。調伏諸根意。於境界中諸根不馳騁故。深定意。佛三昧不

可稱量故。佛子。是爲菩薩摩訶薩十種意。若菩薩摩訶薩成就此意。則得一切諸佛無上意。佛子。菩薩摩訶薩有十種行。何等爲十。所謂聞法行。樂聽受法故。說法行。利益眾生故。不隨愛瞋癡怖行。調伏自心故。欲界行。教化成熟欲界眾生故。色無色界三昧行。令速轉故。義法行。速成就淨慧故。一切趣行。教化眾生故。一切佛刹行。恭敬禮拜供養一切佛故。涅槃行。斷生死相續故。成滿諸佛行。不斷菩薩行故。佛子。是爲

菩薩摩訶薩十種行。若菩薩摩訶薩成就此行。則得一切諸佛行。非行。如來行。佛子。菩薩摩訶薩有十種住。何等爲十。所謂菩提心住。未曾忘失故。波羅蜜住。不厭功德故。樂聞正義住。明淨智慧故。阿練若處住。成就諸大三昧故。隨順一切智。頭陀威儀四聖種住。少欲知足故。隨順住。順正法故。親近如來住。成滿佛威儀故。諸明住。滿足大智故。無生忍住。受記滿足故。道場菩提住。滿足力無畏。一切佛法故。佛子。是爲菩

薩摩訶薩十種住。若菩薩摩訶薩安住此住。則得一切諸佛無上一切智住。佛子。菩薩摩訶薩有十種坐。何等爲十。所謂轉輪王坐。興十善故。四天王坐。欲於一切世界諸佛正法得自在故。帝釋坐。於一切眾生最第一故。梵天坐。自心他心得自在故。師子坐。分別演說甚深義故。正法坐。欲明陀羅尼諸力辯故。堅固三昧坐。究竟大誓故。大慈坐。令惡心眾生悉歡喜故。大悲坐。能忍一切諸苦惱故。金剛坐。調伏眾魔諸外

道故。佛子。是爲菩薩摩訶薩十種坐。若菩薩摩訶薩安住此坐。則得一切諸佛無上尊坐。佛子。菩薩摩訶薩有十種臥。何等爲十。所謂寂靜臥。身心憺怕故。禪定臥。正念思惟觀諸法故。諸三昧臥。身心柔軟故。梵天臥。不惱自他故。思惟業臥。後心無悔故。順正法臥。不可傾動故。正道臥。善知識覺悟故。妙願臥。善知回向故。一切事畢臥。所作究竟故。捨方便臥。究竟本事故。佛子。是爲菩薩摩訶薩十種臥。若菩薩摩訶薩安

住此法則得一切諸佛無上道。臥悉能覺悟一切眾生。佛子。菩薩摩訶薩有十種住。何等爲十。所謂大慈住。等心觀察一切眾生故。大悲住。不輕未學眾生故。大喜住。滅憂惱故。大捨住。有爲無爲悉平等故。一切波羅蜜住。菩提心爲首故。一切種空住。善解諸法故。無相住。離生受證不退轉故。無願住。捨受生故。念慧住。忍法成滿故。一切法平等住。得受記法故。佛子。是爲菩薩摩訶薩十種住。若菩薩摩訶薩安住此住。則

得一切諸佛無上無礙住。佛子。菩薩摩訶薩有十種行。何等爲十。所謂正念行滿足。四念處故。諸趣行正覺法趣故。慧行隨順諸佛故。波羅蜜行滿足。一切智故。四攝行教化成熟諸眾生故。生死行長養一切諸善根故。一切眾生言戲行。拔出眾生故。貪熾然行覺悟一切眾生諸根故。巧方便行長養般若波羅蜜故。道場行覺一切智不斷菩薩行故。佛子。是爲菩薩摩訶薩十種行。若菩薩摩訶薩安住此行。則得一切諸

佛無上大智慧行。佛子。菩薩摩訶薩有十種觀察。何等爲十。所謂觀察善業乃至微色悉照見故。觀察死此生彼不著一切眾生故。觀察一切眾生諸根決定。了知無根法故。觀察妙法法界不可壞故。觀察現前於一切佛法修佛眼故。觀察智慧隨器說法故。觀察無生法忍決定得佛法故。觀察不退佛地除滅一切煩惱超出三界二乘地故。觀察甘露灌頂法地。於一切佛法得自在不動故。觀察佛三昧於一切十方作

佛事故。佛子。是爲菩薩摩訶薩十種觀察。若菩薩摩訶薩安住此法。則得一切諸佛無上大智觀察。佛子。菩薩摩訶薩有十種周徧觀察。何等爲十。所謂周徧觀察諸來求者。慈心施與。滿彼意故。周徧觀察諸犯戒者。安置如來清淨戒故。周徧觀察害心眾生。安置如來堪忍力故。周徧觀察諸懈怠者。令彼眾生勤修。精進究竟大乘故。周徧觀察亂心眾生。除彼亂心。安置如來一切智地故。周徧觀察愚癡眾生。除彼疑惑。

一切有見故。周徧觀察諸善知識。隨如來教。住佛法。故。周徧觀察。隨所聞法。具足成就。無上義故。周徧觀察。一切眾生。不捨大悲故。周徧觀察。一切佛法。覺一切智故。佛子。是爲菩薩摩訶薩十種周徧觀察。若菩薩摩訶薩安住此法。則得一切諸佛無上大智。周徧觀察。佛子。菩薩摩訶薩有十種奮迅。何等爲十。所謂色奮迅。於天龍夜叉乾闥婆阿修羅迦樓羅緊那羅摩睺羅伽等一切眾中。現最勝故。象奮迅。示現象寶。

心故龍奮迅興大法雲普覆一切曜明解脫電光震
實義雷降諸根力覺意禪定解脫三昧甘露法雨故
大金翅鳥王奮迅壞滅愚癡闇瞋膜消竭愛水於
大苦海搏撮煩惱諸惡龍故師子奮迅安住無畏被
執平等大智鎧仗摧伏眾魔諸外道故勇健奮迅能
於生死大戰陣中摧滅一切煩惱大怨敵故智慧奮
迅決定了知陰界諸入十二緣起現一切佛自在法
故陀羅尼奮迅聞持一切法未曾忘失廣爲羣生分

別說故。辯才奮迅。分別一切句身。味身。無所罣礙。隨問卽答。悉令歡喜。言不虛故。如來奮迅。坐師子座。降伏眾魔。調伏外道。滿足一切智。具一念相應慧。所得。所。知。所。覺。所。成。皆。悉。覺。知。成。無。上。菩。提。故。佛。子。是。爲。菩。薩。摩。訶。薩。十。種。奮。迅。若。菩。薩。摩。訶。薩。安。住。此。法。則。得。一。切。諸。佛。無。上。自。在。奮。迅。佛。子。菩。薩。摩。訶。薩。有。十。種。師。子。吼。何。等。爲。十。所。謂。我。必。成。佛。是。菩。提。心。師。子。吼。於。一。切。眾。生。起。大。悲。心。未。度。者。度。未。脫。者。脫。未。安。

者安。未涅槃者令得涅槃。是大悲師子吼。守護受持
不斷三寶性。是報如來恩。師子吼。令一切佛刹皆悉
清淨。是究竟大誓。師子吼。除滅一切惡道諸難。是自
持淨戒。師子吼。滿足如來身口意相好莊嚴。是積集
功德無厭足。師子吼。成滿一切諸佛智慧。是積集智
慧眾具無厭足。師子吼。除滅一切魔事。專求正道。是
除滅煩惱。師子吼。知一切法無我。無我所。無命。無富
伽羅空。無相。願觀一切法淨如虛空。是於一切法得

無生忍師子吼。一生補處菩薩摩訶薩。嚴淨震動一切佛刹。釋梵四天王咸悉請求降神下生。以無礙慧眼普觀世間一切眾生無勝我者。示現出生遊行七步。大師子吼。我於世間最勝第一。我永究竟生老死法。是如說修行師子吼佛子。是爲菩薩摩訶薩十種師子吼。若菩薩摩訶薩安住此法。則得一切諸佛無上大師子吼佛子。菩薩摩訶薩有十種淨施。何等爲十。所謂平等心施。無惡眾生故。隨意施。滿一切願故。

無亂心施不退轉故。隨應供施分別了知富伽羅故。不選擇施不求果報故。一向施於一切物心無著故。內外一切施究竟清淨故。回向菩提施遠離有爲無爲故。教化成熟眾生施乃至道場不捨離故。三種圓滿清淨施施者受者財物平等清淨如虛空故。佛子是。是爲菩薩摩訶薩十種淨施。若菩薩摩訶薩安住此施則得一切諸佛無上清淨大施。佛子。菩薩摩訶薩有十種淨戒。何等爲十。所謂身淨戒。防護身三惡故。

口淨戒。遠離口四過故。心淨戒。永離貪恚諸邪見故。具一切淨戒。於天人中最勝妙故。守護菩提心淨戒。不樂小智故。守護如來所說淨戒。乃至微細罪大怖畏故。微密淨戒。善拔犯戒諸眾生故。不作一切惡淨戒。積集一切諸善法故。遠離一切有見淨戒。於戒無著故。守護一切眾生淨戒。出生大悲故。佛子。是爲菩薩摩訶薩十種淨戒。若菩薩摩訶薩安住此戒。則得一切諸佛遠離眾惡無上淨戒。佛子。菩薩摩訶薩有

十種淨忍。何等爲十。所謂若他罵辱。悉能堪忍。護彼心故。若他刀仗加害。亦能堪忍。護彼我故。知一切瞋恚。忍自然不動故。自在處忍。能害不害故。眾生歸趣忍。不惜身命故。遠離我慢忍。不輕未學故。割截支節忍。觀察如幻故。一切惡事忍。離自他想故。煩惱忍。遠離煩惱境界故。隨順一切菩薩方便智忍。得無生忍。於一切智境界不由他悟故。佛子。是爲菩薩摩訶薩十種淨忍。若菩薩摩訶薩安住此忍。則得一切諸佛。

無上法忍不由他悟。佛子。菩薩摩訶薩有十種淨精進。何等爲十。所謂淨身業精進。恭敬供養奉給一切諸佛菩薩。尊重福田。不退轉故。淨口業精進。聞持一切諸佛正法。未曾忘失。讚歎如來。隨所聞法。廣爲人說。無疲倦故。淨意業精進。巧方便入慈悲喜捨禪定。解脫三昧相續。起無退轉故。淨直心精進。遠離諂曲。正直一切事。一切方便。究竟不退轉故。淨深心精進。常趣勝趣。積集無上智慧。白淨法故。行不虛妄。淨精

進攝取布施戒忍多聞及不放逸乃至道場不中息
故降伏一切眾魔怨敵淨精進悉能除滅貪恚愚癡
煩惱邪見諸纏障蓋故滿足智慧光淨精進有所施
作悉善思惟心無中悔究竟眾事得一切佛不共法
故無所染著淨精進離心境界身口心相非相甚深
法門普觀境界決定了知眞實如如故具足成就法
明淨精進次第進入一切諸地於諸佛所得甘露灌
頂受法王記無漏法身現捨天壽降神世間出家成

道轉淨法輪。入大涅槃。究竟具足普賢行故。佛子是。是爲菩薩摩訶薩十種淨精進。若菩薩摩訶薩安住此法。則得一切諸佛無上大淨精進。佛子。菩薩摩訶薩有十種淨禪。何等爲十。所謂常樂出家淨禪。捨離一切有故。親近善知識淨禪。諮受修習正法道故。樂阿練若處淨禪。遠離我所法故。離言戲憤鬧處淨禪。樂寂滅故。心柔軟淨禪。諸根不亂故。智慧寂靜淨禪。一切音聲諸禪。定刺不能亂故。七覺八道淨禪。於一

切境界智慧決定故。離味禪等諸煩惱垢淨禪。不取
欲界故。諸通明淨禪。決定了知一切眾生諸根故。以
少方便現前遊戲神通淨禪。如來三昧不可稱量故。
佛子。是爲菩薩摩訶薩十種淨禪。若菩薩摩訶薩安
住此禪。則得一切諸佛無上淨禪。佛子。菩薩摩訶薩
有十種淨慧。何等爲十。所謂知因淨慧。不壞果報故。
解一切緣淨慧。不壞和合故。解一切法不常不斷淨
慧。了緣起如如故。拔出一切邪見淨慧。不取眾生相

故解一切眾生心心所行淨慧觀一切法皆如幻故。諸辯勝智淨慧隨問能答無罣礙故。降伏眾魔及諸外道出過聲聞緣覺淨慧深入如來方便智故。見一切佛清淨法身。見一切眾生皆悉清淨。見一切法皆悉寂滅。見一切世界皆悉虛空淨慧於一切相智慧無礙故。攝取一切陀羅尼辯諸波羅蜜巧方便淨慧得一切勝智故。一念相應金剛智覺一切法平等淨慧具足成就無上智故。佛子。是爲菩薩摩訶薩十種。

淨慧若菩薩摩訶薩安住此慧則得一切諸佛無上大智佛子菩薩摩訶薩有十種淨慈何等爲十所謂等心淨慈不選擇眾生故饒益淨慈於一切眾生有所施作悉能辦故救護淨慈究竟度脫一切眾生生死險難故哀愍不捨一切眾生淨慈長養有爲善根故解脫淨慈滅一切眾生諸煩惱故出生菩提淨慈令一切眾生樂求菩提故於一切眾生無礙淨慈放無量光明普照眾生故虛空淨慈救護一切眾生故

法緣淨慈覺悟真實法故。無緣淨慈。證取菩薩離生法故。佛子。是爲菩薩摩訶薩十種淨慈。若菩薩摩訶薩安住此慈。則得一切諸佛無上清淨大慈。佛子。菩薩摩訶薩有十種淨悲。何等爲十。所謂不共淨悲。自大悲故。不厭淨悲。代一切眾生受大苦故。處一切惡道淨悲。受生死度眾生故。一切天人中受生淨悲。示現一切法悉無常故。爲邪定眾生淨悲。於無量劫大誓莊嚴不捨離故。不著已樂淨悲。與眾生樂故。不求

報淨悲。自心清淨故。除滅一切眾生倒惑淨悲。說實法故。知一切法自性清淨。空無所有。客塵所染。菩薩於彼而起淨悲。說真實淨法故。解一切法如虛空。足跡眾生癡墮。不知真實。菩薩於彼而起淨悲。欲令眾生發大乘心。究竟涅槃故。佛子。是爲菩薩摩訶薩十種淨悲。若菩薩摩訶薩安住此悲。則得一切諸佛無上清淨大悲。佛子。菩薩摩訶薩有十種淨喜。何等爲十。所謂發菩提心淨喜。捨一切所有淨喜。於犯戒人

不生惡心。教化成就淨喜。於一切諍訟眾生悉令和合。得無上智淨喜。不惜身命守護正法淨喜。遠離五欲常樂正法淨喜。令一切眾生不著資生之具。常樂正法淨喜。見一切佛恭敬供養。無有厭足而不壞法界淨喜。令一切眾生常樂禪定解脫三昧相續淨喜。令一切眾生專求寂靜除滅亂想。得無上慧遠離邪見。滿足諸願。究竟菩薩苦行淨喜。佛子。是爲菩薩摩訶薩十種淨喜。若菩薩摩訶薩安住此喜。則得一切。

諸佛無上清淨大喜。佛子。菩薩摩訶薩有十種淨捨。何等爲十。所謂一切眾生恭敬供養不生愛著。一切眾生輕慢毀辱不生瞋恚。淨捨常行世間不爲八法之所染污。淨捨於器知時。於非器不生惡心。淨捨不求聲聞緣覺學。無學淨捨。遠離五欲一切煩惱。乃至不生一念惡心。淨捨不歎修行二乘及厭生死。淨捨遠離世間語。非涅槃語。非離欲語。戲笑語。惱他語。聲聞緣覺語。乃至一切障菩提語。淨捨若有眾生待時。

受化菩薩淨捨。若有眾生應受佛化菩薩淨捨。菩薩摩訶薩遠離二法。無上無下。無取無捨。無虛無實。觀察平等安住。真實得忍淨捨。佛子。是爲菩薩摩訶薩十種淨捨。若菩薩摩訶薩安住此捨。則得一切諸佛無上清淨大捨。佛子。菩薩摩訶薩有十種義。何等爲十。所謂多聞義。如說修行故。法義善巧方便分別解故。空義解第一空故。寂滅義。令一切眾生離生死故。不可說義。一切語言無所著故。如義。一切三世等觀。

察故。入法義悉一味故。如來義順如來故。實際義覺
眞實故。大般涅槃義滅一切苦不斷菩薩行故。佛子。
是爲菩薩摩訶薩十種義。若菩薩摩訶薩安住此義
則得一切諸佛無上一切智義。佛子。菩薩摩訶薩有
十種法。何等爲十。所謂眞實法。如說修行故。無害法
遠離瞋恚故。無諍法。除滅一切諸煩惱故。寂滅法。離
熾然故。離欲法。永離欲垢諸煩惱故。不虛法。離虛妄
故。不生法。一切諸法悉虛空故。無爲法。離三相故。性

淨法自然清淨故。報身煩惱滅無餘涅槃法。行菩薩
行受持不捨故。佛子。是爲菩薩摩訶薩十種法。若菩
薩摩訶薩安住此法。則得一切諸佛無上之法。佛子。
菩薩摩訶薩有十種功德具。何等爲十。所謂勸發眾
生起菩提心。是功德具。不斷三寶故。隨順十種回向
是功德具。斷一切不善法。集一切善法故。智慧正教
是功德具。於三界功德最殊勝故。心無疲厭。是功德
具。度脫一切眾生到彼岸故。悉能捨離內外所有。是

功德具於一切物。悉無著故。相好滿足。精進不退。是功德具。止心馳騁故。不輕三品善根。是功德具。善巧方便。回向菩提故。於邪定犯戒眾生。不起輕慢。增長大悲。是功德具。顯現大人法故。恭敬供養一切如來。於一切菩薩起如來想。於一切眾生所作。究竟是功德具。長養守護。正直心故。菩薩摩訶薩。於阿僧祇劫。具足修習一切善根。皆悉能捨。與一眾生。心無憂悔。如一眾生。一切眾生。亦復如是。是爲第十虛空界等。

大功德具。具足成就廣大智慧故。佛子。是爲菩薩摩訶薩十種功德具。若菩薩摩訶薩安住此法。則得一切諸佛無上大功德具。佛子。菩薩摩訶薩有十種智具。何等爲十。所謂親近真實。多聞善知識。恭敬尊重。禮拜供養。奉給隨順。不違其教。是第一智具。遠離諂曲。故離慢下意。心無放逸。身口及意。皆悉柔軟。無有輕躁。心常歡喜。護持淨戒。和顏愛語。先意問訊。遠離邪僞。是第二智具。自然成就佛法器故。安住念慧不

捨正覺除滅亂想修習六念行六和敬不求其報是
第三智具出生長養十種智故樂法樂義勤修正法
學無厭足遠離世論及世間語樂聞離世間語遠離
小乘樂求大乘是第四智具修習正念不可思議故
正求六波羅蜜受持修習具足成就四種梵住順諸
明法能問智人遠離惡趣專向善趣慈心調伏離訶
責譏論防護他心是第五智具如說修行諸佛真實
法故常樂出家不樂三界守護自心遠離三覺不生

慧心身口及意皆悉柔輒善知心性是第六智具令
自他心俱清淨故。觀陰如幻界如毒蛇入如空聚觀
一切法如化如燄水月鏡像如夢如電如呼聲響如
旋火輪如空中字。如因陀羅陣如日月光非常非斷
無來無去無住。深心信解不起誹謗是無生住滅第
七智具。具足成就一切法空淨智慧故。無我無眾生
無富伽羅。無思無義。無貪恚癡。無所有。無毀無譽。無
取無捨。無主無行。究竟涅槃。若菩薩摩訶薩聞此深

法能信能解除滅疑惑。是第八智具。究竟具足深解脫故。以正方便思惟止觀調伏諸根。一切諸法無所造作。無生無爲。皆悉寂滅。眾生計我者。究竟無所有。無縛無脫。無身口心。亦無精進觀察一切眾生。一切法。一切心。一切行。無前無後。皆悉平等。是第九智具。遠離一切相。究竟到彼岸故。菩薩摩訶薩善知緣起。故見法清淨。見法清淨故。見刹清淨。見刹清淨故。見虛空清淨。見虛空清淨故。見法界清淨。見法界清淨。

故則見智慧。是第十智具。積集一切智故。佛子。是爲菩薩摩訶薩十種智具。若菩薩摩訶薩安住此法。則得一切諸佛一切法中無上無礙清淨大智。

誦補闕真言

南無三滿哆。沒馱喃。阿鉢囉帝。喝多折。折捺彌。唵。雞彌雞彌。怛塔葛塔喃。末瓦山。矝鉢囉帝。烏怛摩怛摩。怛塔葛塔喃。末瓦吽。發莎訶。舉字母讚
華嚴字母。眾藝親宣。善財童子得真傳。秘密義幽玄。功德無邊。唱誦利人天。

室◎室室東室室室室室室室室室室室

左吞○臧增宗租遭災賁津錢浸簪嗽左

侘◎葛燈躡攄超攄絺獅脰琛覘抽侘

陀●唐滕彤圖韜駘醍田驪○曇骰陀



時普願法界眾生入般若波羅蜜門

四十二字妙陀羅字字包含義理多

婆功德大法界沐恩波

四生九有同登華藏玄門八難三塗其入毘盧性海

南無華嚴海會佛菩薩三稱



大方廣佛華嚴經卷第四十三

東晉天竺三藏佛陀跋陀羅等譯

離世間品第三十三之七

佛子。菩薩摩訶薩有十種明足。何等爲十。所謂深知
佛法明足。一切法中除癡暗明足。遠離邪見明足。慧
光清淨普照諸根明足。正方便勤修精進明足。深入
菩薩真諦正趣離生明足。滅煩惱業成就盡智無生
智明足。思惟淨慧清淨天眼明足。清淨憶念念宿命

明足。具足淨地清淨。諸明除滅。諸漏漏盡。智明足。佛子。是爲菩薩摩訶薩十種明足。若菩薩摩訶薩安住此法。則得一切諸佛一切法中無上大明足。佛子。菩薩摩訶薩有十種求法。何等爲十。所謂直心求法。離於諂曲虛僞心故。精勤求法。離懈怠故。一向求法。不惜身命故。爲斷一切眾生煩惱求法。不求資生具故。爲饒益一切眾生求法。不自利故。爲深入智慧求法。不輕彼故。欲令正法常堅固求法。不樂世間。古爲愍

悼眾生求法不捨菩提心故。爲隨一切眾生所問能
答求法。悉能除滅諸疑惑故。爲具滿佛法求法不樂
餘乘故。佛子。是爲菩薩摩訶薩十種求法。若菩薩摩
訶薩安住此法。則得一切諸佛法中無上無礙智。不
由他悟。佛子。菩薩摩訶薩有十種明了法。何等爲十。
所謂隨順世間明了法。爲欲長養一切世間凡夫善
根故。無礙不壞信明了法。解法眞性信行人故。安住
法界明了法。解法行人故。遠離八邪向八正道明了

法解八人故。除滅眾結。斷生死漏。見真實諦。明了法
解。須陀洹故。觀味是患。還來受生。明了法解。斯陀含
故。乃至須臾不樂三界。不著受生。專求盡漏。明了法
解。阿那含故。六通自在。遊入解脫。隨意正受。九次第
定。諸辯明了。法解阿羅漢故。常樂寂靜。因外緣解。知
足少事。不由他悟。成就智慧。明了法解。緣覺故。成就
勝智。諸根明利。心常解脫。長養無量功德智慧。滿足
諸佛十力。四無所畏。一切佛法。明了法解。菩薩故。佛

子。是爲菩薩摩訶薩十種明了法。若菩薩摩訶薩安住此法。則得一切諸佛無上大智慧。明了法。佛子。菩薩摩訶薩有十種向法。何等爲十。所謂隨順恭敬善知識向法。覺悟諸天向法。於一切佛所常懷慚愧向法。哀念眾生不斷生死向法。究竟一切事不起虛妄心向法。遠離餘乘專修菩薩大乘向法。遠離邪道專求正道向法。降伏眾魔滅除煩惱向法。安住佛地知一切眾生諸根隨應聞法。廣爲演說向法。安住無量

無邊清淨法界向法佛子。是爲菩薩摩訶薩十種向法。若菩薩摩訶薩安住此法。則得一切諸佛無上向法。佛子。菩薩摩訶薩有十種魔。何等爲十。所謂五陰魔。貪著五陰故。煩惱魔。煩惱染故。業魔。能障礙故。心魔。自憍慢故。死魔。離受生故。天魔。起憍慢放逸故。失善根魔。心不悔故。三昧魔。昧著故。善知識魔。於彼生著心故。不知菩提正法魔。不能出生諸大願故。佛子。是爲菩薩摩訶薩十種魔。應作方便速遠離之。佛子。

菩薩摩訶薩有十種魔業。何等爲十。所謂忘失菩提心。修諸善根。是爲魔業。惡心布施。瞋心持戒。是爲魔業。棄捨惡性。懈怠眾生。輕慢厭惡。亂心無智。眾生是爲魔業。慳惜正法。訶責法器。眾生貪求利養。爲人說法。爲非器人。說深妙法。是爲魔業。不聞波羅蜜。雖聞不修行。生懈怠心。不求深妙。無上菩提。是爲魔業。遠離善知識。親近惡知識。樂求二乘。於受生處。起離欲寂靜除滅之心。是爲魔業。於菩薩所起瞋恚心。說其

過惡斷彼利養常求罪覺惡眼視之是爲魔業。誹謗正法不聞契經聞不讚歎若有法師說法不能恭敬下意自言我說是義彼說非義是爲魔業。學世間論巧於文字善於句味手筆文頌樂說二乘隱覆深法開演雜語於非器所說甚深法遠離菩提安住邪道是爲魔業。已度已安者親近恭敬而供養之未度未安者永不親近恭敬供養亦不教化是爲魔業。墮增上慢增長諸慢輕憍眾生不求正法真實智慧諸根

散亂難可化度。是爲魔業。佛子。是爲菩薩摩訶薩十種魔業。菩薩摩訶薩應速遠離正求佛業。佛子。菩薩摩訶薩有十種捨離魔業。何等爲十。所謂親近善知識。捨離魔業。不自尊舉。不自讚歎。捨離魔業。信佛深法。不生誹謗。捨離魔業。未曾忘失一切智心。捨離魔業。安住不放逸。修習甚深法。捨離魔業。安住菩薩藏。正求一切法。捨離魔業。常欲聽法。樂聞深義。心無疲倦。捨離魔業。歸依十方一切諸佛。捨離魔業。信心正。

念一切諸佛菩提樹捨離魔業。一切菩薩出生善根。皆悉不二。捨離魔業。佛子。是爲菩薩摩訶薩十種捨離魔業。若菩薩摩訶薩安住此業。則離一切諸魔業道。佛子。菩薩摩訶薩有十種見佛。何等爲十。所謂無著佛安住世間成正覺故。願佛出生故。業報佛信故。持佛隨順故。涅槃佛永度故。法界佛無處不至故。心佛安住故。三昧佛無量無著故。性佛決定故。如意佛普覆故。佛子。是爲菩薩摩訶薩十種見佛。若菩薩摩

訶薩安住此法。則能覩見無上如來佛子。菩薩摩訶薩有十種佛業。何等爲十。所謂勸化眾生。是第一佛業。隨順長養諸佛法故。夢中見佛。是第二佛業。發起過去諸善根故。多聞。是第三佛業。逮得無礙決定智。故爲悔纏所纏者。善巧方便說悔過法。是第四佛業。除滅一切諸疑悔故。若有眾生起慳心。無智心。聲聞心。緣覺心。害心。疑心。憍慢心者。現如來身相好莊嚴。化斯等類。是第五佛業。出生長養過去諸善根故。正

法難時。廣爲眾生說淨妙法。眾生聞已。便得具足陀羅尼智慧神通。如應示現。饒益眾生。是第六佛業。心力清淨故。若魔事起。種種方便。速遠離之。以虛空界等微妙音聲。亦不輕慢他人。除滅一切魔業。具足忍辱。是第七佛業。正直功德故。行無量行。不證聲聞緣覺離生聖行。諸根未熟者。不爲彼人說解脫果。但除愛本。是第八佛業。出生本願故。斷除一切生死漏縛。一切諸結。出生菩薩行。於一切眾生長養大悲深心。

信解菩薩所行。究竟涅槃。是第九佛業。不斷菩薩行。故。菩薩摩訶薩。爲自他故。求解脫道。而無厭足。離一切行。及一切法。於如來色身。無所染著。精勤專求。無礙智慧。不由他悟。令一切佛刹嚴飾清淨。決定了知。皆悉虛空。教化成熟。一切眾生。而不捨無我性。安住法界。諸通自在。具足成就一切種智。而不捨菩薩行。轉淨法輪。令一切眾生。皆得歡喜。廣爲眾生說甚深法。示現如來無量自在。而不捨菩薩身。現大涅槃。而

不捨離一切處生佛子。菩薩摩訶薩出生如是等。乃至翻覆三昧。是第十佛業。佛子。是爲菩薩摩訶薩十種佛業。若菩薩摩訶薩安住此業。則得一切諸佛無上無師大業。不由他悟。佛子。菩薩摩訶薩有十種慢業。何等爲十。所謂於尊重福田和尚阿闍梨父母沙門婆羅門所。而不尊重恭敬供養。是爲慢業。有諸法師得勝妙法。乘於大乘。深知出生死道。得陀羅尼成就。就多聞具智慧藏善能說法。而不信受恭敬供養。是

爲慢業。聽受法時若聞深法。發離欲心。歡喜無量。而不讚法師。令眾歡喜。是爲慢業。起憍慢心。自高降彼。不省己過。不調自心。是爲慢業。起計我心。見有功德。智慧者。不讚其美。見無德者。反說其善。若聞讚他。於彼人所起嫉妬心。是爲慢業。若有法師。知是法是律。是實是佛語。以憎嫉故。說言非法。非律。非實。非佛語。欲壞他信心。故是爲慢業。自敷高座。我爲法師。不應執事。不應宗敬。供養餘人。諸修梵行。尊長有德。悉應

恭敬供養於我。是爲慢業。遠離頻蹙惡眼。視彼常以
和顏等觀。眾生言常柔軟。無有麤獷離恚恨心。而於
彼法師求其過惡。是爲慢業。以我慢心。於多聞者不
往恭敬。起聞法留難。亦不諮問。何等爲善。何等不善。
何等應作。何等不應作。作何等業。長夜饒益一切眾
生。作何等行。不益眾生。作何等行。從明入明。作何等
行。從冥入冥。如是人輩。爲我心漂沒。不能得見。出要
正道。是爲慢業。起慢心故。不值諸佛難得之法。消盡

宿世所種善根。不應說而說。起訶責心。更相譏論。住如是法。應入邪道。但菩提心力。故而不永捨菩薩所行。雖不捨菩薩道。而於無量百千萬劫。尚不值佛。何況聞法。是爲慢業。佛子。是爲菩薩摩訶薩十種慢業。若菩薩摩訶薩離此慢業。則得一切諸佛十種無上清淨意業。佛子。菩薩摩訶薩有十種智業。何等爲十。所謂信解因緣不壞因果。是爲智業。不捨菩提心。常念一切佛。是爲智業。親近一切諸善知識。恭敬供養。

心無懈怠是爲智業。樂法樂義多聞無厭。專求正法。遠離邪念。修習正念。是爲智業。於一切眾生不起我心。於一切菩薩起如來想。愛樂菩薩。猶如己身。愛重正法。如惜己命。愛敬如來。如護己目。於持戒者。生諸佛想。是爲智業。離身口意諸不善業。修行清淨身口意業。歎諸賢聖。隨順菩提。是爲智業。不違緣起。離諸邪見。除滅癡暗。照一切法。是爲智業。於十回向起慈母想。於諸波羅蜜起慈父想。於巧方便起菩提想。是

爲智業。於布施淨戒多聞專求止觀功德智慧。心無
疲厭。是爲智業。若業諸佛所讚。能降眾魔。滅除煩惱
諸纏障礙。教化眾生。順智律儀。攝取正法。嚴淨佛刹。
正向通明。是爲智業。佛子。是爲菩薩摩訶薩十種智
業。若菩薩摩訶薩安住此業。則得一切諸佛出生巧
妙方便。無上智業。佛子。菩薩摩訶薩有十種魔所攝
持。何等爲十。所謂懈怠心魔所攝持。捨佛正法魔所
攝持。貪求無厭魔所攝持。專念自度魔所攝持。不發

大願魔所攝持。遠離煩惱常樂寂靜。魔所攝持。斷生死漏。魔所攝持。捨菩薩行。魔所攝持。捨教化成熟一切眾生心。魔所攝持。於正法中生疑惑心。誹謗佛法。魔所攝持。佛子。是爲菩薩摩訶薩十種魔所攝持。應速遠離。若菩薩摩訶薩能棄捨此魔所攝持。則得一切諸佛十種攝持。何等爲十。所謂佛攝持故。初發菩提心。佛攝持故。常於生生未曾忘失菩提之心。佛攝持故。覺一切魔事能悉遠離。佛攝持故。聞六波羅蜜。

如說修行。佛攝持故。知生死苦而不厭惡。佛攝持故。觀甚深法得解脫果。佛攝持故。爲眾生說聲聞緣覺。解脫而不樂彼乘。佛攝持故。觀無爲法。心不樂住。於有爲法不生二相。佛攝持故。令不相續。得寂滅相續。佛攝持故。得一切智自在而不捨眾生種姓所行。佛子。是爲菩薩摩訶薩十種佛攝持。若菩薩摩訶薩安住此持。則得一切諸佛十力所持。佛子。菩薩摩訶薩有十種法攝持。何等爲十。所謂一切行無常法所攝。

持一切行苦法所攝持。一切法無我法所攝持。寂滅
涅槃法所攝持。法從緣起。無緣則不起。法所攝持。不
正思惟故。起無明行。乃至老死。不正思惟滅故。則無
明滅。無明滅故。乃至老死滅。法所攝持。三解脫門。出
生聲聞乘。決定無諍法。出生緣覺乘。法所攝持。六波
羅蜜。四攝法。出生大乘法。法所攝持。知一切刹。一切法
一切眾生。一切世間。是佛境界。法所攝持。斷一切念。
捨一切取。離過去未來。隨順涅槃。法所攝持。佛子。是

爲菩薩摩訶薩十種法攝持。若菩薩摩訶薩安住此持。則得一切諸佛無上法持。佛子。菩薩摩訶薩住兜率天有十種事業。何等爲十。所謂菩薩摩訶薩爲欲界諸天說離欲法。縱逸自在。皆悉無常。一切快樂皆悉苦惱。勸發開導。彼諸天子發菩提心。是爲住兜率天第一所行事業。菩薩摩訶薩爲色界諸天說諸禪解脫三昧相續起。彼諸禪支有味著者。因味起身見邪見無明煩惱。爲說實智。於一切妙色起顛倒心。妄

想取淨。爲說不淨。觀察無常。勸發開導。彼諸天子發
菩提心。是爲住兜率天第二所行事業。菩薩摩訶薩
住兜率天。正受三昧。名光明莊嚴。於自身中。放大光
明。普照一切三千大千世界。隨其所應。以種種音聲
而爲說法。彼諸眾生聞說法已。皆大歡喜。起恭敬心。
命終之後。生兜率天。復爲說法。皆悉令發菩提之心。
是爲住兜率天第三所行事業。菩薩摩訶薩以無礙
淨眼。普觀十方一切兜率天菩薩摩訶薩。彼諸菩薩

亦見此菩薩摩訶薩各相見已。爲彼菩薩廣說正法。謂降神母胎。出生世間。捨家求道。往詣道場。以大莊嚴。而自莊嚴。發起過去所行。憶過去行。成就功德。不離此座。現如是等一切諸事。是爲住兜率天第四所行事業。菩薩摩訶薩住兜率天十方一切兜率天菩薩欲見此菩薩摩訶薩。恭敬供養禮拜。故皆來詣此。爾時菩薩摩訶薩欲令彼諸菩薩皆悉歡喜。滿其願。故說大法門。隨彼菩薩所住之地。所行所斷所修所。

證具足廣說。彼諸菩薩聞說法已。皆大歡喜。各還本刹所住宮殿。是爲住兜率天第五所行事業。菩薩摩訶薩住兜率天講說正法。時欲界主天魔波旬眷屬圍繞詣菩薩所。壞亂說法。爾時菩薩住金剛智所攝般若波羅蜜。巧妙方便深入智門。說甘露法。承佛神力。說如來法。皆悉降伏彼諸魔眾。時彼魔眾見菩薩如是自在神力。又聞說法。皆發阿耨多羅三藐三菩提心。是爲住兜率天第六所行事業。菩薩摩訶薩住

兜率天。知欲界天子不識苦故不樂聞法。爾時菩薩摩訶薩放大音聲告諸天子。今日菩薩摩訶薩出內眷屬。若欲見者應速詣此。聞是音已。無量億那由他天子悉往詣彼。爾時菩薩摩訶薩普現宮內一切眷屬。彼諸天子未曾聞見。見已皆大歡喜。此菩薩眷屬音樂之中。出如是聲而告之言。諸天子一切眾行皆悉無常。一切眾行皆悉大苦。一切諸法皆悉無我。寂滅涅槃。又復告言。汝等皆應修菩薩行。究竟菩提。具

一切智時諸天子聞是音已。心大恐怖。一向正求無上菩提。是爲住兜率天第七所行事業。菩薩摩訶薩住兜率天不捨兜率天所住之處。悉能往詣一切佛所。見諸如來。恭敬禮拜。供養聽法。爾時諸佛爲菩薩說甘露灌頂受記之法。一切諸明菩薩行地。欲令菩薩以一念相應慧。具足一切枝。一切種。深入一切智。是爲住兜率天第八所行事業。菩薩摩訶薩住兜率天以法界虛空界等一切恭敬供養。供養一切世界。

諸佛見此供養時無量無邊眾生發菩提心是爲住兜率天第九所行事業。菩薩摩訶薩住兜率天。出生無量無邊法門。示現一切世界中種種色種種形種種威儀種種方便。隨其所應而爲說法。欲令一切眾生悉歡喜故。是爲住兜率天第十所行事業。佛子是。爲菩薩摩訶薩住兜率天十種所行事業。若菩薩摩訶薩具足此業。則能下生人間。佛子。菩薩摩訶薩於兜率天臨命終時。有十種示現事。何等爲十。所謂菩

薩於兜率天臨命終時。於足下相輪。放大光明。名安樂莊嚴。普照三千大千世界。一切諸難惡道眾生。觸斯光者。滅一切苦。皆得安樂。爾時眾生咸作是念。今日忽有奇特大人。出現於世。是爲第一所示現事。菩薩摩訶薩於兜率天臨命終時。放眉間白毫相光。名曰覺悟。普照三千大千世界。觸彼宿世同行菩薩摩訶薩身。觸光已。咸作是念。彼菩薩摩訶薩於兜率天。今將命終。時諸菩薩卽化作無量無邊供養之具。疾

往詣彼菩薩摩訶薩所。是爲第二所示現事。菩薩摩訶薩臨命終時。於右掌中出大光明。名淨境界。悉能嚴淨三千大千世界。此世界中若有無漏諸辟支佛。覺斯光者。卽捨壽命。若不覺者。光明力故。徒置他方。餘世界中。一切諸魔及眾外道。有見眾生。悉皆徒置他方世界。除如來住持所化眾生。是爲第三所示現事。菩薩摩訶薩從其兩膝。放大光明。名曰離垢清淨莊嚴。普照最下諸天宮殿。上至淨居諸天宮殿。無不

明了。時諸天子咸作是念。今此菩薩摩訶薩於兜率天將捨壽命。時諸天子疾辦供具。香華纓絡塗香末香衣蓋幢旛。及諸音樂。詣菩薩所。恭敬供養。我等咸皆隨侍守護。從此命終。乃至示現大般涅槃。是爲第四所示現事。菩薩摩訶薩於兜率天。臨命終時。從其心中放大光明。名曰金剛淨妙莊嚴。普照一切世界。金剛力士。爾時百億金剛力士咸作是念。此是菩薩摩訶薩於兜率天將欲命終。故以此相示現我等。我

等咸當隨侍守護。乃至示現大般涅槃。是爲第五所
示現事。菩薩摩訶薩於兜率天臨命終時。從一切毛
孔放大光明。名曰分別一切眾生。普照三千大千世
界。徧觸一切諸菩薩身。觸已復觸一切諸天世人。時
諸菩薩咸作是念。我等當往詣彼恭敬供養如來。并
復教化彼諸眾生。是爲第六所示現事。菩薩摩訶薩
於兜率天臨命終時。於摩尼寶藏正法堂中。放大光
明。名善調伏。隨彼菩薩所降神處。普照王宮。彼諸菩

薩各作是念。隨此菩薩所生之處。若於其家。若於聚落。若於城邑。若閻浮提內受生之處。我當生彼。爲欲教化諸眾生。故是爲第七所示現事。菩薩摩訶薩於兜率天。臨命終時。天樓閣中。放大光明。名淨莊嚴。一切宮殿。放斯光明。照所生母。照已。彼菩薩母安隱快樂。具足成就一切功德。其母身內。自然樓閣七寶莊嚴。爲欲安處菩薩身故。是爲第八所示現事。菩薩摩訶薩於兜率天。臨命終時。放足下光明。名曰安住。若

諸天子及諸梵天。其命將終。蒙斯光故。皆得住壽。供養菩薩。從此命終。乃至示現大般涅槃。是爲第九所示現事。菩薩摩訶薩於兜率天。從其小相。放大光明。名嚴淨日眼。示現菩薩種種諸業。時有人天。或見菩薩在兜率天。或見命終。或見處胎。或見出生。或見捨家。或見成佛。或見轉法輪。或見如來大般涅槃。是爲第十所示現事。佛子。菩薩摩訶薩或於坐處。或於樓閣。或於宮殿。放如是等百萬阿僧祇光。放斯光時。顯

現無量諸菩薩業。佛子。菩薩摩訶薩具足如是等一切淨業故。從兜率天下生世間。佛子。菩薩摩訶薩有十種事故。降神母胎。何等爲十。所謂爲教化成就小心眾生故。示現處胎。不令小心眾生作如是念。菩薩自然化生。善根智慧不從行得。是爲第一事。示現處胎。又復欲令父母諸親長養宿世同行善根故。是爲第二事。示現處胎。菩薩摩訶薩初受胎時。遠離愚癡。正念思惟。除滅亂想。成就念慧。心未曾亂。是爲第三

事示現處胎。菩薩摩訶薩處母胎時常講說法。十方世界諸菩薩眾。釋梵四天王來詣菩薩。菩薩卽時廣爲說法。示現菩薩自在神力。菩薩摩訶薩具足成就無量無邊諸智慧故。現如是等奇特之事。是爲第四事。示現處胎。菩薩摩訶薩於母胎中。爲化眾生故。令彼眾生本願滿故。是爲第五事。示現處胎。菩薩摩訶薩於人中成道。應具人法受生故。是爲第六事。示現處胎。菩薩摩訶薩於母胎中。三千大千世界眾生普

見菩薩處於母胎如明鏡中見其面像。爾時大心諸天龍夜叉乾闥婆阿修羅迦樓羅緊那羅摩睺羅伽人非人等悉詣菩薩恭敬供養。是爲第七事。示現處胎。菩薩摩訶薩處母胎時。餘方世界一生補處在母胎者。悉其講說菩薩無盡智慧之藏。是爲第八事。示現處胎。菩薩摩訶薩初受胎時。正受離垢三昧。一切兜率天宮一切供養莊嚴之具。悉入母胎。三昧力故。令其母身無諸苦患。是爲第九事。示現處胎。佛子。菩

薩摩訶薩處母胎時。具足成就無量無邊功德藏。故十方世界一切供具。悉以供養一切如來。彼諸如來爲此菩薩演說無量無邊法界法門。是爲第十事。示現處胎。佛子。若菩薩摩訶薩住此法門。則能示現菩薩十種微細趣。何等爲十。所謂菩薩摩訶薩處母胎時。示現初發菩提之心。乃至甘露灌頂受記之地。在母胎中又復現處兜率陀天。在母胎中示現出生。在母胎中示現童子地。在母胎中現在宮殿色味之間。

在母胎中示現出家。在母胎中現行苦行。往詣道場。成等正覺。在母胎中現轉法輪。在母胎中示現大般涅槃。在母胎中示現微細諸法。一切菩薩行。一切如來自在神力無量行門。佛子。是爲菩薩摩訶薩十種微細趣。若菩薩摩訶薩安住此趣。則得一切諸佛無上智慧。大微細趣。佛子。菩薩摩訶薩有十種生。何等爲十。所謂離愚癡生。放大光明網。普照三千大千世界。除滅一切未來世最後身生。不生生。知三界諸

劫悉如幻生。於十方世界普現身生。具足一切智身。生放一切如來光明普照覺悟一切眾生。正受大智自在諸禪三昧身生。佛子。菩薩生時。一切佛刹六種震動。一切眾生皆得解脫。一切惡道皆悉除滅。映蔽一切諸魔光明。悉如聚墨。無量菩薩普來雲集。佛子。是爲菩薩摩訶薩十種生。爲欲化度眾生類故。示現是生。佛子。菩薩摩訶薩有十種大莊嚴而自莊嚴。何等爲十。所謂菩薩摩訶薩作如是念。一切世間沒

五欲泥除我一人無能濟彼如是知故發大莊嚴而
自莊嚴煩惱愚癡覆眾生眼皆悉盲瞽我今智慧自
在當普開導眾生慧眼悉令清淨發大莊嚴而自莊
嚴我今因此假名身故得如來無上清淨法身充滿
三世發大莊嚴而自莊嚴菩薩摩訶薩以無礙淨眼
悉徧觀察十方一切諸梵天處乃至大自在天處是
等眾生皆自謂我成就自在智慧之力菩薩悉能摧
滅彼我慢心發大莊嚴而自莊嚴菩薩摩訶薩見諸

眾生於過去世種諸善根。今欲退沒。我今還令彼諸
眾生住不退地。發大莊嚴而自莊嚴。欲令眾生種少
善根。得無量果。發大莊嚴而自莊嚴。見佛無量自在
神力。發大莊嚴而自莊嚴。觀見過去同行菩薩。染著
餘事。不成正覺。發大莊嚴而自莊嚴。菩薩摩訶薩見
諸天人疲頓厭倦。退正希望。發大莊嚴而自莊嚴。菩
薩摩訶薩爲一切如來光明觸故。長養一切大正希
望。發大莊嚴而自莊嚴。佛子。是爲菩薩摩訶薩十種

大莊嚴爲教化眾生故發此莊嚴而自莊嚴。佛子。菩薩摩訶薩有十種事故遊行七步。何等爲十。所謂現菩薩力故遊行七步。現七寶故遊行七步。滿地神願故遊行七步。現超出三界相故遊行七步。現大象王牛王師子王最勝行故遊行七步。現金剛地相故遊行七步。欲與眾生力故遊行七步。現七覺寶相故遊行七步。具足成就一切佛法不由他悟故遊行七步。欲自稱我於世最勝無倫匹故遊行七步。佛子。是爲

菩薩摩訶薩十種事故。遊行七步。教化眾生。故作是示現。佛子。菩薩摩訶薩有十種事故。現童子地。何等爲十。所謂書數。算計。刻印。方便。現此業故。現童子地。現乘象馬車。乘弓射諸武藝故。現童子地。欲學一切世間巧妙談論。諸嬉戲故。現童子地。離身口意一切惡業故。現童子地。現正向般涅槃。正受三昧。充滿一切諸世界故。現童子地。現菩薩力過天人龍夜叉乾闥婆阿修羅迦樓羅緊那羅摩睺羅伽釋梵四天王

故現童子地。現殊妙色。出過一切釋梵四天王故。現童子地。欲令眾生遠離五欲。常樂正法故。現童子地。爲現尊重正法供養一切世界諸如來故。現童子地。常樂正法。普現一切受持正法故。現童子地。佛子。是爲菩薩摩訶薩十種事故。現童子地。佛子。菩薩摩訶薩現童子地已。有十種事故。現處中宮。何等爲十。所謂令同修行者增長善根故。現處中宮。欲明菩薩諸善根故。現處中宮。爲著樂天人故。現處中宮。於五濁

世隨應化故現處中宮。於深宮內正受三昧。欲明菩薩功德力故現處中宮。欲令宿世同行眾生滿本願故現處中宮。欲令父母親屬滿本願故現處中宮。欲以伎樂出妙法音供養一切佛故現處中宮。菩薩摩訶薩於其宮內入甚深三昧成等正覺。乃至示現大般涅槃故現處中宮。隨順守護法故現處中宮。佛子是。是為菩薩摩訶薩十種事故。現處中宮。以此事故。最後生菩薩示現出家。佛子。菩薩摩訶薩有十種事故。

示現出家。何等爲十。所謂欲令眾生厭離家故。示現出家。爲著家眾生故。示現出家。欲現隨順諸賢聖道故。示現出家。欲宣揚讚歎出家法故。示現出家。欲令眾生離二見故。示現出家。欲令眾生離欲樂我樂故。示現出家。欲現出三界相故。示現出家。欲顯自在不由他悟故。示現出家。欲隨順如來十力四無畏故。示現出家。一切最後生菩薩法應爾故。示現出家。佛子。是爲菩薩摩訶薩十種事故。示現出家。爲化眾生故。

佛子。菩薩摩訶薩爲十種事故。示現苦行。何等爲十。
所謂菩薩摩訶薩欲教化成熟小心眾生故。示現苦
行。爲拔著邪見眾生故。示現苦行。爲無業報邪見眾
生欲令知業報故。示現苦行。爲隨順五濁世界眾生
故。示現苦行。爲懈怠眾生故。示現苦行。欲令眾生樂
求法故。示現苦行。爲著欲樂我樂眾生故。示現苦行。
爲顯菩薩殊勝行故。示現苦行。欲令未來眾生發精
進故。示現苦行。諸天世人。諸根未熟。待時熟故。示現

苦行佛子。是爲菩薩摩訶薩。爲十種事故。示現苦行。
大方廣佛華嚴經卷第四十三

誦補闕真言

南無三滿哆。沒馱喃。阿鉢囉帝。喝多折。折捺彌。唵。雞
彌雞彌。怛塔葛塔喃。末瓦山。斫鉢囉帝。烏怛摩怛摩。
怛塔葛塔喃。末瓦吽。發莎訶。舉字母讚
華嚴字母。眾藝親宣。善財童子得真傳。秘密義幽玄。
功德無邊。唱誦利人天。

阿上聲
後同○快鞞翁烏爇哀醫因安音諳阿

多○當登東都刀驢低顛單○耽兜多

波○幫崩○逋褒碩卑賓般○○○波

時普願法界眾生入般若波羅蜜門


四十二字妙陀羅字字包含義理多

婆功德大法界沐恩波

四生九有同登華藏玄門八難三塗共入毘盧性海

南無華嚴海會佛菩薩

三稱



大方廣佛華嚴經卷第四十四

東晉天竺三藏佛陀跋陀羅等譯

離世間品第三十三之八

佛子。菩薩摩訶薩有十種事故。往詣道場。何等爲十。所謂欲普照一切世界故。往詣道場。爲震動一切世界故。往詣道場。欲於一切世界普現身故。往詣道場。爲覺悟一切菩薩一切眾生一切同行故。往詣道場。爲示現道場莊嚴事故。往詣道場。爲隨應受化示現

莊嚴菩提樹故。往詣道場。欲對見十方世界一切佛
故。往詣道場。欲於舉足下足念念悉入無量正受諸
三昧門。成等正覺故。往詣道場。爲受一切天龍夜叉
乾闥婆阿修羅迦樓羅緊那羅摩睺羅伽乃至釋梵
四天王等恭敬供養。各不相知故。往詣道場。欲以無
礙智眼普觀一切世界。正念一切佛。於一切刹現成
佛故。往詣道場。佛子。是爲菩薩摩訶薩十種事故。往
詣道場。爲教化眾生故。佛子。菩薩摩訶薩有十種事

故坐於道場。何等爲十。所謂種種震動一切刹故。坐於道場。普照一切諸世界故。坐於道場。除滅一切諸惡道故。坐於道場。變一切刹爲金剛故。坐於道場。觀一切佛師子吼故。坐於道場。離一切虛妄心。淨如虛空故。坐於道場。示現隨順淨身威儀故。坐於道場。隨順圓滿金剛三昧故。坐於道場。受一切佛清淨坐處故。坐於道場。自善根力悉能受持一切眾生故。坐於道場。佛子。是爲菩薩摩訶薩十種事故。坐於道場。佛

子。菩薩摩訶薩坐道場時。有十種奇特未曾有法。何等爲十。所謂菩薩摩訶薩坐道場時。十方世界一切諸佛。觀此菩薩。咸舉右手。讚言善哉善哉。無上導師。是一奇特未曾有法。菩薩摩訶薩坐道場時。一切如來應供等正覺。皆悉護持。是二奇特未曾有法。菩薩摩訶薩坐道場時。宿世同行菩薩。悉來雲集。以種種莊嚴具恭敬供養。是三奇特未曾有法。菩薩摩訶薩坐道場時。十方一切世界草木叢林非眾生類。皆悉

曲躬歸向道場。是四奇特。未曾有法。菩薩摩訶薩坐道場時。正受三昧。名善知法界。得此三昧故。究竟菩薩一切諸行。是五奇特。未曾有法。菩薩摩訶薩坐道場時。得陀羅尼。名曰離垢勝妙海藏。菩薩摩訶薩住此陀羅尼故。一切諸佛降甘露法雨。此菩薩是六奇特。未曾有法。菩薩摩訶薩坐道場時。以神通力恭敬供養一切諸佛。是七奇特。未曾有法。菩薩摩訶薩坐道場時。入於無上智慧法門。善巧方便。悉知一切眾

生諸根。是八奇特。未曾有法。菩薩摩訶薩坐道場時。正受三昧。名曰善覺。菩薩摩訶薩入此定已。得淨法身。滿虛空界。一切三世。是九奇特。未曾有法。菩薩摩訶薩坐道場時。清淨身業。攝取三世無礙智慧。普照一切。是十奇特。未曾有法。佛子。是爲菩薩摩訶薩坐道場時。得十種奇特。未曾有法。佛子。菩薩摩訶薩坐道場時。有十種義故。示現降魔。何等爲十。所謂五濁惡世眾生。樂相征伐。欲顯菩薩功德力故。示現降魔。

悉滅天人諸疑惑故。示現降魔。爲欲化度魔眷屬故。
示現降魔。諸天世人樂征伐者。令集受化故。示現降
魔。集天人已。顯現菩薩功德之力。不可破壞。調伏眾
生故。示現降魔。發起一切眾生力故。示現降魔。哀愍
未來一切眾生故。示現降魔。乃至道場現有魔事。悉
能超出眾魔境故。示現降魔。顯現煩惱力勢羸劣。大
悲善根勢強盛故。示現降魔。順五濁世諸眾生故。示
現降魔。佛子。是爲菩薩摩訶薩十種義故。坐道場時

示現降魔。佛子。菩薩摩訶薩有十種覺如來力。何等爲十。所謂超出一切眾魔事業。除滅煩惱。究竟一切菩薩所行。覺如來力。於一切菩薩三昧而得自在。覺如來力。具足成就一切菩薩諸禪三昧。覺如來力。滿足一切諸白淨法。覺如來力。分別善法調伏世間法。覺如來力。以淨法身滿一切刹。覺如來力。所出淨音。悉與一切眾生心等。覺如來力。悉能受持一切佛法。覺如來力。得與三世如來身口意等於一念中。知三

世法覺如來力。得善覺三昧。具佛十力。所謂是處非處。智乃至漏盡。智覺如來力。佛子。是爲菩薩摩訶薩十種覺如來力。菩薩摩訶薩具此力故。得名如來。佛子。如是得成如來應供等正覺已。能轉十行清淨法輪。何等爲十。一者具足清淨。四無所畏。二者出生四辯。淨妙音聲。三者明了四諦。四者隨順諸佛無礙法門。五者清淨等心。悉能普覆一切眾生。六者所說不虛。決定濟度眾生苦際。七者宿世大悲所持。八者以

妙法音充滿世界一切眾生無不聞知。九者阿僧祇劫常說正法。未曾暫息。十者轉諸根力覺意解脫諸禪三昧相續不絕。佛子。如來應供等正覺轉如是十行等無量行法輪。佛子。如來應供等正覺清淨法輪。因十種白淨法故。轉入眾生心。出生無相。決定不虛。何等爲十。所謂過去願力故。大悲所持故。不捨眾生故。智慧自在。隨其所應爲說法故。未曾失時故。隨彼法器不增減故。決定了知三世智故。身行最勝故。口

行無虛故。智行隨音聲。悉覺悟故。佛子。是爲因十種
白淨法故。能轉法輪入眾生心。出生無相。決定不虛。
佛子。如來應供等正覺。究竟佛事已。有十種義。示現
大般涅槃。何等爲十。所謂明一切行。悉無常故。明一
切有爲。非安隱故。明般涅槃趣。最安隱故。明般涅槃
遠離一切諸怖畏故。以諸天人樂著色身。明色身無
常。是磨滅法。令求常住淨法身故。明無常力強。不可
轉故。明有爲法不隨愛行。不自在故。明三界法。悉如

壞器無堅牢故。明般涅槃最爲真實。不可壞故。明般
涅槃遠離生死。非起滅故。佛子。以此十種義故。如來
應供等正覺。示現大般涅槃。佛子。一切如來應供等
正覺法皆如是。所願已成。已轉法輪。所應度者皆悉
已度。已與菩薩受尊記號。一切佛事皆悉究竟。安住
不變。示現大般涅槃。佛子。是爲如來應供等正覺以
十義故。示現大般涅槃。佛子。是爲菩薩摩訶薩清淨
勝行大妙法門。諸佛所說無量深義。能令一切諸有

智者皆悉歡喜。究竟一切菩薩大願。不斷所行。佛子。若有眾生聞此經者。信心清淨。不起誹謗。如說修行。彼諸眾生。速成阿耨多羅三藐三菩提。何以故。菩薩摩訶薩。如說行。故。佛子。是故菩薩摩訶薩。應如說行。一心敬信受持此經。佛子。此經出生一切菩薩諸行。功德深妙。義華深入。智慧攝一切法門。遠離世間聲聞緣覺。一切眾生所不共法。悉能普照一切法門。長養善根。度脫眾生。是故菩薩摩訶薩。應一心聽受護

持此經。若菩薩摩訶薩受持此經。則能出生一切諸願。以少方便。疾得阿耨多羅三藐三菩提。說此出生一切菩薩諸行功德深妙義華。深入智慧攝一切法門。遠離世間聲聞緣覺。一切眾生所不共法。悉能普照一切法門。長養善根。度脫眾生。經時佛神力故。此經法如是故。十方無量阿僧祇世界六種震動。大光普照。爾時十方諸佛。面對觀視普賢菩薩。歡喜讚言。善哉佛子。乃能說此出生一切菩薩諸行功德深妙。

義華。深入智慧攝一切法門。遠離世間聲聞緣覺。一切眾生所不共法。悉能普照一切法門。長養善根。度脫眾生。經佛子。汝已善學此法。善知此法。快說此法。我等諸佛亦說此法。一切諸佛亦復如是。是故佛子。我等悉共守護此經。令未來世菩薩未聞者聞。爾時普賢菩薩承佛神力。觀察十方一切大眾一切法界。以偈頌曰。

無量無數劫 勤修諸苦行 供養無量佛

生此眞佛子 化度無量眾 安立無上道
菩薩無等行 我說善諦聽 供養無量佛
皆悉無染著 化度一切眾 不起眾生想
常求佛功德 其心無所依 說彼勝妙行
令眾悉歡喜 降伏一切魔 滅三界煩惱
已具聖功德 示現童子地 滅惡煩惱癡
其心常寂然 示現無量行 我說彼功德
遠離一切惡 究竟到彼岸 無量眾生中

枯槁無量身	樂修悲喜捨	具足慧方便	一心善諦聽	欲令彼解脫	無量苦逼迫	說彼妙功德	種種現變化
常正求菩提	我說彼功德	大慈度眾生	施戒忍精進	一向求菩提	流轉於生死	令眾悉歡喜	知心生住滅
不惜其壽命	仁等當諦聽	無量無數劫	禪定得自在	略說彼功德	煩惱火熾然	見三有眾生	示現一切事

究竟無上道 常爲利眾生 不求自安樂
慈悲心牟尼 我說彼勝行 無量無數劫
說少分不盡 虛空可度量 海水可滴數
菩薩功德海 無可爲譬喻 饒益眾生故
略說其少分 持眾生善根 長養白淨法
遠離憍慢心 求法無厭足 令眾得安止
長養智慧樹 菩薩心如地 饒益一切眾
柔軟慈心根 無上大悲莖 功德葉智華

持戒爲妙香	如來淨慧光	開敷菩薩華
不著有爲水	普令眾生喜	直心爲種子
慈悲爲根芽	智慧方便莖	五度爲枝條
禪業諸明華	一切智爲果	法樹神力鳥
普覆三世間	真實諦爲足	白淨法爲身
正念爲頸項	智首解脫頂	慈悲明淨眼
實義幽谷出	菩薩法師子	調伏一切魔
生死爲曠野	煩惱諸惡道	邊見爲賊難

癡盲迷正路 菩薩大導師 見彼迷冥者
開示其正道 引至安隱處 貪恚諸煩惱
常惱害眾生 無量眾苦患 長夜而逼切
菩薩見彼苦 爲發大悲心 具說八萬四
對治濟度之 菩薩爲法王 正道化眾生
遠惡修眾善 一向求菩提 一切諸佛所
受自在智記 廣施賢聖珍 令具七覺寶
清淨戒爲轂 精進以爲輻 三昧正受輞

三轉淨法輪	清淨心爲盾	明利智慧劍
摧滅諸煩惱	外道眾魔怨	甚深智慧海
正法一味水	禪覺寶充滿	一切莫能知
直心淨彌廣	一切智爲潮	菩薩智慧海
演說不可盡	世間高無上	於彼無所著
禪明智慧山	堅正不傾動	若有親近者
疾得同彼慧	住智須彌頂	普觀一切世
深心如金剛	一切悉堅固	三寶一切智

信心不可壞 降伏一切魔 除滅諸煩惱
安住無所畏 度脫諸羣生 興起大慈雲
普覆於一切 明曜大悲電 雷震法洪音
四辯澍法雨 入正甘露水 除滅煩惱火
安住一切義 白淨法爲城 智慧爲牆壁
無上智樓閣 慚愧爲深塹 三空解脫門
正念爲防守 四道爲正路 遊之出三界
建無上法幢 摧滅一切魔 法身金翅鳥

四如意爲足	慈悲明淨眼	住一切智樹
菩薩金翅王	生死大海中	搏撮天人龍
安置涅槃岸	淨戒圓滿日	清淨智光明
神足爲疾行	消竭愛欲水	覺長夜眾生
長養根力藥	菩薩明淨日	一切無不照
圓滿法界月	眾生觀無厭	映蔽於二乘
小智螢火光	菩薩清涼月	遊於畢竟空
垂光照三界	心法無不現	自在諸法王

功德色巖身 方便淨智眼 安住勝妙法
相好莊嚴身 一切觀無厭 彼法自在王
如法治眾生 除滅欲煩惱 超出於三界
常樂勤修習 慈悲喜捨法 菩薩大梵王
普現種種身 演出淨妙音 三界無不聞
遠離一切行 境界常清淨 逮得不退智
具足法自在 永離二乘道 諸佛所授記
乘於無上乘 究竟一切智 心淨如虛空

究竟無上行	究竟白淨行	永離一切有
安住如來處	亦令眾生然	行於世間事
菩薩功德華	菩薩慧彌廣	其心無所依
	無量方便地	
	消滅熾煩惱	
	智慧猛盛火	
	饒益諸羣生	
	風馳遊十方	
	廣作諸佛事	
	除滅眾貧苦	
	智慧如金剛	
	無量德莊嚴	
	悉令眾生喜	
	摧滅諸邪見	
	燒盡煩惱習	
	菩薩如意寶	

七覺令開敷	諸願爲寶鬘	嚴飾世間頂
菩薩淨戒香	遠離諸惡戒	以此淨戒香
塗熏一切眾	菩薩無上蓋	普覆諸世間
建立智慧幢	摧滅眾魔幢	菩薩莊嚴行
淨妙智慧旛	慚愧功德衣	普覆一切眾
菩薩無上乘	乘之出三界	其心善調順
安住寶象王	菩薩大龍王	具足自在力
普降甘露法	澤潤諸羣生	菩薩甚難值

猶如優曇華	降伏一切魔	除滅諸煩惱
佛所轉法輪	彼能隨順轉	慧燈除眾暗
普令見正道	菩薩功德河	隨順正道流
常爲生死橋	度人無休息	菩薩正法船
汎遊諸願海	智慧悉成滿	度人到彼岸
菩薩淨園林	實樂樂眾生	正法解脫華
明淨智宮殿	菩薩雪山頂	出生藥樹王
除滅煩惱病	悉令一切喜	菩薩等如來

覺悟諸眾生 除滅愚癡暗 得成等正覺
最勝所從來 菩薩如是來 逮得平等智
究竟到彼岸 菩薩大導師 教化諸羣生
自然成正覺 一切智境界 具足無量力
一切莫能壞 安住無所畏 知法了眾生
乃至色界中 所有諸眾生 一切語言音
皆悉能隨順 過色至無色 現彼一切事
一切諸眾生 說之不能盡 菩薩悉成就

如是等功德	解了性非性	所有無所有
具足真實智	除滅一切縛	究竟一切智
其心無所著	說彼甚深行	令眾悉歡喜
了達一切法	皆悉如幻化	發起方便悲
一切佛護持	出生智化門	普現無量事
仁等當諦聽	菩薩諸功德	一身無邊際
普現無量身	非心非心境	應現一切眾
出於一妙音	究竟語言法	悉攝眾生類

一切諸言音	遠離煩惱身	隨應示現身
無量方便身	一切音說法	其心常寂滅
清淨如虛空	以心莊嚴刹	示現一切眾
示現種種身	於彼無所著	遠離一切生
亦不壞彼因	隨順一切趣	受生無所著
了身如虛空	隨其所應現	菩薩現如是
無量無邊事	恭敬供養彼	最勝兩足尊
塗香末香華	幢蓋幡音樂	無上供養具

直心供諸佛	不離一佛會	普在諸佛所
善巧能問難	聽受深妙法	聞此正法故
逮得諸三昧	一一三昧中	生無量定門
又復能普現	無量三昧起	智慧巧方便
究竟到彼岸	覺悟一切法	皆悉如幻化
示現種種身	出生無量音	入眾生想網
其心無染著	或時現眾生	隨順世間義
或示菩提行	無量無有邊	布施持淨戒

忍辱勤精進	定慧四無量	修行四攝法
或現行成滿	或得無生忍	或受灌頂記
或一生補處	或現聲聞乘	或復現緣覺
無量刹涅槃	不捨菩薩行	或現爲帝釋
或現梵天王	或天女圍繞	或復獨宴默
或現比丘像	淨戒調諸根	或現自在王
或現入法網	或現巧術女	或現修苦行
或現在五欲	或復在禪定	或現般涅槃

或復現受生	或現童子身	或復現衰老
若有思議者	迷亂心發狂	或在天宮殿
或現終下生	或現處母胎	成佛轉法輪
或復現出生	或現般涅槃	或現童子術
或復現出家	或現坐道場	或成無上道
或復示現轉	自在正法輪	或現求正法
或現爲佛身	充滿無量刹	不退菩薩行
深入無量劫	究竟到彼岸	無量劫一念

一念無量劫 一切劫非劫 示現眾生劫
無來無積聚 示現諸劫事 於一微塵中
普見一切佛 一切諸羣生 無處不有佛
一切諸佛刹 及眾生境界 悉能分別知
一切諸法印 一切劫可盡 法印無窮已
如是知眾生 無量無有邊 彼一眾生有
無量百千萬 那由他等身 因緣亦如是
如彼一眾生 一切亦復然 如是究竟知

亦令一切學	悉知眾生根	上中下不同
諸根常流轉	知是器非器	一根一切根
展轉相依持	菩薩微細智	皆悉分別知
亦知諸欲性	種種煩惱垢	了過去心行
未來今現在	悉知眾生行	究竟到彼岸
知行無所行	爲眾說妙法	如是知心行
染汙及清淨	菩薩一念中	逮得一切智
深入如來心	究竟難思議	一念悉能知

諸佛無上智 究竟神力智 具足諸通明
能於一念中 悉詣十方刹 如是疾遊行
無量無數劫 不離本坐處 安住甚深法
猶如工幻師 種種現形色 非色非無色
幻化無所有 菩薩亦如是 深知廣方便
示現眾變化 充滿一切世 譬如明淨日
出現於世間 悉能除眾冥 一切靡不照
菩薩智慧日 明淨甚圓滿 出淨心境界

普照一切法	猶如人夢中	造作種種事
無量劫可盡	夢性無窮盡	菩薩於一念
示現夢等法	無量劫可盡	智慧無終極
常樂居山澤	遠離世間語	究竟語言道
其心無染著	菩薩悉了知	諸法真實性
普說眾生音	不起虛妄想	譬如春月時
眾生見燄氣	愚者謂爲水	尋之增渴愛
菩薩如是見	眾生煩惱覆	如燄增渴愛

一向求解脫 知眾生非實 而更增大悲
觀色如聚沫 受如水上泡 想如春時燄
眾生如芭蕉 心如工幻師 示現種種事
善分別五陰 其心無所著 諸人悉空寂
遠離自在事 諸界無實性 示眾生界分
第一真實諦 決定寂滅性 廣演分別法
而心不染著 菩薩知五陰 無有去來今
因由煩惱業 轉此三苦輪 演說緣起法

非有亦非無	深解真實義	於彼無所著
菩薩淨智慧	解說三世法	示現諸羣生
皆悉是一念	欲色無色界	示現眾生事
三乘戒解脫	究竟一切智	了知處非處
知業知諸根	欲性諸煩惱	一切至處道
宿命智天眼	除滅諸煩惱	知佛十種力
而猶未究竟	隨順諸佛法	深解諸法空
悉滅眾煩惱	而不盡諸漏	廣入甚深道

教化諸羣生 佛子住無畏 不捨菩薩行
無謬無漏失 亦不捨正念 精進欲三昧
智慧無損減 三種常清淨 明達於三世
大慈念眾生 一切無障礙 深入諸法門
具足如是行 我說其少分 莊嚴功德義
無量無數劫 說之不可盡 我所說少分
如大地一塵 常依如來智 而亦無所依
常修奇特想 大悲堅強故 安住清淨戒

常勤修精進	教化諸羣生	受真佛子記
究竟佛功德	如刹知眾生	分別三世劫
其心無疲倦	具陀羅尼力	深解真實義
思惟無等法	逮得無上道	一切妙功德
發願求菩提	慈悲因緣力	令菩提淨勝
具足波羅蜜	隨順善究竟	決定諸智力
覺悟無上道	成就方便智	樂說甚深法
隨順常守護	逮得法王處	安住勝妙法

於彼無所著 出生智慧華 覺悟勝菩提
住持一切劫 菩薩得正望 安住甚深法
除滅眾生疑 修習甚深智 善能分別智
究竟定慧境 覺悟一切智 智入諸解脫
究竟到彼岸 具足諸通明 離垢清涼園
具足白淨法 示現種種行 普現莊嚴法
皆悉不可議 善知眾生心 能說合究竟
清淨菩提印 智光照一切 一切莫能稱

遠離懈怠法

安住如山王

具功德智海

金剛妙寶法

安住大莊嚴

究竟諸大事

一切莫能壞

得授菩提記

安住廣大心

得佛無盡藏

覺悟一切法

世智常自在

遊戲諸神通

一切法境界

自在無障礙

身願行自在

智慧亦自在

無量億自在

示現於一切

具足諸自在

遊戲諸通力

深入佛境界

一切莫能壞

點慧所莊嚴

無畏不共法	修行佛子業	遠離一切惡
清淨身身業	清淨口口業	諸佛守護故
成辦十大事	心心所起住	顯現無上事
安住諸根定	逮得最勝根	清淨正直心
遠離諸諂曲	深入眾生性	示現種種事
除滅煩惱習	究竟無上行	具足深智慧
逮得一切智	遠離一切惡	方便趣寂滅
出生功德道	善學一切學	無量道心境

修習無所著	安住深智慧	示現道莊嚴
手足及心腹	無上智慧藏	其心如金剛
智慧爲器仗	智慧觀察頂	深入菩提行
清淨戒爲鼻	除滅諸熾然	四辯廣長舌
無處不至身	淨妙智慧心	諸善行爲行
道場安隱住	師子牀爲座	梵住爲安臥
無礙第一義	觀察善逝智	普照於一切
徧觀眾生行	種種妙功德	以此爲奮迅

離貪爲淨施	不慢清淨戒	不動爲淨忍
不轉淨精進	自在爲淨禪	不行愚癡智
虛空慈普救	不憂惱爲悲	清淨法爲喜
離諸煩惱捨	寂靜爲深義	境界爲正法
回向功德具	智具如利劍	普照爲眾明
聞法無厭足	是爲正求法	不惜身壽命
是爲明正法	隨順諸佛教	除滅諸魔道
清淨正直心	攝取諸佛業	遠離眾魔業

增長白淨法	得成無上道	普放無量光	復現處深宮	獨稱我最勝	降神入母胎	究竟得法持	長養諸智慧
現大般涅槃	現轉淨法輪	覺悟諸羣生	現出家學道	示現行七步	示現微細趣	住無住智慧	遠離魔所持
菩薩修諸行	示現如來地	降伏一切魔	莊嚴詣道場	現爲童子地	又復現出生	作業已命終	安住諸佛持

無量無有邊 如我向所說 略舉其少分
無量劫修習 令眾住菩提 眾生諸法行
於彼無染著 如是具足行 成就力自在
以無量諸刹 安置一毛道 常持無量刹
徧遊諸世界 還置於本處 眾生無恐怖
菩薩以一切 嚴淨諸佛刹 安置一毛孔
眾生無不見 能以一毛孔 悉受一切海
大海不增減 眾生無燒害 示現如是等

一切諸事相	無量金剛山	手摩爲微塵
以此一切塵	徧散諸佛刹	復末塵下刹
徧布餘世界	一切塵可知	智慧不可盡
於一毛孔中	放演淨光明	普照一切世
悉蔽日月光	珠火天神光	隱沒悉不現
除滅惡道苦	爲說無上法	菩薩一言音
出生一切音	一切諸眾生	無不悉聞者
以聞此法音	皆得大歡喜	具足廣宣暢

諸佛所說法	過去一切劫	安置未來今
未來現在劫	回置過去世	十方一切刹
皆悉現成壞	以一切眾生	安置一毛道
過去及現在	一切諸如來	具足自在力
悉於身中現	深知變化法	善能隨所應
普現無量身	於彼無所著	帝釋梵王身
四天大王身	諸天清淨身	一切眾生身
聲聞緣覺身	如來清淨身	普現一切身

善修菩薩行	現入眾想網	上中下諸品
一切智所持	普現佛及刹	具足深智慧
除滅諸想網	示現菩薩行	究竟成菩提
示現如是等	無量自在力	一切無不現
舉世莫能知	示現無所現	究竟無有上
隨順應眾生	爲說決定行	淨身等虛空
妙音滿世間	淨戒爲塗香	慚愧衣普覆
離垢正法繒	一切智摩尼	功德莊嚴身

拜署無上王
波羅蜜金輪
諸通爲象寶
神足爲馬寶
淨慧無上珠
妙行爲女寶
四攝寶藏臣
方便主兵寶
無上轉輪王
勝妙三昧城
空觀妙宮殿
慈悲大莊嚴
智慧爲利劍
堅強正念弓
明利根爲箭
諸佛護持蓋
建立智慧幢
直入諸魔軍
忍力悉摧滅
陀羅尼平地
淨妙行流水
深智爲涌泉
淨慧清涼林
空爲澄淨池

七覺妙華敷	神足以莊嚴	三昧爲娛樂
法門爲歌頌	思惟正法女	甘露法之食
解脫味爲漿	調御順三乘	遊戲無上園
此等諸勝行	及餘無上法	無量劫修學
其心無疲倦	供養一切佛	嚴淨一切刹
普令一切眾	安住一切智	一切刹微塵
悉可知其數	一切虛空界	皆悉可度量
一切眾生心	念念可知數	佛子諸功德

說之不可盡 欲具此功德 及餘勝妙法

欲滅一切苦 安樂諸羣生 欲與諸如來

身口意齊等 應發金剛心 究竟此勝行

誦補闕真言

南無三滿哆。沒馱喃。阿鉢囉帝。喝多折。折捺彌。唵。雞
彌。雞彌。怛塔葛塔喃。末瓦山。矴鉢囉帝。烏怛摩怛摩。
怛塔葛塔喃。末瓦吽。發莎訶。 舉字母讚
華嚴字母。眾藝親宣。善財童子得真傳。秘密義幽玄。
功德無邊。唱誦利人天。

左○臧增宗租遭災賫津錢浸簪呶左

那○囊能濃奴獠痲泥年難誑南窈那

邏○郎楞籠盧勞來黎隣闌林藍婁邏

時普願法界眾生入般若波羅蜜門



四十二字妙陀羅。字字包含義理多。

婆。功德大。法界沐恩波。

四生九有。同登華藏玄門。八難三塗。共入毘盧性海。

南無華嚴海會佛菩薩

三稱



大方廣佛華嚴經卷第四十五

東晉天竺三藏佛陀跋陀羅等譯

入法界品第三十四之一

爾時佛在舍衛城祇樹給孤獨園大莊嚴重閣講堂。與五百菩薩摩訶薩俱。普賢菩薩文殊師利菩薩而爲上首。夜光幢菩薩。須彌山幢菩薩。寶幢菩薩。無礙幢菩薩。華幢菩薩。離垢幢菩薩。日光幢菩薩。正幢菩薩。離塵幢菩薩。明淨幢菩薩。大地端嚴菩薩。寶端嚴

菩薩。大慧。端嚴菩薩。金剛智。端嚴菩薩。離垢。端嚴菩薩。法日。端嚴菩薩。功德山。端嚴菩薩。智光。端嚴菩薩。普妙德。端嚴菩薩。大地藏菩薩。虛空藏菩薩。蓮華藏菩薩。寶藏菩薩。日藏菩薩。淨德藏菩薩。法印藏菩薩。明淨藏菩薩。齊藏菩薩。蓮華藏菩薩。善德眼菩薩。普見眼菩薩。清淨眼菩薩。離垢眼菩薩。無礙眼菩薩。普眼菩薩。善觀眼菩薩。青蓮華眼菩薩。金剛眼菩薩。寶眼菩薩。虛空眼菩薩。善眼菩薩。天冠菩薩。普照法界。

慧天冠菩薩。道場天冠菩薩。普照十方天冠菩薩。生
諸佛藏天冠菩薩。一切世間最上天冠菩薩。明淨天
冠菩薩。無量寶天冠菩薩。受一切如來師子座天冠
菩薩。普照法界虛空天冠菩薩。梵王周羅菩薩。龍王
周羅菩薩。一切佛化光明周羅菩薩。道場周羅菩薩。
一切願海音摩尼寶王周羅菩薩。出生如來光眾寶
自在周羅菩薩。莊嚴一切虛空寶摩尼寶王周羅菩
薩。一切如來自在光幢摩尼王網普覆周羅菩薩。一

切佛音轉法輪周羅菩薩。三世慧音周羅菩薩。大光菩薩。離垢光菩薩。寶光菩薩。離塵光菩薩。夜光菩薩。法光菩薩。寂靜光菩薩。日光菩薩。自在光菩薩。天光菩薩。功德幢菩薩。智幢菩薩。法幢菩薩。諸通幢菩薩。光幢菩薩。華幢菩薩。摩尼幢菩薩。菩提幢菩薩。梵幢菩薩。普光幢菩薩。梵音菩薩。海音菩薩。大地音菩薩。世主音菩薩。山相擊音菩薩。充滿一切法界音菩薩。一切法海雷音菩薩。降伏一切魔音菩薩。大悲方便

雲雷音菩薩。滅一切苦。安慰音菩薩。法上菩薩。勝上菩薩。智上菩薩。功德須彌山上菩薩。功德珊瑚上菩薩。稱上菩薩。普光上菩薩。大慈上菩薩。智海上菩薩。如來性起上菩薩。光妙德菩薩。勝妙德菩薩。上妙德菩薩。明淨妙德菩薩。法妙德菩薩。月妙德菩薩。虛空妙德菩薩。寶妙德菩薩。妙德幢菩薩。智妙德菩薩。娑羅林王菩薩。法王菩薩。眾生王菩薩。梵王菩薩。山王菩薩。寶王菩薩。離垢王菩薩。寂靜王菩薩。不動王菩薩。

薩。仙王菩薩。勝王菩薩。寂靜音菩薩。無礙音菩薩。說
大地音菩薩。大海雷音菩薩。雲音菩薩。法光音菩薩。
虛空音菩薩。一切眾生善根雷音菩薩。開悟過去願
音菩薩。圓滿道音菩薩。智須彌山音菩薩。虛空覺菩
薩。離垢覺菩薩。無礙覺菩薩。善覺菩薩。普照三世覺
菩薩。廣覺菩薩。普光覺菩薩。法界光覺菩薩。如是等
五百菩薩。此諸菩薩皆悉出生普賢之行。境界無礙
充滿一切諸佛刹故。持無量身悉能往詣一切佛故。

具足無礙淨眼見一切佛明自在故。至無量處。一切諸佛成正覺時。悉能往詣現前見佛無休息故。無量智光普照一切諸法海故。於無量劫說不可盡辯清淨故。究竟虛空界智慧境界悉清淨故。無所依止隨其所應現色身故。除滅癡瞋善分別知眾生界故。虛空智慧放大光網普照一切諸法界故。復與五百大聲聞俱。悉覺真諦。證如實際。深入法性。離生死海。安住如來虛空境界。離結使縛。不著一切遊行虛空。於

諸佛所疑惑悉滅。深入信向諸佛大海。復與諸天王俱。悉已恭敬供養過去諸佛。長夜饒益一切眾生。心常行慈。未曾忘失。守護羣生。入勝智門。不捨一切眾生。出生諸佛正法境界。守護佛法。受持佛性。生如來家。專求一切智門。爾時諸菩薩聲聞天人及其眷屬。咸作是念。如來行。如來智境界。如來持。如來力。如來無畏。如來三昧。如來住。如來勝妙功德。如來身。如來智。一切天人無能知。無能度。無能得底。無能受。無能

思惟。無能觀察。無能分別。無能開發。無能宣明。無能
爲人如實解說。除佛持力。自在力。威神力。如來本願
力。過去善根力。親近善知識力。清淨信心方便力。樂
求勝妙法力。清淨正直菩提心力。深心一切智願力。
又諸大眾種種意。種種欲。種種解。種種語。種種地。種
種根。種種種方便。種種心境界。種種依如來功德。種種
樂聞法世尊往昔發一切智願求一切智。菩薩諸願
清淨波羅蜜。菩薩諸地。菩薩滿足行。菩薩莊嚴。菩薩

方便莊嚴。菩薩道莊嚴。菩薩出生方便海莊嚴。菩薩自在莊嚴。菩薩本生海。菩提門自在海。如來自在轉法輪。如來刹清淨自在。如來方便莊嚴眾生界。如來法王法。如來道明普照一切。如來自在入一切眾生處。如來爲一切眾生作最上福田。如來爲一切眾生說功德。嚩嚩三輪化度一切羣生。唯願世尊大悲慈愍。具足顯現。爾時世尊知諸大眾心之所念。以大悲身。大悲門。大悲爲首。大悲隨順方便法。入師子奮迅。

三昧。令一切眾生樂清淨法。入三昧已。時大莊嚴重
閣講堂。忽然廣博無量無邊。不可破壞。金剛寶地清
淨莊嚴。一切摩尼寶王。偏布其地。散無量寶華。奇妙
眾寶。瑠璃爲柱。以明淨寶而莊嚴之。眾寶莊嚴。微密
無閒。閣浮檀寶以爲樓閣。眾寶欄楯。卻敵撩向。阿僧
祇欄楯。而以嚴飾。諸天王寶。堅固眾寶。而莊嚴之。摩
尼寶網。彌覆其上。建眾寶幢。懸諸旛蓋。放大光網。普
照法界。又以不可說眾雜妙寶。莊嚴其外。四邊階道。

眾寶合成。爾時佛神力故。令祇洹林忽然廣博。與不可說佛刹微塵數世界等。眾寶莊嚴。不可說寶徧布其地。阿僧祇寶以爲垣牆。寶多羅樹列植道側。無量香河微流盈滿。一切寶華以爲波浪。皆悉右旋。演說一切佛法音聲。不可思議。分陀利華皆悉開敷。彌布水上。眾寶華樹高顯榮茂。列植其岸。不可思議樓閣。摩尼寶網羅覆其上。阿僧祇妙寶莊嚴。光明普照。阿僧祇摩尼寶王嚴飾其地。出眾妙香。建立無量摩尼

王幢。香幢。衣幢。旛幢。繒幢。華幢。莊嚴具幢。鬘幢。寶垂帶幢。眾寶蓋幢。大摩尼幢。普照摩尼寶幢。出佛音幢。師子寶王幢。出一切佛本生海幢。一切法界幢。摩尼寶王幢。以爲莊嚴。時祇洹林上虛空中。有不可思議天寶宮殿雲。不可思議眾香樹雲。不可說須彌山雲。莊嚴虛空。不可說不可說眾寶樂器。演妙法音。讚詠如來。不可說寶樹雲。彌覆虛空。不可說眾寶座雲。覆以寶衣。菩薩處上。歎佛功德。不可說天寶像雲。以爲

莊嚴不可說白淨眞珠網雲以爲莊嚴不可說解脫樓閣雲以爲莊嚴不可說妙解脫音樂雲雨以爲莊嚴何以故如來善根不可思議故如來白淨法不可思議故如來威神不可思議故如來一身充滿一切法界自在不可思議故一切佛刹莊嚴入一佛身不可思議故一微塵中現一切佛一切法界不可思議故一毛孔中盡過去際一切如來次第顯現不可思議故放一光明照一切刹不可思議故如來一毛孔

中。出一切佛刹微塵等化身雲。充滿一切世界不可思議故。如來一毛孔中現一切佛刹成壞不可思議故。如此祇樹給孤獨園。見嚴淨佛刹。一切法界虛空界一切世界所見嚴淨。亦復如是。如來充滿來詣祇洹。菩薩充滿一切如來大眾海安住。普雨一切妙莊嚴雲。雨一切眾寶光明普照一切摩尼王雲。雨一切蓋雲。莊嚴一切天身雲。雨一切華樹雲。莊嚴一切雜色衣雲。雨一切鬘雲。流注莊嚴一切摩尼寶王莊嚴。

雲。雨一切眾生身雜色香雲。雨寶華雲。諸天女雲。各持妙寶於虛空中回轉莊嚴。一切眾寶鉢曇摩華。雜寶師子座莊嚴虛空。爾時東方過不可說佛刹微塵等世界海。有世界名金剛雲明淨燈莊嚴。佛號明淨妙德王。彼大眾中有菩薩名明淨願光明。與不可說佛刹微塵等菩薩俱來向此土。興種種雲。莊嚴虛空。所謂興天華雲。散天末香雲。垂天鬘帶雲。雨天寶雲。天莊嚴雲。天寶蓋雲。天寶衣雲。天幢蓋雲。充滿虛空。

以可悅樂眾寶莊嚴。來詣佛所禮拜敬養。卽於東方
化作一切莊嚴樓閣寶蓮華藏師子之座。如意寶網
羅覆其身。與其眷屬結加趺坐。南方過不可說佛刹
微塵等世界。有世界名金剛藏。佛號普照妙德王。彼
大眾中有菩薩名不可壞精進勢王。與不可說佛刹
微塵等菩薩俱。來向此土。皆悉齎持一切妙香神力
持故。普熏一切佛世界海。執持一切摩尼寶網華鬘
瓔珞寶衣寶像。妙德光明諸莊嚴具。一切妙師子寶

以爲莊嚴。神力持故。充滿一切諸佛世界。來詣佛所。禮拜供養。卽於南方。化作白淨妙寶樓閣。普照十方。寶蓮華藏師子之座。結加趺坐。以寶華網羅覆其身。西方過不可說佛刹微塵等世界。有世界名寶燈須彌山幢。佛號法界智燈。彼大眾中有菩薩名無上普妙德王。與世界海微塵等菩薩俱來。向此土。興不可說佛刹微塵等種種色香。須彌山雲。充滿一切法界。不可說佛刹微塵等種種色香水。須彌山雲。充滿一

切法界不可說佛刹微塵等種種色摩尼寶王須彌山雲充滿一切法界不可說佛刹微塵等種種色光明莊嚴寶幢須彌山雲充滿一切法界不可說佛刹微塵等種種色金剛藏摩尼寶王須彌山雲充滿一切法界不可說佛刹微塵等閻浮檀寶幢須彌山雲充滿一切法界不可說佛刹微塵等摩尼寶王徧照一切法界須彌山雲普覆虛空一切如來不可說佛刹微塵等相好摩尼寶王普照須彌山雲充滿一切

眾生境界。一切如來爲菩薩時不可說佛刹微塵等
所行須彌山雲充滿法界。一切如來示現不可說佛
刹微塵等莊嚴道場。來詣佛所禮拜供養。卽於西方
化作一切香王樓閣。以眞珠寶網羅覆其上。如帝釋
幢寶蓮華藏師子之座。結加趺坐。金色寶網羅覆其
身。如意寶王爲髻明珠。北方過不可說佛刹微塵等
世界。有世界名寶衣光明幢。佛號法界虛空妙德。彼
大眾中有菩薩名無礙妙德藏王。與世界海微塵等

菩薩俱來向此土。以一切寶繒雲莊嚴虛空。神力持故。充滿虛空。雜寶衣雲。雜香熏衣雲。日幢摩尼寶衣雲。金色妙衣雲。眾寶網衣雲。閻浮檀金色莊嚴衣雲。白淨寶衣雲。明淨寶王衣雲。妙光寶衣雲。海莊嚴寶王衣雲。莊嚴虛空。神力持故。皆悉充滿一切虛空。來詣佛所禮拜供養。卽於北方化作大海摩尼寶王樓閣。瑠璃寶蓮華藏師子之座。結加趺坐。妙寶王網羅覆其身。清淨寶王爲髻明珠。東北方過不可說佛刹。

微塵等世界。有世界名放離垢歡喜光明網。佛號無礙眼。彼大眾中有菩薩名法界善化願月王。與世界海微塵等菩薩俱來。向此土。與寶樓閣雲。皆悉充滿一切世界。香樓閣雲。香煙樓閣雲。華樓閣雲。旃檀樓閣雲。金剛樓閣雲。摩尼樓閣雲。金樓閣雲。寶衣樓閣雲。鉢曇摩樓閣雲。皆悉普覆一切佛刹。來詣佛所。禮拜供養。卽於東北方化作一切法界門寶山樓閣。不可稱香王寶蓮華藏師子之座。結加趺坐。摩尼華妙

網羅覆其身。妙莊嚴藏摩尼寶王以爲天冠。東南方
過不可說佛刹微塵等世界。有世界名香雲莊嚴幢。
佛號龍自在王。彼大眾中有菩薩名法義慧燄王。與
世界微塵等菩薩俱來向此土。興無量金色圓滿光
雲。普覆虛空。無量寶色圓滿光雲。佛白毫相圓滿光
雲。眾寶雜色圓滿光雲。寶蓮華藏圓滿光雲。眾寶樹
華圓滿光雲。如來無見頂相圓滿光雲。閻浮檀金色
圓滿光雲。日光圓滿光雲。月光圓滿光雲。普覆虛空。

來詣佛所禮拜供養。卽於東南方化作明淨摩尼寶
王樓閣。金剛寶蓮華藏師子之座。結加趺坐寶燄光
網羅覆其身。西南方過不可說佛刹微塵等世界有
世界名曰光藏。佛號法月普照智王。彼大眾中有菩
薩名壞散。一切眾魔智幢王。與世界微塵等菩薩俱
來向此土。一一毛孔普興虛空界等寶華燄雲。徧照
一切世界。放香燄雲。眾寶燄雲。金剛燄雲。香煙燄雲。
大龍自在電光燄雲。明淨摩尼寶燄雲。金色寶燄雲。

妙德藏摩尼寶王網燄雲。一一毛孔各放虛空界等如
來光明海雲。普照三世來詣佛所禮拜供養。卽於西
南方化作一切方便門光網普照法界摩尼樓閣。香
燈燄寶蓮華藏師子之座。結加趺坐摩尼寶藏王妙
光明網羅覆其身。冠一切眾生向解脫音摩尼寶王
冠。西北方過不可說佛刹微塵等世界。有世界名淨
願摩尼寶藏。佛號普明淨妙德須彌山王。彼大眾中
有菩薩名明淨願智幢王。與世界微塵等菩薩俱來。

向此土。於念念中一切相好。一切毛孔皆出三世一切諸佛身雲。充滿一切虛空界。又出一切菩薩身雲。一切如來眷屬身雲。一切如來變化身雲。一切如來本生身雲。一切聲聞緣覺身雲。一切如來道場菩提樹雲。一切如來自在雲。一切世界王身雲。一切嚴淨佛刹雲。於念念中一切相好。一切毛孔皆出如是等雲。充滿虛空。來詣佛所。禮拜供養。卽於西北方化作諸方清淨摩尼妙寶樓閣。清淨一切眾生摩尼寶蓮。

華藏師子之座。結加趺坐。堅固光明。眞珠寶網羅覆
其身。首冠普覆摩尼寶冠。下方過不可說佛刹微塵
等世界。有世界名一切如來光圓滿清淨。佛號無礙
虛空智幢王。彼大眾中有菩薩名壞散一切障智慧
勢王。與世界微塵等菩薩俱來向此土。於一切毛孔
出一切眾生語海音雲。三世菩薩行海音雲。一切菩
薩願音雲。一切菩薩成滿清淨波羅蜜音雲。一切菩
薩行妙音聲雲。充滿一切世界。一切菩薩積集自在

音雲。一切菩薩往詣道場降伏眾魔成最正覺自在音雲。一切諸佛轉正法輪修多羅音雲。隨其所應化度眾生方便音雲。令一切眾生隨時方便得妙智慧善根音雲。來詣佛所禮拜供養。卽於下方化作諸佛寶光明藏莊嚴樓閣。寶蓮華藏師子之座。結加趺坐。普照道場。摩尼寶王爲髻明珠。上方過不可說佛刹微塵等世界。有世界名說無盡覺。佛號圓滿普智光音。彼大眾中有菩薩名分別法界智通王。與世界海

微塵等菩薩俱。來向婆娑世界釋迦牟尼佛所。一切相好。一切毛孔。一切支節。一切身分。一切莊嚴具。一切衣服中。出盧舍那等過去一切諸佛。未來一切已受記佛。未受記佛。現在十方一切世界一切諸佛。及眷屬雲。皆悉顯現過去所行檀波羅蜜及受施者。皆悉顯現過去所修尸波羅蜜持戒清淨。過去羸提波羅蜜割截支節。心不動亂。過去修習毗梨耶波羅蜜。過去修習一切如來禪波羅蜜海。過去修習一切如

來轉淨法輪。過去一切悉捨不著壽命。過去歡喜樂求諸菩薩道。過去出生菩薩清淨大莊嚴願。過去一切菩薩力波羅蜜。過去一切菩薩圓滿智慧。皆悉具足。出如是等諸自在雲。充滿法界。皆悉顯現。來詣佛所。禮拜供養。卽於上方。化作金剛莊嚴藏樓閣。青金剛寶蓮華藏師子之座。結加趺坐。一切寶網羅覆其身。三世佛號摩尼寶王。爲髻明珠。是諸菩薩及其眷屬。皆悉具足普賢行願。成就三世諸佛清淨智眼。轉

一切佛淨妙法輪。攝取諸佛勝妙音聲。修多羅海。具足一切菩薩自在。究竟彼岸。於念念中。悉詣一切諸如來所。現自在力。一身充滿一切世界。能於一切如來眾中。現清淨身。於一微塵。悉能示現一切世界。隨所應化。成熟眾生。未曾失時。於一毛孔。出一切佛妙法雷音。知眾生界。皆悉如幻。知一切佛。悉如電光。知一切有趣。皆悉如夢。知一切果報。如鏡中像。知一切生如熱時燄。知一切世間。皆如變化。具足成就如來。

十力無所畏法。於大眾中能師子吼。深入無盡一切
辯海。決定了知一切眾生語言法海。於淨法界行無
礙行。知一切法皆悉無諍。具足菩薩諸通妙智。勤修
精進。摧伏諸魔。安住三世以勝妙智慧。無所染著。清
淨妙行。得佛莊嚴一切智地。知一切有悉無所有。深
入一切法界智海。以不壞智。入一切世界。於一切世
界普現自在。示現一切世界受生。知一切世界種種
形色。以微細境界現廣佛刹。以廣佛刹現微細境界。

於一念中住一切佛住。得一切佛住持智身。得清淨
慧。了知十方一切刹海。於一念中悉能出生無量自
在。徧滿十方一切世界海。此諸菩薩皆悉成就。如是
等無量功德。滿祇洹林。皆是如來威神力故。爾時諸
大聲聞。舍利弗。目捷連。摩訶迦葉。離婆多。須菩提。阿
泥盧豆。難陀。金毗羅。迦旃延。富樓那。彌多羅尼子。如
是等諸大聲聞。在祇洹林。而悉不見如來自在。如來
莊嚴。如來境界。如來變化。如來師子吼。如來妙功德。

如來自在行。如來勢力。如來住持力。清淨佛刹。如是等事皆悉不見。亦復不見不可思議菩薩大會。菩薩境界自在變化。菩薩眷屬隨所來方。妙寶莊嚴諸師子座。菩薩宮殿。三昧自在。周徧觀察。菩薩奮迅勤行。精進供養諸佛。菩薩受記長養善根。菩薩受身清淨法身。智身。願身。色身。相好。無量光明圓滿莊嚴。放大光網變化身雲。菩薩充滿一切方網。菩薩諸行圓滿具足。如是等事。一切聲聞諸大弟子皆悉不見。何以

故修習別異善根行故。本不修習能見如來自在善根。亦不修習淨佛土行。又不讚歎見佛自在。所得功德。不於生死中教化眾生。發阿耨多羅三藐三菩提心。亦不安立眾生於佛菩提。亦不守護如來種姓。令不斷絕。亦不攝取一切眾生。亦不成就諸波羅蜜。不爲眾生稱歎勝妙智慧眼地。亦不修習一切智行。不求諸佛離世善眼。亦不出生自在淨刹。不求菩薩諸通明眼。不修菩薩境界。不壞善根。亦不出生佛力住。

持菩薩大願。又亦不知諸法如幻。菩薩集會悉皆如夢。亦不修習菩薩離生聖行之心。不得普賢清淨智眼。是諸功德。不與聲聞辟支佛共。以是因緣。諸大弟子不見不聞。不入不知不覺不念。不能徧觀。亦不生意。何以故。此是菩薩智慧境界。非諸聲聞智慧境界。是故諸大弟子在祇洹林。不見如來自在神力。亦無三昧清淨智眼。於微細處見諸境界。亦無法門神力。境界亦無諸力勝妙功德。亦無是處智。亦無智眼能

見聞覺知及生意念亦不樂說不能讚歎不能顯現不能施與不能勸化安立眾生於彼妙法何以故以聲聞乘出三界故又以滿足聲聞之道住聲聞果不能具足無所有智住真實諦常樂寂靜遠離大悲常自調伏捨離眾生是故雖與如來對面而坐不能覺知神變自在譬如餓鬼裸形飢渴舉身燒然爲諸虎狼毒獸所逼往詣恆河欲求水飲或見枯竭或見灰炭所以者何悉由宿行罪業障故一切聲聞亦復如

是雖在祇洹。不覩如來自在神力。所以者何。無明障
瞶覆淨眼故。譬如有人於大會中昏寢。夢見諸天城
郭。帝釋宮殿。園觀林池。眾寶莊嚴。散諸雜華寶樹。行
列妙衣覆上。諸天男女遊戲其中。自然妙音共相娛
樂。受天快樂。其人自覩安住此處。見天宮殿無量莊
嚴。其餘大會悉不知見。所以者何。覺夢異故。一切菩
薩世界諸王。亦復如是。如彼夢中無所不見。深入菩
薩妙法門故。積集善根。出生一切智願故。決定明了。

佛功德故。正向菩薩宏誓道故。滿足一切智故。滿足
普賢諸行願故。得一切菩薩圓滿地故。得一切菩薩
三昧自在故。行一切菩薩無礙智故。是故一切諸大
菩薩悉覩如來不可思議神變境界。深入明達究竟
彼岸。一切聲聞諸大弟子皆不能知。譬如雪山有諸
藥草。賢明良醫悉分別知。雖有捕獵放牧人等遊止
彼山。悉不能知。菩薩摩訶薩亦復如是。具足一切智
出生一切菩薩自在。明了如來神足變化。彼諸聲聞

大弟子眾。雖處祇洹。悉不覺知。所以者何。常求自安。不廣濟故。譬如地中有諸寶藏。唯呪術者。悉能別知。記錄庫藏。以自資給。奉養父母。賑卹親屬。拯濟貧乏。菩薩摩訶薩。亦復如是。以淨慧眼。入佛自在不可思議神力境界。普入無量方便大海。諸三昧海。恭敬供養一切諸佛。守護正法。以四攝法。攝取眾生。諸大聲聞。雖處祇洹。不覩如來。自在神變。譬如盲人。至大寶洲。行住坐臥。不見眾寶。此諸聲聞。亦復如是。在祇洹。

林大法寶洲親侍世尊。不覩如來自在神變。菩薩大
眾。所以者何。不得菩薩清淨眼故。不能次第覺法界
故。譬如有人以明淨藥而用治眼。於夜暗中處在大
眾。悉見眾人行住坐臥。餘人不見如來亦爾。逮得無
礙清淨智眼。悉能知見一切世間。示現無量自在神
變及菩薩眾。諸大聲聞不覩如來自在神變及菩薩
眾。譬如比丘在大會中。入一切處定。所謂地水火風
天眾生境界。其餘大眾悉不能見地水火風乃至境

界諸一切處。如來所現不可思議。菩薩悉見。諸大聲聞不知不見。譬如有人以翳身藥自塗其目。行住坐臥無能見者。唯有彼人悉能覩見。如來亦復如是。永離世間無能見者。唯一切智菩薩境界。非諸聲聞之所能知。如人從生有二種天。常隨侍衛。一曰同生。二曰同名。天常見人。人不見天。如來神變亦復如是。非諸聲聞所能知見。唯諸菩薩乃能覩見。譬如比丘於大眾中。入滅盡定。不捨諸根。亦不滅度。而不知見諸

大眾事。所以者何。滅定力故。諸大聲聞亦復如是。處
祇洹林大眾之中。諸根現前。而不覩見如來神變。不
入不知不覺不念不生心意。所以者何。如來境界甚
深彌曠。難知難見。難得源底。無有限量。遠離世間不
可思議。無能壞者。非諸聲聞緣覺境界。爾時明淨願
光明菩薩承佛神力。觀察十方。以偈頌曰。

瞻察堅固人 菩提難思議 祇洹林顯現
無量自在法 如來神力持 顯現無量德

世間悉迷惑	不知諸佛法	法王甚深法
無量難思議	顯現大變化	一切莫能測
如來莊嚴相	讚歎不可盡	以法無相故
宣明一切佛	最勝於祇洹	顯現自在力
甚深不可議	遠離語言道	觀察無量德
菩薩眾雲集	不思議刹來	供養於最勝
悉滿諸大願	常修無礙行	一切諸世間
莫能知其心	一切諸緣覺	無量大聲聞

皆悉不能知
菩薩行境界
菩薩大智慧

一切莫能壞
遠離諸亂想
究竟深智地

最大名稱人
深入無量定
顯現自在力

充滿諸法界

大方廣佛華嚴經卷第四十五

音釋

唵 唵陀葛切
嚩 嚩初覲切

誦補闕真言

南無三滿哆。沒馱喃。阿鉢囉帝。喝多折。折捺彌。唵。雞
 彌。雞彌。怛塔葛塔喃。末瓦山。矻鉢囉帝。烏怛摩怛摩。
 怛塔葛塔喃。末瓦吽。發莎訶。舉字母讚
 華嚴字母。眾藝親宣。善財童子得真傳。秘密義幽玄。
 功德無邊。唱誦利人天。



時普願法界眾生入般若波羅蜜門
四十二字妙陀羅。字字包含義理多。

茶 婆 施

梵韻滿娑

婆功德大法界沐恩波。

四生九有同登華藏玄門。八難三塗共入毘盧性海。
南無華嚴海會佛菩薩

三稱

大方廣佛華嚴經卷第四十六

東晉天竺三藏佛陀跋陀羅等譯

入法界品第三十四之二

爾時不可壞精進勢王菩薩承佛神力觀察十方以偈頌曰。

瞻察眞佛子 功德智慧藏 究竟菩薩道

安隱諸世間 無量智明鑒 禪定心不動

智慧甚深廣 境界不可測 閑靜祇洹林

無量妙莊嚴	菩薩皆充滿	悉依正覺住
無量大眾海	一切無所著	十方來會此
處華師子座	除滅眾虛妄	一切無所染
離垢無礙心	究竟諸法界	建立智慧幢
不動如金剛	諸法無變化	示現無量變
一切十方界	無量億佛刹	悉能徧往詣
而亦不分身	瞻仰釋師子	無量力自在
以佛威神故	十方大眾集	佛子悉究竟

一切語言道 佛法不可壞 安住法界地
法性不可壞 牟尼甚深法 句身及味身
分別無窮盡

爾時無上普妙德王菩薩承佛神力觀察十方以偈頌曰。

瞻察堅固人 智慧廣圓滿 善知時非時
爲眾演說法 遠離諸外道 調伏諸論師
隨其所應化 爲現自在力 正覺非量法

亦非無量法 牟尼悉超越 有量無量法
譬如明淨日 除滅一切闇 導師智亦然
普照三世法 譬如十五日 圓滿明淨月
最勝亦如是 白淨法圓滿 譬如虛空中
淨日光明曜 普照於一切 佛自在亦然
譬如虛空性 一切無障礙 世間燈如是
自在無障礙 譬如大地性 能持諸羣生
世間燈法輪 能持亦如是 譬如大風性

飄疾無障礙 佛法亦如是 速徧諸世間

譬如大水輪 世界所依住 智慧輪亦然

三世佛所依

爾時無礙妙德藏王菩薩承佛神力觀察十方以偈頌曰。

譬如大寶山 饒益諸羣生 如來功德山

饒益亦如是 譬如大海水 清涼而澄淨

如來亦如是 能除熱渴愛 譬如須彌山

安峙於大海	譬如大海中	覺難覺無難	顯現自在力	示現種種事	譬如如意珠	悉滿諸淨願	導師智如是
如來山亦然	能出一切寶	導師甚深智	無能思議者	佛智亦如是	能滿一切意	譬如明淨寶	普照一切法
安住深法海	無師智亦然	無量無有數	譬如工幻師	現諸自在力	最勝亦如是	悉能照一切	譬如隨方寶

正住諸方現 無礙燈亦然 諸法於中現

譬如淨水珠 澄清諸濁水 見佛亦如是

諸根悉清淨

爾時法界善化願月王菩薩承佛神力觀察十方以
偈頌曰。

譬如青寶珠 能青一切色 若有見佛者

皆悉同菩提 一一微塵中 最勝現自在

悉能淨無量 無邊諸菩薩 逮得甚深法

種種莊嚴事 唯諸菩薩境 世間莫能測
具足諸莊嚴 如來淨妙行 成就菩薩道
深入諸法界 正覺所示現 不可思議刹
一切現在佛 菩薩悉充滿 釋師子成就
無量自在法 示現大神變 無量無有邊
菩薩種種行 無量無有邊 如來自在力
爲之悉顯現 佛子善修學 甚深諸法界
成就無礙智 明了一切法 如來威神力

爲眾轉法輪 出生勝功德 令世悉清淨

如來淨境界 甚深圓滿智 實智大龍王

度脫一切眾

爾時法義慧燄王菩薩。承佛神力。觀察十方。以偈頌
曰。

最勝有三世 聲聞諸弟子 皆悉不能知

如來舉足事 去來今現在 一切諸緣覺

亦復不能知 如來舉足事 何況世凡夫

結使所纏縛 愚暗覆淨眼 而能知導師
最勝無量德 具足諸智慧 超出語言道
一切莫能知 譬如明淨月 光明無能知
導師亦如是 功德不可議 如來一方便
出生無量化 無數劫思算 不能知少分
如來一方便 出生無量德 一切智正法
皆悉無能知 若有求菩提 修習菩薩行
是彼之境界 所能分別知 不思議方便

超度生死海 若滅吾我心 是則能究竟
清淨心無量 大願悉成滿 逮得佛菩提
最勝之境界

爾時壞散一切眾魔智幢王菩薩承佛神力觀察十方以偈頌曰。

大智無礙身 非身難思議 如來淨法身
一切莫能測 不思議行業 起此清淨身
無量妙莊嚴 不染於三界 普明照一切

清淨諸法界 開發菩提門 出生深定智
永離諸垢染 除滅一切障 世間明淨日
普放慧光明 永絕生死流 悉令三界淨
具足菩薩德 成就佛菩提 顯現無量色
於彼無所染 所可現眾色 一切莫能思
人王勝智慧 能於念念中 具無量菩提
一切莫不知 具足無盡智 一切莫能壞
彼於一念中 明達三世佛 分別一切業

正念思菩提 於思而非思 思法寂滅故
甚深不可說 遠離語言道 如來從此起

佛業難思議

爾時明淨願智幢王菩薩承佛神力觀察十方以偈頌曰。

離癡清淨念 聞持一切法 深慧能分別
諸佛無盡海 菩薩決定心 修習菩薩行
出生甚深智 除滅諸疑惑 其心無疲厭

遠離於懈怠 常勤修精進 究竟諸佛法
具足信智慧 安住不可動 常樂甚深法
觀察無所著 無量無邊劫 積集諸功德
專心常回向 諸佛甚深法 雖在生死中
其心無染著 安住諸佛法 常樂如來行
世間諸所有 陰界等諸法 無畏悉除斷
安住佛正法 世間顛倒惑 生死輪常轉
修習無礙行 實利益眾生 菩薩行難稱

一切莫能知 除滅一切苦 安樂諸羣生

善覺菩提智 普照諸世間 除滅愚癡暗

度脫一切眾

爾時壞散一切障智慧勢王菩薩承佛神力觀察十方以偈頌曰。

無量無數劫 佛音難得聞 何況親奉覲

除滅諸疑惑 如來世間燈 究竟一切法

無上勝福田 令眾悉清淨 如來妙色身

一切莫能思
無量劫諦觀
其心無厭足
佛子善觀察
如來妙色身
除滅一切障
究竟成菩提
如來妙色身
出生淨妙音
無礙諸辯才
廣開菩提門
普照一切眾
無量難思議
建立大乘智
授以菩提記
功德圓滿日
出興照世間
長養一切世
無量功德身
若有值如來
遠離諸惡道
除滅一切苦
具足智慧身
若有見如來

能發無量心 長養無數智 值遇諸導師

若有見如來 得定菩提心 能自決定知

我必成菩提

爾時分別法界智通王菩薩承佛神力觀察十方以
偈頌曰。

菩薩見如來 無量淨功德 皆悉善回向

究竟一切智 饒益眾生故 如來出世間

具足大悲心 爲世轉法輪 一切無能報

大仙普慈恩 不可思議劫 代眾受苦故
無量億劫中 受諸地獄苦 不捨一切眾
悉令得見佛 普能代眾生 具受無量苦
其心無疲倦 爲度一切故 一切諸世間
所有惡道苦 如來常處中 悉令聞正法
一一地獄住 不可思議劫 具受無量苦
終不離諸佛 所以無量劫 常在三惡道
欲令諸羣生 長養智慧故 眾生見如來

除滅諸苦惱 安立於大智 一切佛境界

若有見佛者 除滅一切障 長養功德藏

究竟成菩提 如來能除滅 世間諸疑惑

隨其所應化 悉滿彼大願

爾時普賢菩薩觀察一切大眾欲重開發顯現照明
以法界等方便廣說師子奮迅三昧法界等虛空界
等三世等一切眾生界等一切劫等一切業性等眾
生希望等眾生欲等法光明等隨時教化等一切眾

生根等。爲諸菩薩十種廣說。師子奮迅三昧。何等爲十。所謂廣說一切法界中一切佛刹微塵等佛次第興世演說正法。廣說虛空界等一切佛刹中盡未來劫一切諸佛所說。廣說一切佛刹中一切如來現成正覺。廣說虛空界等一切佛刹中佛坐道場眷屬圍繞菩薩大眾皆悉往詣。廣說一念中三世一切佛出變化身充滿一切法界。廣說一身充滿一切世界海一切佛刹海平等照持。廣說一一境界中顯現三世

一切諸佛自在功德地。廣說一一微塵中顯現三世一切佛刹微塵等佛自在神力。廣說一一毛孔出三世一切佛大願海音開發化導盡未來劫一切菩薩。廣說處法界等師子之座大眾圍繞莊嚴道場各隨其處轉妙法輪。盡未來劫未曾斷絕。佛子。此師子奮迅三昧。有如是等不可說佛刹微塵等。廣說唯是如來智慧境界。爾時普賢菩薩摩訶薩欲重明師子奮迅三昧。承佛神力觀察如來。觀察大眾。觀察如來不

可思議境界。觀察諸佛三昧。觀察不可思議世界。觀察不可思議智慧。觀察一切法皆悉如幻。觀察不可思議諸佛平等。觀察無量無邊一切音聲語言道故。以偈頌曰。

一一毛孔中	普現最勝海	佛處如來座
菩薩眾圍繞	一一毛孔中	無量諸佛海
道場處華座	轉淨妙法輪	一一毛孔中
一切剎塵等	最勝加趺坐	演說普賢行

最勝坐一刹	充滿十方界	無盡菩薩雲
來詣於佛所	無量億佛刹	塵數菩薩集
圍繞於如來	爲說諸法界	顯現諸佛刹
入法界智海	安住普賢行	滿足諸佛刹
安住於如來	一切諸世界	深入菩薩行
樂聞勝法雲	一一刹無量	億劫修諸行
修習彼行已	究竟深法海	滿足大願海
安住如來地	出生最勝法	具足普賢行

成就功德海 得無量自在 如來身雲覆

一切諸佛刹 普雨甘露法 令眾住佛道

爾時世尊欲令諸菩薩安住師子奮迅三昧故放眉
間白毫相光名普照三世法界門不可說世界微塵
等光明以爲眷屬普照十方一切世界海時祇洹林
菩薩大眾普雲集者悉見一切法界虛空界等一切
佛刹種種色種種清淨種種安住種種形如是等一
切世界諸大菩薩現坐道場菩薩圍繞諸天供養成

等正覺。或見於不可說佛刹微塵等諸眷屬中。出妙音聲。充滿法界。轉淨法輪。或見在天宮殿。在龍宮殿。夜叉乾闥婆阿修羅迦樓羅緊那羅摩睺羅伽人及非人等諸宮殿中。或見在人聚落城邑大王京都。現種種身。種種姓名。種種色。種種圓光。種種光網。種種辯。種種眷屬。種種持。種種教持。種種音聲。而爲說法。如此間如來爲諸菩薩現甚深三昧神力變化。一切法界虛空界等十方一切世界海中。現國土身及眾

生身諸業所起。乃至一毛孔中一切悉現。亦復如是。而不壞三世。不壞眾生。普照一切諸眾生心。色身清淨。隨所應化。普現一切眾生類前。開示一切諸佛妙法。調伏眾生。顯現如來自在神力。其有眾生見聞念知。如來自在神通力者。皆佛宿世善知識也。皆悉修習四攝善根。一向專求無上菩提。攝諸善根成就方便。逮得如來不可思議自在三昧。悉與法界虛空界等。或得法身。或得色身。或得菩薩具足諸行。或得清

淨諸波羅蜜。或得菩薩圓滿淨行。或得菩薩諸地。或得菩提自在。或得如來不壞三昧。或得如來諸行智力。或得如來無礙辯才。此諸菩薩得如是等。十不可說。佛刹微塵等。諸妙功德。所謂種種道。種種門。種種入。種種度。種種方便。種種至。種種方。種種光明。種種功德。種種功德具。種種自在。深入菩薩諸三昧海。所謂普莊嚴法界菩薩三昧。普照三世無礙三昧。不壞法界智三昧。隨時深入如來境界三昧。普照虛空三

昧。行如來力三昧。如來無畏莊嚴師子奮迅三昧。一切法界方便藏三昧。無礙法界淨月三昧。清淨莊嚴法雲三昧。除滅癡障法王幢三昧。一一境界中悉見一切佛海三昧。一切世間不可壞身清淨光明智幢三昧。深入佛身無壞三昧。隨順一切世藏三昧。諸法無迹無依三昧。圓滿普照寂滅三昧。無所有善化普化徧照三昧。攝持一切佛刹三昧。莊嚴一切佛刹現成菩提三昧。行一切正法三昧。行一切眾生境界無

礙三昧。生一切諸佛三昧。究竟一切佛德海三昧。一境界出生盡未來際功德三昧。解了一切如來本生海三昧。護持盡未來際一切如來種姓三昧。令現在十方一切佛刹海悉淨三昧。於一念中普照一切佛刹住三昧。遠離障礙深入一切境界三昧。令一切刹入一佛刹三昧。出一切佛化身三昧。決定智慧金剛王入一切根海三昧。住持一切佛身皆一身藏無差別三昧。於一念中住一切佛法界方便無盡三昧。

於一切法界佛刹中示現涅槃三昧。住無上地三昧。令一切世界眾生悉見其身無別異三昧。一切佛智現前三昧。知一切法實相三昧。於一念中具分別知三世三昧。於一念中知一切法界藏三昧。皆隨順知如來智師子行三昧。於一切境界慧眼圓滿三昧。十方境界等三昧。於一切境界以平等眼示現三昧。出生一切妙色眾生見無厭足三昧。無動藏三昧。一法攝一切法三昧。一言普說一切音聲三昧。一切佛無

二法三昧。離三世三昧。分別一切劫不壞智三昧。微細方便十力內三昧。一切劫出生菩薩行無斷三昧。一切十方普雲現前三昧。菩提自在法界無礙三昧。分別一切覺正希望安隱幢三昧。一切莊嚴莊嚴虛空三昧。於念念中出生化雲三昧。離垢如空如來月光三昧。一切佛持如空三昧。一切法莊嚴法光三昧。開一切法義燈三昧。十力圓滿光三昧。三世一切佛幢三昧。一切佛同一藏三昧。於念念中發起究竟一

切事三昧。無盡功德藏三昧。示現無量無邊諸佛境界三昧。住一切法金剛師子座三昧。出生顯現一切如來變化無不知見三昧。一切念如來日三昧。一日悉覺三世三昧。自然寂靜解脫三昧。見一切佛三昧。鉢曇摩華莊嚴一切法界決定智三昧。一切法無著虛空淨眼三昧。一方攝十方海三昧。深入無底法界三昧。一切法海三昧。放一切光寂靜身三昧。一念出生一切通明願三昧。一切時一切處成菩提三昧。一

切法界入一莊嚴三昧。一切佛住持三昧。一切眾生
勝地智明三昧。一念中一身充滿法界三昧。一身中
顯現清淨法界三昧。普門入法界顯現大莊嚴三昧。
一切佛法圓滿輪智住持三昧。一切法方便一方便。
莊嚴三昧。因陀羅網攝眾生界諸願精進住持三昧。
分別一切世界輪三昧。蓮華妙德自在三昧。分別一
切眾生身三昧。對現一切眾生身三昧。分別一切音
聲海三昧。了別一切眾生地三昧。不可壞大悲藏三

昧。一切佛入如來際。三昧修習一切佛法門。三昧觀
察師子奮迅菩薩三昧。如是等不可說佛刹微塵等
三昧門。入如來海。入一切佛自在三昧。於念念中充
滿法界。彼諸菩薩。一一皆有妙師子座。悉與十佛世
界等。現大自在甚深智慧。悉得諸地明淨智慧。普觀
一切從智性生。專求一切智。具足成就離癡慧眼。悉
爲眾生作調御師。修行諸佛平等正法。決定了知一
切境界。分別了知一切世界。樂寂滅法。遠離世間。常

好閑靜。遊諸佛刹。無所染著。於一切法。心無所依。安
住莊嚴妙法宮殿。教化成熟。一切眾生。爲一切眾生。
顯現佛刹。具足成就。無上智門。順離欲際。得智慧身。
消竭一切諸有。爲海。爲一切眾生。顯真實際。法海慧
光。具足圓滿。皆悉安住。堅固三昧。以大悲心。常念眾
生。解一切眾生。皆悉如夢。一切如來。悉如電光。一切
言音。皆悉如響。了一切法。皆悉如化。滿足諸願。具菩
薩行。普智圓滿。方便清淨。心樂寂靜。成滿一切諸陀

羅尼智慧境界。具足十力。遠離恐怖。安住法界。具淨法眼。得一切法。無所有門。修行無量智慧大海。究竟到於智慧彼岸。悉得般若波羅蜜力。成就神通波羅蜜。度眾生海。於三昧波羅蜜。悉得自在。善知一切智。無錯謬。巧妙方便。開示法藏。具足辯才。成就大願。具足諸力。法雲無盡。於大眾中能師子吼。而無所畏。常求正法。心無所著。以淨慧眼。滅除癡闇。智月圓滿。照世生滅。成就智慧。放大光明。照一切諦。善巧方便。智

慧功德金剛之山。超出三世一切法王。覺無所畏。智
功德幢。滅諸魔幢。建立精進圓滿智幢。具足成就無
上之身。得一切法無礙智慧。覺了無盡智。真實際。安
住真際。修行決定無相三昧。巧方便。生諸菩薩行。無
二智慧。諦見境界。世間諸趣。普照佛刹。無所染著。於
一切法。除滅癡闇。究竟智慧。皆悉圓滿。放淨法光照
十方界。爲一切眾生作不虛福田。若見聞者。所願成
滿。爲一切世間功德須彌。遠離恐怖。伏諸外道。以微

妙音徧一切刹。常見諸佛。心無厭足。成就如來自在法身。隨其所應而化度之。能以一身滿一切刹。以少方便。具足清淨自在神力。普遊十方。無所障礙。智慧圓滿。徧照法界。爲一切眾曜明淨日。隨其所應讚歎功德。了一切眾生諸根希望於一切法。得無諍境界。分別了知諸法自性。大小相攝。決了如來甚深之地。說句味身。諸法深義。無有窮盡。於一言中。普說一切修多羅海。究竟一切諸陀羅尼。廣智慧身。究竟無量。

劫陀羅尼於一念中決定了知不可說劫於一念中
了達三世法陀羅尼普照無量諸佛法海爲一切眾
生起淨智慧轉正法輪無能壞者成就如來智慧境
界常入善現三昧正受遠離障礙深入諸法於一切
法得勝智自在清淨莊嚴一切境界深入十方甚深
法界攝取十方一切法界於一一微塵中現成正覺
於無色性現一切色能以一方攝一切方彼諸菩薩
具足成滿如是等無量功德智慧之藏常爲一切諸

佛讚歎以句味身說其功德不能窮盡。皆悉雲集於
祇洹林。爾時彼諸菩薩深入如來功德大海。入已於
菩薩身中及樓閣中。莊嚴具中。師子座中。以樂法力
故。不可思議力故。於念念中。各放無量光明雲。普照
法界。覺悟眾生。所謂出一切寶香光明雲。讚歎三世
諸佛功德。微妙音聲充滿十方。出一切眾生雲。境界
光明。說一切眾生清淨業報。微妙音聲充滿十方。出
一切菩薩願行莊嚴光雲。說一切菩薩願行功德。出

一切佛變化身雲。一切如來微妙音聲充滿十方。出一切菩薩身雲。相好莊嚴。於一切佛刹以微妙音讚歎諸佛。充滿十方。出三世佛莊嚴道場雲。現一切佛成等正覺。充滿十方。於一切境界中出龍王雲。雨一切香。充滿十方。出一切佛身雲。歎普賢行。充滿十方。出一切佛刹淨光明雲。一切如來轉法輪音。充滿十方。時諸菩薩威神力故。此法力故。出如是等不可說佛刹微塵等雲。爾時文殊師利菩薩摩訶薩承佛神

力觀察十方。欲讚歎祇洹林中無量莊嚴。以偈頌曰。
觀察祇洹中 如來自在力 一切境界出
無量功德雲 無量淨妙色 種種而莊嚴
皆悉普照現 十方諸佛刹 佛子身毛孔
出佛音聲雲 種種寶莊嚴 充滿十方刹
其身如梵王 威儀常安靜 徧遊十方刹
演出妙音聲 如來毛孔出 不可思議身
皆悉如普賢 眾妙相莊嚴 菩薩普成就

三世功德海	充滿於虛空	出生莊嚴雲
於此祇洹中	演出妙音聲	普說一切眾
善淨業果報	一一境界中	悉現佛刹海
三世諸如來	無量自在力	如來毛孔中
一切諸世界	微塵等佛刹	皆悉分別現
一切境界中	出生諸佛雲	無量善方便
度脫一切眾	華雲香燄雲	清淨摩尼寶
種種莊嚴雲	充滿於十方	三世一切佛

莊嚴妙道場 於此祇洹林 一切悉顯現
普賢等佛子 無量種莊嚴 眾生等劫中
所修嚴淨刹 如是諸世界 悉現祇洹林
時彼一切諸菩薩眾以如來三昧照故一一皆得不
可說佛刹微塵等大悲法門饒益安樂攝取眾生彼
諸菩薩於一一毛孔各出不可說佛刹微塵等光明
一一光明端各出不可說佛刹微塵等菩薩其身尊
重於諸世間最爲殊勝隨其所應皆悉顯現充滿法

界教化眾生未度者度。未脫者脫。現不可說佛刹微塵等諸天宮殿。無常死相一切諸法皆悉如夢。讚歎道場說一切菩薩諸大願門。或於一切世界示現受生。爲一切眾生廣現檀波羅蜜門。或現一切諸佛圓滿淨戒功德尸羅波羅蜜門。或現斷一切支節羸提波羅蜜門。或現勤修精進毗梨耶波羅蜜門。或現一切菩薩禪定三昧相續解脫法門。如來圓滿智慧光明門。專求一切佛法爲一一句身味身義故。能捨無

量無數之身。詣諸佛所。問無量法門。善知時會。隨其所應。而爲說法。令一切眾生。住一切智。逮得方便智。光海門。悉能供養諸佛菩薩。降伏眾魔。制諸外道。悉能顯現菩薩力門。知一切技術。明淨智地。欲令眾生得勝妙法。悉能了知眾生諸根。煩惱習氣。種種業報。及智慧地。以如是等不可說佛刹微塵等法門教化眾生。或現天宮。或現龍宮。夜叉乾闥婆阿修羅迦樓羅緊那羅摩睺羅伽等宮。或現梵宮。或現人宮。或現

閻羅王宮。或現地獄餓鬼畜生處。大悲智慧及諸大願。不可沮壞。攝取眾生。不捨方便。或以名號教化。或以憶念教化。或以音聲教化。或以圓滿光明教化。或以光明網教化。隨其所應。悉現其前。現處處莊嚴。不離佛所。不離樓閣座。而普現十方。或放化身雲。或現無二身。遊行十方。教化眾生。或現聲聞色像。或現梵天色像。或現一切苦行色像。或現良醫色像。或現商人色像。或現正命色像。或現伎人色像。或現天色像。

或現一切技術色像。或現一切城邑聚落京都色像。隨其所應。往詣其所。或現種種色身音聲。教化眾生。或現諸語言法。種種威儀。種種菩薩行。種種巧術。一切智明。爲世間燈。普照眾生業報莊嚴。分別諸方。悉行圓滿菩薩諸行。悉現一切城邑聚落京都。化度眾生。爾時文殊師利童子。從善安住樓閣。出與一切同行諸菩薩俱。金剛力士常隨侍衛。本願足天。樂聞法地。天常習大悲泉池。方天除滅愚癡。夜天出生佛晝。

日天。莊嚴正法界虛空河天。度眾生生死海天。長養一切善根薩婆若山天。莊嚴一切眾生身滿足諸願供養一切佛身天。守護一切眾生城天。守護一切眾生夜叉王。令一切眾生歡喜乾闥婆王。除滅一切餓鬼趣鳩槃荼王。於生死海拔濟眾生迦樓羅王。正求薩婆若阿修羅王。見佛歡喜無厭足摩睺羅伽王。常厭生死諸天王。常敬禮佛諸梵天王等。俱詣佛所。頭面禮足。設諸供養已。辭遊南方。爾時尊者舍利弗承

佛神力見文殊師利童子以菩薩莊嚴而自莊嚴。出
祇洹林遊行南方。見已作如是念。我今當與文殊師
利菩薩俱行。爾時尊者舍利弗與六千比丘眷屬圍
繞從自房出。來詣佛所。禮足辭退。向文殊師利。此六
千比丘是舍利弗共行弟子。皆新出家。其名曰海智
比丘。大善調伏比丘。功德光比丘。大童子比丘。電光
與比丘。清淨行比丘。天妙德比丘。因陀羅慧比丘。梵
天比丘。寂靜慧比丘。如是等六千比丘。已曾供養過

去諸佛。於諸佛所種諸善根。性樂清淨。信心明徹。行諸大願。觀佛境界。了法實相。饒益眾生。常樂專求諸佛功德。此等比丘皆是文殊師利之所化度。爾時尊者舍利弗觀察大眾。告海智比丘言。汝可觀察文殊師利菩薩清淨之身相好莊嚴。一切天人莫能思議。光明圓滿。令無量眾生發歡喜心。放大莊嚴妙光明網。除滅眾生無量苦惱。觀其眷屬成就善根。觀其遊步威儀庠序。所遊行處自然平正。十方無礙。觀其功

德所行道路。其傍悉有眾妙寶藏。自然發出。觀其供養過去諸佛善根依果。從眾林樹出莊嚴藏。觀彼一切諸天大王恭敬禮拜供養雲雨。海智汝觀文殊師利。一切如來眉間毫相放無量光。說諸佛法。悉入其頂。爾時尊者舍利弗爲諸比丘讚說文殊師利無量功德。諸大莊嚴。彼諸比丘聞讚歎已。皆悉歡喜。其心清淨。離諸垢穢。身體柔軟。調伏諸根。遠離障礙。現見諸佛。正求菩提。逮得菩薩清淨諸根。具菩薩力。長養

大悲。入諸波羅蜜。發宏誓願。悉見十方諸如來。海時諸比丘白尊者舍利弗言。唯然大師願俱往詣文殊師利。爾時尊者舍利弗與諸比丘往詣其所。到已。謂文殊師利。此諸比丘皆新出家。欲見仁者。爾時文殊師利童子。卽爲顯現菩薩自在。如象王回顧視比丘。時諸比丘頭面禮足。卻住一面。合掌而立。作如是念。我等以此禮拜功德。知法實相。如和尚舍利弗。釋迦牟尼世尊。得清淨身。相好音聲。神力自在。如文殊師

利爾時文殊師利告諸比丘。汝等當知。若善男子善女人成就十種大心。則得佛地。況菩薩地。何等爲十。所謂發廣大心。長養一切善根。究竟不退。心無厭足。見一切佛恭敬供養。心無厭足。正求一切佛法。心無厭足。徧行菩薩諸波羅蜜。心無厭足。具足一切菩薩三昧。心無厭足。於一切三世流轉。心無厭足。嚴淨佛刹。充滿十方。心無厭足。教化成熟一切眾生。心無厭足。於一切刹。一切劫中行菩薩行。心無厭足。發廣大

心修習一切佛刹微塵等諸波羅蜜。度脫一切眾生。具佛十力。心無厭足。若善男子善女人。成就如是十種大法。則能長養一切善根。離生死趣一切世間性。超出聲聞緣覺之地。生如來家。具足成就菩薩大願。行菩薩行。住菩薩地。成就如來功德之力。降伏眾魔。制諸外道。彼諸比丘聞此法已。皆得無礙淨眼三昧。悉見十方一切如來及其眷屬無量眾生。亦見種種世界形類眾寶宮殿及諸微塵。乃至如來十眼境界。

皆悉覩見。彼諸如來以種種句身味身。種種辯才。微妙音聲。所說法海。皆悉聞知。彼世界中一切眾生。心念諸根。皆悉了知。知彼眾生過去未來諸趣受生。又能知彼過去未來各十劫事。知彼如來十種本生。十種成就。菩提自在。十種轉法輪。十種神力。十種教誡。十種說法。十種辯才。得此三昧時。具足成就十種實際。菩提之心。一萬三昧。一萬淨波羅蜜。得大智慧。圓滿光明。菩薩十明。住菩提心。爾時文殊師利菩薩勸

諸比丘修普賢行。住普賢行。彼諸比丘出生大願海。生大願海已。身心清淨。得不死通明。得是明已。不離此處。出生一切如來法身。充滿十方。具足一切佛法。爾時文殊師利菩薩建立彼諸比丘菩提心已。與其眷屬漸遊南方。至覺城東。住莊嚴幢娑羅林中。大塔廟處。過去諸佛所遊止處。亦是過去諸佛爲菩薩時修苦行處。此處常爲一切天龍夜叉乾闥婆阿修羅人非人等之所供養。時文殊師利卽於此處說普照

一切法界修多羅。有百萬億修多羅。以爲眷屬。說此
法時。於大海中有無量千億龍王。與眷屬俱來詣文
殊師利。聞此法已。厭離龍趣。正求佛道。捨龍身已。生
天人中。一萬龍王於阿耨多羅三藐三菩提得不退
轉。時覺城人聞文殊師利在莊嚴幢娑羅林中。大塔
廟處。聞已。優婆塞。優婆夷。童男。童女。皆悉往詣文殊
師利。時有優婆塞名曰大智。與千優婆塞眷屬俱。其
名曰修達。多優婆塞。婆須達。多優婆塞。功德光優婆

塞。名稱德優婆塞。寂靜德優婆塞。歡喜德優婆塞。善
慧優婆塞。大慧優婆塞。賢優婆塞。賢妙德優婆塞。如
是等千優婆塞。俱頭面禮足。退坐一面。復有五百優
婆夷。其名曰。大慧光優婆夷。善光優婆夷。善身優婆
夷。可樂身優婆夷。跋陀羅優婆夷。賢德優婆夷。賢光
優婆夷。光明幢優婆夷。妙德光優婆夷。善眼優婆夷。
如是等五百優婆夷。俱頭面禮足。退坐一面。復有五
百童子。其名曰。善財童子。善行童子。善戒童子。善威

儀童子。善精進童子。善心童子。善慧童子。善覺童子。
善眼童子。善臂童子。善光勝童子。如是等五百童子
俱。頭面禮足。退坐一面。復有五百童女。其名曰善行
童女。跋陀羅童女。悅樂顏童女。堅固慧童女。妙功德
童女。勝體童女。梵天興童女。功德光童女。善光明童
女。如是等五百童女。俱頭面禮足。退坐一面。爾時文
殊師利知覺城大眾集已。隨其所應。以大慈力。令彼
清涼。大悲現前。將爲說法。甚深智慧。分別其心。以大

辯力而爲說法。觀察善財童子以何因緣名曰善財。此童子者初受胎時。於其宅內有七大寶藏。其藏普出七寶樓閣。自然周備。金銀瑠璃玻瓈眞珠砗磲瑪瑙。從此七寶生七種芽。時此童子處胎十月。出生端正。支體具足。其七種寶芽高三尋。廣七尋。又其家內自然具有五百寶器。盛滿眾寶。金器盛銀。銀器盛金。金剛器盛眾香。眾香器盛寶衣。玉石器盛上味饌。摩尼器盛雜寶。種種寶器盛酥油蜜。及以醍醐資生之。

具。瑠璃器盛眾寶。玻瓈器盛碑磬。碑磬器盛玻瓈。瑪瑙器盛赤珠。赤珠器盛瑪瑙。火珠器盛淨水。淨水珠器盛火珠。如是等五百寶器自然行列。又雨眾寶滿諸庫藏。以此事故。婆羅門中善明相師字曰善財。此童子者已曾供養過去諸佛。深種善根。常樂清淨。近善知識。身口意淨。修菩薩道。求一切智。修諸佛法。心淨如空。具菩薩行。爾時文殊師利菩薩如象王回觀察善財而告之曰。吾當爲汝說微妙法。卽爲分別。

諸佛正法。分別諸佛。次興世法。淨眷屬法。轉梵輪法。諸佛色身相好清淨莊嚴之法。一切諸佛具法身法。諸佛音聲妙莊嚴法。說一切如來平等正法。爾時文殊師利知善財等一切大眾聞說此法皆大歡喜發菩提心。顯明過去諸善根已。不捨本座。如應化度覺城眾生已。遊行南方。爾時善財童子從文殊師利聞佛如是諸妙功德。專求菩提。隨從文殊師利以偈頌曰。

三有爲城郭 高慢爲垣牆 諸趣爲卻敵
染愛爲深塹 愚癡暗覆蔽 三毒常熾然
惡魔爲君王 童蒙依止住 貪愛所纏縛
諂曲壞正行 疑惑障慧眼 流轉諸邪道
慳嫉所纏縛 趣向餓鬼難 生老病死逼
愚癡轉趣輪 圓滿無上悲 清淨智慧日
消竭煩惱海 願願少觀察 圓滿無上慈
慧光安眾生 一切無不曜 月王願照我

一切法界王	淨法爲四兵	常轉正法輪
願化我妙法	具足菩提願	積集功德藏
饒益一切眾	大師願度我	忍鎧莊嚴身
執持智慧劍	於魔險惡道	濟我免眾難
住法須彌頂	妙定天女侍	降伏阿修羅
帝釋觀察我	具足離垢力	分別一切有
世間明淨燈	願示我正趣	遠離諸惡道
悉令善趣淨	開我解脫門	超出諸世難

著常樂我淨 迷惑於生死 清淨智慧眼
願開解脫門 遠離諸顛倒 無畏知正道
了達諸正趣 示現我菩提 安住正見地
諸佛功德樹 常雨正覺華 願示我菩提
世間明淨日 三世諸如來 如法而來去
願令我悉見 分別一切業 深知諸法性
決定智慧乘 示我摩訶衍 諸願輪成滿
大悲不可盡 淨妙德莊嚴 安我菩提乘

具足淨法界	大慈爲觀察	功德華莊嚴
賜我第一乘	安住梵行座	三昧女朝侍
微妙法音樂	示我法王道	無盡四攝藏
功德莊嚴智	光明照一切	願速示勝道
施惠圓滿光	旃檀戒塗身	忍辱大莊嚴
願速示正道	深入諸禪定	教化羣生類
具足方便乘	安我勝法乘	諸願圓滿輪
永絕生死輪	具足持智力	安我妙法乘

一切悉殊妙
大悲觀眾生
究竟勝妙行
安我實智乘
安住金剛慧
究竟一切智
除滅諸障礙
安我賢聖乘
慈悲甚彌廣
安樂諸羣生
法界等淨眼
安我無上乘
除滅眾苦陰
諸業煩惱輪
降伏一切魔
安我正法乘
智慧照十方
莊嚴諸法界
滿足眾生願
安我勝妙乘
心淨如虛空
除滅邪見愛
饒益一切眾
安我勝法乘

安住如風輪	普持一切刹	令眾住定地
安我殊勝乘	安住如大地	具足大悲力
智慧益眾生	安我最勝乘	四攝光圓滿
饒益羣生類	總持清淨光	示我明淨日
開發淨慧眼	莊嚴妙智王	冠以無上冠
法王慈顧我		

爾時文殊師利如象王回觀善財童子。作如是言。善哉善哉。善男子。乃能發阿耨多羅三藐三菩提心。求

善知識親近善知識。問菩薩行。求菩薩道。善男子。是爲菩薩第一之藏。具一切智。所謂求善知識。親近恭敬而供養之。是故善男子。應求善知識。親近恭敬。一心供養而無厭足。問菩薩行。云何修習菩薩道。云何滿足菩薩行。云何清淨菩薩行。云何究竟菩薩行。云何出生菩薩行。云何正念菩薩道。云何緣於菩薩境界道。云何增廣菩薩道。云何菩薩具普賢行。爾時文殊師利爲善財童子以偈頌曰。

善哉功德藏	能來詣我所	發廣大悲心
專求無上道	先發諸大願	除滅眾生苦
究竟菩薩行	成就無上道	若有諸菩薩
不厭生死苦	具足普賢行	一切莫能壞
功德光勝來	清淨功德海	正求普賢行
饒益一切眾	無量無有邊	世界諸佛所
聞說淨法雲	受持不忘失	悉於十方界
普見無量佛	成滿諸願海	具足菩薩行

究竟方便海 安住如來地 隨順諸佛教
逮得一切智 一切世界中 法王積劫行
具足普賢道 究竟佛菩提 一切刹劫海
修習菩薩行 滿足諸大願 成就普賢乘
無量諸眾生 聞彼名號者 修習普賢願
得成無上道


大方廣佛華嚴經卷第四十六

誦補闕真言

南無三滿哆。沒馱喃。阿鉢囉帝。喝多折。折捺彌。唵。雞
 彌。雞彌。怛塔葛塔喃。末瓦山。斫鉢囉帝。烏怛摩。怛摩。
 怛塔葛塔喃。末瓦吽。發莎訶。 舉字母讚

華嚴字母。眾藝親宣。善財童子得真傳。秘密義幽玄。
 功德無邊。唱誦利人天。

沙◎霜生春疎稍。唵詩申山深衫搜沙
 嚩●忘○聲無○微文楠○瓊雲嚩
 哆○鐺燈冬都。唵惶堤顛殫○擔佉哆



時普願法界眾生入般若波羅蜜門
四十二字妙陀羅。字字包含義理多。

沙 唵 哆

梵韻滿娑

婆功德大。法界沐恩波。
四生九有。同登華藏玄門。八難三塗。共入毘盧性海。
南無華嚴海會佛菩薩

三稱

大方廣佛華嚴經卷第四十七

東晉天竺三藏佛陀跋陀羅等譯

入法界品第三十四之三

爾時文殊師利說此偈已。告善財言。善男子。於此南方。有一國土。名曰可樂。其國有山。名曰和合。於彼山中。有一比丘。名功德雲。汝詣彼問。云何菩薩學菩薩行。修菩薩道。乃至云何具普賢行。善男子。彼比丘者。善能顯說菩薩所行。時善財童子。從文殊師利聞法。

歡喜。頭面禮足。繞無數匝。瞻仰悲戀。泣涕辭退。漸漸南行。向可樂國。登和合山。於彼山中。十方周徧。一心觀察。求覓大師。爲在何所。如是尋求。乃至七日。爾時善財見彼比丘。乃在山頂。靜思經行。見已馳詣。頭面禮足。右繞而住。白言大聖。我已先發阿耨多羅三藐三菩提心。而未知菩薩云何學菩薩行。修菩薩道。我聞大師善能宣暢。唯願垂慈。具足演說。時彼比丘告善財言。善哉善哉。善男子。乃能發阿耨多羅三藐三

菩提心。問菩提行。善男子。如是事者。難中之難。所謂能問菩薩所行。修菩薩道。入菩薩境界。出生清淨菩薩之道。求於菩薩清淨廣心。具足諸願。隨順世間所應化者。於生死中求解脫門。有爲無爲。心不染著。善男子。我於解脫力。逮得清淨方便慧眼。普照觀察一切世界境界。無礙除一切障。一切佛化陀羅尼力。或見東方一佛。二佛。十百千萬十億百億千億百千億佛。或見百億那由他千億那由他百千億那由他佛。

或見無量阿僧祇不可思議不可稱無分齊無邊際不可量不可說不可說不可說佛。或見閻浮提微塵等佛。或見四天下微塵等佛。或見小千世界微塵等佛。或見二千世界微塵等佛。或見三千大千世界微塵等佛。南西北方四維上下亦復如是。種種形色。種種自在遊戲神通。種種眷屬莊嚴。放大光網。種種清淨莊嚴佛刹。隨受化者。示現自在菩提法門。見諸如來於大眾中而師子吼。善男子。我唯知此普門光明。

觀察正念諸佛三昧。豈能了知菩薩圓滿清淨智行。
諸大菩薩得圓滿普照念佛三昧門。悉能覩見一切
諸佛及其眷屬嚴淨佛刹。得一切眾生遠離顛倒念
佛三昧門。隨一切眾生所應。悉令清淨。得一切力究
竟念佛三昧門。正念修習諸佛十力。得諸法中心無
顛倒念佛三昧門。悉得覩見一切佛雲。於彼佛所。聞
法受持。得分別十方一切如來念佛三昧門。悉見一
切世界海中諸如來海。得不可見不可入念佛三昧

門。於微細境界見一切佛自在境界。得諸劫不顛倒。念佛三昧門。於一切劫常見諸佛。未曾遠離。得隨時念佛三昧門。於一切時常見諸佛。得嚴淨佛刹。念佛三昧門。起一切佛刹無能壞者。普見諸佛。得三世不顛倒念佛三昧門。悉見三世諸佛及其眷屬。得無壞境界念佛三昧門。於一切境界悉見諸佛。得寂靜念佛三昧門。於一念中悉見一切世界中一切如來示現涅槃。得離月離時念佛三昧門。於一日中悉見一

切如來遊行教化。得廣大念佛三昧門。見一佛身結
加趺坐。充滿法界。得微細念佛三昧門。於一毛孔見
一切佛成等正覺。得莊嚴念佛三昧門。於一念中見
一切佛於一切世界成等正覺。神力自在。得清淨事
念佛三昧門。見一切佛慧光普照。轉妙法輪。得淨心
念佛三昧門。自心明了。見一切佛。得淨業念佛三昧
門。見一切眾生諸業如鏡中像。得自在念佛三昧門。
見一切莊嚴法界諸佛充滿。得虛空等念佛三昧門。

見如來身普照法界及虛空界。爾時功德雲比丘告善財言。善男子。南方有國。名曰海門。彼有比丘。名曰海雲。汝應詣彼。問菩薩行。善男子。彼比丘者。能分別說善根。具因善根。大地善根。大力善根。能讚歎菩提因緣。廣摩訶衍。增廣波羅蜜力。顯現一切菩薩行海。善能清淨圓滿大願。能令出生清淨普門莊嚴法門。生大悲力。時善財童子從功德雲比丘聞法歡喜。頭面禮足。繞無數匝。眷仰顧戀。辭退南行。爾時善財童

子一心正念善知識教智慧光明菩薩法門菩薩三
昧觀察一切菩薩諸方便海圓滿功德心常樂見一
切菩薩念一切佛次第興世清淨功德漸趣南方海
門國土詣海雲比丘頭面禮足右繞畢退住一面白
言大聖我已先發阿耨多羅三藐三菩提心欲度一
切智慧大海而未知菩薩云何離生死性得不退轉
生如來家度生死海逮得如來一切智海捨凡夫地
得如來地斷生死流入菩薩流滅諸趣輪滿諸願輪

降伏眾魔具佛功德。竭愛欲海。長大悲海。閉諸惡道。開天人路。諸解脫門。出三界城。到一切智城。捨離一切玩好之具。發弘誓願。攝取眾生。爾時海雲比丘告善財言。善男子。汝已發阿耨多羅三藐三菩提心耶。答言。唯然。善男子。若不深植善根。則不能發阿耨多羅三藐三菩提心。得普門善根。普照光明法門。長養正道。三昧慧光。出生種種功德海藏。長白淨法。未曾退失。親近善知識。恭敬供養。不惜身命。無所藏積。離

諸憍慢。心安不動。猶如大地。大慈愍念一切羣生。遠離一切諸生死門。好樂佛境界者。能發菩提心。大悲心救護一切眾生故。大慈心安樂一切眾生故。無疲倦心。滅一切眾生諸苦惱故。饒益心。滅一切眾生不善法故。無畏心。除滅一切諸惱害故。無礙心。滅一切障故。廣大心。充滿一切法界故。無邊心。等虛空界故。廣心。見一切如來故。清淨心。於三世法智不違故。智心。究竟一切智海故。善男子。我住此海門國。十有二

年。境界大海。觀察大海。思惟大海。無量無邊。思惟大海。甚深難得源底。思惟大海。漸漸深廣。思惟大海。無量妙寶。而莊嚴之。思惟大海。無量水聚。思惟大海。水色種種不可思議。思惟大海。大身眾生之所依止。思惟大海。水性所居。思惟大海。大雲彌覆。思惟大海。未曾增減。善男子。我如是思惟時。復作是念。世間頗更有法。廣此大海。深此大海。莊嚴於此大海者不。作是念已。卽見海底水輪之際。妙寶蓮華自然涌出。伊那

尼羅寶爲莖。閻浮檀金爲葉。沈水香寶爲臺。瑪瑙寶
爲鬚。彌覆大海。百萬阿脩羅王。悉共執持。百萬摩尼
寶莊嚴。網羅覆其上。百萬龍王。雨以香水。百萬迦樓
羅王。銜妙寶繒帶垂下。莊嚴百萬羅刹王。慈心觀察
百萬夜叉王。恭敬禮拜。百萬乾闥婆王。讚歎供養。百
萬天王。雨天香華末香幢旛妙寶衣雲。百萬梵王稽
首敬禮。百萬淨居天。各敬禮已。合掌而住。百萬轉輪
王。七寶莊嚴。百萬海神王。從大海出。恭敬禮拜。百萬

夜光寶光明網普照一切。百萬淨寶。百萬明淨寶。以爲莊嚴。百萬寶藏。出無量光明普照一切。百萬閻浮檀寶。安住莊嚴。百萬金剛師子寶。不可沮壞清淨莊嚴。百萬日藏寶。明淨光明普照一切。百萬不可壞摩尼寶。出生長養一切善行。百萬如意寶珠。無盡莊嚴。彼寶蓮華如來無上善根所起。悉令一切菩薩諸願成滿。十方世界無不顯現。出生一切諸法如幻。從淨法生無諍方便法之所莊嚴。行如夢法。無爲法印。究

竟到於無礙方便普覆十方一切法界。唯佛境界。隨
順世間無量阿僧祇劫。歎不可盡。見彼華上。有一如
來結加趺坐。彼佛淨身上。至非想非非想天。無不充
滿。見彼如來坐此莊嚴寶蓮華座。不可思議大眾圍
繞。見不可思議圓滿光明莊嚴。見不可思議相好莊
嚴。見不可思議神力自在。見不可思議如來妙色。見
不可思議無見頂相。見不可思議廣長舌相。念不可
思議清淨音聲。思惟不可思議圓滿音聲。見不可思

議如來諸力。解了不可思議清淨無畏。解了不可思議一切諸辯。憶念菩薩過去不可思議大劫本行。見不可思議菩提自在。見不可思議正法雲。見不可思議普門莊嚴身。見不可思議身左右端嚴。見辦一切不可思議事。饒益眾生。時彼如來卽申右手而摩我頂。說普眼經。唯是如來境界。出生一切菩薩淨行。普照一切法界。攝取圓滿一切法界。普照一切嚴淨佛刹。降伏一切眾魔外道。悉令一切眾生歡喜。普照一

切眾生所行。隨其所應。無不顯現。普照一切眾生根輪。善男子。我從佛聞此普眼經。皆悉受持。讀誦通利。正念思惟。善男子。假使有人以大海等墨。須彌聚筆。書寫此經。一一品。一一法門。一一方便。一一生法門。一一句中義味。猶不能盡。善男子。我於佛所。千二百歲。聞受此經。於一日。受阿僧祇品。多聞陀羅尼。光明力故。究竟阿僧祇品。百萬門陀羅尼。光明力故。攝取阿僧祇品。無量旋陀羅尼。光明力故。分別阿僧祇

品隨順分別諸地陀羅尼光明力故。淨阿僧祇品。嚴
勝陀羅尼光明力故。出生阿僧祇品。隨喻莊嚴陀羅
尼光明力故。說阿僧祇品。明淨音聲陀羅尼光明力
故。照阿僧祇品。虛空藏陀羅尼光明力故。廣阿僧祇
品。樹提沙陀羅尼光明力故。成阿僧祇品。海藏陀羅
尼光明力故。其有十方諸天。天王。諸龍。龍王。夜叉。夜
叉王。乾闥婆。乾闥婆王。阿脩羅。阿脩羅王。迦樓羅。迦
樓羅王。緊那羅。緊那羅王。人人王。梵天。梵天王。若來

問我。我卽爲彼開發顯現。分別讚說。悉令安住。此普
眼經。善男子。我唯知此一法門。豈能盡知菩薩諸行。
何以故。諸菩薩等。究竟一切行故。究竟大願海。一切
劫海。不斷絕故。入眾生海。應受化者。悉隨順故。深入
一切眾生心海。出生如來十力智光明故。悉知一切
眾生諸根。隨所應化。不失時故。入一切佛刹海。出生
佛刹堅固願故。究竟恭敬供養一切佛海。大願力故。
度一切法海。解脫智故。深入功德海。如說修行故。度

一切眾生語言海。於十方刹轉法輪。故善男子。汝詣南方六十由旬。有一國土。名曰海岸。彼有比丘。名曰善住。應往問彼。云何菩薩修清淨行時。善財童子頭面禮足。繞無數帀。眷仰無量。辭退南行。爾時善財童子正念善知識教。正念普眼經。思惟彼佛自在神力。受持彼佛句味法雲。修習正法。入深法海。盡法源底。攝取勝法。除滅癡瞋。了法寶洲。至海岸國。周徧十方。推求大師。今在何所。見彼比丘。經行虛空。阿僧祇天。

眷屬圍繞。時諸天眾爲供養善住比丘。故於虛空中散諸天華。作眾妓樂。出微妙音。阿僧祇寶藏莊嚴虛空。時諸龍王爲供養故。與不可思議沈水香雲徧滿虛空。緊那羅王爲供養故。作諸妓樂。出妙音聲。充滿虛空。諸海神王爲供養故。嘯和雅音。阿脩羅王爲供養故。與不可思議寶雲。莊嚴虛空。放不可思議光明。普照一切。以不可思議珍玩之具。莊嚴虛空。不可思議緊那羅王。充滿虛空。離殺害心。恭敬供養善住比

丘不可思議諸羅刹王與諸惡形羅刹鬼等眷屬圍繞充滿虛空善住比丘大慈力故不可思議諸夜叉王與夜叉眾俱充滿虛空爲守護善住比丘故周而圍繞不可思議諸梵天王在虛空中合掌敬禮以人音聲讚彼比丘於一面住不可思議諸淨居天與宮殿俱爲供養故詣善住比丘爾時善財童子見虛空中如是供養合掌敬禮善住比丘白言大聖我已先發阿耨多羅三藐三菩提心而未知菩薩云何正向

佛法專求佛法。恭敬佛法。修諸佛法。長養佛法。積集佛法。熏修佛法。淨諸佛法。徧淨佛法。至諸佛法。我聞大聖善能教授諸菩薩法。云何菩薩修習佛法。常見諸佛未曾遠離。常見菩薩同其善根。不離佛法。智慧具足。不捨大願。於一切眾生究竟其事。於一切劫修菩薩行。心無疲倦。不捨佛刹。普能莊嚴一切世界。悉能知見諸佛自在。不離有爲。修菩薩行。悉了如幻。入一切趣。現受生死。而無起滅。常聞正法。未曾遠離。悉

能受持諸佛法雲不離慧光普照三世爾時善住比丘告善財言善哉善哉善男子乃能發阿耨多羅三藐三菩提心能問佛法一切智法及無師法善男子我已成就菩薩無礙法門我已修習分別明了逮得無礙明淨慧光得慧光已觀察一切眾生心行無所障礙觀一切眾生死此生彼無所障礙於宿命智無所障礙於未來智無所障礙於現在世知一切眾生無所障礙於一切眾生語言法中無所障礙若一切

眾生來問難者。悉能應答。無所障礙。知一切眾生根
無所障礙。教化眾生。無所障礙。分別了知一切刹那
羅婆摩睺妒路。無所障礙。於三世海。無所障礙。已身
充滿十方。佛刹無所障礙。何以故。依無所有。無作神
通力故。善男子。我得此神通力故。於虛空中。行住坐
臥。遊騰十方。於一念中。徧至東方。一佛世界。百佛世
界。千佛百千佛。無量佛世界。乃至不可說不可說諸
佛世界。閻浮提微塵等世界。乃至不可說不可說佛

刹微塵等世界。悉得覩見彼世界中一切諸佛及其眷屬。以一切華香末香塗香寶鬘幢幡雜綵繒蓋眾妙寶網一切形像。供養彼如來。應供等正覺。彼諸如來所可開現。宣明讚歎。悉聞受持。分別通達。彼佛所有過去淨刹。我悉憶念。南西北方四維上下亦復如是。若有眾生得見我者。皆悉畢定阿耨多羅三藐三菩提。如我所見一切眾生。若大若小。若好若醜。若苦若樂。爲化度故。隨其所應。現同彼身。若有眾生來至

我所悉令安住於此正法。善男子。我唯知此一無礙法門。云何能說菩薩修大悲戒。諸波羅蜜戒。乘大乘戒。不捨菩薩道戒。滅障礙戒。菩薩藏戒。不捨菩提心戒。一切佛法深心戒。念一切智不忘失戒。如虛空戒。一切世間無所依戒。不可壞戒。無譬喻戒。不濁戒。不雜戒。離疑戒。清淨戒。離塵戒。離垢淨戒。善男子。菩薩有如是等無量功德。我豈能知如實解說。善男子。於此南方有一國土。名曰自在。城名祝藥。彼有良醫名。

曰彌伽。汝詣彼問云何菩薩向菩薩行。時善財童子
禮善住比丘足。乃至辭退南行。爾時善財童子一心
正念法光法門。具足法力。正念諸佛。不斷三寶。歎離
欲性。念善知識。普照三世。念諸大願。究竟一切法界
眾生。於一切有爲心無所著。觀察一切諸法無常。悉
能嚴淨一切佛刹。心無懈怠。於一切佛及其眷屬。心
無所著。漸至彼國。入祝藥城。求良醫彌伽。今在何所。
爾時童子見彼良醫處正法堂。坐於說法師子之座。

與一萬大眾前後圍繞。爲說輪字莊嚴光經。時善財童子詣良醫彌伽頭面禮足。右繞畢。退住一面。合掌白言。大聖。我已先發阿耨多羅三藐三菩提心。而未知菩薩云何向菩薩行。云何學菩薩行。云何於生死中常能不失菩提之心。云何得平等心而無所趣。云何逮得堅固正直之心。一切世間無能壞者。云何生大悲力而無憂惱。云何證淨普門陀羅尼力。云何生智慧光於一切法除滅癡闇。云何證諸辯力。分別諸

法眞實之藏。云何得正念力受持一切清淨法輪。未曾忘失。云何得淨趣力。於一切趣普照諸法。云何得智慧力。於一切法得決定智。了眞實義。爾時良醫謂善財言。善男子。汝已先發阿耨多羅三藐三菩提心耶。答言。唯然。爾時良醫下師子座。五體投地。敬禮善財。禮已。散妙金華。諸雜寶華。無價摩尼。勝末旃檀。無價寶衣。而以覆之。以如是等眾妙供具。而供養之。敬重讚歎。作如是言。善哉善哉。善男子。乃能發阿耨多

羅三藐三菩提心。善男子。若有能發阿耨多羅三藐
三菩提心者。則爲守護一切佛性。嚴淨一切諸佛刹
性。化眾生性。爲一切眾生說如法性。順一切業性。成
滿一切菩薩行性。不斷一切諸大願性。解離欲性。智
慧明淨普照三世一切法性。建解脫性。爲一切佛之
所護持。一切諸佛常共護念。善能隨順一切菩薩。一
切賢聖皆悉隨喜。爲一切梵天恭敬禮拜。一切諸天
恭敬供養。一切夜叉王之所建立。一切羅刹王恭敬

供養一切龍王而頂戴之。一切緊那羅王敬心讚歎。一切世界王皆悉敬念。彼爲安慰一切眾生。滅三惡道。遠離眾難。救拔一切貧窮根本。安置天人快樂之處。遇善知識。未曾遠離。聞佛妙法。發菩提心。因淨菩提心枝。得明淨光。照菩薩道。順菩薩智。住菩薩地。善男子。當知菩薩能爲一切眾生作甚難事。難值難見。爲一切眾生而作父母。莊嚴眾生。攝取一切諸天世人。除滅眾生無量苦難。守護眾生。遠離憂惱。菩薩爲

大風輪安持眾生不令墜落三惡道故。菩薩爲大地。生長一切諸善根故。菩薩爲大海。具足無盡功德藏。故。菩薩爲日。明淨慧光普照世間滅癡闇故。菩薩爲須彌山王。功德善根最高大故。菩薩爲月。令一切眾生悉清涼故。菩薩爲大將。悉能降伏一切魔故。菩薩爲善丈夫。於法城中爲君王故。菩薩爲火。能燒眾生諸貪愛故。菩薩爲雲。雨甘露法故。菩薩爲正見。悉能長養諸妙根故。菩薩爲方便。顯法海故。菩薩爲橋。令

諸眾生度生死海故。爾時良醫稱揚讚歎善財童子
及諸菩薩已。卽從口中於大光雲普照三千大千世
界。照已時。大千世界大神力天。乃至諸梵天等。悉詣
良醫。時彼良醫卽爲方便隨順。分別廣演顯現說輪
字莊嚴光經。時彼大眾聞此經已。於阿耨多羅三藐
三菩提得不退轉。所應作已。還昇本座。告善財言。善
男子。我已成就所言不虛法門。分別了知三千大千
世界諸天語言。諸龍夜叉乾闥婆阿脩羅迦樓羅緊

那羅摩睺羅伽人非人等一切語言。如此三千大千世界。十方無量無邊不可說不可說三千大千世界亦復如是。善男子。我唯知此菩薩所言不虛法門云。何能說諸菩薩行。彼諸菩薩隨順深入眾生一切相。海隨順深入眾生一切施設海。隨順深入諸名號海。隨順深入諸語言海。隨順深入諸句相續海。隨順深入諸解說句次第海。隨順深入諸如來海。隨順深入分別諸句海。隨順

深入一切眾生語語言海。逮得一切圓滿莊嚴微妙
音聲。出生分別諸文字輪。善男子。於此南方有一國
土。名曰住林。彼有長者。名曰解脫。汝詣彼問。云何菩
薩向菩薩道。修菩薩道。成菩薩道。思菩薩道。時善財
童子於良醫所聞此法門。發深淨信心。恭敬於法。決
定知見。因善知識。得薩婆若。頭面禮足。乃至辭退南
行。爾時善財童子。正念菩薩所言。不虛法門。入菩薩
語言海。念一切眾生微細方便海。思惟菩薩諸垢淨

法。出生菩薩善根光明。淨修菩薩教化眾生巧方便。門。明淨菩薩攝眾生智。堅固菩薩正直心力。長養菩薩深心之力。淨修菩薩種種欲力。信菩薩心遠離諸惡。願心堅固以大莊嚴而自莊嚴。心無疲倦勇猛精進。心不退轉。具不可壞淨信心力。金剛那羅延所不能壞。攝取一切善知識教。無礙境界皆悉清淨。無垢境界妙心現前。逮得普眼方便光明陀羅尼地。了法界地。心常現前。知平等地。非地。莊嚴清淨。不著我所。

無二境界。速得清淨無礙智慧。了知法地無所障礙。知諸方地而不退轉。分別了知一切業地。嚴淨顯現。諸佛大地。得智慧輪。分別三世。速得普樂光明三昧。徧照身心。順至一切諸境界地。如來智慧普照境界。興起一切智慧波浪。身常不離佛法勢力。爲諸如來之所護持。其心悉與一切佛等。隨順智慧普照一切。其身充滿一切刹網。成就大願。已身容受一切法界。如是念已。漸漸遊行。經十二年。至住林國。周徧推求。

解脫長者見已禮足於一面住。作如是念。我得善利見善知識。善知識者出與世難。至其所難。得值遇難。得見知難。得親近難。得其意難。得隨順難。念已白言。大聖。我已先發阿耨多羅三藐三菩提心。欲值一切佛。欲見一切佛。欲得一切佛意。欲知一切佛。欲得一切諸佛三昧。隨順一切佛。一切大願。欲滿一切佛。一切大願。欲求一切佛智慧光明。欲自身中出一切佛。欲得諸明知一切佛自在神通。欲淨一切

佛力無畏法。欲聞一切佛法。心無厭足。欲受一切佛法。欲持一切佛法。欲分別一切佛法。欲護一切佛教。欲與一切諸菩薩同。欲與菩薩同善根友。欲具菩薩諸波羅蜜。欲滿一切諸菩薩行。欲發菩薩清淨大願。欲得一切諸佛菩薩因緣法藏。欲得一切菩薩無量法藏。智慧光明。欲得一切菩薩諸三昧藏。欲出生一切菩薩諸通明藏。欲發大悲藏。教化眾生無有窮盡。欲分別智遊戲神通藏。欲分別知自在之藏。欲於自

在藏心得自在。欲清淨十種藏。一向專求此諸功德。
詣長者所。欲滿諸願。欲超出生死。欲得自在法。欲具
恭敬門。欲具方便門。欲遠離諸垢。欲清淨莊嚴。欲身
心柔軟。欲調伏諸根。白言。我聞大聖善教菩薩方便
正道。普照一切顯現妙法。示導津濟。開正法門。除滅
顛倒。拔疑惑刺。心離迷垢。照除重闇。離諸煩惱。永得
清涼。棄捨諂曲。超出生死。離不善根。長養善根。遠離
諸趣。無所染著。滅一切障。求薩婆若。到法王城。其心

安住大慈大悲。教菩薩行。修諸三昧。其心安住隨順
法門。發廣大心。具足諸力。照明一切諸羣生心。唯願
大聖爲我分別。云何菩薩向菩薩道。修菩薩行。旣修
習已。令速清淨菩薩之行。具成菩薩圓滿淨行。時解
脫長者以過去善根力。佛威神力。文殊師利憶念力
故。入菩薩三昧門。其三昧門名攝一切佛刹無量旋
陀羅尼。入已。得清淨身。於其身內十方各見十佛世
界微塵等佛及嚴淨刹。一切大眾過去所行。彼諸如

來神力自在。一切大願功德之具。諸清淨行莊嚴正道。成等正覺。轉淨法輪。教化眾生。究竟諸法。於其身內。皆悉顯現。而無雜亂。不相障礙。如本相住。形色不同。種種莊飾。菩薩大眾圍繞莊嚴。顯現一切諸佛自在。說諸願門。示現無量自在神力。或於一刹處兜率天。而作佛事。或於一刹。示現命終。或現受胎。或現處胎。顯自在力。或現出生。或現處中宮。或現出家。或現往詣莊嚴道場。或現降魔。或現成佛。或現天宮夜叉。

乾闥婆諸世界主大眾圍繞請轉法輪。或現轉法輪。或現入諸趣。或現般涅槃。或現分舍利。或現起塔。種種莊嚴。彼諸如來爲種種眾生諸眾生海種種方便。種種根種種煩惱習氣。或於小眾而現大眾。所謂一由旬眾現十由旬眾。乃至不可說佛刹微塵等由旬眾而爲說法。彼諸如來以微妙音所說正法。善財童子悉聞受持。又見彼佛自在神力不可思議。菩薩三昧。爾時解脫長者從三昧起。告善財言。善男子。我已

成就如來無礙莊嚴法門。得此法門已。覩見東方閻
浮檀光世界星宿王如來應供等正覺。明淨藏菩薩
等一切大眾。又見南方諸力世界普香如來應供等
正覺。心王菩薩等一切大眾。又見西方香光世界須
彌燈王如來應供等正覺。無礙心菩薩等一切大眾。
又見北方聖服幢世界自在神力無有能壞如來應
供等正覺。自在勢菩薩等一切大眾。又見東北方一
切樂寶世界無礙眼如來應供等正覺。無礙化菩薩

等一切大眾。又見東南方香燄光世界香智如來應供等正覺。自在慧燄光菩薩等一切大眾。又見西南方普照慧日世界法界輪幢如來應供等正覺。散一切化幢菩薩等一切大眾。又見西北方普淨現世界一切佛寶無上幢如來應供等正覺。法幢王菩薩等一切大眾。又見上方無盡佛性世界無量慧光圓滿幢如來應供等正覺。法界地幢王菩薩等一切大眾。又見下方佛解脫光世界無礙慧幢如來應供等正

覺一切眾生世界幢王菩薩等一切大眾。善男子。我見十方各一萬佛刹微塵等如來。彼諸如來不來至此。我不往彼。善男子。我若欲見安樂世界無量壽佛。隨意卽見。妙樂世界阿閼如來。善住世界師子如來。善現圓滿光明世界月慧如來。寶師子莊嚴世界毗樓遮那如來。善男子。如是等一切諸佛。隨意卽見。彼諸如來不來至此。我不往彼。知一切佛無所從來。我無所至。知一切佛及與我心皆悉如夢。知一切佛悉

如電光。了知已心如水中像。知一切佛皆悉如幻。已心亦爾。知一切佛音聲如響。已心亦爾。如是知。如是解。如是入。善男子。當知菩薩皆由已心得諸佛法。修菩薩行。淨一切刹。教化眾生。出諸大願。一切智城。遊戲神通。不思議門。諸佛菩提。一切自在。無礙境界。皆由已心。具甚深智。了一切法。是故善男子。以諸善根增長已心。雨甘露法。潤澤其心。於境界中。令心清淨。勤修精進。令心堅固。專念正法。令心不亂。智慧明淨。

遠離心垢。明淨慧光。照察其心。生自在心。發廣大心。與諸佛等。如來十力。以照其心。善男子。我唯修此。如來無礙法門。云何能說菩薩諸行。無障礙智。無礙淨行。安住觀察。現在諸佛三昧。得無涅槃三昧。具足三世平等正法。善知平等三昧境界之地。具足淨身住諸佛住。不壞境界。一切諸方法門境界。智門圓滿。智慧觀察。普照一切。於已身中。悉現一切世界成壞。而於已身及諸世界。不生二想。究竟眾行。功德具足。善

男子於此南方有一國土名曰莊嚴閻浮提頂彼有比丘名曰海幢汝詣彼問云何菩薩向菩薩道修菩薩行時善財童子頭面敬禮解脫長者足右繞畢讚歎無量阿僧祇功德眷仰觀察心無厭足悲泣流淚專念善知識順善知識觀善知識由善知識得一切智於善知識遠離諂曲於善知識發慈母心遠離一切無益法故於善知識發慈父心能生一切諸善法故辭退南行。

誦補闕真言


南無三滿哆。沒馱喃。阿鉢囉帝。喝多折。折捺彌。唵。雞
 彌。雞彌。怛塔葛塔喃。末瓦吽。發莎訶。舉字母讚

怛塔葛塔喃。末瓦吽。發莎訶。舉字母讚
 華嚴字母。眾藝親宣。善財童子得真傳。秘密義幽玄。
 功德無邊。唱誦利人天。

也 ○陽蠅容余遙 ○移寅延淫鹽由也

瑟吒 ○尸尸書書尸師尸尸師尸師師瑟
 吒 ○張徵中朱朝樞知珍檀砧詰轉吒

迦 ○岡捩公孤高該雞斤千金甘鈎迦



時普願法界眾生入般若波羅蜜門
四十二字妙陀羅。字字包含義理多。
也
瑟吒迦
梵韻滿娑

婆。功德大。法界沐恩波。

四生九有。同登華藏玄門。入難三塗。共入毘盧性海。
南無華嚴海會佛菩薩

三稱

大方廣佛華嚴經卷第四十八

東晉天竺三藏佛陀跋陀羅等譯

入法界品第三十四之四

爾時善財童子正念思惟解脫長者教念不可思議菩薩法門。思惟不可思議菩薩慧光。隨順深入不可思議甚深法界。攝取菩薩不可思議淨妙功德。顯現如來不可思議自在神力。解了不可思議莊嚴佛刹。分別知佛不可思議住持莊嚴安住境界。思惟不可

思議菩薩境界三昧莊嚴。分別不可思議世界究竟
無礙。向不可思議菩薩堅固淨業。深心受持不可思
議淨業諸願。漸趣南方。至莊嚴閻浮提頂國。周徧推
求海幢比丘。見在靜處。結加趺坐。三昧正受。滅出入
息。身安不動。寂然無覺。從其足下。出阿僧祇長者阿
僧祇婆羅門。皆悉頂冠眾寶天冠。各齋妙寶上味飲
食。一切寶衣香華寶鬘末香塗香資生之具。攝諸貧
窮。安慰撫接。雨眾寶物。令一切眾生皆大歡喜。充滿

十方從其兩膝。出刹利婆羅門。皆悉聰慧。形色威儀。服飾莊嚴。皆悉不同。以微妙音。訓導眾生。離惡修善。住真實義。說四攝法。令眾生歡喜。充滿十方。從腰兩邊。出一切眾生數等五通仙人。或服草衣。或樹皮衣。皆執澡瓶。持三奇杖。威儀庠序。無有變異。遊行虛空。讚歎三寶。爲眾生說清淨梵行。調伏諸根。演真實義。攝取世間。令諸眾生入智慧海。又復演說世間諸論。令次第住一切善根。充滿十方。從其兩脇。出不可思

議龍不可思議龍女顯現不可思議諸龍自在攝取
眾生雨不可思議香莊嚴雲華莊嚴雲鬘莊嚴雲寶
蓋莊嚴雲寶旛莊嚴雲眾寶莊嚴雲無價摩尼寶莊
嚴雲寶纓絡莊嚴雲寶座莊嚴雲寶宮殿莊嚴雲寶
蓮華莊嚴雲寶冠莊嚴雲天形像莊嚴雲天女莊嚴
雲雨如是等雲各不可思議普照十方一切世界而
以供養一切如來普令眾生皆大歡喜充滿法界從
胸德字出無量阿僧祇阿修羅王示現阿修羅王不

可思議自在神力。震動一切諸大海水。及百千世界。令諸山王皆相衝擊。震動一切諸天宮殿。映蔽一切諸魔光明。悉如聚墨。降伏一切諸魔軍眾。除滅眾生放逸。憍慢。離怒害心。滅不善法。壞煩惱山。棄捨戰諍。又以神力覺悟眾生。厭離諸惡。永絕生死。不著諸趣。普令眾生常樂寂滅。住菩提心。淨菩薩行。住諸波羅蜜。究竟菩薩地。照一切法。普照諸佛方便之法。充滿法界。從其背出。阿僧祇聲聞緣覺。應以二乘法化眾生。

故著我見者教不淨觀。貪欲多者教慈心觀。瞋恚多者教緣起觀。愚癡多者教方便智。觀察諸法爲等分者說無著法。著境界者說妙願境界。樂寂滅者教入諸趣饒益眾生。充滿法界。從其兩肩出。阿僧祇諸夜叉王諸羅刹王種種惡身。長短形色。乘種種乘。各與其眾而自圍繞。其有眾生能行善者。及眾賢聖諸菩薩等。若向正道。若向果證。皆悉防衛而守護之。或作金剛力士。守護諸佛及佛住處。若有眾生遭諸恐怖。

亦防護之。悉令無畏。諸疾病者。令得除愈。諸在難者。悉令解脫。除滅橫死。離諸熱惱。教化眾生。令得實利。壞生死輪。讚歎法輪。摧外道輪。充滿法界。從其腹出百千阿僧祇緊那羅王。各與百千阿僧祇阿僧祇緊那羅女眷屬圍繞。出百千阿僧祇乾闥婆王。各與百千阿僧祇阿僧祇乾闥婆眷屬圍繞。出百千阿僧祇天娛樂音。說實相法。讚歎諸佛。稱美菩提。及菩薩行。歎菩提門。入法輪門。好樂一切。自在法門。演說一切。

般涅槃門。攝持一切諸佛教門。歡喜一切諸佛之門。
嚴淨一切諸佛刹門。講說一切諸法界門。除滅一切
諸障礙門。宣明一切諸善根門。充滿法界。從其口出
百千阿僧祇轉輪聖王。七寶具足。四兵圍繞。放無慳
光。雨摩尼寶。諸貧苦者。悉令富樂。無財施者。令得惠
施。爲諸羣生。歎離殺盜邪淫之法。修習慈心。常說愛
語。饒益眾生。除滅妄語。遠離惡口。攝取眾生。遠離兩
舌。說和合語。離無義語。說甚深法。悉令眾生遠離口

過讚歎大悲。令眾生歡喜離瞋恚心。分別世間一切
正法觀察因緣。照明真諦。拔諸羣生邪見毒刺。除滅
疑惑。離一切障。明法實義。充滿法界。從其兩目出百
千阿僧祇日。普照十方。滅一切闇。悉令眾生除滅垢
障。遠離一切惡道苦毒。令寒者得溫。於垢濁佛刹放
明淨光。廣說乃至普照金銀瑠璃等一切世界及眾
生類。除滅眾生心之重闇。悉令歡喜。能辦眾生無量
事業。莊嚴一切世界妙法境界。充滿法界。從其眉間

出百千阿僧祇天主帝釋。無量雜寶以爲莊嚴。持釋
王法普照一切諸天宮殿。震動一切須彌山王。悉令
諸天於天境界生厭離心。歎功德力。明智慧力。起直
心力。長深心力。嚴淨念力。堅固菩提心。遠離欲樂。讚
歎樂見一切諸佛。不歎樂境界樂。歎聞法樂。離世間
樂。觀察諸法智慧之樂。離阿脩羅戰鬥恐怖。滅煩惱
軍。遠離死畏。願降眾魔。興妙法山。說須彌山等廣大
法句。能辦眾生無量事業。充滿法界。從其額上出無

量梵天。妙色端嚴。世界無倫。威儀庠序。演出妙音。讚
歎諸佛。勸請說法。令眾生歡喜。乃至能辦眾生無量
事業。充滿法界。從其頭上。出阿僧祇諸菩薩眾。種種
形色。相好嚴身。放無量光網。現檀波羅蜜。讚歎布施。
遠離慳吝。無所貪著。莊嚴一切世界。稱揚淨戒。遠離
惡戒。安立眾生。菩薩律儀。歎大乘戒。出生大悲功德
之藏。說一切有。皆悉如夢。說五欲樂。無有滋味。安立
眾生。離煩惱法。稱揚讚歎金色身業。讚歎慈心遠離。

殺害滅畜生趣。歎多聞力。安立眾生於忍辱力。歎普
照自在。遠離放逸。安立眾生於不放逸。歎禪波羅蜜。
心得自在。拔邪見刺。讚歎正見般若波羅蜜。樂智自
在。歎隨世間遠離生死。而於諸趣自在受生。歎願力
滿足。出諸通明自在壽命。讚歎一切陀羅尼力。出生
願力淨三昧力。現自在生。讚歎智慧普照一切眾生
諸根。分別演說諸心心行。照十力智。讚歎自在薩婆
若。充滿法界。從其頂上出百千阿僧祇佛。身分具足。

相好莊嚴猶如金山普照一切。出妙音聲充滿法界。
顯現無量無邊神力自在。普雨一切甘露法雲。爲坐
道場菩薩雨平等法雲。爲灌頂菩薩雨普門法雲。爲
深忍菩薩雨普莊嚴法雲。爲童眞菩薩雨堅固山法
雲。爲不退菩薩雨海藏法雲。爲成就直心菩薩雨普
境界法雲。爲方便道菩薩雨自性地音聲法雲。爲生
貴菩薩雨隨順世間法雲。爲修行菩薩雨厭離法雲。
爲治地菩薩雨長養法藏法雲。爲初發心菩薩雨精

進法雲。爲信行者雨。無盡門法雲。爲色界眾生雨。無盡平等法雲。爲大梵天雨。普藏法雲。爲大自在天雨。生力法雲。爲魔天王雨。心幢法雲。爲化樂天雨。淨念法雲。爲兜率天雨。淨意法雲。爲夜摩天雨。歡喜法雲。爲帝釋天雨。莊嚴虛空法雲。爲夜叉王雨。歡喜法雲。爲乾闥婆王雨。自在圓滿法雲。爲阿脩羅王雨。大境界法雲。爲迦樓羅王雨。無量世界法雲。爲緊那羅王雨。饒益眾生勝智法雲。爲諸人王雨。不可樂法雲。爲

諸龍王雨歡喜幢法雲。爲摩睺羅伽王雨寂靜法雲。
爲地獄眾生雨不亂念莊嚴法雲。爲諸畜生雨智慧
法雲。爲閻羅王處雨無畏法雲。爲餓鬼處雨正希望
法雲。悉令眾生向賢聖門。充滿法界。彼諸如來一一
毛孔各放阿僧祇淨光明網。阿僧祇妙色。阿僧祇莊
嚴。阿僧祇境界。辦阿僧祇事。充滿十方。爾時善財一
心觀察海幢比丘。念彼三昧法門。思惟不可思議菩
薩境界。思惟無量無作現在莊嚴普門法門。觀察法

界莊嚴智慧。依佛智住。出菩薩力。建菩薩願力。增廣菩薩諸行。如是正立觀察。一日一夜乃至七日七夜。半月一月乃至六月六日。過此已後。海幢比丘從三昧起。爾時善財歎未曾有。合掌白言。甚奇大聖。如此三昧最爲甚深。如此三昧最爲廣大。如此三昧境界無量。如此三昧不可思議。神力自在。如此三昧不可稱量。如此三昧慧光明淨。如此三昧阿僧祇莊嚴。以爲莊嚴。如此三昧境界不可壞。如此三昧無有退轉。

如此三昧普照十方一切世界。如此三昧具有無量
義趣方便。大聖。其有菩薩入此三昧。能爲一切除滅
眾苦。永絕地獄餓鬼畜生一切楚毒。遠離諸難。令天
人趣悉得寂靜。令眾生歡喜。常樂甚深禪定境界。厭
離有爲。超出三界。發菩提心。長養智慧功德。因緣長
養。彌廣無上大悲。生大願力。照菩薩道。智慧莊嚴。六
波羅蜜。究竟出生大乘境界。智慧徧照。普賢所行。得
菩薩諸地智慧光明。具一切菩薩清淨願行。證一切

智境界。大聖。此三昧者名爲何等。善男子。此三昧名
普眼捨得。又名清淨光明般若波羅蜜境界。又名清
淨莊嚴普門。善男子。修習般若波羅蜜故。得此三昧。
得此三昧時。卽得百萬阿僧祇三昧。大聖。此三昧唯
有此功德境界。復有餘耶。善男子。此三昧者。分別一
切世界無所障礙。究竟一切世界無所障礙。遊行一
切世界無所障礙。莊嚴一切世界無所障礙。修治一
切世界無所障礙。嚴淨一切世界無所障礙。見一切

佛無所障礙。觀一切佛功德無所障礙。知一切佛自在神力無所障礙。究竟一切佛力無所障礙。度一切佛功德大海無所障礙。雨一切佛淨妙法雲無所障礙。度一切佛法無所障礙。得一切佛轉法輪智不可破壞無所障礙。得一切佛清淨大眾海之源底無所障礙。隨順普入十方世界無所障礙。隨順觀察十方佛法無所障礙。大悲攝取十方眾生無所障礙。大慈充滿十方世界無所障礙。見十方佛心無厭足無所

障礙。隨順徧入眾生大海無所障礙。了知眾生一切
根海無所障礙。分別一切諸眾生海無所障礙。善男
子。我唯知此清淨光明般若波羅蜜三昧法門。云何
能說諸大菩薩究竟之行。諸大菩薩皆悉深入智慧
大海。善能分別清淨法界。智慧究竟一切法趣。慧光
無量充滿一切。得大陀羅尼自在光明。一切三昧圓
滿清淨。出生一切自在通明。深入一切無盡辯海。雷
震一切諸地音聲。悉能救護一切眾生。我尚不能說

彼所行。況其功德。顯其境界。說其境界。照其法門。明其積聚。諸功德藏。說其正道。諸三昧海。平等智慧。善男子。於此南方。有一住處。名曰海潮。彼有園林。名普莊嚴。有優婆夷。名曰休捨。汝詣彼問。云何菩薩。修菩薩道。淨菩薩道。時善財童子。歡喜無量。於海幢比丘所。不堅固中。而得堅固。於不實中。而得真實。究竟功德。妙藏境界。得明淨智。普照一切。逮得甚深三昧光明。到淨解脫。方便觀察一切世界。淨諸法門。明淨智。

慧普照十方。頭面禮足。繞無數匝。眷仰觀察。辭退南
行。爾時善財童子。正念思惟。海幢比丘。心未曾捨。樂
見無厭。願戀聖音。目想慈顏。正念思惟。其心境界。三
昧境界。願行境界。正念思惟。明淨智慧。敬善知識。向
善知識。念善知識。教於善知識。起愛恭敬。又作是念。
因善知識。得見諸佛。善知識者。開示顯現一切佛法。
善知識者。是奇特法。令人得見諸佛法故。善知識者。
爲明淨眼。令人見佛如虛空故。善知識者。爲善津濟。

令人於佛華池得源底故。漸漸南行。至海潮處。見普莊嚴園林。七寶垣牆。周帀圍繞。諸妙寶樹。行列莊嚴。一切華樹。雨華如雲。布散其地。香樹芬馨。普熏十方。鬘樹垂鬘。寶樹雨寶。徧布莊嚴。眾寶衣樹。彌覆一切。諸音樂樹。出微妙音。以如是等諸珍玩具。而以莊嚴。此園林中。有一萬講堂。眾寶合成。一萬樓閣。閣浮檀金。以覆其上。一萬宮殿。毗樓遮那寶藏莊嚴。一萬浴池。眾寶合成。七寶欄楯。周帀圍繞。八功德水。湛然盈。

滿閣浮檀金沙淨水寶珠徧布池底。四面寶階端嚴齊正。寶多羅樹周帀行列。鳧雁鴛鴦孔雀哀鸞異類。眾鳥遊戲其中。出和雅音。覆以金網。風自然起。出微妙聲。設眾寶帳寶樹周徧。建阿僧祇殊勝寶幢。放大光明照百由旬。百萬池沼黑梅檀泥凝積池底。生寶蓮華充滿其中。從彼蓮華出大光明普照一切。彼園林中有大宮殿名莊嚴幢。海藏妙寶以爲其地。瑠璃寶柱莊嚴殊妙。巍巍高大。猶若金山。眾生見者無不

喜樂。有阿僧祇淨摩尼寶普照一切。出自然香。謂明相香。香王香。覺悟香等。敷眾寶座。謂蓮華藏座。照諸方藏座。明淨藏座。眾生悅樂藏座。師子藏座。離垢寶藏座。不思議藏座。普門摩尼妙寶藏座。光嚴藏座。大海藏座。金剛師子藏座。無量窗牖妙寶莊飾。又張一萬眾妙寶帳。謂寶衣帳。妙寶華帳。寶樹枝帳。摩尼寶帳。金帳。莊嚴帳。香帳。娛樂帳。自在龍王帳。馬王帳。釋天莊嚴寶帳。一萬寶網交絡其上。謂金鈴網。珍寶蓋。

網眾寶像網。海藏珠網。青瑠璃摩尼寶網。師了吼網。
月摩尼網。香像網。眾寶山網。寶王網。一萬光明普照
世界。謂夜光摩尼光明。日藏摩尼淨寶光明。月幢摩
尼妙寶光明。香燄光明。妙藏摩尼寶光明。鉢曇摩光
明。夜光摩尼淨寶光明。大燈摩尼淨寶光明。普照諸
方摩尼光明。又出十種火香電光。雨十種雲。出過諸
天。謂十種黑梅檀雲。十種曼陀羅華雲。十種莊嚴雲。
十種鬘雲。十種雜色衣雲。十種寶雲。十種天子雲。十

種天女雲。十種菩薩雲。常樂聞法。爾時休捨優婆夷處。金色藏座。海藏寶莊嚴網羅覆其身。吉由羅莊嚴出過諸天。大摩尼網莊嚴其首。師子珠寶無量如意。淨摩尼寶嚴飾其身。無量億眾恭敬圍繞。合掌而住。東方無量眾生諸梵天王。梵身大梵輔。他化自在天王。乃至人及非人。一切諸王來詣其所。南西北方四維上下亦復如是。其有得見此優婆夷者。一切眾病皆悉除愈。心淨離垢。拔邪見刺。除滅障礙。淨無礙。

地於彼地中長養善根。成就諸根方便。攝一切智。一切陀羅尼門。一切三昧門。皆現在前。發一切願門。究竟一切行門。出生一切淨門。其心廣大。出生一切通。得無礙身。靡所不至。爾時善財童子。入普莊嚴園林。周徧觀察。見休捨優婆夷。處金色座。往詣其所。頭面禮足。繞無數匝。白言。大聖。我已先發阿耨多羅三藐三菩提心。而未知菩薩云何學。菩薩行修。菩薩道。唯願爲我具足演說。答言。善男子。我唯成就一法門。若

見聞念知親近我者。皆悉不虛。善男子。若有眾生不
種善根。不親近善知識。不爲諸佛所護念者。彼諸眾
生不能見我。善男子。若有眾生能見我者。則於阿耨
多羅三藐三菩提得不退轉。東方諸佛常來我所處
寶師子座。爲我說法。南西北方四維上下一切諸佛
悉來我所處寶師子座。爲我說法。善男子。我常見諸
佛菩薩。未曾遠離。善男子。我此大眾有八萬四千億
菩薩。皆我同行。於阿耨多羅三藐三菩提得不退轉。

此普莊嚴園林一切眾會亦於阿耨多羅三藐三菩提得不退轉。善財白言。大聖發菩提心來。爲久如耶。答言。善男子。我念過去於定光佛所出家求道。淨修梵行。恭敬供養。聞法受持。次於離垢佛所出家求道。淨修梵行。恭敬供養。聞法受持。次於妙幢佛。妙德佛。福德藏佛。毗樓遮那佛。普眼佛。梵壽佛。自在佛。善天佛。善男子。我於如是等三十六恆河沙佛所出家求道。淨修梵行。恭敬供養。聞法受持。了知一切諸佛智。

慧初發菩薩心。充滿法界。無量大悲。攝取眾生。發諸
菩薩無量大願。究竟十方法界。無量大悲。普覆眾生。
於一切刹一切劫中。修習菩薩無量諸行。無量三昧
力。不捨不轉。菩薩正道。菩薩無量陀羅尼力。善能護
持一切眾生。菩薩無量淨智慧力。方便正念。普照三
世。菩薩無量諸通明力。徧遊一切諸世界網。菩薩無
量諸辯才力。能以一言悅一切眾。善男子。我有菩薩
無量自在神力。能以一身滿一切刹。善財白言。大聖。

久如當成阿耨多羅三藐三菩提。善男子。菩薩不爲教化一眾生故發菩提心。不爲教化百眾生乃至不爲教化不可說不可說轉眾生故發菩提心。廣說如阿僧祇品不爲教化一世界眾生故發菩提心。乃至不爲教化不可說不可說世界眾生故發菩提心。不爲教化閻浮提微塵等眾生故。不爲教化三千大千世界微塵等眾生故。乃至不爲教化不可說不可說三千大千世界微塵等眾生故發菩提心。菩薩不爲

恭敬供養一如來故發菩提心。乃至不爲恭敬供養不可說不可說諸如來故發菩提心。菩薩不爲淨一刹故發菩提心。乃至不爲淨不可說不可說刹故發菩提心。菩薩不爲淨閻浮提微塵等刹故發菩提心。乃至不爲淨不可說不可說三千大千世界微塵等刹故發菩提心。菩薩不爲護持一佛法故發菩提心。廣說如上菩薩不爲滿一願故發菩提心。不爲莊嚴一刹故。不爲知一佛眷屬故。不爲受持一佛法故。不

爲知一眾生心海故。不爲度一眾生根海故。不爲知一世界諸劫次第成敗故。不爲知一眾生煩惱習氣故。不爲斷一眾生煩惱故。不爲滿一眾生行故。發菩提心。欲教化一切眾生。故發菩提心。欲恭敬供養一切諸佛。欲嚴淨一切佛刹。欲守護受持一切佛法。欲滿足一切大願。欲知一切佛眷屬。欲知一切眾生心海。欲知一切眾生心所行。欲知一切眾生諸根輪。欲知一切世界一切劫數。次第成敗。欲知一切眾生。

煩惱習氣欲斷一切眾生煩惱欲滿一切眾生行故
發菩提心善男子略說菩薩有如是等百萬阿僧祇
方便法門菩薩悉應究竟了知隨順智慧究竟修習
菩薩等行淨一切佛刹心無倒惑善男子是故我發
此願淨一切刹我願乃滿斷一切眾生煩惱習氣我
願乃滿大聖此法門者名爲何等善男子此法門名
離憂安隱幢我唯知此法門諸大菩薩其心如海悉
能容受一切佛法我當云何能知其行諸菩薩心堅

固正直如須彌山。諸大菩薩則爲見藥。若有見者除滅煩惱。諸大菩薩則爲淨日。除滅一切眾生癡闇。諸大菩薩則爲大地。悉能載持一切眾生。諸大菩薩則爲智風。長養一切眾生實義。諸大菩薩則爲自在。以淨智光普照一切。諸大菩薩則爲慶雲。隨其所應。雨甘露法。諸大菩薩則爲淨月。放諸功德光明之網。諸大菩薩則爲帝釋。悉能守護一切眾生。我當云何能知其行。善男子。於此南方有一國土。名曰海潮。彼有

仙人。名毗目多羅。善能解說。菩薩諸行。汝詣彼問。時善財童子。頭面禮足。繞無數匝。觀察無厭。悲泣流淚。正念思惟。得菩提難。遇善知識難。得與上人共同止難。得菩薩諸根難。滿足菩薩直心難。值遇同意善知識難。觀真實難。如法正教難。出生妙心難。念一切智難。長養法明難。作是念已。辭退南行。爾時善財童子。思惟隨順菩薩正教。淨菩薩行。心能長養菩薩德力。心見諸佛。心欲菩提。心能發起長養大願。心照十

方一切諸法。心見法實。心覆一切無有散亂。心淨智
慧觀諸法界。除滅癡闇。心淨正直。除滅障礙。心能降
伏一切眾魔。漸漸遊行。至海潮國。周徧推求。仙人毗
目多羅。時彼仙人在大林中。阿僧祇樹莊嚴。此林寶
葉普覆。諸華果樹常以嚴飾。寶樹雨寶徧散其地。大
梅檀樹周帀行列。諸沈水樹常出妙香。尼拘律樹閻
浮檀樹。雨甘香果。優鉢羅鉢曇摩。分陀利華。以爲莊
嚴。爾時善財見彼仙人。在此林中。服樹皮衣。縈髮草

座。一萬仙人以爲眷屬。如梅檀林。梅檀圍繞。往詣其所。五體敬禮。念善知識。能開導我。薩婆若門。念善知識。現眞實道。念善知識。能安置我。一切智地。念善知識。然智寶燈。明淨慧光。長養十力智慧光明。善知識道。卽一切智無盡之藏。善知識爲燈。照一切智境界。故善知識爲橋。度生死故。善知識爲蓋。生大慈力。覆一切故。善知識爲光。不虛照一切法。眞實相故。善知識爲海潮。滿足大悲故。作是念已。繞無數匝。合掌而

立白言。大聖。我已先發阿耨多羅三藐三菩提心。而未知菩薩云何學菩薩行。修菩薩道。時彼仙人觀察大眾而作是言。汝等當知此童子者。已發阿耨多羅三藐三菩提心。請一切眾生普施無畏。饒益一切眾生。向深智海。欲飲一切諸佛法雨。欲盡一切法海源底。欲成世間智慧大海。欲興大悲重雲。欲雨甘露法雨。欲出世間明淨智月。欲滅世間諸煩惱闇。欲長養一切眾生善根。爾時大眾各持種種金色妙華。香可

悅樂。散童子。上頭面禮足。曲躬敬繞。作如是言。此童子者。悉能救護一切眾生。滅三惡道。離閻羅趣。一切諸難。消渴欲海。除滅苦陰。捨愚癡闇。斷貪愛縛。能升功德金剛圍山。建立世間智慧須彌。於世間出明淨智日。顯曜一切善根諸法。示導世間明識善惡。時彼仙人告大眾言。若有能發阿耨多羅三藐三菩提心者。得一切智淨一切佛功德之地。時彼仙人告善財言。善男子。我已成就菩薩無壞幢智慧法門。善財白。

言大聖。彼法門者。境界云何。時彼仙人。卽申右手。摩善財頂。摩已。執善財手。卽時善財自見其身。在於十方十佛世界。微塵等佛所。見彼諸佛相好莊嚴。以阿僧祇寶珍玩之具。莊嚴其刹。又見彼佛眷屬大海。所從聞法。悉能受持。乃至不失一句一味。分別受持正法。梵輪。受諸法雲。入佛大願。淨修諸力。清淨願行。究竟諸功德藏。見彼諸佛隨應化度一切眾生。見一切佛清淨圓滿大光明網。見已隨順無礙智慧光明。究

竟佛力。或自見身於一佛所。一日一夜。或復自見於
餘佛所。七日七夜。如是次第於餘佛所。或有半月一
月一歲百歲千歲。或百千歲百千億歲。或百億那由
他歲。或半劫一劫百劫千劫百千劫。或百億那由他
劫。乃至不可說不可說。那由他劫。或閻浮提微塵等
劫。乃至不可說不可說。世界微塵等劫。爾時善財爲
無壞幢。智慧法門。照故得明淨藏三昧。無盡法門三
昧。照故得遊一切方陀羅尼光明。金剛圓滿光明法

門照故。得分別智。意樓閣三昧。住平地莊嚴法藏。般
若波羅蜜。精進照故。得佛虛空藏三昧。光明一切諸
佛法輪三昧。光明相照故。得三世圓滿智。無盡光明。
時彼仙人。放善財手。爾時善財。卽自見身。還在本處。
時彼仙人。問善財言。汝憶念耶。答言。唯然。大聖善知
識力故。善男子。我唯知此菩薩。無壞幢智慧法門。我
豈能知大菩薩行。諸大菩薩。皆得一切眾生自在。三
昧。於一切時。輪而得自在。出生諸佛。無盡智慧。證一

切佛嚴淨慧燈。於一念中了。三世事。於一切世間現。淨慧身。充滿法界。隨眾生所應。悉現其前。了知一切。眾生所行。圓滿清淨。悉可愛樂。我豈能知大菩薩行。妙功德。願嚴淨佛刹。善察輪機。智慧境界。甚深三昧。神力自在。解說淨界。遊戲神通。法身音聲。究竟智慧。如是等事。非我境界。善男子。於此南方。有一國土。名曰進求。有婆羅門。名方便命。汝詣彼問。云何菩薩向菩薩道。修菩薩道。時善財童子。歡喜無量。恭敬禮已。


繞無數帀。瞻仰觀察。辭退南行。

大方廣佛華嚴經卷四十八


誦補闕真言

南無三滿哆。沒馱喃。阿鉢囉帝。喝多折。折捺彌。唵。雞
彌。雞彌。怛塔葛塔喃。末瓦山。斫鉢囉帝。烏怛摩。怛摩。
怛塔葛塔喃。末瓦吽。發莎訶。舉字母讚
華嚴字母。眾藝親宣。善財童子得真傳。秘密義幽玄。
功德無邊。唱誦利人天。

娑○桑僧捻甦驩腮西新珊心三凍娑
麼●茫嘗蒙模毛埋彌民瞞○姁毋麼
伽●強殫窮渠喬○奇勤虔琴鉗求伽



時普願法界眾生入般若波羅蜜門
四十二字妙陀羅。字字包含義理多。



梵韻滿娑

婆。功德大。法界沐恩波。

四生九有。同登華藏玄門。入難三塗。共入毘盧性海。
南無華嚴海會佛菩薩

三稱

大方廣佛華嚴經卷第四十九

東晉天竺三藏佛陀跋陀羅等譯

入法界品第三十四之五

爾時善財童子爲無壞幢智慧法門所照。決了諸佛不可思議自在神力。善知菩薩不可思議法門。又不可思議菩薩三昧智慧以照其心。得一切時三昧光明。得一切相三昧境界光明。得明淨智。令一切眾生得勝妙法。得一切處至道法門。隨順世間行。心無有

二。以明淨智普照境界。得一切聲聞明淨忍藏。得無
生忍。知法實相。常行菩薩行。不捨菩薩心。增長薩婆
若心得十力明普照一切。樂妙法音。心無厭足。如說
修行。住薩婆若。究竟一切智境界。出生無量菩薩莊
嚴心。滿足菩薩清淨大願。於一念頃徧至一切諸佛
刹網。教化成熟無量眾生海。心無懈怠。悉見菩薩無
量行境界。悉分別見一切世間見諸佛刹種種莊嚴。
於微細境界。悉能安置無量世界。又能見彼種種莊

嚴。悉能分別無量世界諸語言法。又知無量眾生欲樂。知諸眾生無量所行。以無量方便教化眾生。善知殊方。隨其所應。化度眾生。念善知識。漸漸遊行。至進求國。周徧推求。彼婆羅門。時婆羅門修諸苦行。求一切智。四面火聚。猶如大山。中乃刀山。高峻無極。從彼山上。自投火聚。爾時善財詣婆羅門。頭面禮足。合掌而立。白言。大聖。我已先發阿耨多羅三藐三菩提心。而未知菩薩云何學菩薩行。修菩薩道。願爲我說。答。

言善男子。汝今若能登此刀山。投火聚者。菩薩諸行。皆悉清淨。爾時善財。作如是念。得人身難。離諸難難。得無難難。得淨法難。值佛世難。具諸根難。聞佛法難。遇善知識難。得與同止難。得聞正教難。得正命難。順趣正法難。此將非魔魔所使耶。非善知識而現善知識相。將非惡菩薩耶。而今爲我作壽命難。作善根難。薩婆若難。此非正教。險惡道耳。遠離法門。薩婆若等一切佛法。作是念時。十萬梵天在虛空中。作如是言。

善男子。莫作是念。莫作是念。此是大聖。具足金剛智。慧光明。精進不退。悉已究竟一切境界。欲竭一切眾生貪愛大海。欲裂一切諸邪見網。欲燒一切眾生煩惱。除滅愚闇。普照一切。令一切眾生離生死險難。除滅三世愚癡闇冥。放淨光明。普照一切。時諸梵天及自在天。眾生主天等諸邪見天。作如是言。我造眾生。我爲一切世間最勝。我爲最上。我爲第一。是諸天等。見婆羅門修大苦行。五熱炙身。見如是已。各於諸禪。

不得滋味。來詣其所。時婆羅門以自在力而爲說法。令滅邪見。捨離我心。發大慈悲。普覆眾生長養菩提。正直之心。開四種道。求佛法身。隨所應化。悉能示現。佛微妙音。一切悉聞。無有障礙。復有一萬魔在虛空中。以種種摩尼寶華。散婆羅門。告善財言。善男子。此婆羅門苦行力故。放大光明。令我宮殿諸莊嚴具。悉如聚墨。我不復樂。卽與無量諸天天女眷屬圍繞。來詣其所。爲我說法。悉於阿耨多羅三藐三菩提得不

退轉。復有一萬他化自在天。在虛空中。各持天華。恭敬供養。作如是言。善男子。此婆羅門苦行力故。放大光明。令我宮殿諸莊嚴具。悉如聚墨。我不復樂。卽與眷屬來詣其所。爲我說法。令我於心而得自在。於煩惱中而得自在。於受生中而得自在。除滅障礙而得自在。於一切三昧而得自在。於莊嚴具而得自在。於壽命。中而得自在。乃至令我於一切佛法而得自在。復有一萬化自在天。在虛空中。以天妓樂。恭敬供養。

作如是言。善男子。此婆羅門五熱炙身時。放大光明。照我宮殿及莊嚴具。照已。悉令我等不樂五欲。不求欲樂。身心柔軟。與眷屬俱來詣其所。爲我說法。淨心明淨心。善奇特心。柔軟心。歡喜心。乃至逮得清淨十力。長養離生。出生無量清淨之身。乃至得佛清淨法身。得清淨口微妙音聲。徧至一切無所障礙。乃至得一切智。復有一萬兜率陀天。與其眷屬在虛空中。雨一切末香雲。恭敬供養。作如是言。善男子。此婆羅門

五熱炙身時。我自於宮殿不樂須臾。來詣其所。爲我
解說無著之法。少欲知足。長養善根。發菩提心。乃至
究竟一切佛法。復有一萬諸天。三十三天。及阿脩羅
與眷屬。俱在虛空中。雨曼陀羅華雲。摩訶曼陀羅華
雲。恭敬供養。作如是言。善男子。此婆羅門五熱炙身
時。我於天樂不須臾樂著。來詣其所。爲我說法。遠離
欲樂。乃至爲我說無常法。變易不住。斷除一切放逸
憍慢。長養發起菩提之心。又善男子。我見此婆羅門

時須彌山頂六種震動。我於爾時心大恐怖。專求一切智。復有一萬大龍王。伊那槃那難陀跋難陀等。與黑梅檀香雲。諸龍王女出妙樂音。雨天華雲。天香水雲。恭敬供養。作如是言。善男子。此婆羅門五熱炙身。時放大光明。普照一切龍王宮殿。令諸龍王離熱沙苦。金翅鳥怖。滅瞋恚熱。身體清涼。發歡喜心。發喜心已。而爲說法。厭惡龍趣。至誠悔過。除滅業障。發阿耨多羅三藐三菩提心。乃至住一切智。復有一萬夜叉。

王種種供養此婆羅門。及以善財。作如是言。善男子。此婆羅門五熱炙身時。我及羅刹鳩槃荼等。悉於眾生發大慈心。無所燒害。慈心力故。不樂宮殿。與眷屬俱。來詣其所。彼婆羅門以大慈心。蔭覆我等。令我歡喜。身心柔軟。安隱快樂。爲我說法。乃至令無量夜。又羅刹鳩槃荼等。發阿耨多羅三藐三菩提心。復有一萬乾闥婆王。在虛空中。作如是言。善男子。此婆羅門五熱炙身時。放大光明。照我宮殿。悉令我等得不思

議樂來詣其所爲我說法。乃至令發阿耨多羅三藐三菩提心。得不退轉。復有一萬阿脩羅王在虛空中。右膝胡跪。一心合掌。恭敬供養。作如是言。善男子。此婆羅門五熱炙身時。一切阿脩羅宮殿大地大海皆悉震動。我等爾時除滅高心。來詣其所。爲我說法。遠離一切諂曲幻心。得深法忍。安住不動。具足十力。復有一萬迦樓羅王。勇力持等。化爲外道童子。在虛空中。作如是言。乃至爲我說法。安立大慈。讚歎大悲。度

生死海。沒於五欲泥者。歎淨直心門。生慧方便翅。隨其所應。皆悉化度。復有一萬緊那羅王。在虛空中。作如是言。善男子。此婆羅門五熱炙身時。於我寶多羅樹中。金鈴網中。寶纓絡中。諸寶樹中。種種樂器中。自然演出微妙音聲。佛聲法聲。比丘僧聲。不退轉諸菩薩聲。菩提心聲。某方某國有某菩薩。發菩提心。修行苦行。修大布施。莊嚴道場。往詣道場。成正覺聲。善男子。我聞是聲。卽大歡喜。來詣其所。爲我說法。令無量

眾生於阿耨多羅三藐三菩提得不退轉。復有無量
欲界諸天在虛空中。恭敬供養。作如是言。善男子。此
婆羅門五熱炙身時。放大光明。乃至普照阿鼻地獄。
除滅苦痛。若有眾生見斯光者。命終生天。知報恩故。
捨五欲樂。來詣其所。樂觀無厭。爲我說法。乃至令無
量眾生發菩提心。爾時善財童子聞奇特法。心大歡
喜。於婆羅門所發起真實善知識心。頭面禮足。如是
白言。向疑聖教。違知識教。唯願大聖受我悔過。時婆

羅門爲善財童子而說偈言。

欲求菩提者 當順知識教 除滅諸疑惑

一心常恭敬 修習於正道 知法眞實相

安住於道場 成就佛菩提

爾時善財童子卽登刀山。自投火聚。未至中間卽得菩薩安住三昧。旣至火燄復得菩薩寂靜安樂。照明三昧。得三昧已。白言。甚奇大聖。如是刀山及大火聚。我身觸時安隱快樂。時婆羅門告善財言。善男子。我

唯成此菩薩無盡法門。明淨法王諸菩薩行。滿足諸願。悉滅眾生煩惱。邪見得不退轉。不可盡心。離懈怠心。一切無畏。得金剛那羅延藏。究竟大心境界。無有疲倦。遠離諸垢。不動如風輪。精進不退。以大莊嚴而自莊嚴。饒益眾生。如是法門。我當云何能知能說。善男子。於此南方有城。名師子奮迅。有一童女。名彌多羅尼。汝詣彼問。云何菩薩學菩薩行。修菩薩道。時善財童子。頭面禮足。繞無數匝。觀察無厭。辭退南行。爾

時善財童子起不可思議恭敬之心。好樂淨法。專向大乘。求諸佛智。親近如來。觀法境界。無所障礙。決定實際。住實境界。至三世際。解了三世如虛空際。決定了知三世法際。不住法際。住無礙際。不違業際。決定了知佛際。非際。住如來住。滅一切妄想。不著一切佛一切眷屬。一切世界。知一切眾生。非我無實。一切音聲。離語言道。解一切色。猶如電光。漸漸南行。至彼城已。周徧推問。彌多羅女。爲在何所。時有人答。今在師

子幢王宮內聞已卽詣門下求見彼女。時無量人眾悉入宮中。善財問言。諸人今者爲詣何所。答言。我等欲詣彌多羅女聽受正法。爾時善財作如是念。此王宮門自在出入。無所障礙。善財卽入。見彼女人處在明淨寶藏法堂。地玻瓈色。瑠璃爲柱。金剛爲壁。閻浮檀金欄楯。牖光明普照。阿僧祇摩尼寶而莊校之。又千寶藏摩尼寶鏡。圓滿莊嚴。眾生所樂。明淨妙寶。以爲嚴飾。又阿僧祇摩尼寶網。羅覆其上。百千金鈴。

出微妙音。有如是等不可思議眾寶校具。莊嚴講堂。見彼女人身如真金。目髮紺色。處淨水香寶師子座。覆以金網。敷眾寶衣。大眾圍繞。以梵音聲而爲說法。見已。頭面禮足。繞無數匝。合掌恭敬。於一面住。白言。大聖。我已先發阿耨多羅三藐三菩提心。而未知菩薩云何學菩薩行。修菩薩道。答言。善男子。汝諦觀此法堂莊嚴。爾時善財見一一瑠璃柱中。一金剛壁中。一一摩尼鏡中。一一形像中。一一寶中。一一莊嚴

中。一一金鈴中。一一寶樹中。一一寶形像中。一一寶瓔珞中。悉見法界等一切如來從初發心修菩薩行。成滿大願功德莊嚴。成等正覺。轉淨法輪。乃至示現無餘涅槃。如淨水中見月影像。善財童子於一切境界莊嚴具中。見一切佛從初發心乃至示現無餘涅槃。亦復如是。皆是彼女過去善根依果力故。爾時善財正念諸佛恭敬合掌。白言。大聖。此何法門。答言。善男子。是般若波羅蜜普莊嚴法門。我於三十六恆河

沙佛所。修此法門。彼諸如來各以異門。令我入此般
若波羅蜜。普莊嚴法門。善財白言。大聖。此法門者。境
界云何。答言。善男子。我入此法門。正念思惟。分別受
持。生平等時。得普門陀羅尼。等百萬阿僧祇陀羅尼
門。以爲眷屬。所謂佛刹陀羅尼門。佛陀羅尼門。法陀
羅尼門。眾生陀羅尼門。過去陀羅尼門。未來陀羅尼
門。現在陀羅尼門。安住實際陀羅尼門。功德陀羅尼
門。功德具陀羅尼門。智陀羅尼門。智具陀羅尼門。諸

願陀羅尼門。分別諸願陀羅尼門。行陀羅尼門。修集
行陀羅尼門。淨行陀羅尼門。滿足行陀羅尼門。業陀
羅尼門。不違業陀羅尼門。業流陀羅尼門。業所作陀
羅尼門。遠離惡業陀羅尼門。向正業陀羅尼門。業自
在陀羅尼門。善業陀羅尼門。善行三昧陀羅尼門。三
昧陀羅尼門。隨順三昧陀羅尼門。分別三昧陀羅尼
門。無壞三昧陀羅尼門。諸通明陀羅尼門。心海陀羅
尼門。種種心陀羅尼門。淨心地陀羅尼門。普照重惡

心陀羅尼門。心喜調御師陀羅尼門。發起眾生陀羅
尼門。煩惱陀羅尼門。習氣陀羅尼門。煩惱方便陀羅
尼門。欲陀羅尼門。眾生所行陀羅尼門。眾生種種業
行陀羅尼門。眾生世間自性陀羅尼門。眾生相陀羅
尼門。方陀羅尼門。說法陀羅尼門。大悲陀羅尼門。大
慈陀羅尼門。寂滅陀羅尼門。諸語言道陀羅尼門。方
便非方便陀羅尼門。隨順陀羅尼門。分別陀羅尼門。
攝取陀羅尼門。無礙實際陀羅尼門。普陀羅尼門。佛

法陀羅尼門。菩薩法陀羅尼門。緣覺法陀羅尼門。聲聞法陀羅尼門。世間法陀羅尼門。世界起陀羅尼門。世界滅陀羅尼門。世界形色陀羅尼門。淨世界陀羅尼門。垢世界陀羅尼門。於淨世界現垢濁刹陀羅尼門。於垢世界現清淨刹陀羅尼門。純淨世界陀羅尼門。純垢世界陀羅尼門。平等世界陀羅尼門。翻覆世界陀羅尼門。伏住世界陀羅尼門。入因陀羅網陀羅尼門。回轉世界陀羅尼門。住相陀羅尼門。小處置大

陀羅尼門。大處置小陀羅尼門。分別佛身陀羅尼門。
放佛莊嚴光明網陀羅尼門。分別如來圓滿音聲陀
羅尼門。佛正法輪陀羅尼門。生佛法輪陀羅尼門。分
別佛法輪陀羅尼門。無壞佛法輪陀羅尼門。佛辯法
輪陀羅尼門。向佛法輪陀羅尼門。能作佛事陀羅尼
門。向諸佛眾陀羅尼門。分別諸佛大眾陀羅尼門。諸
佛無量大眷屬海陀羅尼門。普照佛力陀羅尼門。如
來三昧陀羅尼門。如來三昧神力自在陀羅尼門。究

竟佛事陀羅尼門。住佛所住陀羅尼門。佛持陀羅尼門。佛化陀羅尼門。佛知眾生心心所行陀羅尼門。佛神力自在陀羅尼門。住兜率天陀羅尼門。乃至示現入般涅槃陀羅尼門。饒益無量眾生陀羅尼門。諸甚深法陀羅尼門。諸莊嚴法陀羅尼門。菩提心色法方便陀羅尼門。菩提心起色陀羅尼門。願色陀羅尼門。行色陀羅尼門。通明色陀羅尼門。出生死色陀羅尼門。清淨智色陀羅尼門。清淨慧色陀羅尼門。菩提無

量色陀羅尼門。自心淨色陀羅尼門。善男子。我唯知
此般若波羅蜜普莊嚴法門。諸大菩薩心如虛空。入
深法界。功德成滿。安住出世法。遠離世間行。具足清
淨。離癡慧眼。決定了知無量法界。智慧無量。與虛空
等。得無礙眼。於一切境界無所障礙。住無礙地藏。普
照一切善能分別一切法義。一切世間無能壞者。行
世間行無所染著。善巧方便。饒益攝取一切眾生。隨
其所應。悉能示現。於一切時轉正法輪。而得自在。如

是功德。我當云何能知能說。善男子。於此南方。有一國土。名曰救度。彼有比丘。名曰善現。汝詣彼問。云何菩薩學菩薩行。修菩薩道。時善財童子。頭面禮足。繞無數匝。辭退南行。爾時善財童子。正念思惟甚深法門。思惟甚深法界。思惟甚深法地。思惟甚深眾生。思惟甚深諸行。思惟甚深眾生心流注。思惟甚深眾生如光影。思惟甚深諸法之性。思惟甚深眾生語法。思惟甚深法界圓滿莊嚴。思惟甚深種種業行。思惟甚

深世間業所莊飾。漸漸遊行。至救度國。於城都聚落。村邑市里。仙人住處。山林曠野。周徧推求。善現比丘。見彼比丘。在林經行。形貌端嚴。顏容姝妙。其髮右旋。如紺青色。頂有肉髻。身色紫金。其目長廣。如青蓮華。脣口丹色。如頻婆果。頸項圓直。修短得所。胸有德字。勝妙莊嚴。七處平滿。其臂纖長。手指縵網。金輪莊嚴。臚脰鹿蹲。腰腹不現。師子上身。如淨居天。其身圓滿。如尼拘樹王。相好莊嚴。如雪山王。出諸良藥。圓光一

尋諸根調伏。目視安諦。智慧無礙。猶如大海。其心不
動。一切世間所不能壞。天龍八部恭敬圍繞。彼比丘
經行時。地天持地步天。出寶蓮華。隨覆其迹。無盡圓
滿。天除滅眾闇。覺天雨雜華雲。不動藏天現諸寶藏。
普光勝虛空。天莊嚴虛空。妙德海天散寶供養。離垢
藏須彌山。天合掌禮侍。恭敬供養。無礙力天起香華
風雲而供養之。夜天以莊嚴身。五體敬禮。常覺日天
持明淨寶幢。莊嚴虛空。除滅闇冥。爾時善財童子往

詣其所。頭面禮足。白言。大聖。我向阿耨多羅三藐三
菩提求菩薩行。我聞大聖善能開導諸菩薩道。云何
菩薩學菩薩行。修菩薩道。願分別說。答言。善男子。我
年旣少。出家日近。自我生來。於三十八恆沙佛所。淨
修梵行。或於一佛所。七日七夜。淨修梵行。或餘佛所
半月一月一歲百歲。那由他歲。乃至不可說不可說
歲。或一小劫半劫一劫。或阿僧祇劫。乃至不可說不
可說阿僧祇劫。淨修梵行。彼諸佛所。聞法受持。不違

其教莊嚴諸願。究竟淨修菩薩諸行。具足六波羅蜜。知菩提境界。知種種法輪。守護佛法。乃至正法滅盡。嚴淨一切諸佛世界。出生三昧大願力故。究竟菩薩一切淨行。出生菩薩一切行願力故。淨一切佛諸波羅蜜。出生普賢諸行力故。善男子。我不離此經行處。悉見十方智慧無礙故。一切法界悉現在前。於一念中。過不可說不可說諸世界故。於一念中。嚴淨不可說不可說諸佛世界。出生大願力故。不可說不可說

眾生方便門。悉現在前。具十力智。出生普賢菩薩行。願力故。見不可說不可說諸佛。悉現在前。於一念中。恭敬供養。不可說不可說世界微塵等佛。恭敬供養。如來願力故。能聞受持不可說不可說諸佛法雲。分別了知阿僧祇諸法趣。出生法輪陀羅尼力故。不可說不可說菩薩行。悉現在前。一切諸行皆悉清淨。滿足菩薩因陀羅網行。願力故。不可說不可說諸三昧。海悉現在前。一切三昧皆悉清淨。滿一三昧。出生一

切三昧力故。不可說不可說。諸根海皆現在前。一切根輪隨順時輪。出生安住。諸根際願力故。不可說不可說。時輪悉現在前。能一切時轉淨法輪。出生究竟。眾生願力故。一切三世海悉現在前。分別一切世界三世。出生隨順智慧光明願力故。善男子。我唯知此隨順菩薩燈明法門。諸金剛燈菩薩生諸佛家。具足成就不死命根。無盡智慧。成無壞身支體。具足隨其所應。悉能顯現。具妙形色。世無倫匹。毒刀火災所不

能害身如金剛不可沮壞降伏眾魔制諸外道身真
金色超出世間隨其所應無不聞見普觀世間雨甘
露法普照一切滅諸障礙見者無厭拔斷一切諸不
善根起妙善根難遇難見我當云何能知能說彼功
德行善男子於此南方有一國土名曰輸那彼有童
子名釋天主汝詣彼問云何菩薩學菩薩行修菩薩
道時善財童子專求菩薩莊嚴正道菩薩諸力照心
修行菩薩無壞無盡諸功德行成滿菩薩堅固大願

以大莊嚴而自莊嚴。一切無畏。不退堅固正直之心。受持一切菩薩行雲。受持菩薩正法之雲而無厭足。恭敬一切菩薩功德。攝取一切眾生。常欲超出生死曠野。樂欲見聞恭敬親近於善知識。心無厭倦頭面禮足。恭敬無量。隨順教誨。辭退南行。爾時善財童子與天龍大眾眷屬圍繞。至輸那國。周徧推求釋天主童子。時虛空中有諸天龍而告之曰。善男子。此童子。在善城門外河水之側。爾時善財見釋天主與一萬

童子弄沙嬉戲。卽詣其所。頭面禮足。繞無數匝。合掌
恭敬於一面住。白言。大聖。我已先發阿耨多羅三藐
三菩提心。而未知菩薩云何學菩薩行。修菩薩道。唯
願解說。答言。善男子。文殊師利教我相。麤子法。算數
法。印法。我因知此三種法。故得一切巧術。智慧法門。
善男子。我因此法門。故知。麤子算數。印性。疾病。中毒。
爲鬼所著。諸魔所持。悉能消伏。立大小城。都邑。聚落。
善惡之相。田業。商估。一切眾生。身肢節相。善趣。惡趣。

行業之相。知此眾生之於善趣。知此眾生之於惡趣。此聲聞此緣覺。此如來地諸方便相。如是等事。我悉了知。普令眾生修學此法。復次善男子。我亦了知菩薩算數之法。所謂百千爲一羅叉。百千羅叉爲一拘梨。百千拘梨爲一那由他。廣說如阿僧祇品。善男子。若有無量百千由旬等大沙聚。我悉分別算知其數。善男子。如算法能知沙聚。算知東方一切世界。南西北方四維上下亦復如是。算知一切世界中一切。

劫一切佛一切法一切菩薩一切業算數了知一切
世界中一切四諦名號亦復如是善男子我唯知此
巧術智慧法門諸大菩薩深入一切算數法門算數
一切法深入三世算數之法算數一切眾生算數一
切法算數一切佛算數一切佛名號算數一切菩薩
一切算數轉自在輪菩薩我當云何能知能說彼功
德行發明境界讚歎諸力顯正直心說功德具說諸
大願顯現清淨諸波羅蜜說功德藏勝妙智慧善男

子於此南方有城名曰海住。有優婆夷名曰自在。汝詣彼問云。何菩薩學菩薩行。修菩薩道。時善財童子聞善知識教。歡喜無量。得未曾有。奇特正直心寶。其心彌廣。普覆眾生。得算數諸佛次第出世自在法門。淨法圓滿。智慧究竟。分別顯現一切諸趣。於三世境界無所障礙。出生無盡功德海心。得大智慧自在光明。斷三界縛。頭面禮足。右繞三匝。辭退南行。爾時善財童子於善知識心無厭足。猶如大海吞納眾流。善

知識日明淨慧光。開發其心猶蓮華敷。長養一切善
根萌芽莖節枝葉功德大樹。善知識月能以清涼教
法光明除眾熱惱。善知識者如夏雪山眾獸所集樂。
善知識心猶如大海眾寶充滿。善知識教長養法身。
如閻浮樹華果具足。心常樂住善知識教法。譬如龍
王於虛空中神變自在。善知識教起大寶山。顯現一
切以善知識教而自圍繞。猶如帝釋降阿脩羅無能
壞者。漸漸遊行。至海住城。周徧推求自在優婆夷時。

有人言善男子。此優婆夷在此城中深宮之內。善財聞已。往詣宮門。敬心而立。彼優婆夷所住之處。廣博嚴飾。眾寶垣牆。周帀圍繞。開置四門。阿僧祇寶以爲莊嚴。善財進入。見優婆夷處師子座。年在盛美。容色姝妙。觀者無厭。除莊嚴具。素服被髮。身色光明。除佛菩薩餘無能及。於其宮內。敷十億牀。出過天人。菩薩宿世行業所造。衣服飲食。眾妙寶物。諸莊嚴具。常開四門。周給一切。而無窮盡。一萬女眾眷屬圍繞。容色

威儀悉如諸天。猶如莊嚴眾妙寶樹。口常演出天妙
音聲。敬樂觀察。此優婆夷禮拜供養。彼諸女身常出
妙香。普熏大城。若有聞者。皆得不退菩提之心。無怒
害心。無怨敵心。無慳嫉心。無幻偽心。無諂曲心。無貪
愛心。無瞋恚心。無懈怠心。無量心。平等心。大慈心。益
眾生心。淨持戒心。無求欲心。聞彼音聲。皆悉歡喜。身
心柔輒。其有見者。皆得離欲。爾時善財頭面禮彼優
婆夷。足敬心。右繞於一面。住白言。大聖。我已先發阿

耨多羅三藐三菩提心。而未知菩薩云何學菩薩行。修菩薩道。答言。善男子。我成就無盡功德藏莊嚴法門。以一器食。施百眾生。隨其所欲。皆得充滿。千眾生。百千眾生。億眾生。千億眾生。百千億眾生。那由他眾生。百那由他眾生。百千那由他眾生。乃至不可說不可說眾生。閻浮提微塵等眾生。乃至不可說不可說佛刹微塵等眾生。隨其所欲。皆悉充滿。而無損減。又復施與上味美膳。輦輿衣服華鬘妙香末香塗香寶。

莊嚴具。又施牀座車乘妙蓋幢旛。如是等種種諸物。隨其所欲。悉令充滿。皆大歡喜。善男子。於東方一世界。乃至不可說不可說世界。閻浮提微塵等世界。乃至不可說不可說佛刹微塵等世界中。一切聲聞緣覺。食我食已。悉成道果。又於東方乃至不可說不可說佛刹微塵等世界中。一生補處菩薩。食我食已。降魔成道。南西北方四維上下亦復如是。善男子。汝見我此一萬眷屬女不。唯然已見。善男子。如是等百萬

阿僧祇菩薩悉我同行。同願。同善根。同修道。同欲性。同淨正念。同清淨趣。同善根無量。同得諸根。同心依果。同境界。同正趣。離生。同真實義。同明正法。同具菩薩清淨妙色。同無量力。同堅精進。同正法音。同語言道。同諸功德。同清淨業。同清淨報。同清淨大悲救護一切。同清淨業不違因緣。同清淨口業。於一切佛眾隨其所應。悉爲說法。同恭敬供養諸佛。同決定知一切諸法。同得菩薩清淨諸地。此諸菩薩取我器食。於

一念頃徧遊十方。供養一切聲聞緣覺菩薩諸佛。及
施餓鬼。悉令滿足。而我器食無所損減。善男子。我此
器食。隨應諸天。悉令充滿。乃至施人。亦復如是。善男
子。且待須臾。汝自見之。善財。卽見無量人眾。從四門
入。彼優婆夷。皆令安坐。隨所適樂。悉令充悅。善男子。
我唯得此無盡功德藏莊嚴法門。諸大菩薩無盡功
德藏海。猶如虛空。以無量功德熏修其心。如隨意寶。
滿足一切眾生願故。大功德城。悉滅一切諸貧苦故。


功德須彌。雨眾寶故。大功德藏。開法城門故。功德燈明。滅貧暗故。大功德蓋。勝妙善根。覆一切眾生故。我當云何能知能說彼功德行。善男子。於此南方有城名曰大興。彼有長者名甘露頂。汝詣彼問云何菩薩學菩薩行。修菩薩道。時善財童子頭面禮足。繞無數而。憶念不捨。辭退南行。

大方廣佛華嚴經卷第四十九

誦補闕真言

南無三滿哆。沒馱喃。阿鉢囉帝。喝多折。折捺彌。唵。雞
 彌雞彌。怛塔葛塔喃。末瓦吽。山斫鉢囉帝。烏怛摩怛摩。
 怛塔葛塔喃。末瓦吽。發莎訶。舉字母讚
 華嚴字母。眾藝親宣。善財童子得真傳。秘密義幽玄。
 功德無邊。唱誦利人天。

他◎湯藝通琮叨胎梯天灘譚貪偷他
 社●常成慵蝓韶○時辰禪湛蟾酬社
 鑣◎顙僧敵蘇掃諛洗鹵傘罽堪參鑣



時普願法界眾生入般若波羅蜜門
四十二字妙陀羅。字字包含義理多。

鎖	社	他
---	---	---

梵韻滿娑

婆。功德大。法界沐恩波。

四生九有。同登華藏玄門。八難三塗。共入毘盧性海。
南無華嚴海會佛菩薩

三稱

大方廣佛華嚴經卷第五十

東晉天竺三藏佛陀跋陀羅等譯

入法界品第三十四之六

爾時善財童子得無盡功德光明法門。正念思惟彼功德海。觀察彼虛空功德。趣彼功德聚。登彼功德山。攝彼功德藏。盡彼功德底。度彼功德海。淨彼圓滿功德。周徧觀察彼諸功德。隨彼功德藏。持彼功德教。淨彼功德性。漸漸遊行。至大興城。周徧推求長者甘露。

頂樂求善知識。以善知識熏其身心。於善知識起正
直心。觀善知識常無厭足。學善知識勇猛精進。求善
知識一切善根。同善知識一切善根。於善知識無嫌
恨心。滿功德藏。學善知識種種方便。雖不由他悟而
常親近諸善知識。長諸善根。淨修菩提正直之心。增
長一切菩薩諸根。成就一切善根。滿足大願。發廣大
悲。近一切智。不離諸佛。增長普賢菩薩所行。如來光
明常照其心。爾時善財見甘露頂於彼城內。處七寶

堂阿僧祇寶師子座上。金剛伊尼羅寶以爲座足。離垢寶藏而以校飾。五百寶像以爲莊嚴。建眾寶幢。垂寶繒旛。張眾寶帳。無量寶網羅覆其上。有人手執閻浮檀金蓋。瑠璃爲竿。復有執持離垢寶拂。侍立左右。眾妙雜香而以熏之。雨天華雲。作五百種勝妙妓樂娛樂。城內一萬大眾周而圍繞。顏容殊妙。天人無倫。成就菩薩直心莊嚴。眾生悉常隨順。甘露頂教。宿世同修諸善根故。爾時善財頭面禮足。繞無數匝。恭敬

合掌於一面住。白言。大聖。我爲利益一切眾生故。發
阿耨多羅三藐三菩提心。所謂滅一切眾生苦惱。令
安隱住。究竟快樂。度生死海。到法寶洲。銷竭貪愛。修
大悲念。除五欲渴樂。一切智。令究竟度生死曠野。常
樂一切諸佛功德。超出三界。至薩婆若城。而未知菩
薩云何學菩薩行。修菩薩道。攝一切眾生。長者答言。
善哉善哉。童子。乃能發阿耨多羅三藐三菩提心。若
能發心學菩薩道。修菩薩行。此人難得。求善知識。見

善知識。親近恭敬。於善知識。其心不退。而無厭足。善男子。汝見我此一萬眷屬不。唯然已見。我本爲彼說種種法。令發阿耨多羅三藐三菩提心。生如來家。修白淨法。滿足無量諸波羅蜜。具佛十力。離世間姓。立如來姓。壞生死輪轉淨法輪。滅三惡道。立正法趣。善男子。當知菩薩悉能救護一切眾生。善男子。我成就此如意功德寶藏法門。隨其所須。悉滿彼願。謂以眾寶車乘象馬。僮僕衣服飲食香華末香燈明湯藥幢

旛繒蓋隨意眷屬天冠寶飾一切珍玩資生之具盡
給施之。乃至以法廣施眾生善男子。且待須臾。汝自
見之。卽時善財見諸方國城邑聚落一切眾生來詣
其所。悉命令坐。時甘露頂仰視虛空。隨諸來會。一切
所須。悉從空下。滿足其願。旣充願已。爲說正法。悉令
長養諸功德藏。消生死愛。渴仰佛法。乃至具足大人
味味之相。滅貧窮苦。富甘露財。降伏眾魔。無能壞者。
成就十力。無上智慧。如是等類。悉滿願已。皆大歡喜。

隨所來方各還本處。善男子。我唯知此如意功德寶藏法門。諸大菩薩具足一切自在功德。成就寶手覆一切刹雨無量雲。謂眾寶雲。種種色莊嚴雲。種種色寶天冠雲。種種色衣雲。種種妙聲雲。種種華雲。種種周羅摩尼寶雲。種種色香雲。種種色蓋雲。種種色幢旛雲。皆悉充滿一切世界。一切佛刹。一切諸佛及其眷屬。爲教化一切眾生。令供養一切佛故。我當云何能知能說彼菩薩行。顯其自在。善男子。於此南方有

城名師子重閣。彼有長者名法寶周羅。汝詣彼問云。何菩薩學菩薩行。修菩薩道。時善財童子歡喜踊躍。頭面敬禮。繞無數匝。如弟子法。作如是念。因善知識得一切智。於善知識。生無壞心。聞善知識教。悉能隨順。調伏諸根。作是念已。辭退南行。爾時善財童子正念如意。功德寶藏法門。守護彼功德藏。淨彼功德。須彌山王。得彼功德海之源底。開彼功德藏。觀彼功德。藏圓滿。清淨彼功德藏。攝彼功德藏。出生長養彼功

德藏力。漸漸遊行。至於彼城。周徧推求長者法寶。周羅。於道遇見頭面禮足。合掌恭敬於一面住。白言。大聖。我已先發阿耨多羅三藐三菩提心。而未知菩薩云何學菩薩行。修菩薩道。時彼長者執善財手。將歸其家。善男子。且觀我家。爾時善財徧觀舍宅。悉閻浮檀金色。七寶爲牆。周而圍繞。瑠璃莊嚴。碑磬爲柱。敷赤真珠寶師子座。建師子寶幢。張瑠璃寶帳。如意珠網羅覆其上。阿僧祇寶而莊嚴之。碼碯寶池。八功德

水盈滿其中。一切寶樹周徧圍繞。其宅廣大十重八門。爾時善財見最下重。設眾肴膳惠施一切。見第二重。施雜寶衣。見第三重。施惠一切寶莊嚴具。見第四重。施內眷屬。悉履善行。巧於語言。見第五重。乃至五住菩薩雲集其中。結集正法。離世間樂。出一切論諸陀羅尼三昧法印。分別三昧智慧光明。見第六重。得般若波羅蜜菩薩。充滿其中。具甚深智。得寂靜明智。慧藏地無礙法門。超出三有境界。無礙念不二法。結

集般若波羅蜜門。分別解說般若波羅蜜門。所謂寂滅藏般若波羅蜜門。分別一切眾生般若波羅蜜門。不動轉般若波羅蜜門。離欲普照般若波羅蜜門。不可壞藏般若波羅蜜門。一切眾生淨眼般若波羅蜜門。海藏般若波羅蜜門。普眼般若波羅蜜門。一切無盡方便海般若波羅蜜門。隨順眾生普照無礙般若波羅蜜門。慶雲漸下般若波羅蜜門。結集如是等百萬阿僧祇般若波羅蜜門。彼菩薩眾不可說莊嚴而

莊嚴之。見第七重響忍菩薩充滿其中。出方便智。悉能聞持諸佛法雲。見第八重常住菩薩充滿其中。具諸神通徧一切刹。照一切眾生一切法界。具足法身。詣一切佛無所障礙。悉能受持一切佛法。見第九重補處菩薩充滿其中。見第十重一切如來充滿其中。從初發心修菩薩行。超出生死。滿足大願。神力自在。一切佛刹及其眷屬。轉淨法輪。化度眾生。顯現住持。爾時善財見如是等奇特事。已白言。大聖。我未曾見。

如是清淨大眾。昔於何處種諸善根。今得如是勝妙果報。善男子。我憶過去無量光明法界普莊嚴王。如來應供等正覺。明行足善逝。世間解。無上士。調御丈夫。天人師。佛世尊。出興于世。彼佛入城。我以香華妓樂而供養之。供養已。持此善根。回向三處。謂滅除貧苦。常見諸佛菩薩及善知識。恆聞正法。故獲斯報。善男子。我唯知此滿足大願法門。諸大寶海菩薩。得不可壞清淨法身。不可壞法雲。普覆一切。具足成就不

可壞功德。不可壞大功德網。普覆一切。入不可壞三昧境界。具足菩薩不可壞善根。住不可壞如來所住。不可壞智慧究竟三世。住一切劫而無疲倦。住不可壞普眼境界地。我當云何能知能說彼功德行。善男子。於此南方有一國土。名實利根。域名普門。彼有長者名普眼妙香。汝詣彼問云何菩薩學菩薩行。修菩薩道。時善財童子頭面敬禮法寶周羅足已。辭退南行。爾時善財童子思惟諸佛無量法門。逮得菩薩無

量諸行。菩薩無量妙方便道。普照身心。樂求無量方便法門。成就菩薩清淨解脫。菩薩無量清淨諸根。菩薩無量諸清淨力。心隨菩薩無量諸行。出生菩薩無量大願力。速得菩薩不可沮壞妙智慧幢。普照一切。漸漸遊行。至於彼國。求普門城。心無休息。精進不退。念善知識。讚善知識。隨順善知識。諸根專向普門法門。遠離一切諸放逸行。開淨慧眼。度生死海。見普門城。百千小城。周帀圍繞。高峻堅固。妙巧無比。種種莊

嚴見普眼妙香長者於此城中坐眾香座往詣其所
頭面禮足恭敬合掌於一面住白言大聖我已先發
阿耨多羅三藐三菩提心而未知菩薩云何學菩薩
行修菩薩道答言善哉善哉善男子乃能發阿耨多
羅三藐三菩提心善男子我知一切眾生病風寒熱
病及諸雜病枉橫病鬼著病毒病諸呪術病如是等
類一切諸病我悉了知隨其所應皆能療治善男子
十方眾生病者來詣我所我悉能治除其患已

沐浴香湯。香華纓絡名衣上服而莊嚴之。肴膳飲食而供養之。無量珍寶而惠施之。然後爲說種種法門。貪欲多者。教不淨觀。瞋恚多者。教慈心觀。愚癡多者。教法相觀。等分行者。教勝法門。稱揚讚歎諸佛功德。發菩提心故。說長養大悲。於無量生死苦心不厭故。分別廣說諸波羅蜜。長養無量淨智慧故。說諸大願。教化成就一切眾生故。說普賢菩薩行。顯現清淨尸波羅蜜故。說不可思議如來功德。顯現羸提波羅蜜。

故說如來無壞清淨法身。顯現毗梨耶波羅蜜故。說如來無與等者。顯現如來禪波羅蜜故。說清淨法身。顯現般若波羅蜜故。說一切淨法身。令一切眾生皆悉覩見。顯現方便波羅蜜故。說於生死中住一切劫。顯現願波羅蜜故。說嚴淨一切佛刹。顯現諸力波羅蜜故。說淨法身隨其所應。悉令歡喜。顯現智波羅蜜故。說常樂見清淨法身。遠離一切不善法故。善男子。我以如是等種種法施。悉令滿足歡喜而還。善男子。

我又善知和眾香法。所謂不可稱王香。新頭香。勝香。覺香。明相香。沈水香。堅固香。梅檀香。雲香。不動諸根香。知如是等一切諸香。燒此香時。一心向佛。發大誓心。滿一切願。所謂救護一切眾生。嚴淨一切佛刹。恭敬供養一切諸佛。乃至燒一丸香時。充滿十方一切法界。一切如來及其眷屬。香帳莊嚴一切法界。香宮殿。香垣牆。香樓閣。香欄楯。香卻敵。香牕牖。香半月。香蓋。香幢。香旛。香網。香形像。香光明。香莊嚴具。香雲雨。

莊嚴十方一切法界一切諸佛及其眷屬善男子。我
唯知此令一切眾生歡喜普門法門。見一切佛身。諸
大藥王菩薩。若有見聞親近憶念執持名號。皆悉不
虛。其有見者煩惱悉滅。得諸如來法之源底。滅除苦
陰。永離一切生死恐怖。得無所畏。具一切智。破壞無
量生死高山。安住正法。我當云何能知能說彼功德
行。善男子。於此南方有城名曰滿幢。王名滿足。汝詣
彼問云何菩薩學菩薩行。修菩薩道。時善財童子頭

面敬禮普眼妙香長者。繞無數帀。辭退南行。爾時善財童子次第憶念諸善知識。正念思惟善知識教。復作是念。善知識者能攝取我。能守護我。令我不退阿耨多羅三藐三菩提。如是思惟。得大歡喜心。無量歡喜心。發清淨心。寂滅心。廣大心。莊嚴心。無著心。無礙心。虛空心。見諸佛菩薩心。自在心。順諸法心。於一念中。充滿一切佛刹心。見如來心。念十力心。不捨諸佛善知識心。漸經人眾城邑聚落。至滿幢城。問滿足王。

今在何所。有人答曰。今在正殿。行於王法。教化眾生。應攝取者而攝取之。應罰者罰。應治者治。諸有諍者。斷其諍訟。有恐怖者。施以無畏。讚歎不殺不盜不邪。姪不妄言不兩舌不惡口不無義語無貪恚癡。爾時善財遙見彼王處金剛師子座。阿僧祇寶而以莊嚴。無量寶像以爲莊飾。種種香雲而普熏之。無量寶衣以敷其上。又復建立無量寶幢。無量寶旛。周徧垂下。張眾寶帳。頂冠如意摩尼寶冠。閻浮檀金半月莊嚴。

髮紺青色。耳普垂垂。身佩無價摩尼纓絡。百千寶網。羅覆其上。閻浮檀金蓋。眾寶爲鈴。常出妙音。瑠璃爲竿。夜光寶藏。普照諸方。彼滿足王。有大勢力。離諸怨敵。無量自在。一萬大臣。各處常位。修理王事。勇將一萬。持杖侍衛。爾時善財。見無量眾生。犯王法者。身被五縛。或斷手足。或截耳鼻。或挑雙目。或斬身首。或投沸灰。或氈纏。油灌以火焚之。如是等無量。楚毒而苦治之。爾時善財。作如是念。我爲一切眾生。故學菩薩。

行。修菩薩道。今見此王行大惡逆。諸不善法。此乃惡中之惡。第一惡人。作是念時。虛空有天而告之曰。善男子。汝當憶念普眼妙香善知識教。善財卽時仰觀虛空而答之言。我常憶念。天又語言。若常憶念。何故疑怪。善男子。菩薩方便不可思議。菩薩智慧不可思議。攝取眾生不可思議。調伏眾生不可思議。教化眾生不可思議。愍念眾生不可思議。度脫眾生不可思議。爾時善財聞天教已。詣彼王所。頭面禮足。白言。大

聖。我已先發阿耨多羅三藐三菩提心。而未知菩薩云何。學菩薩行。修菩薩道。時滿足王王事。訖已。手執善財。將入宮內。命就寶師子座。而告之曰。善男子。汝觀我家。善財卽觀廣大無極七寶垣牆。周帀圍繞。七寶講堂。無量百千眾寶樓閣。而莊嚴之。乃至不可思議。摩尼寶網。羅覆其上。五百侍女。端嚴如天。如上所說。善男子。見我此報。所因業不。答言。已見。善男子。我成就菩薩幻化法門。我此國土。殺生偷盜。乃至邪見。

諸羣生類不可教化。離諸惡業。我爲調伏。令解脫。故化作人眾。種種苦治。令捨十不善道。一切諸惡。具足十善。得究竟樂。發阿耨多羅三藐三菩提心。具足一切智。善男子。當知我身口意。乃至蟻子不生害心。何況人耶。人是福田。生諸善根。善男子。我唯知此幻化法門。諸大菩薩得無生法。忍知一切有趣。皆悉如幻。知菩薩行。悉如變化。一切世間。悉如電光。一切諸法。皆悉如夢。深入無礙法界。具菩薩妙行。境界無礙。攝

一切行。於無量旋陀羅尼而得自在。我當云何能知。能說彼功德行。善男子。於此南方有城。名曰善光。王名大光。汝詣彼問。云何菩薩學菩薩行。修菩薩道。時善財童子頭面禮足。繞無數帀。辭退南行。爾時善財童子一心正念。彼王智慧幻化法門。觀一切法皆悉如幻。分別諸業。專求正法。一心思惟。彼王變化救度眾生。思惟世間一切如幻。分別了知三世願行。悉如幻化。入淨法界。漸經人眾聚落城邑曠野諸難。心無

疲倦。至善光城。問眾人曰。此城何名。答曰。善光。爾時善財作如是念。我善知識在此城中。我今必定見善知識。聞菩薩行。菩薩正法。及諸法門。菩薩功德。不可思議。境界不可思議。自在不可思議。平等法門不可思議。勇猛之力不可思議。我今必聞菩薩究竟境界。作是念已。入善光城。見城七寶無量莊嚴。七重深塹。周帀圍繞。八功德水盈滿其中。底布金沙。優鉢羅鉢曇摩拘牟頭分陀利華徧滿其中。七寶垣牆。七重圍

繞所謂金剛師子垣牆。不可壞金剛垣牆。精進金剛
垣牆。不可壞精進金剛垣牆。無底金剛垣牆。淨網金
剛垣牆。離欲清淨金剛垣牆。是七重牆。阿僧祇寶而
莊嚴之。其城奇特高峻廣大。十億街巷。一一街巷各
有無量億那由他阿僧祇人眾。阿僧祇閻浮檀金樓
閣。瑠璃寶網羅覆其上。不可思議白銀樓閣。赤真珠
網羅覆其上。不可思議瑠璃樓閣。莊嚴藏摩尼寶網
羅覆其上。不可思議玻瓈樓閣。離垢摩尼寶藏網羅

覆其上。不可思議明淨寶樓閣。日藏摩尼寶網羅覆其上。阿僧祇因陀尼羅寶樓閣。妙寶光明網羅覆其上。阿僧祇堅固寶樓閣。夜光寶炎網羅覆其上。不可思議金剛樓閣。不可壞幢摩尼寶網羅覆其上。不可思議沈水梅檀樓閣。摩訶曼陀羅華網羅覆其上。如是等不可稱說妙寶樓閣。以種種網羅覆其上。不可思議妙寶網。不可思議金鈴網。不可思議香網。不可思議華網。不可思議衣網。羅覆其上。又張不可思議

諸妙寶帳不可思議。珍妙寶蓋以覆其上。建立不可思議雜寶幢旛。而莊嚴之。當此城中有一樓閣名曰眾生樂見無厭。阿僧祇摩尼寶而以莊嚴。彼大光王常處其中。爾時善財於此一切嚴飾珍妙。心無染著。一心樂欲見善知識。見大光王處於法堂寶師子座。結加趺坐。眾寶莊嚴。敷以寶衣。萬阿僧祇寶像以爲莊嚴。種種妓樂而娛樂之。有二十八大人之相。八十八種好而以莊嚴。身真金色。如明淨日普照一切。如盛

滿月。眾星中明。如梵天王處於大眾。如大海中有眾
珍寶。如雪山中出諸良藥。如大龍王雷震諸法實相
音聲。如虛空清淨不受塵垢。如須彌山四種寶色。普
照眾生性海。譬如寶洲。智寶充滿。彼王殿前及諸街
巷。城四門外。處處安置眾珍寶。聚及諸寶衣。無量億
那由他。諸姝女眾。容飾端嚴。五欲無倫。姿好巧妙。回
動天人。六十四術。無不備舉。無量乳牛。其角金色。乳
味甘香。一穀一石。又有無量諸莊嚴具。種種甘香。百

味肴膳無量音樂及諸湯藥資生之具。一一街巷兩
邊各有二十億菩薩。以此一切資生之具而用惠施。
攝眾生故。悅眾生故。淨眾生心故。滅眾生煩惱故。令
眾生解實義故。安立眾生一切智故。令眾生離惡心
故。拔出眾生邪見刺故。淨眾生業道故。爾時善財五
體敬禮大光王已。右繞一帀於一面住。白言。大聖。我
已先發阿耨多羅三藐三菩提心。而未知菩薩云何
學菩薩行。修菩薩道。我聞大聖善能解說。唯願敷演。

答曰。善男子。我成就菩薩大慈。幢行清淨。滿足。我於無量不可說不可說諸佛菩薩所聞。此妙法。觀察清淨。修習莊嚴。善男子。我住此行。如法治國。觀察眾生。順行世間。如法教化眾生。攝取眾生。安置眾生。饒益眾生。如法熏眾生。如法教眾生。令修善根。觀法真實。令諸眾生得慈心。大慈心。大慈力心。饒益心。離恐怖心。攝眾生心。不捨眾生心。發於大願。滅諸苦心。安隱眾生。令得快樂。身心柔軟。遠離心垢。捨生死樂。常樂。

正法除煩惱垢得清淨心。以一切善熏眾生心。斷生死流。入深法海。滅諸有趣。出無礙心。得一切智淨諸心海。信力堅固。無能壞者。善男子。我以如是安住此行。如法治國。令諸人民離眾怖畏。有貧窮者來至我所。隨所求索。常開庫藏而告之曰。恣意取之。勿作眾惡。此城眾生悉向大乘。各見此城種種不同。或見垢穢。或見清淨。或見木石。或見琉璃。或見無壞幢旛周帀圍繞。或見不可思議樓閣。阿僧祇寶而以莊嚴。以

正直心修諸善根。於諸佛所求一切智。爲我宿世所攝。眾生修菩薩行者。乃見此城。眾寶嚴淨。餘見垢穢。善男子。此城眾生五濁惡時。行諸不善。我愍念彼。入於菩薩大慈。爲首順世三昧。入此定時。彼諸眾生惡心惱心。諍心害心。皆悉除滅。所以者何。此三昧力法。如是故。善男子。且待須臾。汝自見之。時王卽入大慈。爲首順世三昧。入已。善光大城六種震動。諸寶垣牆。樓閣宮殿。欄楯牕牖。卻敵半月寶鈴羅網。諸寶形像。

出妙音聲讚歎彼王。其城內外一切人民皆大歡喜。
一心合掌敬禮彼王。諸畜生等慈心相向。亦禮彼王。
山原樹林皆悉曲躬而向彼王。河池泉流皆悉向王。
一萬龍王興黑重雲。雷震曜電。雨眾香水。一萬釋天
王夜摩天王。刪兜率天王。化自在天王。他化自在天
王。等於虛空中。作億那由他妓樂音聲。阿僧祇天姝
女眾。妙音歌頌。雨阿僧祇華雲。香雲。末香雲。鬘雲。蓋
雲。雜色衣雲。阿僧祇寶幢。旛。蓋。莊嚴。虛空。供養彼王。

伊那槃那龍王敷大蓮華。普覆虛空。垂阿僧祇妙姝
繒帶。阿僧祇寶而莊嚴之。阿僧祇寶鬘纓絡。天莊嚴
具。諸妙華香。充滿虛空。供養彼王。阿僧祇天女。充滿
虛空。稱讚彼王。阿僧祇羅刹鬼等。常在大海閻浮提
住。飲血食肉。水陸惡獸。常害眾生。皆得慈心及寂靜
心。明信後世。遠離諸惡。心大歡喜。五體投地。敬禮彼
王。皆得無量身心快樂。阿僧祇毗舍闍鬼及四天下
毒害眾生。三千大千世界。乃至十方各百萬億那由

他世界中毒害眾生亦復如是。時大光王從三昧起。告善財言。善男子。我唯知此菩薩大慈。幢行三昧。諸大菩薩以大慈蓋普覆救護一切眾生。上中下品等觀無二。慈如大地載育眾生。菩薩滿月。出功德光。除眾惱熱。菩薩淨日。智慧光明。普照一切。菩薩明燈。除滅重闇。菩薩淨水珠。滅眾生心海煩惱垢濁。菩薩如意寶珠。隨眾生心。悉令滿足。菩薩疾風。速令眾生修習三昧。入一切智城。我當云何能知能說彼功德行。

讚歎稱量彼功德。山觀彼功德。知大願風輪。得真實地。分別了知莊嚴大乘。普賢菩薩之所修行。及諸三昧。讚大悲雲善男子。於此南方有城。名曰安住。有優婆夷。名曰不動。汝詣彼問。云何菩薩學菩薩行。修菩薩道。時善財童子敬禮彼王。繞無數匝。辭退南行。爾時善財童子正念思惟大光王教。思惟菩薩大慈幢行。大慈爲首。隨順世間三昧。出生不可思議功德願力。長養菩薩不可思議堅固智慧。思惟菩薩不共之

法思惟不可思議諸法實相。思惟菩薩不可思議眷屬。思惟菩薩不可思議眾事。作是思惟已。得歡喜心。離欲心。極踊躍心。謙下心。離垢心。明淨心。堅固心。無畏心。無盡心。作是念時。悲泣流淚。復作是念。見善知識。則能出生一切功德。起菩薩行。清淨正念。陀羅尼。出生菩薩三昧光明。見一切佛。雨諸佛法雲。分別解說。菩薩諸願。出生菩薩不可思議智慧光明。長養菩薩堅固諸根。念善知識。能離險道。念善知識。開示正

路。念善知識。順平等法。念善知識。顯摩訶衍。念善知識。究竟普賢菩薩所行。念善知識。現一切智城。念善知識。度一切法界海。念善知識。普照三世一切法海。念善知識。長養一切諸白淨法。念善知識。成滿一切諸賢聖法。善財如是悲心念時。如來使天隨菩薩。天於虛空中而告之曰。善男子。其有隨順善知識教。諸佛歡喜。其有隨順善知識教。近一切智。於善知識教。心無厭故。一切諸義悉現在前。善男子。汝詣安住王

城不動。優婆夷所。是汝善知識。不久當見。爾時善財從智慧光明三昧起。漸漸遊行。至安住城。推問不動。優婆夷。今在何所。時有人言。善男子。不動優婆夷在其家內。父母守護。親近眷屬。周帀圍繞。爲無量眾演說正法。爾時善財歡喜無量。卽詣其門。入彼家內。見其宮殿。金色光明。皆悉普照。觸斯光者。身心柔軟。爾時善財光明觸身。卽得五百三昧門。所謂覺一切三昧門。奇特幢三昧門。寂靜三昧門。遠離一切眾生三

昧門。普眼三昧門。如來藏三昧門。得如是等五百三昧門。身心柔軟如七日胎。又聞妙香出過天人前。詣其所合掌恭敬。一心觀察。見彼形色。天龍八部諸姝女眾所不能及。十方世界一切女人無與等者。容色妙絕。十方無倫。況有勝者。唯除諸佛。其宮殿嚴飾。十方世界無與等者。口出妙香。十方世界無與等者。其莊嚴具。十方世界無與等者。其眷屬眾。十方世界無與等者。何況有勝。除如來眾。如是勝妙。不令眾生起

染著心。其有見者除滅煩惱。如梵天王欲界煩惱不
現在前。其有得見此優婆夷。一切煩惱皆悉除滅。十
方眾生樂觀無厭。除明行足。爾時善財見彼女人不
可思議法。不可思議三昧。不可思議無比妙色無量
光明網。一切無障。不可思議饒益眾生。不可窮盡諸
眷屬海。觀察不可思議身。無有厭足。爾時善財以偈
頌曰。

常持清淨戒

精進修忍辱

譬如盛滿月

星中獨明曜

爾時善財偈讚歎已。白言。大聖。我以先發阿耨多羅三藐三菩提心。而未知菩薩云何學菩薩行。修菩薩道。我聞大聖善能解說。願爲敷演。爾時彼女以善語愛語答善財言。善哉善哉。善男子。乃能發阿耨多羅三藐三菩提心。我成就菩薩無壞法門。修學菩薩堅固之行。得一切法平等地。陀羅尼。得一切法平等法門。得離有莊嚴三昧。善財白言。菩薩無壞法門。乃至

離有莊嚴三昧境界云何。善男子。是處難知難說。善財白言。唯願大聖承佛神力。爲我解說。我當因善知識。信知分別。正念觀察。一心隨順。遠離虛妄。解了平等。爾時優婆夷答言。善男子。於過去世。離垢劫中。有如來應供等正覺。號曰修臂。出興於世。時有國王名曰電光。我爲王女。中夜寂靜。廢音樂時。五百侍女皆悉昏寐。我在樓上仰觀星宿。見彼如來在虛空中。如寶山王。天龍八部不可思議大菩薩眾恭敬圍繞。放

大光明網普照十方。彼佛毛孔出微妙香。我聞是香。身體柔軟。心大歡喜恭敬禮拜。一心合掌仰觀彼佛。不見頂相。觀身左右不見邊際。相好莊嚴見無厭足。善男子。我於爾時作如是念。修何等業。出生如是身。長養如是身。具足如是身。清淨如是身。自在如是身。光明眷屬諸莊嚴具。功德智慧三昧陀羅尼諸辯才。藏不可譬喻。善男子。時彼如來知我心念而告我言。汝應發不可壞心。除滅煩惱。發勝妙心。不著一切有。

發不懈怠心。隨順深入方便之法。發忍辱心。調伏眾
生諸惡心海。發離癡心。遠離一切諸生死趣。發無厭
心。見一切佛心無厭倦。發無知足心。悉飲一切諸佛
法雲。發寂靜心。以一切佛方便隨順世間。發守護心。
護持一切諸佛法輪。發分別心。隨其所應演說法寶。
皆令歡喜。善男子。我於爾時從彼如來聞此法教。清
淨法門。求一切智。如來十力所言不虛。光明莊嚴清
淨法身。相好莊嚴如來眷屬。嚴淨佛刹。如來威儀如

來壽命。我發是心時。一切煩惱聲聞緣覺金剛諸山。所不能壞。善男子。我發此心已。於閻浮提微塵等劫。不生欲想。何況其事。於爾所劫。自於眷屬不生瞋心。何況餘人。於爾所劫。不生我見心。況我所心。於爾所劫。不生愚癡心。不生無記心。乃至胎中常起正念。何況餘時。於爾所劫。乃至夢中見一切佛。況十眼觀。於爾所劫。聞持一切諸佛法。雲未曾忘失一句。乃至世間語言。尚不忘失。況如來語。於爾所劫。悉飲一切諸

佛法海乃至世法亦分別知。出生一切方便。諸三昧
門。心無虛妄。於爾所劫受持一切諸佛法輪。於法輪
中不失一法。乃至無有二智。除化眾生。於爾所劫見
一切佛海及諸化佛。於彼佛所滿足大願。於爾所劫
於一切菩薩海所具足。出生清淨菩薩行海。於爾所
劫若有眾生得見我者。皆發阿耨多羅三藐三菩提
心。乃至不生一念二乘之心。於爾所劫於一切佛法
乃至一句一味不生疑惑。無有二想。無虛妄想。無種

種想無染著想。無好醜想。無愛恚想。善男子。我初發心來。常見諸佛菩薩及善知識。聞佛大願。修菩薩行。諸波羅蜜。智慧諸地。無盡法藏。普入無量無邊一切世界。分別無量眾生界。不離清淨智慧光明。除滅一切眾生煩惱。長養發起眾生善根。隨其所應。悉能顯現。未曾捨離微妙音聲。其有聞者。皆悉歡喜。善男子。我入此無壞法門。觀察一切法平等。陀羅尼顯現。無量自在神變。汝欲見不。唯然欲見。爾時不動優婆夷。

入萬三昧門。正念觀察。所謂專求莊嚴正法。心無疲厭。三昧門。離癡莊嚴三昧門。十力三昧門。佛無盡藏。三昧門。住如是等三昧門時。十不可說佛刹微塵等世界六種震動。淨如瑠璃。一一世界中各見百億如來。一一如來大眾圍繞。放大光明普照十方。或現兜率天。或現於一切世界。以妙音聲轉淨法輪。乃至示現大般涅槃。時優婆夷從三昧起。告善財言。善男子。汝見此不。唯然已見。善男子。我唯成就此無壞法門。

爲一切眾生說微妙法。皆令歡喜。諸大菩薩遊行十方。無有障礙。如金翅鳥王。悉得眾生大海源底。若見眾生有菩提因。從生死海而撮取之。安置菩提。譬如商人入大寶洲。專求如來十力大寶。遊生死海教化眾生。除滅煩惱。如明淨日消竭愛水。開敷一切眾生蓮華。譬如疾風遊行十方。摧滅一切眾生邪見煩惱。樹枝譬如大地長養一切眾生善根。如轉輪王以四攝法攝取眾生。我當云何能知能說彼功德行。善男

子於此南方有一國土名不可稱。城名知足。有出家
外道名曰隨順。一切眾生。汝詣彼問。云何菩薩學菩
薩行。修菩薩道。時善財童子頭面禮足。繞無數帀。辭
退南行。

大方廣佛華嚴經卷第五十

音釋

毳徒協切 穀古候切

誦補闕真言

南無三滿哆。沒馱喃。阿鉢囉帝。喝多折。折捺彌。唵。雞
彌。雞彌。怛塔葛塔喃。末瓦山。矻鉢囉帝。烏怛摩怛摩。
怛塔葛塔喃。末瓦吽。發莎訶。舉字母讚
華嚴字母。眾藝親宣。善財童子得真傳。秘密義幽玄。
功德無邊。唱誦利人天。

施 ● 堂滕筒途桃擡提田壇 ㊦ 談投施
奢 ◎ 傷升春書燒篩尸伸羶琛苦收奢
佉 ◎ 康碭空枯尻開欵緊看欽龕疆佉

唱
施 奢 佉
字

時普願法界眾生入般若波羅蜜門

四十二字妙陀羅。字字包含義理多。

婆。功德大。法界沐恩波。

檀 奢 佉

梵韻滿娑

四生九有。同登華藏玄門。入難三塗。共入毘盧性海。

南無華嚴海會佛菩薩 三稱

大方廣佛華嚴經卷第五十一

東晉天竺三藏佛陀跋陀羅等譯

入法界品第三十四之七

爾時善財童子一心正念彼優婆夷是我眞善知識
念彼正教念彼所說念彼所發念彼所開念彼示現
念彼所歎念彼所明念彼廣演念彼修習隨順思惟
修徧修寂靜寂滅照明觀察漸漸經由城邑聚落於
日沒時入知足城周徧推求隨順一切眾生外道今

在何所。於中夜時。見彼城北有一大山。光明照耀。如日初出。爾時善財天明出城。登彼山上。遙見外道靜處。經行成就。妙色超踰。梵王一萬。梵天眷屬。圍繞往詣其所。頭面禮足。卻住一面。白言。大聖。我已先發阿耨多羅三藐三菩提心。而未知菩薩云何學菩薩行。修菩薩道。答言。善哉善哉。善男子。乃能發阿耨多羅三藐三菩提心。善男子。我已安住至一切處。菩薩之行。成就普觀三昧法門。無依無作。神足以平等般若。

波羅蜜光明觀察分別一切諸趣。一切眾生死此生
彼流轉。諸有種種雜類形色好醜。種種欲樂諸趣受
生。所謂天龍夜叉乾闥婆阿脩羅迦樓羅緊那羅摩
睺羅伽地獄餓鬼畜生閻羅王處人非人處。彼諸眾
生或著邪見。或好二乘。或樂大乘。以妙智慧種種方
便饒益眾生。或教世間種種技藝。欲令眾生得諸巧
術陀羅尼門。或以四攝攝取眾生。欲令得一切薩婆
若。或歎諸波羅蜜。欲令眾生得一切智回向。或歎發

菩提心。欲令眾生於諸善根不可沮壞。或歎菩薩行。欲令眾生嚴淨佛刹。滿足大願。教化眾生。或說厭離法。欲令眾生知惡行果。受三塗苦。或說淨法。欲令眾生發歡喜心。於諸佛所植眾德本。得一切智果。或歎如來應供等正覺。欲令眾生發弘誓願。一向專求清淨法身。或歎如來功德。欲令眾生一向樂求佛無壞身。或歎如來無比妙法。欲令眾生得佛一切無壞功德。復次善男子。此知足城內一切人民男女長幼。隨

其所應我悉化度。彼諸眾生莫知我誰。此閻浮提九十六種外道邪見。我悉爲彼種種說法。斷其邪見。三千大千世界乃至十方一切世界諸眾生海。以種種智方便法門。種種諸事色像音聲。化度饒益。亦復如是。善男子。我唯知此菩薩至一切處行法門。諸大菩薩身與一切眾生數等。悉得分別一切眾生身。三昧出生變化輪。徧遊一切世界一切諸趣。普現十方一切眾生前。其有見者。樂觀無厭。悉能長養一切善根。

住一切劫。不捨大願。得因那羅莊嚴光明之行。不著一切。專求實義。隨順眾生。三世平等。照無我界。具足無盡大悲之藏。我當云何能知能說。彼清淨行功德。智慧善男子。於此南方有一國土。名甘露味。彼有長者。名青蓮華香。汝詣彼問。云何菩薩學菩薩行。修菩薩道。時善財童子。頭面敬禮。彼外道足。繞無數匝。辭退南行。爾時善財童子。不惜身命。不著財寶。遠離熾然。不著諸趣。不著世間五欲快樂。不著眷屬勢力。自

在常樂化度一切眾生。嚴淨一切諸佛世界。恭敬供養一切諸佛。心無厭足。知一切法真實之相。欲得一切菩薩功德。巨海滿足。大願於一切劫。修菩薩行。詣一切佛及眷屬海。入一菩薩三昧。悉能顯現一切菩薩神力。自在於一毛孔。見一切佛。心無厭足。悉聞受持一切諸佛正法輪雲。心無厭足。專求此等一切菩薩諸佛功德。漸漸遊行。至甘露味國。詣青蓮華香長者所。頭面禮足。繞無數帀。於一面住。白言。大聖。我已

先發阿耨多羅三藐三菩提心。向無上道。志求一切諸佛智慧。欲滿一切諸佛大願。欲淨一切諸佛色身。欲見一切諸佛法身。欲知一切諸佛智身。欲淨滿一切菩薩諸行。欲照一切菩薩諸三昧門。欲成就一切菩薩諸陀羅尼。欲悉除滅一切障礙。欲徧遊一切諸佛世界。而未知菩薩云何學菩薩行。修菩薩道。生一切智。答言。善哉善哉。善男子。乃能發阿耨多羅三藐三菩提心。善男子。我能善知一切諸香。一切和香。一

切熏香。一切塗香。一切末香。一切香王。一切天香。龍
夜叉乾闥婆阿修羅迦樓羅緊那羅摩睺羅伽人非
人等香。除滅一切眾疾病香。滅憂惱香。生一切眾生
諸喜樂香。長養諸煩惱香。除滅諸煩惱香。喜樂無爲
香。厭離有爲香。放逸香。不放逸香。念諸佛香。順正法
香。賢聖人香。分別一切諸菩薩香。一切菩薩地一切
菩薩住香。如是等香。我悉了知。彼香生起所行成就。
具足清淨安隱方便境界行業根本皆悉了知。善男

子。人中有香。名大象藏。因龍鬪生。若燒一丸。與大光網雲覆。甘露味國。七日七夜降香水雨。若著身者。身則金色。若著衣服。宮殿樓閣。亦悉金色。若有眾生得聞此香。七日七夜歡喜悅樂。滅一切病。無有枉橫。遠離恐怖。危害之心。專向大慈普念眾生。我知彼已。而爲說法。令無量眾生於阿耨多羅三藐三菩提。得不退轉。善男子。復有香。名牛頭栴檀。從離垢山生。若以塗身。火不能燒。復有香。名不可壞。從大海生。若以塗

身出妙音聲。降伏怨敵。復有香名蓮華黑沈水。從阿
耨達池四岸邊生。若燒一丸。悉能普熏閻浮提界。若
有眾生得聞此香。離一切惡。具清淨戒。復有香名曰
明相。從雪山王生。若有眾生聞此香者。離諸垢染。心
得清淨。而爲說法。令彼悉得菩薩離垢圓滿三昧。復
有香名曰海藏。從羅刹國生。應轉輪王。若燒一丸。令
四種兵列住虛空。復有香名清淨莊嚴。從善法堂生。
若燒一丸。悉令諸天得念佛三昧。復有香名曰淨藏。

從夜摩天生。若燒一丸。令彼諸天皆悉雲集。詣夜摩王聽受正法。復有香名先陀婆。從兜率天生。常在補處菩薩座前。若燒一丸。興大香雲。普覆十方一切法界。雨無量莊嚴。供一切佛及其眷屬。復有香名曰轉意。從化自在天生。若燒一丸。於化自在天七日七夜。雨莊嚴雨。善男子。我未知此香。諸大菩薩遠離一切不善習氣。永離五欲。滅除煩惱。降伏眾魔。斷一切縛。離三有趣。智慧妙香。而自莊嚴。一切世間無有染著。

具足成就無礙戒香。除滅障礙智慧境界。通達無滯。心常平等。我當云何能知能說。彼功德行清淨戒門。身口意業離一切惡。善男子。於此南方有城。名曰樓閣。彼有海師。名曰自在。汝詣彼問云何菩薩學菩薩行。修菩薩道。時善財童子頭面敬禮。彼長者足繞無數。而辭退南行。爾時善財童子向樓閣城。觀察正道。專求正道。觀夷險道。垢淨道。安危道。復作是念。因善知識得菩薩道。諸波羅蜜道。攝取眾生入無礙法界。

隨順一切眾生。除滅一切煩惱熾然。一切邪見。拔一切不善刺。度一切生死海。必至一切智城。何以故。因善知識。得一切善根。因善知識。得一切智。作是念已。漸漸遊行。至樓閣城。周帀推求。自在海師。見在海岸。船舶處住。十萬商人。及無量眾。而圍繞之。欲聞勝法。入大海法。佛功德海法。往詣其所。頭面禮足。卻住一面。白言。大聖。我已先發阿耨多羅三藐三菩提心。而未知菩薩云何學菩薩行。修菩薩道。答言。善哉善哉。

善男子。乃能發阿耨多羅三藐三菩提心。能諮問我
大乘妙寶。度生死海。到一切智洲。得不可壞摩訶衍
法。離二乘難。住寂滅樂。遠離生死。洄復流淵。逮得菩
薩至處。道法陀羅尼輪。菩薩莊嚴道。薩婆若波浪。成
就普法門。於一切法無所障礙。度一切智海。善男子。
我成就大悲幢淨行法門。在此海邊樓閣城中。爲貧
窮者修諸苦行。欲令一切隨意所求悉充足已。廣爲
說法。皆令歡喜。發起善根。長養功德。智慧之藏。利菩

薩根發菩提心。淨菩薩直心。增益菩薩深心。出生長
養大悲之心。除生死苦。遊生死海而無疲倦。攝取眾
生。海令住功德海。得一切法智海。光明見一切佛海。
度一切智海。善男子。我住此城。如是思惟。如是正念。
饒益眾生。善男子。我知海中一切寶洲。一切寶相。一
切生寶。一切淨寶及不淨寶。知一切寶價。一切寶器。
知一切寶隨所應用。知作一切寶。知一切寶境界。知
一切寶光明。知一切龍宮殿。滅一切龍難。知一切羅

刹宮殿滅一切羅刹難知一切大身眾生宮殿滅一切大身眾生難知趣知捨洄復恐怖能離波浪知相水色知日月星宿知諸算數知晝知夜知刹那羅婆摩睺妒路知去知住安危之法知海船舶牢不牢法明候風相而回轉之了所至處善男子我已成就如是智慧利益眾生故入於大海因爲說法悉令歡喜離生死怖入一切智海竭愛欲海速得三世光明智海度一切苦海清淨一切眾生心海嚴淨一切諸佛

刹海徧遊一切十方界海。無所障礙。知一切眾生諸
根願海。隨順一切眾生行海。知一切眾生隨所應海。
善男子。我成就此大悲幢淨行法門。若有見聞憶念
我者。皆悉不虛。善男子。我唯知此法門。諸大菩薩行
於生死煩惱大海。無所染著。離邪見海。入實法海。以
善方便攝眾生海。住一切智海。滅一切眾生諸放逸
海。善分別知時非時海。善方便知化眾生海。未曾失
時。我當云何能知能說。彼功德行。善男子。於此南方

有城名曰可樂。彼有長者名無上勝。汝詣彼問云。何菩薩學菩薩行。修菩薩道。時善財童子頭面禮足。繞無數匝。悲泣流淚。辭退南行。爾時善財童子增廣大慈大悲。潤澤長養。功德智慧莊嚴。離煩惱垢。入平等法。心不放逸。拔不善刺。滅一切障。精進堅固。修習菩薩不可思議三昧。慧光普照。寂靜快樂。功德水池。解脫華敷。滿足大願。充滿法界。無所障礙。趣一切智。一向專求菩薩正道。漸漸遊行。至可樂城。周徧推求。無

上勝長者。城東有林。名離憂惱。妙莊嚴幢。時彼長者。在此林中。無量長者。周而圍繞。理斷國事。因爲說法。離我所及一切有。遠離嫉妒。清淨心海。安住淨心。常見諸佛。得無垢信力。受諸佛法。起菩薩力。行菩薩行。出生菩薩諸三昧力。顯現菩薩諸智慧力。演說菩薩正念之力。樂發無上菩提之心。爾時善財詣長者所。以敬法故。五體投地。良久乃起。白言。大聖。我是善財。我是善財。我已先發阿耨多羅三藐三菩提心。而

未知菩薩云何學菩薩行。修菩薩道。教化眾生。常見諸佛。諮問正法。悉能受持。諸佛法雲。專向一切諸方便門。於一切世界一切劫中。行菩薩行。知一切佛自在神力。能受一切諸佛所持。得諸佛力。時彼長者告善財言。善哉善哉。善男子。乃能發阿耨多羅三藐三菩提心。善男子。我成就至一切趣菩薩淨行莊嚴法門。無依無作神足之力。善男子。何等爲至一切趣菩薩淨行莊嚴法門。善男子。此三千大千世界一切阿

脩羅世間一切迦樓羅地獄餓鬼夜叉羅刹鳩槃荼
乾闥婆人非人等世間三十三天須夜摩天刪兜率
天乃至魔天世間欲界所住一切生趣一切天宮一
切龍宮一切夜叉乾闥婆阿脩羅迦樓羅緊那羅摩
睺羅伽等宮人中國土城邑聚落於中說法滅除諍
訟諸恚害心悉解繫縛皆令出獄離諸恐怖滅不善
業殺害眾生乃至邪見斷諸王事及國土事遠不善
法悉令眾生除滅諸惡教以巧術及種種論饒益一

切皆令歡喜。隨順一切諸外道眾。現勝妙智。遠離邪見。樂於佛法。乃至梵天。廣爲說法。如此三千大千世界。乃至十方。不可說不可說億那由他佛刹微塵等世界中。廣說正法。所謂佛法。菩薩法。眾生法。聲聞法。緣覺法。說地獄。餓鬼。畜生。閻羅。趣法。現惡道苦。說諸天趣。現諸天樂。說世間法。離世間法。顯菩薩道。離生死惡。說一切智。諸妙功德。滅愚癡苦。及諸障礙。欲令眾生得離世樂。離諸虛妄。解真實法。遠離惡業。滅諸

煩惱轉淨法輪。善男子。我唯知此至一切趣。菩薩淨
行莊嚴法門。無依無作神通之力。諸大菩薩具足成
就諸神通。明佛刹等身。得普眼地。知語言道。神力自
在。具足智慧。離諸諍訟。逮得大人廣長舌相。出微妙
音。無能壞者。分別一切三世諸佛。亦無二想。明淨智
慧。照三世法。境界無量。淨如虛空。我當云何能知能
說彼功德行。善男子。於此南方有一國土。名曰難忍。
城名迦陵伽婆提。有比丘尼名師子奮迅。汝詣彼問。

云何菩薩學菩薩行。修菩薩道。時善財童子頭面敬
禮彼長者足。繞無數匝。眷仰觀察。辭退南行。爾時善
財童子漸漸遊行。至彼國城。周徧推問。彼比丘尼。時
有無量男女大眾。答善財言。此比丘尼。今在王園日
光林中。以法饒益一切眾生。爾時善財詣彼園林。周
徧觀察。見一大樹。名曰滿月。放大光明。照百由旬。復
見大樹。名曰普覆。其形如蓋。放青光明。復見華樹。名
曰華藏。高如雪山。雨眾華雲。如天帝釋波利質多羅。

樹復見大樹名曰柔輒。光明普照。常有果實。復見大樹名曰明淨。不可譬喻。摩尼莊嚴。出阿僧祇清淨妙寶。復見衣樹。出阿僧祇妙寶衣藏。復見歡喜樹。自然演出微妙音聲。復見普莊嚴香熏樹。出一切香普熏十方。無所障礙。復見彼園泉流淵池。梅檀行樹。周而圍繞。七寶欄楯。以爲莊嚴。黑梅檀泥凝淳。其底布以金沙。八功德水充滿其中。優鉢羅鉢曇摩拘牟頭分陀利華。敷榮鮮茂。徧覆其上。寶樹周徧。端嚴殊妙。一

一樹下。各敷無量師子之座。布以寶衣。熏以眾香。張眾寶帳。白淨寶網羅覆其上。金鈴網中。出妙音聲。或有樹下敷蓮華藏師子之座。或有樹下敷香藏座。或有樹下敷龍莊嚴藏座。或有樹下敷寶聚師子座。或有樹下敷明淨普照藏座。或有樹下敷師子樂藏座。彼一一座。各有十萬寶師子座。眷屬圍繞。無量莊嚴。散無量寶。充滿其中。如海寶洲。寶衣布地。柔軟妙好。蹈則足沒。舉則還復。異類眾鳥。出和雅音。超越帝釋。

歡喜之園。種種華樹。常雨華雲。超勝帝釋。照明之園。
妙香普熏。超於帝釋。善法講堂。寶樹樂樹。出微妙聲。
超過善口。天女歌音。無量百千樓閣。莊嚴觀者。無厭
超踰帝釋。善現大城。此園一切諸莊。嚴具如梵天宮。
眾生樂見。爾時善財。見此園林。皆是菩薩業行所成。
出諸世間。善根所起。供養不可思議。諸佛所得。無能
壞者。此皆師子奮迅。比丘尼了法如幻。長養功德藏。
善根所成。三千大千世界。天龍八部。無量眾生。悉入

此園而不迫迮。何以故。此比丘尼不可思議威神力。故爾時善財見比丘尼徧處一切寶師子座。端嚴姝妙。威儀庠序。其心寂靜調伏。諸根譬如龍象如澄淨淵。如意寶珠。五欲不染。猶如蓮華。心無所畏。如師子王。安住淨戒不可傾動。如須彌山。除滅眾生諸煩惱。熱如涼香王。滅除眾病如良藥王。見者不虛。如婆樓那天。長養善根。猶如良田。見處一座淨居。天眾眷屬圍繞。爲說不盡法門。又見處座。悅樂梵等。梵眾圍繞。

爲說普妙音聲法門。又見處座。無量他化自在天王
等天子天女眷屬圍繞爲說菩薩清淨自在法門。又
見處座。化自在天王等天子天女眷屬圍繞爲說清
淨一切莊嚴法門。又見處座。刪兜率天王等天子天
女眷屬圍繞爲說心藏旋復法門。又見處座。夜摩天
王等天子天女眷屬圍繞爲說無量莊嚴法門。又見
處座。釋天王等天子天女眷屬圍繞爲說厭離法門。
又見處座。娑伽羅龍王十光明龍王難陀跋難陀龍

王摩那斯龍王伊那槃那龍王阿耨達龍王等龍子
龍女眷屬圍繞爲說善方便救護眾生法門。又見處
座提頭賴吒天王等乾闥婆男女眷屬圍繞爲說無
盡法門。又見處座摩睺羅伽阿脩羅王等眷屬圍繞
爲說法界方便智莊嚴法門。又見處座大勢力迦樓
羅王等眷屬圍繞爲說於生死海無畏法門。又見處
座屯緊那羅王等眷屬圍繞爲說佛行光明法門。又
見處座雲山摩睺羅伽王等眷屬圍繞爲說佛喜法

門。又見處座。無量男子。女人。童男。童女。眷屬。圍繞。爲說勝趣法門。又見處座。常奪眾生命。羅刹王等。眷屬圍繞。爲說起大慈大悲法門。又見處座。樂聲聞者。眷屬圍繞。爲說勝智光明法門。又見處座。樂緣覺者。眷屬圍繞。爲說明淨如來功德光明法門。又見處座。樂大乘者。眷屬圍繞。爲說普門三昧智慧光明法門。又見處座。初發心菩薩。眷屬圍繞。爲說一切佛大願法門。又見處座。二地菩薩。眷屬圍繞。爲說離垢三昧法

門。又見處座。三地菩薩眷屬圍繞爲說寂靜莊嚴法
門。又見處座。四地菩薩眷屬圍繞爲說一切智勢力
境界法門。又見處座。五地菩薩眷屬圍繞爲說淨心
華藏法門。又見處座。六地菩薩眷屬圍繞爲說明淨
藏法門。又見處座。七地菩薩眷屬圍繞爲說普地藏
法門。又見處座。八地菩薩眷屬圍繞爲說法界法身
境界法門。又見處座。九地菩薩眷屬圍繞爲說無有
無著莊嚴法門。又見處座。十地菩薩眷屬圍繞爲說

無礙三昧法門。又見處座。金剛力士眷屬圍繞。爲說
智慧金剛法門。見處如是等一切諸座。一切諸趣一
切眾生眷屬圍繞。種善根者爲說善根。長善根者爲
說增長一切善根。隨其所應而爲說法。乃至於阿耨
多羅三藐三菩提得不退轉。何以故此比丘尼成就
百萬阿僧祇般若波羅蜜門故。所謂普眼般若波羅
蜜門。說一切佛法般若波羅蜜門。分別法界般若波
羅蜜門。壞散一切障礙般若波羅蜜門。出生長養一

切眾生善法般若波羅蜜門。勝莊嚴般若波羅蜜門。
無礙藏般若波羅蜜門。法界圓滿般若波羅蜜門。清
淨心藏般若波羅蜜門。一切眾生樂藏般若波羅蜜
門。得如是等百萬阿僧祇般若波羅蜜門。於此園中
所有眾生皆於阿耨多羅三藐三菩提得不退轉。爾
時善財見師子奮迅比丘尼諸奇特事。所謂園林資
生之具。經行威儀。寶師子座。大眾眷屬。諸妙功德。神
力自在。微妙音聲。如是一切諸奇特事。又聞微妙清

淨音聲宣揚讚歎不思議法。無量法雲之所潤澤。身心柔輒。五體投地。恭敬禮已。將欲繞旋。見比丘尼徧一切座。自見己身及無量眾樹木園林皆悉右旋。繞無數帀。如是見已。合掌恭敬。於一面住。白言。大聖。我已先發阿耨多羅三藐三菩提心。而未知菩薩云何學菩薩行。修菩薩道。唯願大聖爲我解說。善男子。我成就菩薩一切智底法門。大聖。如此法門體性云何。善男子。此法門者。智光莊嚴。於一念中普照三世。大

聖。此智光莊嚴法門境界云何。善男子。入此法門現前正受一切法林三昧時。十方一切世界諸佛處兜率天者。於彼一一佛所。從其自身出生。不可說不可說。佛刹微塵等。摩菟摩身。恭敬禮拜。又齋。不可說不可說。佛刹微塵等。華香纓絡。諸妙寶鬘。末香塗香。衣蓋幢旛。種種寶華雲。乃至一切莊嚴具。雲寶網。寶帳。莊嚴網。等種種寶座。以如是等諸供養具。供養如來。如兜率天所興供養。降神母胎。出生王宮。捨家學道。

詣菩提樹成最正覺轉淨法輪在諸天上人非人中
乃至般涅槃所興供養亦復如是若有眾生知我供
養皆於阿耨多羅三藐三菩提得不退轉其有眾生
來至我所卽爲彼說般若波羅蜜我不起眾生想不
取眾生相知一切語言而不著語言見一切佛不取
佛相深解法身故受持一切諸佛法輪而亦不取法
輪之相解了諸佛真實相故於念念中悉能充滿一
切法界而亦不取法界之相了一切法猶如幻故善

男子。我唯知此菩薩一切智底法門。諸大菩薩究竟法界一切無著。一身結加趺坐。充滿法界。於自身內。悉能顯現一切佛刹。於一念中。悉能往詣一切佛所。於自身內。悉能顯現諸佛神力。能以一毛舉不可說不可說諸佛世界。於一毛孔現不可說不可說世界。成敗於一念中。攝取不可說不可說眾生。於一念中。攝取不可說不可說劫。我當云何能知能說彼功德。行善男子。於此南方有一國土。名曰險難。城名寶莊。

嚴有一女人。名婆須蜜多。汝詣彼問云。何菩薩學菩薩行。修菩薩道。時善財童子頭面敬禮比丘尼足。繞無數帀。眷仰觀察。辭退南行。爾時善財童子大慧光明。以照其心。具足長養一切種智。一心思惟諸法實相。建立一切語言陀羅尼藏。廣修受持一切法輪陀羅尼。爲眾生歸。長大悲力。方便觀察一切種智。滿法界等清淨大願。明淨慧光普照十方。生一切莊嚴諸通明力。充滿十方一切世界。究竟成滿菩薩諸業。漸

漸遊行。至險難國寶莊嚴城。推問婆須蜜多女。今在何所。爾時有人不知彼女深智慧者。作如是念。今此童子威儀庠序。其心寂靜。調伏諸根。遠離放逸顛倒。惑亂。念慧現前。視瞻詳審。言音和雅。不著形色。正念思惟甚深法相。遠離懈怠。心如大海。此非染欲顛倒之人。無情欲想。不沒欲泥。不隨諸根。行出魔界。不服五欲。不爲一切諸魔所縛。所不應作。已能不爲。有何等意而求此女。其中有人先知彼女有智慧者。作如

是言善哉童子。得大善利。乃能推求深智女人。當知童子一向求佛。悉欲攝取一切眾生。拔諸欲刺。壞散淨想。善男子。今此女人在此城中深宮之內。爾時善財聞此語已。心大歡喜。往詣其門。見彼宮宅嚴飾廣大。十重寶牆。周帀圍繞。列植十行寶多羅樹。十重深塹。八功德水。充滿其中。底布金沙。妙寶蓮華。優鉢羅鉢曇摩。拘牟頭分陀利。敷榮鮮茂。彌覆水上。出微妙香。能轉人心。不生垢染。眾寶宮殿臺觀樓閣。阿僧祇

寶以爲嚴飾。紺瑠璃地。灑以香水。熏以沈香。塗以旃檀寶網羅覆。閻浮檀金以爲垂鈴。出和雅音。散眾寶華。猶如降雪。諸妙莊嚴說不可盡。金剛摩尼眞珠寶藏。充滿宅內。十種園林以爲莊嚴。爾時善財見彼女人處寶師子座。顏貌端嚴。妙相成就。身如眞金。目髮紺色。不長不短。不白不黑。身分具足。一切欲界無與等者。何況有勝。言音婉妙。世無倫匹。善知字輪。技藝諸論。成就幻智菩薩方便。以阿僧祇寶莊嚴其身。寶

網羅覆首冠天冠。大眾圍繞皆悉修善。同其願行。成就善根。不可沮壞。具足無盡功德寶藏。身出光明。普照一切。觸斯光者。歡喜悅樂。身心柔軟。滅煩惱熱。爾時善財頭面禮足。繞無數匝。恭敬合掌於一面住。白言。大聖。我已先發阿耨多羅三藐三菩提心。而未知菩薩云何學菩薩行。修菩薩道。答言。善男子。我已成就離欲實際清淨法門。若天見我。我爲天女。若人見我。我爲人女。乃至非人見我。我爲非人女。形體殊妙。

光明色像殊勝無比。若有眾生欲所纏者。來詣我所。爲其說法。皆悉離欲。得無著境界三昧。若有見我。得歡喜三昧。若有眾生與我語者。得無礙妙音三昧。若有眾生執我手者。得詣一切佛刹三昧。若有眾生共我宿者。得解脫光明三昧。若有眾生目視我者。得寂靜諸行三昧。若有眾生見我。嘖呻者。得壞散外道三昧。若有眾生觀察我者。得一切佛境界光明三昧。若有眾生阿梨宜我者。得攝一切眾生三昧。若有眾生

阿眾鞞我者。得諸功德密藏三昧。如是等類一切眾生來詣我者。皆得離欲實際法門。善財白言。大聖。昔於何所種諸善根。修何等業。得此法門。答言。善男子。過去有佛號曰常住如來。應供等正覺。出興於世。彼佛哀愍饒益諸羣生。故入安樂城。足蹈門闌。卽時大地六種震動。其城自然奇妙廣博。眾寶莊嚴。散諸雜華。自然演出娛樂之音。放大光明。一切諸天充滿虛空。廣說如佛入城經中現奇特事。善男子。我於爾時

爲長者婦。名曰善女。見如是等諸特奇事。從夫長者出於道巷。奉彼如來妙寶天冠。時文殊師利爲佛侍者。爲我說法。發阿耨多羅三藐三菩提心。善男子。我唯知此離欲實際法門。諸大菩薩成就無量方便智。慧廣大智藏。智慧境界無能壞者。我當云何能知能說彼功德行。善男子。於此南方有城。名首婆波羅。彼有長者名曰安住。彼常供養梅檀佛塔。汝詣彼問云。何菩薩學菩薩行。修菩薩道。時善財童子頭面敬禮。

彼女人足。乃至辭退南行。爾時善財童子漸漸遊行。至於彼城。詣長者所。乃至白言。大聖。我已先發阿耨多羅三藐三菩提心。而未知菩薩云何學菩薩行。修菩薩道。答言。善男子。我已成就不滅度際菩薩法門。住此法門故。普見十方一切世界去來今佛無涅槃者。除化眾生方便滅度。善男子。我開梅檀佛塔戶時。念念正受無盡佛性三昧門。於念念中。得無量無邊勝妙諸法。白言。大聖。此三昧者境界云何。答言。善男

子。我入此三昧時。見此世界迦葉佛。拘那含牟尼佛。
尸棄佛。毗婆尸佛。提舍佛。弗沙佛。無上勝佛。無上蓮
華佛。見如是等不可說不可說諸佛。閻浮提微塵等
佛。乃至不可說不可說佛刹微塵等佛。見此諸佛從
初發心。神力自在。一切大願。清淨妙行。諸波羅蜜。次
第成就。菩薩諸地。得深法忍。降伏眾魔。長養成就。自
在菩提。淨諸佛刹。種種大眾。教化眾生。放大光明。轉
淨法輪。神力變化。皆悉受持。正念思惟。智慧分別。彼

諸佛法。顯現眾生。見知未來彌勒佛等一切諸佛。現
在盧舍那佛等一切諸佛。亦復如是。如此世界。見知
十方三世一切諸佛聲聞緣覺菩薩。亦復如是。善男
子。我唯知此不滅度際菩薩法門。諸大菩薩一念悉
知三世諸法。念際平等而無有二。住佛所住。於一切
劫而無劫想。隨順諸佛平等正法。如來及我一切眾
生等無有二。淨莊嚴智。照三世間。成就諸佛不轉威
儀。分別一切法界境界。我當云何能知能說彼功德。


行善男子。於此南方。海上有山名曰光明。彼有菩薩
名觀世音。汝詣彼問云。何菩薩學菩薩行。修菩薩道。
時善財童子頭面敬禮。彼長者足繞無數。帀眷仰觀。
察辭退南行。

大方廣佛華嚴經卷第五十一

誦補闕真言

南無三滿哆。沒馱喃。阿鉢囉帝。喝多折。折捺彌。唵。雞
 彌雞彌。怛塔葛塔喃。末瓦山。矻鉢囉帝。烏怛摩怛摩。
 怛塔葛塔喃。末瓦吽。發莎訶。舉字母讚
 華嚴字母。眾藝親宣。善財童子得真傳。秘密義幽玄。
 功德無邊。唱誦利人天。

又◎創琤衝初抄釵鴟嗔獬覲攙撈又
 娑吞◎思思蘇蘇思思西西思西思思娑
 多吞◎當登東都刀儻低顛單◎耽兜多
 壤◎穰仍茸如饒◎而仁然任聶柔壤



時普願法界眾生入般若波羅蜜門
 四十二字妙陀羅。字字包含義理多。
 婆功德大法界沐恩波。

壤	多	娑	叉
---	---	---	---

梵韻滿娑

四生九有。同登華藏玄門。八難三塗。共入毘盧性海。
 南無華嚴海會佛菩薩三稱

大方廣佛華嚴經卷第五十二

東晉天竺三藏佛陀跋陀羅等譯

入法界品第三十四之八

爾時善財童子正念思惟彼長者教。隨順菩薩解脫之藏。正念菩薩諸憶念力。欲次第分別一切諸佛及諸佛法。一心正念諸佛法流。憶念受持彼諸佛法及諸莊嚴。長養菩提。思惟正念一切諸佛不思議業。漸漸遊行。至光明山。登彼山上。周徧推求。見觀世音菩

薩住山西阿處。處處皆有流泉浴池。林木鬱茂。地草柔軟。結加趺坐金剛寶座。無量菩薩恭敬圍繞。而爲演說大慈悲經。普攝眾生。見已歡喜踊躍。不能自勝。合掌諦觀。自不暫眴。作如是念。善知識者。則是如來。善知識者。一切法雲。善知識者。諸功德藏。善知識者。十力妙寶。善知識者。難見難遇。善知識者。無盡智藏。善知識者。功德山王。善知識者。開發示導一切智門。能令一切入薩婆若海。究竟清淨。無上菩提。時觀世音。

遙見善財。告言。善來。童子。專求大乘。攝取眾生。直心
深心。樂求佛法。長養大悲。救護一切。向普賢行。清淨
成滿一切大願。欲聞受持一切諸佛一切法雲。增長
善根。而無厭足。順善知識。不違其教。從文殊師利智
慧功德大海所起。成就善根。得佛勢力。光明三昧。離
懈怠心。專求正法。常見諸佛。遠離眾惡。修諸善行。智
慧成滿。淨如虛空。爾時善財。詣觀世音。頭面禮足。繞
無數。而恭敬合掌。於一面住。白言。大聖。我已先發阿

耨多羅三藐三菩提心而未知菩薩云何學菩薩行
修菩薩道。答言。善哉善哉。善男子。乃能發阿耨多羅
三藐三菩提心。善男子。我已成就大悲法門。光明之
行。教化成就一切眾生。常於一切諸佛所住。隨所應
化。普現其前。或以惠施攝取眾生。乃至同事攝取眾
生。顯現妙身。不思議色。攝取眾生。放大光網。除滅眾
生諸煩惱熱。出微妙音而化度之。威儀說法。神力自
在。方便覺悟。顯變化身。現同類身。乃至同止。攝取眾

生善男子。我行大悲法門光明行時。發弘誓願。名曰
攝取一切眾生。欲令一切眾生離險道恐怖。熱惱恐
怖。愚癡恐怖。繫縛恐怖。殺害恐怖。貧窮恐怖。不活恐
怖。諍訟恐怖。大眾恐怖。死恐怖。惡道恐怖。諸趣恐怖。
不同意恐怖。愛不愛恐怖。一切惡恐怖。逼迫身恐怖。
逼迫心恐怖。愁憂恐怖。復次善男子。我出生現在正
念法門。名字輪法門故。出現一切眾生等身。種種方
便。隨其所應。除滅恐怖。而爲說法。令發阿耨多羅三

藐三菩提心得不退轉。未曾失時。善男子。我唯知此
菩薩大悲法門光明之行。諸大菩薩一切普賢大願
成滿。究竟成就普賢所行。不斷一切諸善根流。不斷
一切菩薩諸三昧流。一切劫流。修菩薩行未曾斷絕。
順三世流。善知一切成敗諸世界流。斷一切眾生不
善根流。出生一切眾生諸善根流。除滅一切諸生死
流。我當云何能知能說彼功德行。爾時東方有一菩
薩名曰正趣來詣此土。住金剛山頂。至此山時。娑婆

世界六種震動。眾寶莊嚴。放大光明。映蔽日月。釋梵
天龍八部。光明悉如聚墨。普照地獄餓鬼畜生閻羅
王處。滅除眾苦。斷除煩惱。及諸病苦。普雨寶雨。充滿
佛刹。乃至普雨一切莊嚴雲雨。供養如來。隨其所應。
示現其身。然後來詣觀世音所。時觀世音告善財言。
善男子。汝見此眾中正趣菩薩不。答言。唯然。已見。善
男子。汝詣彼問云。何菩薩學菩薩行。修菩薩道。時善
財童子頭面敬禮。觀世音足。繞無數匝。觀察無厭。正

念聖教深入智海。辭詣正趣。頭面禮足。右繞畢。恭敬
合掌於一面住。白言。大聖。我已先發阿耨多羅三藐
三菩提心。而未知菩薩云何學菩薩行。修菩薩道。善
男子。我已成就菩薩普門速行法門。白言。大聖。於何
佛所得此法門。所從來刹。去此幾何。發來久如。答言。
善男子。此處難知。一切諸天人非人等所不能了。唯
精進不退。近善知識。佛所護念。具足善根。淨正直心。
得菩薩根。開智慧眼。多聞多知。菩薩境界。唯願大聖。

爲我解說。我當承佛神力。善知識力。而得信解。答言。
善男子。我所從來刹名曰妙藏。佛號妙德。於彼佛所。
得此法門。從彼發來。已經不可說佛刹微塵等劫。於
一念中行。不可說佛刹微塵等步。一步過不可說佛
刹微塵等世界。所經諸國。佛皆現在。以一切菩薩諸
供養具而供養之。悉能了知彼世界中諸羣生海。分
別諸根。隨其所應而爲說法。放大光網。普照十方。出
妙音聲。演說正法。饒益度脫彼諸眾生。乃至十方亦

復如是善男子。我唯知此菩薩普門速行法門。諸大菩薩普於十方無所不至。境界無量。無能壞者。清淨法身。充滿法界。分別了知諸眾生道。滿一切刹。順一切法等。觀三世說平等法。隨順世間。不著佛道。普至諸道。無著無礙。我當云何能知能說彼功德行。善男子。於此南方有城名婆羅波提。彼有一天名曰大天。汝詣彼問云何菩薩學菩薩行。修菩薩道。時善財童子頭面敬禮。正趣菩薩。繞無數匝。眷仰觀察。辭退南

行。爾時善財童子正念思惟菩薩無障礙行。一向專求正趣菩薩智慧境界。出生通明境界。一切功德精進堅固。歡喜無量。得不思議遊戲神通。決定了知諸功德地。諸三昧地。陀羅尼地。諸大願地。諸辯才地。具諸力地。漸漸遊行。至於彼城。推問大天。今在何所。時有人言。善男子。在此城內大法堂上。化現其身。大眾圍繞。而爲說法。爾時善財往詣其所。頭面敬禮。彼大天足繞無數帀。恭敬合掌。於一面住。白言。大聖。我已

先發阿耨多羅三藐三菩提心。而未知菩薩云何學。菩薩行。修菩薩道。爾時大天出四長臂。取四海水。澡洗其面。洗已。取諸金華。以散善財。作如是言。善男子。菩薩難聞難見。乃是世間奇特之法。諸善男子。中分陀利華。爲眾生歸依。攝取饒益。載育眾生。普照一切。顯現正道。遠離愚癡。爲眾生師。救護正法。爲眾生將。救護安隱。悉令得至一切智城。具足成熟。淨身口業。永離眾惡。於眾生類。常以愛語。隨其所應。悉現其前。

未曾失時。善男子。我已成就菩薩雲網法門。白言。大聖。此法門者。境界云何。爾時大天於善財前。積天金聚。猶若山王。白銀。瑠璃。玻瓈。硨磲。瑪瑙。夜光。離垢。藏寶。明淨寶。諸方便門。摩尼寶。周羅寶。纓絡寶。吉由羅寶。莊嚴髮寶。莊嚴童子寶。彌阿羅。莊嚴寶。彌拘羅寶。赤真珠寶。莊嚴一切諸肢節寶。如意珠寶。皆悉積聚。猶若山王。一切華。一切香。一切塗香。一切末香。一切鬘。一切衣。一切蓋。一切幢。一切旛。一切娛樂具。五欲。

境界如是等積。悉如山王。又復顯現阿僧祇諸童女。眾。語善財言。善男子。汝取此諸物供養如來。惠施一切。攝取眾生。悉令眾生修檀波羅蜜。學檀波羅蜜。捨離一切善男子。我以此物教汝惠施。教一切眾生亦復如是。悉令眾生以無貪善根。普熏身心。近善知識。恭敬供養諸佛菩薩。出生長養一切善根。發阿耨多羅三藐三菩提心。復次善男子。若有眾生貪五欲者。爲彼顯現不淨境界。若瞋恚放逸。憍慢諍訟。如羅刹。

鬼飲血食肉。悉教彼等修大慈悲。皆令永離瞋恚放
逸。若懈怠者。爲現水火盜賊惡王怨敵等難。善男子。
如是等類諸惡眾生。種種方便。滅不善根。長養善根。
除滅一切波羅蜜障礙怨敵。具足成滿諸波羅蜜。超
出障礙。得無礙法。善男子。我唯知此菩薩雲網法門。
諸大菩薩。帝釋天王。滅一切煩惱。阿脩羅難。諸菩薩
水滅煩惱火。諸菩薩火能燒一切眾生貪愛。諸菩薩
風能散一切諸染著心。菩薩金剛摧滅一切吾我之

想我當云何能知能說彼功德行。善男子。此閻浮提
內有一國土名摩竭提。有道場地神名曰安住。汝詣
彼問云何菩薩學菩薩行。修菩薩道。時善財童子頭
面敬禮彼大天。足乃至辭退。趣摩竭提國。詣彼道場
安住地神。爾時一萬地天各作是言。此來童子能攝
眾生。卽是佛藏。能破一切眾生無明殼膜。生法王家。
離垢無礙。寶繒以冠其頂。智慧寶藏。摧外道輪。時安
住地天等一萬地天。雨眾香水。以灑其地。埽以香風。

而以莊嚴。放大光明普照三千大千世界。眾寶莊嚴。一切華樹開敷鮮茂。一切果樹悉成果實。一切泉源。河池流相灌注。演出種種娛樂音聲。諸天眾寶莊嚴樓閣。異類眾鳥皆悉歡喜。出哀和音。無量寶藏自然涌出。爾時安住地神告善財言。善來童子。汝欲自見曾於此處所種善根果報不乎。爾時善財頭面敬禮彼地神足。恭敬合掌於一面住。白言。大聖。唯然欲見。時彼地神卽以足指案地。無量阿僧祇那由他寶藏。

開發顯現善男子。汝昔所種善根果報。致此寶藏。自在隨汝。善男子。我已成就菩薩不可壞藏法門。我於然燈佛來。常護菩薩。修菩薩行。深入智慧境界。盡其源底。大願成滿。淨菩薩行。出生菩薩一切通明。具足菩薩諸力功德。成就菩薩不可壞法。遊諸佛刹。聞一切佛所授記法。轉一切法輪。一切脩多羅法雲。以大法光明教化眾生。受持諸佛自在神力。善男子。乃往古世。過須彌山微塵等劫。有劫名莊嚴。世界名月幢。

佛號善眼。於彼佛所得此法門。修習長養淨此法門。於其中間常遇不可說不可說佛刹微塵等佛。彼諸如來往詣道場。自在神力皆悉奉覲。於此佛所修習善根。善男子。我唯知此法門。諸大菩薩常能隨侍一切諸佛。悉聞受持彼諸佛法。深入諸佛祕密教法。於念念中出淨法身等一切佛。佛一切影藏。出一切佛法。所行無壞。我當云何能知能說彼功德行。善男子。此閻浮提有城名曰迦毗羅婆。彼有夜天名婆娑婆。

陀。汝詣彼問云。何菩薩學菩薩行。修菩薩道。時善財童子頭面敬禮。安住地神。繞無數匝。辭詣彼城。爾時善財童子正念思惟。安住天教。菩薩不可壞藏法門。修諸三昧。明諸三昧。觀察菩薩諸法律儀。菩薩自在遊戲神通。觀察菩薩一切淨法。深入菩薩甚深智慧。究竟菩薩無壞法門。隨順菩薩無壞法門。深入菩薩諸法門海。漸漸遊行。至於彼城。從東門入。中城而住。爾時善財日沒未久。隨順一切菩薩所教。一心欲見。

婆娑婆陀夜天於善知識發如來想。普眼境界顯現諸方。智慧悉至一切境界。清淨法眼普見一切諸法界海。大智慧眼觀察十方。見彼夜天於彼城上虛空中住。處寶樓閣香蓮華座。身如真金。目髮紺色。端嚴姝妙。見者無厭。身服朱衣。眾寶莊嚴。頂上結髮。猶如梵王。於其身上現一切星宿及其光明。化度無量世界。眾生遠離惡道。於一毛孔皆悉覩見。所化眾生或有生天。或得聲聞緣覺。修菩薩行。種種方便形色音

聲諸語言法。所說正教化度眾生。隨所經劫諸菩薩
等教化眾生。悉令修習菩薩諸行。勇猛精進修諸三
昧。諸神力門。菩薩自在神力境界。菩薩所住菩薩光
明。菩薩奮迅菩薩法門。以化眾生於一毛孔。皆悉見
聞。爾時善財見聞此已。心大歡喜。頭面敬禮。彼夜天
足繞無數。而恭敬合掌於一面住。白言。天神。我已先
發阿耨多羅三藐三菩提心。信解因善知識得諸佛
法。唯願天神開示顯現一切智道。若有菩薩向此道。

者得十力地。爾時夜天告善財言。善哉善哉。善男子。敬善知識。隨順其教。若有菩薩隨其教者。疾得阿耨多羅三藐三菩提。善男子。我已成就菩薩光明普照諸法。壞散眾生愚癡法門。善男子。我於惡眾生發大慈心。於不善業眾生發大悲心。於修善眾生發歡喜心。於善惡眾生發無二心。於染汙眾生發清淨心。於邪道眾生發正道心。於樂不淨眾生發樂淨心。於樂生死眾生發隨順法輪心。於樂聲聞緣覺眾生發安

立一切智道心。善男子。我常如是思惟教化眾生。於
夜闇中人靜鬼神盜賊所遊行時。比丘離威儀時。重
雲煙塵昏蔽日月不見色時。若有眾生在城邑聚落
山巖曠野八方大海。乃至一切水陸眾生。於此眾生
以種種方便滅其恐怖。若有眾生遭於海難雲難山
難。大風洄復。及以波浪。迷惑失道。不見邊岸。遭如是
等種種海難。我於爾時。或作船形。或作馬王象王狗
王師子獸王阿脩羅王海神王形。作如是等形方便。

度脫眾生海難。爲陸地眾生。或作淨月。及諸星宿。炬
火電光。諸寶光明。天身光明。菩薩光明。以如是等無
量方便。救護眾生。發如是心。我爲一切眾生。常作歸
依。除滅煩惱。令畏死者。得無畏法。令貧窮者。皆得富
樂。爲在山眾生。或作果樹。或作流泉。迦陵頻伽鳥等。
出妙音聲。或作山神。或作平地。以如是等無量方便。
度脫眾生。發如是心。令諸眾生。免此山難。又令一切
越生死山。爲曠野眾生。種種方便。令其悅樂。入正見。

道除滅飢渴。於如是等無量難中救眾生已。復作是念。願令眾生速滅眾苦。究竟一切安隱智道。見樂著國土。眾生受諸苦惱。種種方便滅其樂著。作如是念。願令眾生除五陰著。住一切佛薩婆若境界。見著聚落。眾生受諸苦惱。種種方便而爲說法。令其厭離。以法攝之。復作是念。令一切眾生離六入空聚。超出生死。究竟得入一切智城。復次善男子。若有眾生迷於十方。以東爲西。以西爲東。乃至以上爲下。以下爲上。

爲此眾生無量方便。斷其迷惑。若欲出者。開示門戶。
若失道者。示導正路。若欲度者。示以津濟。無舟楫者。
而資給之。不知方域。示其樂土。以如是等無量方便。
顯現開導。而度脫之。發如是心。我已照除長夜昏冥。
世間眾事。無不宣敘。又令眾生永滅癡闇。得清淨眼。
離眾生相。及諸邪見。常樂我淨。計著眾生。及福伽羅。
陰界諸入。不了因果。行不善道。殺害眾生。乃至邪見。
不孝父母。不供養沙門婆羅門。遠離正道。行不善業。

誹謗正道。欲壞法輪。毀菩薩眾。憎惡大乘。不讚菩提。
毀皆賢聖行惡人法。造五逆業。如是等類。諸惡眾生。
我以明淨慧光。除其愚闇。令發阿耨多羅三藐三菩
提心。究竟普賢菩薩所行。開十力道。遠離生死。現一
切智。城諸佛境界。諸佛神通。具足諸力。現總持力。安
住諸佛平等正法。現一切佛悉同一身。復次善男子。
我見貧苦老病眾生。種種方便而救濟之。復作是念。
以無上法。攝彼眾生。滅諸煩惱。令得解脫。離生老病。

死憂悲苦惱惡道諸難。近善知識。深入法界。離諸惡業。淨佛法身。置無老病死。常住法界。復次善男子。我見諸惡眾生。遠離正道。趣於邪徑。著諸倒見。虛妄迷惑。具行不善身口意業。種種放逸。依止惡法。於非正覺。爲正覺想。於正覺所。非正覺想。近惡知識。受諸苦惱。我見此已。無量方便。除其邪惑。安立正見。令於天人。最爲殊勝。復作是念。令諸眾生。得出世間。無上正道。不復退轉。於一切智。滿足。普賢菩薩大願。得一切

智而亦不離菩薩諸地。不壞眾生性。爾時夜天欲重
宣明此法門義。承佛神力。觀察十方。卽爲善財以偈
頌曰。

我所成妙法	知時諸門地	照除愚癡闇
普觀一切法	無量無數劫	我常修大慈
普覆諸羣生	善財應速具	成就大悲海
出生三世佛	除滅一切苦	善財速究竟
佛子心歡喜	遠離世間惡	超出三界苦

受諸賢聖樂	遠離有爲惡	聲聞智解脫
滿足如來力	佛子應究竟	我以淨天眼
普觀十方刹	於彼世界中	見佛處道場
相好莊嚴身	無量眾圍繞	放大光明海
普照化眾生	覩諸羣生類	死此而生彼
回流五趣中	常受無量苦	以淨天耳海
普聞十方音	一切語言海	皆悉能受持
一切諸如來	無量微妙聲	所轉淨法輪

悉聞能受持 我以淨鼻根 法海中無礙
能入諸法門 善財應究竟 我成大人相
清淨廣長舌 隨應演妙法 佛子應究竟
清淨妙法身 三世如如等 隨其所應化
一切無不現 我心無所染 清淨如虛空
普攝一切佛 而亦無所著 了知無量刹
羣生諸心海 分別一切根 遠離諸虛妄
我以神通力 徧遊無量刹 普覆一切眾

調伏諸眾生
智慧如虛空
無比無盡藏

供養諸如來
饒益一切眾
清淨廣智慧

分別諸法海
除滅眾生惑
佛子應究竟

通達三世法
深入諸佛海
明了一切法

無能測量者
一一微塵中
悉見佛刹海

又覩諸如來
此是普力地
見盧舍那佛

道場成正覺
十方刹微塵
悉轉正法輪

爾時善財童子白言。天神發阿耨多羅三藐三菩提

心爲幾時耶。得此法門其已久如。乃能如是饒益眾生。答言。佛子。乃往古世過如須彌山微塵等劫。有世界名寶德。劫名寂靜。有五百億佛出興於世。時有大城名蓮華光。有轉輪聖王名善法度。如聖王法成就七寶。城東有林名曰妙德。於此林中有菩提樹名一切佛自在光明爾時一切法雷王佛坐此樹下成等正覺。放大光明普照一切世界。王玉女寶名法慧月蓮華光。於彼城內有一夜天名曰淨月。於中夜時出。

微妙音告此玉女。汝應當知一切法。雷王佛出興於世。稱揚讚歎彼佛功德。顯現如來自在神力。發阿耨多羅三藐三菩提心。讚歎普賢菩薩一切願行。時王玉女供養彼佛及諸菩薩諸聲聞眾。善男子。爾時玉女法慧月蓮華光者。豈異人乎。我身是也。善男子。我於彼佛種善根。力於須彌山微塵等劫。不墮地獄餓鬼畜生閻羅王處。不生下賤之家。具足諸根。除滅眾苦。常於天人中勝。不離善知識。諸佛菩薩。不生五濁

劫中。於彼諸佛菩薩所。增長善根。於八十須彌山微塵等劫。安隱快樂。而未滿足菩薩諸根。復次善男子。過此須彌山微塵等劫。已復過一萬劫。有劫名離憂。世界名離垢勝。有須彌寂靜眼如來。應供等正覺等五百如來。出興於世。其佛國土。或淨或穢。彼世界中。有一四天下。名曰離垢。城名莊嚴。我於爾時。爲明勝長者女。名勝慧光。端正姝妙。彼淨月天。以本願力。生此城中。復作夜天。名清淨眼。時彼夜天。復於中夜來。

詣我家。顯現妙色。讚歎如來。又勸導我。詣彼如來。放大光明。在前引導。我於爾時。與父母俱。及其眷屬。往詣須彌。寂靜眼如來所。供養恭敬。聽佛說法。得菩薩三昧。名曰見佛。教化眾生。明淨慧光。普照三世。得此三昧。已憶念過去。須彌山微塵等劫。所見諸佛。又聞彼佛所說經法。得光明普照。諸法壞散。眾生愚癡。法門放大光明。照十佛刹微塵等世界。見彼刹中一切如來。往詣其所。知彼眾生。諸語言法。心根欲性。爲彼

眾生作善知識隨其所應顯現其身。於念念中長養此法門。一身充滿世界微塵等世界。乃至充滿世界海微塵等世界海。悉見彼世界海微塵等世界海中一切如來往詣其所。彼佛說法我悉聞持。分別了知彼諸如來本事願海。彼諸如來嚴淨佛刹。我亦嚴淨於彼世界中隨其所應。示現其身化度眾生。念念長養於此法門。與法界等善男子。我唯知此光明普照諸法壞散眾生愚癡法門。諸大菩薩究竟無量無邊。

普賢所行。深入法界海。建智慧幢。得諸三昧。遊戲神通。大願成滿。守護受持十方世界一切佛法。於念念中。悉能嚴淨一切佛刹。滿功德海。於念念中。教化一切諸羣生海。智慧淨日。普照三世一切世界。教化一切眾生。離垢淨月。除滅一切眾生熱惱。疑惑癡闇。於一切有海心。無所著。演出清淨圓滿妙音。充滿十方一切法界。於一一微塵中。顯現一切自在神力。明淨慧光。普照三世。我當云何能知能說彼功德行。善男

子。此閻浮提摩竭提國。有一夜天名甚深妙德離垢
光明。汝詣彼問云何菩薩學菩薩行。修菩薩道。爾時
善財卽以偈讚彼夜天曰。

我見清淨身 相好自莊嚴 如文殊師利

亦如寶山王 具足淨法身 三世悉平等

普攝諸羣生 其心無所著 普放淨光明

徧照一切趣 於一毛孔中 悉見諸星宿

離垢清淨心 如空滿十方 攝取諸法王

明淨深智慧	一一毛孔中	悉放無量光
十方諸佛所	普雨功德雲	一一毛孔中
出諸變化身	充滿十方界	方便度眾生
本爲菩薩時	淨不思議刹	一一毛孔中
皆悉得顯現	若有見聞者	悉獲功德利
專求菩薩道	成就佛菩提	若有見聞者
發大歡喜心	遠離惡道難	除滅諸煩惱
千刹微塵劫	讚歎其功德	諸劫猶可盡

功德無窮已

時善財童子頭面敬禮彼夜天足繞無數帀眷仰觀
察心無厭足辭退遊行向摩竭國爾時善財童子一
心思惟彼夜天神初發道心圓滿清淨思惟是已卽
得深入諸菩薩藏出生菩薩諸大願海淨諸菩薩波
羅蜜道逮得菩薩圓滿諸地住諸菩薩圓滿行業窮
盡菩薩發趣道海善能深入一切智海皆悉救護一
切眾生長養增廣大慈悲雲於一切剎出生普賢諸

大願行。漸漸遊行。至甚深妙德離垢光明夜天所。頭面禮足。繞無數帀。恭敬合掌於一面住。白言。天神。我已先發阿耨多羅三藐三菩提心。而未知菩薩云何修菩薩行。具足諸地。答言。善哉善哉。童子。乃能發阿耨多羅三藐三菩提心。問菩薩行。具足諸地。善男子。菩薩成就十法。則能具足菩薩所行。何等爲十。一者得現前三昧。見一切佛。二者得清淨眼。見一切佛相好嚴身。三者分別了知一切諸佛無量無邊功德大

海四者無量無邊佛光明海。悉能普照一切法界。五者於一一毛孔放一切眾生數等大光明海。隨其所應度脫眾生。六者於一一毛孔悉見一切寶光燄海。七者於念念中出一切佛變化大海。充滿法界。究竟一切諸佛境界。教化眾生而無障礙。八者出一切佛妙音聲海。轉三世佛清淨法輪。九者演說一切脩多羅雲。究竟佛音深入一切諸如來海。十者現不思議佛自在神力。化度眾生。善男子。若有菩薩具此十法。

則能滿足菩薩一切諸行。善男子。我已成就菩薩寂滅定樂精進法門。悉見三世嚴淨佛刹。一切諸佛及眷屬海。無量無邊佛神力海。分別了知佛名號海。轉法輪海。知彼諸佛壽命無量音聲微妙法身清淨充滿法界。亦不著如來一切諸相。何以故。如來非過去除滅世間一切取故。如來非未來無所起故。如來非現在無生身故。如來非滅離語言道故。如來非實現幻法故。如來非虛妄饒益一切眾生出興世故。如來

去無所至滅死此生彼故。如來不可壞。法性無壞故。如來一性離語言道故。如來無性究竟法性故。善男子。我如是了知一切。如來開發增廣菩薩寂滅定樂。精進法門。照明莊嚴。深入隨順平等堅固境界。分別了知遠離虛妄。發起大悲。攝取眾生未曾捨離。一心寂定。正受初禪。除滅意業。得寂智力。攝取眾生歡喜悅樂。入第二禪。捨離生死。寂滅涅槃。觀眾生性。修第三禪。滅一切眾生諸煩惱苦。修第四禪。增長一切智。

菩提心願。出生菩薩一切三昧海。巧妙方便。究竟菩薩一切法門海。成就菩薩遊戲神通。出生菩薩自在所行明淨智慧。深入普門法界。善男子。我如是修習菩薩寂滅定樂精進法門。種種方便度脫眾生。在家放逸貪欲眾生。令修不淨想。不樂想。憂惱想。逼迫想。繫縛想。羅刹想。無常想。苦想。無我想。空想。不自在想。老死想。令彼眾生遠離五欲常樂正法。信家非家出家學道。思惟坐禪。爲障亂聲。除鬼神怖。若於中夜欲

出行時爲開門戶。光明照路。除滅闇冥。讚佛法僧及善知識。又復讚歎近善知識。令諸眾生未生惡法方便不生。已生惡法方便令滅。未生善法方便令生。已生善法方便增廣。行菩薩行。修波羅蜜。滿足大願。出生一切智。習大慈悲。欲令眾生得人天樂。除滅妄想。增長善法。順薩婆若。善男子。我唯知此菩薩寂滅定。樂精進法門。諸大菩薩。滿普賢願。具足普賢菩薩所行。究竟得離癡闇法界。具足善根。成就如來智力光。

明於佛境界無所障礙。住生死中心無所染。薩婆若願具足成滿。深入一切諸佛刹海。攝取一切諸佛大海。受一切佛妙法雲海。滅一切眾生生死閻海。薩婆若光照生死夜。我當云何能知能說彼功德行。善男子。去此不遠。如來右面。有一夜天。名曰喜目。觀察眾生。汝詣彼問云。何菩薩學菩薩行。修菩薩道。爾時甚深妙德離垢光明夜天。欲重宣明此法門義。以偈頌曰。

入於現前定	普見三世佛	離垢清淨眼
分別諸佛海	觀察諸佛身	相好自莊嚴
一念無量力	自在滿法界	盧舍那如來
道場成正覺	一切法界中	轉於淨法輪
最勝知法相	寂滅無有二	妙色相莊嚴
顯現一切眾	佛身難思議	悉滿諸法界
普於十方刹	隨應悉現前	一念放光明
一切刹塵等	無量微妙色	普照諸法界

如來一毛孔 放不思議光 普照諸羣生

除滅眾煩惱 如來一毛孔 出無盡化海

充滿諸法界 顯現眾生類 如來一妙音

充滿諸法界 普雨甘露法 令發菩提心

無量劫修行 攝取諸羣生 普見諸佛刹

皆悉如電光 如來出世間 普見羣萌類

眾生性境界 悉能分別知 一切諸菩薩

所住諸法門 於佛一毛孔 悉能分別知

不遠有夜天 名喜目觀察 汝往彼詣問

云何菩薩行

時善財童子頭面敬禮彼夜天足繞無數而眷仰辭
退向喜目觀察眾生夜天。

大方廣佛華嚴經卷第五十二

誦補闕真言

南無三滿哆。沒馱喃。阿鉢囉帝。喝多折。折捺彌。唵。雞
 彌雞彌。怛塔葛塔喃。末瓦山。斫鉢囉帝。烏怛摩怛摩。
 怛塔葛塔喃。末瓦吽。發莎訶。舉字母讚
 華嚴字母。眾藝親宣。善財童子得真傳。秘密義幽玄。
 功德無邊。唱誦利人天。

曷 九恆 洪胡 毫孩 笑賢 寒 含 侯 曷
囉 郎 楞 籠 盧 勞 來 黎 芬 闌 林 藍 婁 囉
香 〇 當 登 冬 都 刀 懂 低 顛 單 耽 兜 多

● 旁 棚 髮 葡 炮 排 皮 貧 杵 〇 薺 髻 婆
 唱 婆 字
 車 〇 昌 稱 衝 樞 怛 差 蚩 瞋 闡 覲 韞 雙 車

時普願法界眾生入般若波羅蜜門
 四十二字妙陀羅。字字包含義理多。
 婆功德大。法界沐恩波。

車	十	婆	多	闕
	梵	韻		

四生九有。同登華藏玄門。入難三塗。共入毘盧性海。
 南無華嚴海會佛菩薩

三稱

大方廣佛華嚴經卷第五十三

東晉天竺三藏佛陀跋陀羅等譯

入法界品第三十四之九

爾時善財童子專求善知識。念因善知識。生諸善法。善知識者難見難遇。見善知識滅諸亂想。見善知識除滅一切諸纏障礙。見善知識得薩婆若智慧光明。見善知識深入佛海。見善知識得正念法雲陀羅尼。受持一切佛淨法輪雲。見善知識具大悲海救護眾。

生見善知識。智慧明淨。悉能普照諸法界海。時喜日
觀察眾生。夜天以威神力。加善財童子。讚善知識。詣
善知識。恭敬供養。善知識者。則是菩提。善知識者。則
是精進。善知識者。難見難遇。善知識者。是不可壞力。
因善知識。徧遊十方。斷生死流。悉能成辦一切大事。
莊嚴正道。得普門法門。一切無礙。見善知識。不離本
處。徧至十方。一切佛所。爾時善財。卽時了知。見善知
識。成滿無量諸大願海。得一切智。饒益眾生。滅除未

來無量劫苦。以大莊嚴而自莊嚴。一一微塵中。修行一切諸法界法。見十方海。知未來劫諸語言法及菩薩行。究竟一切諸菩薩行。於念念中。得一切智神力。自在諸莊嚴道。等三世佛淨法界流。不離法界境界。而能往詣充滿法界善知識所。爾時善財往詣喜目。觀察眾生夜天。見彼夜天在如來所。於大眾中。處寶蓮華師子之座。正受菩薩普光喜幢法門。一切毛孔出眾妙雲。其有見者。欣悅無厭。所謂智慧行雲。饒益

眾生離於諍訟。不著諸法。以平等心普攝眾生。顯三世菩薩修行布施。悉捨內外難捨之物。十方眾生皆悉覩見。又於一切毛孔。出眾生數等菩薩變化身雲。充滿法界。現眾生前。顯示正受不動三昧。覺悟眾生。不樂三界。遠離世間。滅除生死。現天人中種種成敗。教諸眾生。修不淨觀。除淨想。倒說有爲行。無常變易。苦惱之法。令諸眾生深入佛戒。未曾暫離。受持諸佛清淨禁戒。現無疑戒。及以香戒。戒香普熏一切眾生。

又於一切毛孔。出眾生數等妙色身雲。顯示眾生截諸肢節。皆悉能忍。堪受眾苦。一切訶責惡罵。皆悉忍受。於彼眾生。不生恚心。恭敬讚歎。不生惡心。於一切眾生。不起我慢。顯現諸法自性之忍。顯現無盡菩提心。智除滅一切眾生煩惱。修習忍法。行菩薩行。顯現清淨金剛之身。顯現如來清淨無上色身。隨其所應教化眾生。又於一切毛孔。出諸趣種種色身雲。勇猛精進。現一切智。勇猛精進。現菩提境界。而不退轉。勇

猛精進降伏諸魔。勇猛精進於生死海。悉能救度一切眾生。勇猛精進除滅一切惡道諸難。勇猛精進壞無智山。勇猛精進恭敬供養一切如來。心無疲倦。勇猛精進受持守護諸佛法輪。勇猛精進壞散一切諸障礙山。勇猛精進嚴淨一切諸如來刹。得諸如來清淨。精進教化度脫一切眾生。又於一切毛孔出種種色身雲。以諸方便除滅眾生愁憂苦惱。悉令歡喜。厭惡五欲。讚歎慚愧。調伏諸根。修行無上清淨梵行身。

口意善顯現世間一切所欲皆不可樂。建立眾生令樂正法。出生正受九次第定。除滅眾生一切煩惱。顯現菩薩諸三昧海。通明自在神力境界。令諸眾生皆悉歡喜。身心柔軟。滅煩惱熱。得清涼樂。長養正法。又於一切毛孔出諸趣種種身雲。詣一切刹諸佛師長善知識所。恭敬供養。心無疲倦。受持一切諸佛法輪。究竟一切佛海。顯現一切法海。顯現一切諸法實相。顯現一切諸三昧門。清淨智慧。分別一切眾生心海。

金剛智慧壞散一切眾生諸邪見山。出生圓滿明淨。慧曰。於一念中。悉能除滅一切眾生愚癡闇冥。令諸眾生皆悉歡喜得薩婆若。又於一切毛孔。出一切眾生數等身雲。現種種色身。不思議身。隨其所應。悉現其前。以無量音爲諸眾生演說世間功德之藏。世間行業一切三界皆不可樂。歎離三界諸惡邪見。遠離邪道。向一切智。超出聲聞緣覺之地。於有爲無爲。心無所著。背捨生死。正向涅槃。而亦不捨諸趣往來。不

捨發菩提心。成等正覺。教化眾生。得一切智。又於一
一毛孔。出一切佛刹微塵等變化身雲。普現一切諸
眾生前。修普賢行。滿普賢願。讚歎究竟一切大願。於
念念中嚴淨一切諸世界海。於念念中恭敬供養一
切諸佛。於念念中悉能受持一切法海。於念念中一
一微塵中出生一切世界海微塵等法界方便海。住
持一切刹。一切劫。淨一切智道。未曾休息。於念念中
悉入一切諸如來力。究竟三世方便海。於一切刹現

自在力。令一切眾生修菩薩行。成滿大願。得一切智。
又於一一毛孔。出一切眾生心等身雲。悉現一切諸
眾生前。顯現無量一切智力。不可窮盡。無能壞者。修
不退轉菩薩諸行。於生死法。心無所染。降伏眾魔。滅
煩惱力。壞散一切障礙。山力。具大悲力。於一切劫。修
菩薩行。心無疲倦。震動一切諸佛世界。令眾生喜。轉
淨法輪。建立法幢。制諸外道。修菩薩行力。波羅蜜。得
一切智。又於一一毛孔。出一切眾生心等種種色身。

雲充滿無量諸眾生界。隨其所應現菩薩行。智力精
進度眾生海。分別了知一切眾生心心所行海。一切
眾生諸根海。一切眾生行海。教化眾生未曾失時。明
淨智慧究竟法性。於念念中明淨智慧充滿法界。了
知一切世界成敗及其莊嚴自在神力。詣諸佛所恭
敬供養守護受持正法輪雲。如是顯現智波羅蜜。悉
令眾生皆大歡喜。熙怡快樂。身心柔軟。除滅熱惱。遠
離憂感。棄捨眾惡。調伏諸根心。得解脫於一切智得。

不退轉。如顯現諸波羅蜜。化度眾生。顯現菩薩一切功德。化度眾生。亦復如是。又於一切毛孔。顯現喜目。觀察眾生。夜天從初發心。所爲功德。求善知識。往詣諸佛。恭敬供養。修習善根。行檀波羅蜜。難捨能施。行尸波羅蜜。棄捐天下宮殿眷屬。出家學道。淨修禁戒。行羸提波羅蜜。一切眾生。悉加惡言。無量逼切。皆悉能忍。行毗梨耶波羅蜜。修諸苦行。專求菩提。其心堅固。而不退轉。行禪波羅蜜。諸方便道。滿足清淨。禪波

羅蜜於諸三昧而得自在。究竟一切諸三昧海相續次第未曾斷絕。行般若波羅蜜。清淨菩薩圓滿智慧。出明淨慧日無盡慧藏。究竟智海。行方便波羅蜜。出生一切諸方便身。方便功德。方便清淨。方便本事。行願波羅蜜。出生一切諸願淨身。成滿諸願。隨應行願。及願波羅蜜。本事。行力波羅蜜。力波羅蜜。因緣功德。力波羅蜜。方便海。分別演說力波羅蜜。本事。行智波羅蜜。智波羅蜜。出生智波羅蜜。淨身。智波羅蜜。說智

波羅蜜境界。智波羅蜜所攝。智波羅蜜光明。智波羅蜜本事。智波羅蜜分別行。智波羅蜜深入。智波羅蜜攝取諸法。隨順知法。知業。知刹。知劫。知三世。知佛出世。知佛智。知菩薩。知菩薩智。知菩薩住。知菩薩功德。知菩薩回向。知諸大願。知轉法輪。知分別法。知入法海。知方便海。知法旋流。知諸法趣。如是等一切智波羅蜜於一切毛孔皆悉顯現。化度眾生。又於一切毛孔出無量身雲。所謂阿迦尼吒天身雲。淨居天身雲。

善現。天身雲。不熱。天身雲。果實。天身雲。徧淨。天身雲。
無量淨。天身雲。少淨。天身雲。淨果。天身雲。無量淨。果。
天身雲。少淨。果。天身雲。光音。天身雲。無量光音。天身。
雲。少光音。天身雲。大梵。天身雲。梵輔。天身雲。梵眾。天。
身雲。他化自在。天王及他化自在。天子。天女身雲。化。
自在。天王及化自在。天子。天女身雲。兜率。天王及兜。
率。天子。天女身雲。夜摩。天王及夜摩。天子。天女身雲。
三十三。天王及三十三。天子。天女身雲。提頭賴吒。

天王及一切乾闥婆男女身雲。毗樓勒叉天王及一切鳩槃荼男女身雲。毗樓博叉天王及一切龍男女身雲。毗沙門天王及一切夜叉男女身雲。緊那羅王及一切緊那羅男女身雲。摩睺羅伽王及一切摩睺羅伽男女身雲。迦樓羅王及一切迦樓羅男女身雲。阿脩羅王及一切阿脩羅男女身雲。閻羅王及一切閻羅王男女身雲。人王身雲。男子女人童男童女身雲。出如是等一切諸趣身雲。聲聞緣覺仙人身雲。地

水火風神海神河神山神林神樹神穀神味神藥草
神園觀神城郭神道場神夜神晝神虛空神方神道
路神身形神金剛力士神出如是等一切身雲充滿
十方一切世界法界爲一切眾生現喜目觀察眾生
夜天從初發心所行功德積集無量諸波羅蜜次第
受生死此生彼及其名號近善知識值遇諸佛聞持
正法行菩薩行得諸三昧次第覩見一切佛刹及諸
如來次第諸劫得淨智慧深入法界觀察眾生知眾

生海死此生彼。得淨天耳。次第悉聞一切音聲。知他
心智次第。了知眾生心念。無依神足。次第自在。充滿
十方。得諸菩薩次第法門。究竟菩薩諸法門海。菩薩
自在。菩薩精進。菩薩得證正趣。離生眾生想。菩薩想。
菩薩勝妙清淨功德。如是等類。一切功德。彼化身雲
悉爲眾生。以諸音聲。分別解說。開示顯現。所謂風輪
音聲。水輪音聲。火燄音聲。大海音聲。大地震動音聲。
山王相擊音聲。天城震動音聲。天寶音聲。諸天音聲。

龍王音聲。夜叉王乾闥婆王阿脩羅王迦樓羅王緊
那羅王摩睺羅伽王等音聲。人王音聲。梵王音聲。天
女歌頌音聲。天樂音聲。摩尼寶王音聲。如來音聲。菩
薩音聲。如來化身音聲。以如是等種種音聲。爲諸眾
生分別演說喜目觀察眾生。夜天從初發心一切功
德。彼一一身雲說此法時。念念中於一一方嚴淨不
可說不可說諸佛世界。無量無邊眾生滅惡道苦。無
量無邊眾生成就天樂。無量無邊眾生度生死海。無

量無邊眾生安立聲聞辟支佛地。無量無邊眾生得菩薩不可思議喜幢自在法門。於念念中無量無邊眾生住如來地。爾時善財童子皆得見聞如上一切諸奇特事。正念思惟觀察分別。深入定智安住平等。何以故。與彼夜天先同行故。佛護念故。成就不可思議諸善根故。具足菩薩根故。生佛家故。得善知識力故。一切諸佛神力持故。盧舍那佛本願力故。善根熟故。堪受普賢菩薩行故。爾時善財得菩薩歡喜淨光。

明海得十方一切諸如來力。得彼夜天離垢喜幢法門。卽恭敬合掌。以偈讚歎彼夜天曰。

無量無數劫	深學最勝法	隨應所受化
顯現妙色身	了知諸羣生	愚癡顛倒惑
種種身方便	度脫眾生類	清淨妙法身
除滅煩惱熱	非二現有二	爲化眾生故
陰入及諸界	皆悉無所著	具行及色身
度脫一切眾	不著內外法	越度生死海

明淨智慧光 普照於一切 喜目天無著
除滅眾虛妄 眾生樂著世 爲現佛法力
無礙三昧力 一一毛孔中 出諸化身雲
供養十方佛 念念中出生 諸佛方便力
攝取諸眾生 究竟一切法 觀察諸有海
業行莊嚴身 演說無礙法 令眾清淨故
相好自莊嚴 猶若普賢身 隨應受化者
顯現無量身

爾時善財童子偈讚歎已。白言。天神發阿耨多羅三藐三菩提心。爲幾時耶。得此法門。其已久如。爾時夜天以偈答言。

憶念過去世	無量刹塵劫	爾時有一劫
名曰寂靜音	有都名香水	其王名智慧
十二億百千	那由四天下	彼聖轉輪王
清淨妙色身	三十二相具	八十好莊嚴
妙色清淨藏	閻浮檀金色	光明照一切

庠步遊虛空 彼王有千子 勇猛身端正
大臣有一億 智慧悉賢明 姝女有十億
端嚴如天后 大慈心柔輒 瞻奉給侍王
彼聖轉輪王 常以正法治 統領諸山地
一切四天下 我時爲寶女 具足淨梵音
身出金色光 周照四萬里 日光旣沒已
中夜閑寂然 我當於爾時 神瑞降善夢
見佛出世間 號曰功德海 顯現自在力

充滿十方界	放大光明海	一切剎塵等
無量自在身	充滿於十方	大地六種動
自然出妙音	如來興出世	天人悉歡喜
一切毛孔中	出佛化身海	充滿十方界
隨應而說法	我夢見如是	如來自在力
聞說深妙法	其心大歡喜	一萬夜天神
充滿虛空中	讚歎彼如來	聞已卽覺悟
彼天告我言	賢慧女速起	佛已興汝國

劫海難值遇 聞此音歡喜 卽見明淨光
觀察從何來 道場樹王所 時見如來身
猶若寶山王 一切毛孔中 放大光明海
見佛自在力 其心大歡喜 卽發宏誓願
令我獲此德 我時覺大王 普及諸眷屬
見彼佛光明 歡喜心無量 我時與彼王
無量那由他 眷屬四種兵 往詣如來所
我於二萬歲 供養彼如來 七寶四天下

一切悉奉施	時彼如來說	功德普雲經
大願海莊嚴	隨應度眾生	我發如是願
來世作夜天	諸有放逸者	悉令遠離之
爾時我初發	無上菩提心	生死有爲中
未曾有忘失	從是後供養	十億那由佛
生死海受樂	饒益諸羣生	初佛功德海
第二功德燈	第三寶幢佛	第四虛空智
第五蓮華藏	六無礙音月	第七法月王

八圓滿智燈 第九寶燄佛 無上天人尊
第十化音聲 我已悉供養 如是等諸佛
十億那由他 猶未得慧眼 究竟生死海
次第復有劫 名曰天妙勝 世界名寶光
五百佛興世 初佛圓滿月 第二名淨日
第三光明佛 四須彌山王 第五華燄佛
第六智慧海 第七然燈佛 第八天德藏
九光明王幢 第十普智王 如是等諸佛

我已悉供養	未離樂五陰	非樂生樂想
次第復有劫	名莊嚴梵音	爾時有世界
名蓮華燈雲	彼有無量佛	及其大眷屬
我已悉供養	聞受持正法	初佛寶須彌
第二功德海	法界須彌幢	第四法須彌
第五法幢佛	第六法地佛	第七法力佛
第八虛空慧	第九光燄山	第十照明山
如是等諸佛	我已悉供養	猶未了真實

究竟諸法海	次第復有劫	名曰歡喜德
爾時有世界	名曰功德幢	彼劫有八十
那由他諸佛	無量供養具	奉彼諸最勝
初乾闥婆王	二壽命樹王	三功德須彌
第四寶眼佛	第五盧舍那	六光明莊嚴
第七法勝佛	第八明淨德	第九世間主
十一切法王	如是等諸佛	我已悉供養
猶未得妙智	深入法界海	次第復有劫

名曰寂靜慧	爾時有世界	名普光明雲
有千佛興世	無量德莊嚴	除滅煩惱垢
一切眾清淨	初佛號無諍	第二無礙力
三法界光明	四一切燈王	五婆樓那天
第六眾生歸	七忍圓滿燈	八法具足燈
九光明嚴海	第十光明王	如是等諸佛
我已悉供養	猶未解真法	遊行一切刹
次第復有劫	名曰香燈雲	爾時有世界

五百佛興世	名曰清淨起	彼佛所說法	第二法海佛	第五勝法雲	第八虛空音	供彼諸佛已	名明淨堅固	五百佛興世
彼諸如來等	一億佛興世	我悉聞受持	第三勇猛王	第六天冠佛	第九等勝起	成就八正道	爾時有世界	彼諸如來等
我已悉供養	嚴淨一切劫	初佛無量稱	四功德法王	第七智燄佛	第十妙德光	次第復有劫	名曰寶幢王	我已悉供養

求無礙法門

初佛圓滿德

第二寂靜音

第三功德海

第四日王佛

第五功德王

第六須彌相

第七法王佛

第八功德王

第九須彌山

第十光明王

如是等諸佛

我已悉供養

我皆悉嚴淨

一切最勝道

猶未得具足

究竟深法忍

次第復有劫

名曰爲勝主

爾時有世界

名寂靜音聲

八十那由他

諸佛興出世

我已悉供養

初佛寂靜幢	諸佛興出世	爾時有世界	我已悉供養	我已悉供養	第九法幢佛	第六金山佛	第三功德起	於彼修正道
第二智慧幢	我已悉供養	名善化幢燈	次第復有劫	次第復有劫	第十智王佛	第七寶聚佛	第四天周羅	初佛號華聚
第三百燈佛	彼一切如來	六億那由他	名曰千功德	名曰千功德	如是等諸佛	第八寂靜幢	第五摩尼藏	第二海藏佛

四功德雲王

寂靜光明王

第六明淨日

第七法燈佛

第八光燄佛

九天功德藏

第十智慧燈

如是等諸佛

我已悉供養

未得無生忍

究竟諸法海

次第復有劫

名無著莊嚴

爾時有世界

名無量勝光

時有三十六

那由他佛出

如是等諸佛

我已悉供養

初功德須彌

第二虛空心

第三莊嚴智

第四莊嚴藏

五法音聲海

心淨如虛空	悉得諸佛力	觀察諸眾生	莊嚴大願海	陀羅尼念力	皆悉能受持	我爲功德天	供養彼最勝	時佛爲我說	我皆悉值遇	功德幢如來	出興於世時	九功德海燈	第十功德幢	彼諸如來等	六持法音聲	第七化音聲	第八功德海
悉見最勝海	出生大悲藏	深入方便雲	我得明淨眼	三昧陀羅尼	於一一念中	我爲功德天	供養彼最勝	時佛爲我說	我皆悉值遇	功德幢如來	出興於世時	九功德海燈	第十功德幢	彼諸如來等	六持法音聲	第七化音聲	第八功德海

常樂我淨倒	愚癡闇所覆	煩惱起虛妄
邪見貪欲等	無量諸惡業	一切諸趣中
具受不善報	一切諸趣中	種種業受身
生老病死患	無量苦逼迫	我發無上心
安樂彼眾生	令至諸佛所	成滿如來力
滿足大願雲	常見一切佛	修習於正道
具足諸功德	一向廣專求	無量功德雲
法門波羅蜜	充滿諸法界	佛子我爾時

卽得普賢行 分別深法界 攝取一切法
成滿一切地 三世方便海 修習無礙行
一念具佛智

善男子。爾時智慧轉輪王者。豈異人乎。文殊師利童子。是也。紹繼轉輪王姓。諸如來種。使不斷絕。時王賢慧寶女者。我身是也。爾時夜天覺悟我者。普賢菩薩所變化也。我於爾時初發阿耨多羅三藐三菩提心。發道心已於佛刹微塵等劫。不墮惡道。常生天人覩

見此佛。乃至功德幢佛所得此普光喜幢法門。得此法門已。饒益化度無量眾生善男子。我唯知此法門。諸大菩薩於念念中普詣一切諸如來所具足成就。精進大海。於念念中滿足一切諸大願海。於念念中出生一切未來劫菩薩諸行。於一一菩薩行中出生一切佛刹微塵等身。彼一一身充滿一切諸法界海。於一一法界中顯現一切佛刹。隨其所應現菩薩行。於一一佛刹中究竟一切佛刹微塵等諸佛海。於一

一佛所究竟一切法界等如來自在神力。一一如來所分別過去諸劫行菩薩行。一一如來所守護受持一切法輪究竟三世如來諸方便海。我當云何能知能說彼功德行。善男子。此佛眾中有一夜天。名曰妙德。救護眾生。汝詣彼問云何菩薩學菩薩行具菩薩行。淨菩薩行。時善財童子頭面敬禮喜目觀察眾生。夜天足辭退南行。爾時善財童子正念思惟普光喜幢法門。分別深入開發顯現隨順善知識教。一向專

求見善知識。身心諸根普遊方面。求善知識。思念善知識。道勇猛精進。乃得值遇。同善知識。一切善根。具足成就。深妙方便。因善知識。出生長養。一切善根。發諸大願。於一切劫。不離善知識。往詣妙德。救護眾生。夜天所。爾時夜天爲善財童子。顯現菩薩教化。一切世間法門境界。相好嚴身。眉間白毫相中。放大光明。名曰普慧。燄燈淨幢。無量光明。以爲眷屬。普照一切世界。照已。入善財頂。充滿其身。爾時善財卽得菩薩。

離垢圓滿三昧。得此三昧已於一切地水火風微塵
眾寶微塵香微塵金剛微塵摩尼微塵碎末微塵一
切莊嚴具微塵一切境界微塵如是等一一微塵中
悉見佛刹微塵等世界成敗風輪水輪金剛輪地輪
種種莊嚴眾山圍繞無量大海諸天宮殿諸雜寶樹
種種莊嚴諸龍宮殿夜叉乾闥婆阿脩羅迦樓羅緊
那羅摩睺羅伽人非人等城郭宮殿地獄餓鬼畜生
閻羅王處悉見五道眾生死此生彼分別了知彼諸

世界。或有世界淨。或有世界不淨。或有世界趣淨。或有世界趣不淨。或有世界淨不淨。或有世界不淨淨。或有世界一向淨。或有世界其形平正。或有世界其形如伏。或有世界其形四方。如是等一切世界一切趣中。見彼夜天於一切時。普現一切諸眾生前。隨其所應而度脫之。爲地獄眾生成滅。諸楚毒。爲諸畜生成滅。惱害畏。爲餓鬼眾生成滅。饑渴苦。爲諸龍等滅一切畏。爲欲界眾生成滅。除欲界苦。爲諸人類除闇冥畏。不活畏。

惡名畏。大眾畏。惡道畏。死畏。失善根畏。失菩提心畏。
近惡知識畏。失善知識畏。聲聞緣覺地畏。生死畏。不
同意畏。非時受生畏。生惡人家畏。行惡業畏。業障畏。
煩惱障畏。報障畏。諸貪著畏。諸繫縛畏。滅如是等一
切怖畏。又復教化四生眾生。所謂卵生胎生溼生化
生有色無色有想無想非有想非無想眾生。常現其
前而教化之。滿大願力故。菩薩三昧力故。諸通明力
故。出生普賢菩薩行力故。出生長養大悲海故。無礙

大悲覆一切眾生故。安樂一切眾生故。攝取一切眾生故。深入菩薩自在境界法門故。普現一切諸佛剎中爲嚴淨故。在一切法中智慧覺悟故。在一切佛所恭敬供養故。在一切佛法中守護正法故。在一切眾生心海中度脫眾生故。在一切眾生諸根中調伏諸根故。在一切眾生欲海中爲除障礙得清淨故。在一切眾生愚癡闇中出生一切智光明故。爾時善財見彼夜天自在神力不可思議菩薩境界一切世界教

化眾生成就菩薩一切法門自在神力。歡喜無量。頭面禮足。恭敬合掌。於一面住。一心觀察。爾時夜天卽捨相好妙莊嚴身。現夜天形而不捨離自在神力。爾時善財以偈頌曰。

善財合掌住	諦觀無厭足	見無量神力
其心大歡喜	我見妙尊身	相好自莊嚴
清淨如虛空	一切莫能壞	所放殊妙光
無量刹塵等	種種微妙色	普照於十方

一一毛孔放	眾生等光明	一一光明端
出生寶蓮華	從華出化身	除滅眾生苦
放諸香光明	普熏十方界	雨無量華雲
供養諸最勝	放無量寶光	一一如須彌
普照一切眾	除滅愚癡闇	口放淨光明
猶如無量日	普照盧舍那	無量之境界
眼放淨光明	猶如無量月	普照羣生類
除滅愚癡瞋	妙相等眾生	出生化身海


充滿諸法界 度脫三有海 清淨微妙身
一切無不見 遠離水火賊 王等一切難
喜日觀察天 教我詣尊所 見尊白毫相
演出明淨光 普照十方海 除滅一切闇
顯現自在力 從我頂上入 光明入身已
舉體柔輒樂 卽得離垢定 普見十方佛
悉能分別知 一切諸微塵 一一微塵中
普見十方刹 或有淨世界 或有不淨刹

不淨世界中	眾生受諸苦	不淨世界中
眾生受苦故	示現三乘像	而往救度之
清淨佛國土	無量寶莊嚴	諸佛大菩薩
常樂於中住	一一微塵中	普見淨刹海
盧舍那積劫	令彼土清淨	一切佛刹中
現坐菩提樹	得成最正覺	而轉淨法輪
我見妙德天	詣彼嚴淨刹	一切如來所
恭敬而供養		

誦補闕真言

南無三滿哆。沒馱喃。阿鉢囉帝。喝多折。折捺彌。唵。雞
彌。雞彌。怛塔葛塔喃。末瓦山。矻鉢囉帝。烏怛摩。怛摩。
怛塔葛塔喃。末瓦吽。發莎訶。舉字母讚
華嚴字母。眾藝親宣。善財童子得真傳。秘密義幽玄。
功德無邊。唱誦利人天。

娑 麼 訶 婆
○斯 茫 欣 旁
斯 萌 亨 朋
蘇 蒙 烘 蓬
蘇 模 呼 蒲
思 毛 蒿 袍
思 埋 哈 排
西 迷 希 毘
思 蠻 預 貧
思 校 希 梓
娑 麼 訶 婆
娑 麼 訶 婆



時普願法界眾生入般若波羅蜜門

四十二字妙陀羅。字字包含義理多。

婆。功德大。法界沐恩波。



梵韻滿娑

四生九有。同登華藏玄門。入難三塗。共入毘盧性海。

南無華嚴海會佛菩薩三稱

大方廣佛華嚴經卷第五十四

東晉天竺三藏佛陀跋陀羅等譯

入法界品第三十四之十

爾時善財偈讚歎已。白言。天神甚奇甚特。此菩薩法門最爲甚深。此法門者名爲何等。得此法門其已久如。本修何行而致之乎。善男子。此處甚深。一切天聲聞緣覺所不能知。何以故。滿普賢菩薩行者境界。大悲菩薩藏境界。救護一切眾生菩薩境界。除滅一

切惡道諸難菩薩境界。一切佛刹中守護一切佛法
令不斷絕菩薩境界。一切劫中修菩薩行滿大願海
菩薩境界。具足成就明淨慧光。滅一切眾生愚癡闇
障。普照一切菩薩境界。於一念中明淨智慧。普照三
世諸方便海菩薩境界。善男子。諦聽諦聽。我當承佛
神力爲汝解說。佛子。乃往古世過世界微塵等劫。有
劫名離垢圓滿。世界名明淨妙德幢。有須彌山微塵
等如來出現於世。其佛世界七寶合成。眾寶莊嚴。其

土圓滿離垢清淨。寶網羅覆。金剛圍山周帀圍繞。有十萬億那由他四域天下。或有天下清淨。眾生亦淨。或有天下不淨。眾生不淨。或有天下淨不淨雜。眾生亦雜。或有天下清淨。一切眾生善根具足。無諸疾患。或有天下嚴淨殊勝。但諸菩薩。彼世界東際近金剛山。有四天下。名華燈幢。妙寶樓閣臺觀宮殿。上味飲食自然具足。瞻蔔華樹普覆一切。種種香樹出妙香雲。諸寶鬘樹普雨鬘雲。諸雜華樹雨不思議眾妙華。

雲。諸末香樹。雨末香雲。諸香王樹。雨妙香雲。摩尼寶
樹。雨種種寶。諸音樂樹。微風吹動。出和雅音。充滿虛
空。日月明淨。妙寶光明。普照一切。彼四天下。有百萬
億那由他。諸王京都。一一王都。有千渠水。微流回映。
眾華普被。自然演出。天音樂聲。岸植寶樹。行列莊嚴。
眾寶爲地。一一水間。有十億千城。彼一一城。有十億
百千那由他。聚落圍繞。彼一一城。及一一聚落。各有
無量億那由他。妙寶樓閣。而莊嚴之。彼閻浮提。有一

王都名寶華燈。安隱豐樂。人民熾盛。此諸眾生具足修行十善業道。時彼城中有轉輪王。名曰明淨寶藏。妙德爲大法王。治以正法。從蓮華生。具三十二大人之相。七寶成就。王有千子。端正勇猛。有十億大臣。王有寶女名妙德。成滿端嚴。姝妙。目髮紺色。身如天金。梵音清淨。身出光明。照于由旬。彼有一女名妙德。眼一切諸行皆悉具足。端正殊特。觀者無厭。有十億百千那由他諸姝女眾。皆與聖王同善根行。身真金色。

一切毛孔皆出妙香。眾寶莊嚴超踰天女。爾時眾生
壽命無量。或有不定。或有中天。形色不同。長短名號
音聲善根精進方便亦悉不同。有好有醜。有讚有毀。
爾時有人謂一人言。我色端嚴。汝形鄙陋。共相陵毀。
作惡業已。壽命色力所受快樂皆悉損減。時彼城北
有道場樹名普光明。妙法音幢。眾寶爲根。無能壞者。
莖節枝葉眾寶合成。皆悉齊等。出眾寶光雲普覆一
切。放眾寶光普照十方。演妙音聲宣揚如來自在神

力於其樹前有香水池名寶華光明眞法音雲。眾寶爲岸。有十億百千那由他寶樹圍繞。彼一一樹如菩提樹。寶纓絡樹。周帀垂下。清淨妙寶以爲莊嚴。眾寶樓閣。無量無數。周徧道場。彼香池中有一蓮華。名三世一切佛莊嚴境界雲。最初妙德幢佛於彼華上。成等正覺。化眾生故。放大光明。名曰萬歲。眾生見者。知後萬歲佛當出世。次後放光。名一切眾生離垢歡喜。燈。眾生見者。知九千歲佛當出世。次後放光。名離垢。

燈妙德藏。眾生見者。悉覩妙色。知八千歲佛當出世。次後放光名一切眾生業報音聲。眾生見者。分別了知自己業報。知七千歲佛當出世。次後放光名起一切善根音聲。若有眾生諸根不具。觸斯光明。皆悉具足。知六千歲佛當出世。次後放光名曰顯現不可思議諸佛境界音聲。眾生見者。悉發明淨自在之心。知五千歲佛當出世。次後放光名曰嚴淨一切佛刹。眾生見者。見一切如來嚴淨佛刹。知四千歲佛當出世。

次後放光名一切佛不可壞境界明淨燈。眾生見者知佛自在無所不至。知三千歲佛當出世。次後放光名普照三世一切諸佛本事音聲。眾生見者知一切如來過去本事無量大海。知二千歲佛當出世。次後放光名離癡瞋智如來淨燈。眾生見者得平等淨眼。普見一切嚴淨佛刹一切如來一切眾生。知一千歲佛當出世。次後放光名一切眾生見諸如來長養善根。眾生見者知後七日佛當出世。次後放光名一切

眾生歡喜音聲。眾生見者一心歡喜。欲見如來佛子。彼佛於一萬歲中放如是等無量光明教化眾生。滿七日已。佛神力故。一切世界六種震動。爾時眾生於念念中見一切佛刹。皆悉清淨。眾寶莊嚴。時彼世界眾生悉詣道場。一切金剛圍山。須彌山王。一切諸山。一切變化。一切音聲。一切大地。一切城邑。垣牆宮殿。如是等一切諸物。出微妙音。歌頌讚佛。又出一切香雲。一切寶光明雲。一切寶形像雲。一切寶衣雲。一切

華雲。一切末香雲。一切寶莊嚴雲。一切如來圓滿光雲。一切如來大願聲雲。一切如來妙音聲雲。一切如來諸相好雲。顯現不可思議如來瑞應相雲。出如是等一切妙雲供養如來時。彼三世一切佛莊嚴境界雲。蓮華周匝出生十佛世界微塵等眾寶蓮華。彼一蓮華鬚上有寶蓮華藏師子之座。彼師子座上有十佛世界微塵等菩薩摩訶薩。爾時妙德幢佛於一切世界隨其所應轉正法輪。令無量眾生離惡道苦。

無量眾生。生天人中。立無量眾生。於聲聞緣覺之地。
立無量眾生。於勇猛精進菩薩之行。立無量眾生。於
離垢幢精進菩薩之行。立無量眾生。於法光明菩薩
之行。立無量眾生。於清淨根菩薩之行。立無量眾生。
於平等諸力菩薩之行。立無量眾生。於一向專求入
正法城菩薩之行。立無量眾生。於至一切處不可破
壞神力自在菩薩之行。立無量眾生。於一切方便菩
薩之行。立無量眾生。出生菩薩三昧安住菩提。立無

量眾生修一切淨行安住菩提立無量眾生發菩提心立無量眾生住菩薩道立無量眾生清淨諸波羅蜜立無量眾生於菩薩初地乃至立無量眾生於菩薩十地立無量眾生於菩薩大願殊勝之行立無量眾生於普賢菩薩清淨願行何以故如來轉不可思議自在法輪故於念念中隨其所應以種種身種種方便種種說法度脫無量眾生爾時普賢菩薩知寶華燈城王都眾生自恃色貌陵蔑他人化現妙身端

嚴殊特。往詣彼城。放大光明。普照一切。時彼聖王身
之光明。諸寶光明。寶女光明。寶樹光明。日月星宿光
明。皆悉映蔽。猶如聚墨在真金山。普賢菩薩身色光
明。映蔽眾光。亦復如是。爾時眾生各作是念。今此光
明。悉蔽我等。不復顯現。爲是梵天諸天光耶。爾時普
賢菩薩在彼聖王寶宮殿上。於虛空中而告之言。大
王當知。佛興於世。今在普光明妙法音幢菩提樹下。
時彼眾生見普賢菩薩相好嚴身。無量光明。聞妙音

聲歡喜無量。發如是願。令我等所作善根得此妙身。相好莊嚴。威儀無異。神力自在。除滅一切眾生愚闇。覺悟一切佛興於世。趣趣受生。願常不離此善知識。時彼聖王與其寶女及諸眷屬千子大臣并四種兵。上升虛空。放大光明。照四天下。普爲眾生以偈讚曰。

如來出世間	普救諸羣生	汝等應速起
往詣導師所	無量無數劫	或有佛興世
演說深妙法	饒益一切眾	普見諸羣生

愚癡顛倒惑	流轉生死苦	於彼起大悲
無量無數劫	修習菩薩行	爲化眾生故
發起無上悲	頭目手足等	難捨悉能施
無量無數劫	專求佛菩提	無量無數劫
如來難值遇	其有見聞者	一切悉不虛
如來在道場	處佛正法座	降伏一切魔
得成最正覺	觀察如來身	放演無量光
種種微妙色	除滅一切闇	一一毛孔中

放光不思議
除滅愚癡瞋
令眾悉歡喜
各辦眾供具
發大精進心
咸詣如來所
恭敬設供養

爾時轉輪聖王讚歎佛已以轉輪王功德善根興十
種雲。普覆虛空。往詣道場供養如來。所謂一切寶雲。
一切華雲。一切衣雲。一切寶衣雲。一切寶網金鈴雲。
一切堅固香雲。一切如意珠雲。一切妙寶幢雲。一切
寶宮殿雲。一切莊嚴雲。普覆一切莊嚴虛空。供養如

來往詣佛所頭面禮足。繞無數而退坐。普照寶藏之座。爾時妙德眼女。卽解身上諸莊嚴具。奉散如來時莊嚴具於虛空中。變成寶蓋。眾寶莊嚴。悉與一切諸宮殿等。端嚴齊整。十寶莊嚴。金剛圍山周帀圍繞。其形猶如明淨樓閣。眾寶莊嚴。無量龍王。悉共執持寶樹圍繞。妙香普熏。於其蓋中有菩提樹。枝葉榮茂。普覆法界。以無量莊嚴而莊嚴之。見盧舍那佛坐此樹下。與不可說佛刹微塵等大菩薩俱。皆悉具足普賢

菩薩一切所行住菩薩住無能壞者。又見一切世界諸王圍繞如來。又見彼佛神力自在。又見一切諸劫次第世界成敗。又見一切諸佛次第出世。又見普賢菩薩在一切佛所恭敬供養教化眾生。又見彼一一世界中悉有佛刹微塵等世界。種種安住。種種莊嚴。種種清淨。種種劫。種種如來出興於世。種種三世。種種國土。種種法界。種種諸道。種種入法界。種種虛空。種種道場。種種佛光。種種諸佛莊嚴師子之座。種種

如來眷屬種種如來方便種種轉法輪種種如來妙
音說種種音聲海說種種修多羅雲時彼女人見聞
如是歡喜無量爾時妙德幢佛於大眾中說修多羅
名一切如來法輪妙音十佛世界微塵等修多羅以
爲眷屬時彼女人聞此經已卽得一萬三昧身心柔
軟如初受胎又如眾生初受勝業果報又如初生墜
固吉樹所謂見現在一切諸佛三昧普照一切佛刹
三昧深入三世三昧一切如來妙音轉法輪三昧知

一切佛願海三昧。滅一切眾生生死苦惱三昧。滅一切眾生癡闇滿足莊嚴大願三昧。滅一切眾生諸苦三昧。令一切眾生具足快樂三昧。教化一切眾生心無疲倦三昧。一切菩薩無礙幢三昧。菩薩降神母胎莊嚴三昧。得如是等一萬三昧。復得淨三昧心。不動心。歡喜心。正希望心。廣大心。順善知識教心。甚深薩婆若心。隨順方便海心。一切無著心。捨離一切世間境界心。究竟如來境界心。普照一切色海心。滅瞋恚

心。愛念心。平等心。無疲倦心。不退轉心。離懈怠心。觀一切法寂靜心。隨順一切法海心。隨順分別一切法心。分別一切眾生海心。救護一切眾生心。普照一切世界心。滿一切佛大願海心。壞散一切障礙山心。積集無量功德山心。向佛十力心。普照一切菩薩境界心。長養一切菩薩諸功德心。充滿一切十方海心。發平等心。成滿佛刹微塵等諸願海心。願淨一切如來刹心。如是等心。出生十佛世界微塵等法門。所謂教

化一切眾生法門。分別一切法界法門。究竟一切法
海法門。於一切世界盡未來劫。出生菩薩行法門。於
一切世界盡未來劫。住菩薩行法門。往詣一切佛所
法門。值遇一切善知識法門。恭敬供養一切佛法門。
於念念中。出生一切智。不斷菩薩行法門。出生如是
等十佛世界微塵等法門。出生普賢菩薩願行。專求
一切智。時彼女人得諸如來初發心願善男子。復於
是前過十大劫。有世界名日輪光照。佛號因陀羅妙。

德幢。此妙德眼女。因普賢菩薩善知識。故造蓮華如
來像。眾寶莊嚴。發菩提心。善男子。爾時明淨寶藏妙
德轉輪聖王者。豈異人乎。今彌勒菩薩是也。時寶女
妙德成滿者。今寂靜音夜天是也。妙德眼女者。我身
是也。善男子。我以莊嚴具供養妙德幢如來。故見佛
無量自在神力。聞說正法。聞正法已。卽得教化一切
眾生法門。恭敬供養須彌山微塵等一切如來。聞彼
諸佛所說經法。皆悉受持。於一念中。見彼一切佛刹。

一切如來及菩薩眾善男子。其後有劫名大光明。世
界名種種莊嚴。有五百佛出興於世。我悉恭敬供養
此諸如來。其最初佛名大悲幢。我爲夜天恭敬供養。
次後如來名金剛那羅延幢。時我爲轉輪王恭敬供
養。彼佛爲我說修多羅名起一切如來性。十佛世界
微塵等修多羅以爲眷屬。次後如來號金剛無礙妙
德。時我爲轉輪王恭敬供養。彼佛爲我說修多羅名
普照一切眾生諸根。須彌山微塵等修多羅以爲眷

屬。悉聞受持。次後如來名明淨。妙德。山莊嚴。時我
爲長者恭敬供養。彼佛爲我說修多羅名普照三世
藏。閻浮提微塵等修多羅。以爲眷屬。悉聞受持。次後
如來名一切法海起王。時我爲阿修羅恭敬供養。彼
佛爲我說經名分別一切法界。五百修多羅。以爲眷
屬。悉聞受持。次後如來名甚深妙法海光。時我爲龍
女。雨如意摩尼寶雲。恭敬供養。彼佛爲我說修多羅
名長養歡喜海。百萬億修多羅。以爲眷屬。悉聞受持。

次後如來名寶燄功德山燈時我爲海神雨眾寶華雲恭敬供養彼佛爲我說修多羅名法界方便海世界微塵等修多羅以爲眷屬悉聞受持次後如來名功德海光圓滿妙德時我爲仙人在雪山住與六萬仙人俱往詣彼佛雨寶華雲恭敬供養彼佛爲我說修多羅名法燈無所著六萬修多羅以爲眷屬悉聞受持次後如來名明淨妙德藏我爲地天名出生平等義與無量地天俱往詣彼佛雨一切寶一切寶藏

一切莊嚴雲。恭敬供養彼佛。爲我說修多羅。名起一切如來智藏。無量修多羅。以爲眷屬。悉聞受持。佛子。如是五百如來次第興世。其最後佛名法界虛空寶山妙德燈。時我爲仙人。名曰善口。彼佛入城。我在空中。以一千偈讚歎如來。爾時世尊眉間白毫相放大光明。名普照法界莊嚴普照十方。照已入我身中。卽得法界方便不退藏法門。佛子。如是等世界微塵等劫諸佛興世。我悉恭敬供養。彼諸如來所說正法。悉

聞受持。未曾忘失。一句一味。於一一佛所得三世甚
深法界清淨法身。一切智光普照一切。攝取普賢菩
薩所行。於念念中悉見無量無邊諸佛。得無量無邊
淨慧光明普照一切。先未得未證普賢所行。今悉成
滿。何以故。說無量無邊故。爾時妙德救護眾生。夜天
欲重明此義。以偈頌曰。

善財應諦聽 甚深難見法 普照於三世
分別深法界 如我初發心 專求無上道

隨所得法門	諦聽我今說	過去久遠世
佛刹微塵劫	爾時有一劫	名離垢圓滿
時有世界名	明淨妙德幢	須彌微塵等
如來出興世	初佛妙德幢	二普慧光燄
法幢德須彌	第四師子佛	第五寂靜王
六號除滅惡	第七功德聚	第八須彌山
第九妙德佛	第十明淨月	如是十如來
彼劫初出世	次復有十佛	初虛空方便

是爲第三十	第九如來號	第六勇猛王	第三心義佛	是爲第二十	第八光燄山	第五高無上	第二普光明
第一光燄山	超出一切世	第七智慧德	四陀羅妙德	初光明幢王	第九蓮華佛	第六最勝雲	三安住諸方
第二功德海	第十蓮華佛	第八光明幢	第五妙天佛	第二智慧佛	第十法界化	第七功德佛	第四功德海

第三法光明	第四妙蓮華	第五眾生眼
第六香光明	七妙德寶山	八乾闥婆王
第九明淨智	第十寂靜色	初佛光智慧
第二寶光明	三虛空妙德	第四妙相佛
圓滿功德光	第六那羅延	第七妙須彌
八功德轉輪	九不可壞王	第十寶山佛
初佛娑羅王	第二妙德藏	第三光明王
第四眞實起	第五光明德	六陀羅尼德

七光明甚深
八法海音佛
第九須彌幢

光明妙德佛
寶光燄如來
是爲第十佛

初佛梵光燄
第二虛空音
第三法界光

第四圓滿光
第五分別光
第六光明幢

第七虛空燈
第八樂妙德
第九明淨光

妙功德如來
十寂靜妙德
大悲雲如來

初佛力光慧
二眾生現前
第三無上福

第四妙德光
第五法起佛
六風速妙德

第七淨幢佛

第八寶蓋佛

第九妙德佛

十普照三世

初佛號願海

第二光明德

第三金剛身

四須彌妙德

第五正念佛

六幢王妙德

第七智慧燈

第八無量寶

第九號方便

明淨法界佛

第十號法海

明淨智妙德

初佛號法寶

功德轉輪王

第三功德雲

第四忍辱燈

第五寂靜音

第六寂靜幢

第七眾生燈

第八大願佛

第九如來號	不可壞幢王	第十號智慧
燄起妙德佛	初佛號法王	第二無礙智
三照語言海	第四妙音聲	第五妙德音
第六自在佛	七十方一切	眾生現前佛
第八平等意	九無上如來	第十號自然
賢妙德最勝	如是等一切	須彌塵數佛
彼諸如來等	我已悉供養	佛刹微塵劫
所出諸如來	悉恭敬供養	逮得此法門

我於無量劫 修行得法門 善財聞思惟
應當速究竟

善男子。我唯知此教化眾生菩薩法門。諸大菩薩究竟無量無邊菩薩所行。悉從種種性海中起。種種正直身心。滿諸根海。具足一切諸大願門。修行無量諸三昧門。具足成就無量神力。修行無量智慧之行。入種種智諸法光明。普照一切。我當云何能知能說彼功德行。善男子。於此道場去我不遠。有一夜天名寂

靜音處寶幢蓮華藏師子之座。百萬阿僧祇諸天眷
屬圍繞。汝詣彼問云。何菩薩學菩薩行。修菩薩道。時
善財童子頭面敬禮妙德救護眾生夜天。足繞無數
而。敬心辭退。往詣寂靜音夜天所。頭面禮足。繞無數
而。恭敬合掌於一面住。白言。天神。我已先發阿耨多
羅三藐三菩提心。我依善知識學菩薩行。入菩薩行
入菩薩行地。住菩薩行住。唯願天神爲我解說。爾時
夜天告善財言。善哉善哉。善男子。乃能依善知識求

菩薩道。善男子。我成就菩薩無量歡喜莊嚴法門。白
言。天神。此法門者爲何所作。境界云何。何等方便爲
何等行。答言。善男子。我能清淨一切眾生心海。除滅
塵垢。不斷清淨莊嚴之心。得不退境界堅固之心。不
可動心。決定了知功德寶山莊嚴無染著心。常現前
護一切眾生心。見一切佛諸菩薩海。無厭足心。清淨
菩薩正直力心。普照一切智慧海心。善男子。我爲眾
生滅除憂惱無量眾苦。令其永離諸惡色聲香味觸

法除滅眾生愛別離苦怨憎會苦及餘一切諸惡因緣壞敗大苦。住生死苦。生老病死憂悲惱苦。令得如來無上快樂。一切城邑聚落眾生我悉救護。令得安樂。廣爲說法。教令漸求一切種智。若見眾生在家宮殿心樂著者。爲彼說法。令知諸法真實之性。若見眾生與父母兄弟歡娛讌集。爲彼說法。令與諸佛菩薩共會。若見眾生妻子歡會。爲彼說法。令竭生死愛欲之海。具足大悲等觀一切。若見眾生處王宮殿。爲彼

說法悉令逮得賢聖快樂。若見眾生著境界者。爲彼
說法。令得如來甚深境界。若見眾生起瞋恚者。爲彼
說法。令得如來羸提波羅蜜。爲懈怠者演說正法。令
得菩薩清淨毗梨耶波羅蜜。爲亂心者演說正法。令
得如來禪波羅蜜。爲邪癡者演說正法。令得般若波
羅蜜。爲著三界者演說正法。令出三有。爲樂小法者
演說正法。令其滿足菩提大願。爲自安者演說正法。
令具大願饒益一切。爲心劣者演說正法。令得菩薩

力波羅蜜爲無智者演說正法。令得菩薩智波羅蜜。
爲無色者演說正法。令得如來清淨色身。爲危脆身
者演說正法。令得無上清淨法身。爲惡色者演說正
法。令得如來清淨妙色。爲苦惱者演說正法。令得如
來無上快樂。爲貧窮者演說正法。令得菩薩諸清淨
藏。爲園觀者演說正法。令一向求諸佛妙法。爲在路
者演說正法。令得一切智道。爲聚落者演說正法。令
出三界。爲著國土者演說正法。令過聲聞緣覺及菩

薩地住如來地。爲在城郭者。演說正法。令入法王城。
普照一切。爲在隅者。演說正法。令得三世平等智慧。
爲在方者。演說正法。令一切智常現在前。觀一切法。
爲貪欲多者。演說正法。令觀不淨滅生死愛。爲瞋恚
多者。演說正法。令得究竟大慈之海。爲愚癡多者。演
說正法。令得智慧觀諸法海。爲等分者。演說正法。令
其分別諸勝願海。離生死樂滅生死苦。顯佛正法不
著五陰常行妙法。爲懈怠者。演說正法。令得莊嚴勝

道爲憍慢者演說正法。令觀一切諸法平等。爲諂曲者演說正法。令得菩薩清淨直心。善男子。我以如是等無量法施攝取眾生。滅惡道苦。處天人樂。永離三界。具諸功德。種種方便而化度之。歡喜無量。復次善男子。我常觀察菩薩大海。種種願行。種種淨身。種種淨光。種種光燄。種種諸道。趣薩婆若。入種種三昧海。顯現種種自在神力。出生種種妙音聲海。種種妙莊嚴身。種種方便入如來海。往詣種種諸佛刹海。究竟

種種諸如來海。深入種種諸辯才海。普照種種如來
境界。成就種種諸智慧海。超度種種三昧印海。安住
種種遊戲法門。以種種門趣薩婆若。種種莊嚴虛空
法界。種種莊嚴雲普覆虛空。觀察種種諸大眾海。十
方世界一切刹中諸如來所菩薩眷屬。普雨種種妙
莊嚴雲。皆悉來會。安處種種莊嚴之座。深入如來方
便大海。行諸法海。度種種智海。我見此已。起無量歡
喜。與佛力等。又善男子。盧舍那佛不可思議清淨色

身相好莊嚴。我見此已起無量歡喜。盧舍那佛於念
念中放法界等光。普照一切諸法界海。我見是已起
無量歡喜。盧舍那佛於念念中一一毛孔放無量佛
刹微塵等光。一一光明有無量佛刹微塵等光。以爲
眷屬。普照一切充滿法界。除滅眾生一切苦惱。我見
是已起無量歡喜。盧舍那佛於念念中從頂上兩肩
上放一切佛刹微塵等寶光山雲。普照一切充滿法
界。我見是已起無量歡喜。盧舍那佛一一毛孔放一

切佛刹微塵等香雲普熏十方一切佛刹。我見是已起無量歡喜。盧舍那佛一一相中出一切佛刹微塵等相。充滿一切諸世界海。我見是已起無量歡喜。盧舍那佛一一毛孔出一切佛刹微塵等自在力雲。初發心等清淨波羅蜜莊嚴菩薩諸地。我見是已起無量歡喜。盧舍那佛一一毛孔念念出生不可說不可說佛刹微塵等諸龍王身。爲見龍身而受化故。又出不可說不可說佛刹微塵等諸夜叉身。乾闥婆阿脩

羅迦樓羅緊那羅摩睺羅伽等身爲見彼身而受化
故我見是已起無量歡喜盧舍那佛一一毛孔出不
可說不可說佛刹微塵等轉輪王身雲七寶成就神
力自在充滿法界爲見彼身而受化故我見是已起
無量歡喜盧舍那佛一一毛孔出不可說不可說佛
刹微塵等梵王身雲出淨梵音爲眾生說法爲見聞
彼而受化故我見是已於念念中起無量歡喜悉與
法界薩婆若等起者非起得者非得見者非見入者

非入度者非度。滿者非滿。聞者非聞。何以故。分別了知法界性故。解三世法悉一性故。佛子。此菩薩無量歡喜莊嚴法門。有如是等無量境界。佛子。此法門者無量無邊。究竟方便諸法海故。此法門者不可損減。薩婆若心不可壞故。此法門者不可窮盡。眾生妄想不可盡故。此法門者最爲甚深。寂靜智境界故。此法門者最爲廣大。一切佛境界故。此法門者不可破壞。菩薩智所知故。此法門者不可稱量。不可破壞。滿法

界故此法門者卽是普門。於一相中攝取一切自在力。故此法門者是第一法。一切法無身行無二故。此法門者非生。一切諸法悉如幻故。此法門者如電攝薩婆若諸大願故。此法門者如化善能變化菩薩行。故此法門者如大地輪饒益一切諸眾生故。此法門者如大水輪以廣大悲潤眾生故。此法門者如大火輪消竭眾生諸貪愛故。此法門者如大風輪立一切眾生薩婆若故。此法門者猶如大海功德莊嚴一切。

眾生故。此法門者如須彌山。一切功德海中起故。此法門者如大城郭。一切法街巷而莊嚴故。此法門者猶如虛空。三世諸佛自在最無上故。此法門者猶如慶雲。普雨眾生甘露法故。此法門者猶如白日。普照一切滅癡闇故。此法門者猶如滿月。滿足眾生功德海故。此法門者如如至一切故。此法門者如影。善能應化諸業報故。此法門者如響。隨其所應爲說法故。此法門者猶如電光。隨其所應悉照知故。此法門者

猶如樹王。一切諸佛功德妙華成就。一切智果實故。此法門者。猶如金剛。一切世間無能壞故。此法門者。如隨意寶王。出生無量自在力故。此法門者。如離垢寶。悉分別知三世佛故。此法門者。猶如寶幢。出一切佛平等法輪妙音聲故。佛子。如此諸喻。非喻爲喻。爾時善財白寂靜音夜天言。菩薩修何等法。得此法門。答言。佛子。菩薩修行十妙法故。得此法門。何等爲十。所謂菩薩修行布施。令一切眾生海皆悉歡喜。修行

淨戒成滿諸佛功德大海。修行忍辱。了知一切諸法
眞性。修行精進。於薩婆若堅固不退。修行禪定。除滅
一切眾生煩惱。修行智慧。分別了知一切法海。修行
方便。教化成就一切眾生海。修行大願。於一切佛刹
海盡未來劫。修菩薩行。修行諸力。於念念中現一切
刹。成等正覺。修行無盡智。了知三世法無所障礙。佛
子。是爲十妙法。菩薩摩訶薩。修行此法。起此法門。得
此法門。淨此法門。成此法門。長養增廣。不可沮壞。善

財白言。天神發阿耨多羅三藐三菩提心。爲久如耶。
答言。佛子。乃往古世過二佛刹微塵等劫。有劫名普
照幢。於此蓮華藏莊嚴世界海東過十世界海。有一
世界海名曰離垢眾寶莊嚴。彼世界海中有世界性
名一切佛光明願音。彼世界性中有一世界名離垢
光。金色莊嚴一切寶雲而莊嚴之。眾寶爲地。堅固不
動。形如一切香妙德王。莊嚴樓閣皆悉清淨。諸天宮
殿充滿其中。彼有王都名曰普滿妙德藏王。彼有道

場名一切眾寶莊嚴藏月光明。其佛號不退法界妙音。於此道場得阿耨多羅三藐三菩提。我於爾時爲菩提樹神名功德燈無量光幢。我見彼佛成等正覺。顯現無量自在神力。我於爾時發阿耨多羅三藐三菩提心。於彼佛所。逮得三昧。名普照佛功德海。彼道場上次有如來出興於世。號法樹功德山。彼菩提樹神命終之後。還生此處爲菩提樹夜天。名妙德慧功德光明。聞彼如來轉正法輪。復得無量歡喜普照一

切境界三昧。彼道場上次有如來出興於世。號一切法海妙音聲王。值彼如來復得三昧。名成就一切法地。彼道場上次有如來出興於世。號寶光燄燈幢王。值彼如來復得三昧。名分別一切普照雲。彼道場上次有如來出興於世。號功德須彌光王。值彼如來復得三昧。名照諸佛海。彼道場上次有如來出興於世。號法雲妙音聲王。值彼如來復得三昧。名一切法海燈。彼道場上次有如來出興於世。號智慧燈明淨燈。

王時我爲天女。值彼如來復得三昧。名明淨燈滅眾
生苦。彼道場上次有如來出興於世。號法勇幢妙德。
值彼如來復得三昧。名三世佛普照藏。彼道場上次
有如來出興於世。號法燈勇猛智慧師子。值彼如來
復得三昧。名明淨智普照。一切無所障礙。彼道場上
次有如來出興於世。號智力山王。值彼如來復得三
昧。名普照三世眾生根行。佛子。彼普照幢劫離垢光
金色莊嚴世界。如是次第有十佛世界微塵等如來。

出興於世。我於爾時或爲天王龍王夜叉王乾闥婆
王阿脩羅王迦樓羅王緊那羅王摩睺羅伽王或爲
人王梵王男子女人童男童女。皆悉值彼一切如來。
恭敬供養。彼佛說法。悉聞受持。於彼佛刹二佛世界。
微塵等劫。修菩薩行。經佛刹微塵等受生。最後命終。
生此蓮華藏莊嚴世界。海娑婆世界中。作道場夜神。
值拘樓孫如來。得三昧眼。名離垢。一切香王光明。次
值拘那含牟尼如來。復得三昧。名隨順普照。一切刹

海。次值迦葉如來。復得三昧。名妙音聲海。分別一切
眾生音海。今復值見盧舍那佛。坐於道場。菩提樹下
成等正覺。於念念中顯現無量自在力海。復得菩薩
無量歡喜莊嚴法門。得法門已。深入十不可說不可
說世界海。微塵等法界方便海。以此法界方便海。於
一切佛刹微塵。一一微塵中。悉見十不可說不可說
佛刹微塵等世界。及彼諸佛。彼諸如來所說正法。悉
聞受持。又見盧舍那佛於念念中一切世界。坐於道

場成等正覺。出生無量自在神力。一一神力滿法界。海。我悉詣彼所說正法。悉聞受持。又復見彼一切諸佛。一一毛孔出化身海。滿法界海。顯現種種自在神力。於一切佛刹海。一切世界性。一切世界一切諸趣。一切眾生中。隨其所應。轉正法輪。我以精進聞持。陀羅尼故。悉能受持。正念思惟。知味知義。明智慧藏。圓滿清淨。分別了知一切法海。觀察三世諸佛平等出生。一切方便法門。於一一方便出生。一切脩多羅雲。

一一脩多羅雲成就一切諸正法海。一一法海攝取
一切諸回轉法。一一回轉法普出一切諸妙法雲。一
一法雲出生一切諸法波浪。一一波浪逮得一切歡
喜法海。一一歡喜法海出生一切諸功德地。一一功
德地出生一切諸三昧海。一一三昧海見一切佛海。
一一佛所得一切光明海。一一光明海普照三世得
圓滿智地。普照十方。知無量佛過去行海。照一切佛
無量本事海。難捨能施。持無量淨戒。行無量忍。長養

清淨菩薩精進。清淨無量諸禪定海。了知如來般若
波羅蜜海。普照如來無量方便海。了知如來長養功
德智慧力波羅蜜。分別如來無量智波羅蜜海。普照
如來過去無量菩薩諸地。無量佛地。神力自在。無量
劫中所修習起。淨無量佛過去菩薩地。修無量佛過
去智地。照無量佛諸智慧地。知無量佛爲菩薩時相
續善根。知無量佛爲菩薩時於一切劫海中一切佛
海所修菩薩行。知無量佛爲菩薩時出生佛刹海。無

量菩薩行充滿法界。種種方便門教化眾生。普照十方諸世界海。爲諸眾生現自在力。普照如來一切智地。轉淨法輪。悉聞受持一切法雲。顯現無量菩薩自在神力。普照諸佛相海。行海力海。於念念中知彼諸佛。從初發心乃至無餘涅槃遺法滅盡。善男子。汝所問我發心已來爲幾時者。如上所說。乃至來生此刹。供養盧舍那佛。如此世界供養拘樓孫佛。乃至盧舍那佛。供養賢劫未來諸佛。亦復如是。如供養賢劫諸

佛供養一切世界未來諸佛亦復如是而彼離垢光
金色莊嚴世界今猶現在是故善男子汝當一心修
此法門爾時寂靜音夜天欲重明此法門義以偈頌
曰。

善財應諦聽	我說此法門	應生歡喜心
勤修令究竟	無量諸劫海	修習菩薩行
心淨如虛空	入一切智藏	聞三世佛法
一心樂專求	於彼如來所	修習諸功德

我見過去佛	恭敬悉供養	聞佛說正法
歡喜心無量	亦已悉恭敬	供養於父母
一心樂專求	究竟此法門	老病貧窮等
諸根不具者	除滅彼苦惱	悉令得安樂
水火官賊難	怨敵諸恐怖	及海中諸難
我皆救濟之	眾生煩惱業	種種受報苦
摧破生死山	救護諸羣生	一切諸惡道
無量楚毒苦	生老病死痛	我當悉除滅

我願無量劫 安隱一切眾 常見一切佛
滅除生死苦

善男子。我唯成就此無量歡喜莊嚴法門。諸大菩薩
深入法海。分別一切劫善知一切諸世界海成敗之
事。我當云何能知能說彼功德行。善男子。此道場上
如來眾中。有一夜天名曰妙德。守護諸城。汝詣彼問
云何菩薩學菩薩行。修菩薩道。爾時善財讚歎寂靜
音夜天。以偈頌曰。

我受知識教	來詣天神所	見無量淨身
安處天寶座	虛妄取諸相	染著一切法
無智眾生等	不能知境界	清淨妙色身
一切諸天眾	無量劫諦觀	其心無厭足
遠離於五陰	一切無所著	超出世疑惑
顯現自在力	不染內外法	無礙心不動
明淨智慧眼	見佛自在力	身為正法藏
心是無礙智	成佛智慧光	普照諸羣生


分別說心業 莊嚴諸世間 知心業自性
現身等眾生 知世悉如夢 了佛如電光
一切法如響 令眾無所著 念念悉除滅
三世眾生惑 不取三世相 而能演說法
一切佛刹海 一切諸佛海 無量眾生海
無著修法門

退。時善財童子頭面敬禮彼夜天足繞無數帀敬心辭

誦補闕真言

南無三滿哆。沒馱喃。阿鉢囉帝。喝多折。折捺彌。唵。雞
 彌。雞彌。怛塔葛塔喃。末瓦山。斫鉢囉帝。烏怛摩怛摩。
 怛塔葛塔喃。末瓦吽。發莎訶。舉字母讚
 華嚴字母。眾藝親宣。善財童子得真傳。秘密義幽玄。
 功德無邊。唱誦利人天。

伽 ● 强 擎 蚤 劬 翹 ○ 其 芹 乾 禽 鍼 裘 伽
 吒 ○ 張 徵 中 豬 朝 裡 知 珍 徂 砧 詎 轉 吒
 拏 ○ 孃 窳 釀 柳 嬈 握 尼 紉 然 詎 誦 孺 拏



時普願法界眾生入般若波羅蜜門
四十二字妙陀羅。字字包含義理多。
婆功德大。法界沐恩波。

拏 吒 伽

梵韻滿娑

四生九有。同登華藏玄門。八難三塗。共入毘盧性海。
南無華嚴海會佛菩薩

三稱

大方廣佛華嚴經卷第五十五

東晉天竺三藏佛陀跋陀羅等譯

入法界品第三十四之十一

爾時善財童子正念思惟智慧分別隨順正趣修廣
身證無量歡喜莊嚴法門往詣妙德守護諸城夜天
所見彼夜天處普照一切宮殿寶師子座不可說諸
天眷屬圍繞隨方面身一切眾生色身普現一切眾
生前身一切眾生無所著身一切眾生身身一切眾

生無上身。隨順教化一切眾生身。遊十方身。至一切
十方身。究竟佛身。究竟教化一切眾生身。善財見此
身已歡喜無量。頭面禮足。繞無數匝。恭敬合掌。於一
面住。白言。天神。我已先發阿耨多羅三藐三菩提心
而未知菩薩云何學菩薩道。饒益眾生。以無上攝法
攝取眾生。順如來業。親近法王。時彼夜天告善財言。
善哉善哉。佛子。爲救護一切眾生故。問菩薩行。爲嚴
淨一切佛刹。供養一切佛。住一切劫。救護一切眾生。

守護一切如來種姓。究竟十方一切法界。海平等之
心充滿。一切悉聞。受持一切諸佛所轉法輪。隨其所
應。雨甘露法。故問菩薩行。善男子。我已成就甚深妙
德。自在音聲法門。是故佛子。我爲勝大法師。無所罣
礙於一切法。心無所著。分別如來一切法藏。安住如
來大慈大悲。建立眾生於菩提心。得一切利。不捨菩
提心。長養一切善根。爲一切眾生調御大師。安立眾
生一切智道。故於一切世界。爲明淨日照。一切眾生

無量善根故。等心觀察一切眾生。不捨一切眾生。出生長養一切善根。甚深智慧。觀淨爾燄。斷一切不善業。行諸善業。救護眾生。顯現一切諸佛世界。修行嚴淨諸本事業。立一切眾生清淨善根。令值一切諸善知識。無能壞者。立一切眾生佛正教。故佛子。我常以法施爲首。出生長養諸白淨法。一切智心堅固不動。如金剛藏不可沮壞。心常依止佛力。魔力善知識力。心壞一切諸結業山。心能專求一切智圓滿白淨法。

無礙法門一切種智佛子。我以如是智慧光明淨諸
眾生無量善法饒益一切復次佛子。我以十行觀察
法界隨順法界攝取法界何等爲十。所謂知法界無
量智慧無量故。知法界無量無邊悉見一切諸如來
故。知佛法界無量無邊詣一切刹恭敬供養一切佛
故。知法界無分齊於一切世界海行菩薩行故。知法
界不可壞究竟如來不可沮壞圓滿智故。知法界一
如來妙音一切眾生無不聞故。知法界自然清淨教

化一切眾生滿佛願故。知法界徧至眾生深入普賢
菩薩行故。知法界一切莊嚴普賢菩薩行自在莊嚴
故。知法界不可滅一切智善根充滿法界令諸眾生
悉清淨故。佛子。我以此十行觀察法界增長善根。知
佛奇特境界不可思議。佛子。我如是正念思惟。以一
萬陀羅尼爲眾生說法。所謂攝取一切諸法圓滿陀
羅尼。持一切法圓滿陀羅尼。一切法雲雷震圓滿陀
羅尼。諸佛起住圓滿陀羅尼。轉一切佛名號輪圓滿

陀羅尼。分別演說三世諸佛大願海圓滿陀羅尼。攝一切乘海圓滿陀羅尼。照一切眾生業海燈藏圓滿陀羅尼。一切法現前旋流勇猛圓滿陀羅尼。一切智勇猛圓滿陀羅尼。以如是等萬陀羅尼爲一切眾生分別說法。復次佛子。我或爲眾生說聞慧法。或爲眾生說思慧法。或爲眾生說修慧法。或說一有。或說一切有海。或說一佛海。或說一切佛名號海。或說一世界。或說一切世界海。或說授一記。或說授一切記海。

或說一佛眷屬海。或說一切佛眷屬海。或說一佛法輪。或說一切佛法輪海。或說一脩多羅。或說一切佛脩多羅海。或說一會。或說一切會海。或說一薩婆若心。或說一切菩提心海。或說一乘。或說一切乘海。佛子。以如是等無量方便。爲諸眾生敷演不可說不可說。說法佛子。我深入此無壞法界。皆悉究竟如來正法。以無上法施。攝取眾生。盡未來劫。修習普賢菩薩所行佛子。我已成就此甚深妙德。自在音聲法門。於念

念中悉能長養一切法門。充滿法界。爾時善財。白。夜
天言。妙哉。天神。如此法門。最爲甚深。得此法門。其已
久如。答言。佛子。乃往古世。過轉世界。微塵等劫。有劫
名離垢光明時。有世界名法界妙德雲。有四天下。微
塵等香。須彌山莊嚴於蓮華中。出一切佛妙願音聲。
一切眾生淨業所起。眾寶合成。形如蓮華。清淨無垢。
有須彌山微塵等眾。妙寶樹周而圍繞。有須彌山微
塵等眾。妙寶香以爲莊嚴。有須彌山微塵等諸四天

下莊嚴世界。一一四天下各有不可說不可說城。彼世界中。有四天下。名莊嚴幢。彼四天下。有王都城。名普寶華光。於彼城外。有道場。名法王宮殿。光明。其道場上。有須彌山。微塵等佛。出興於世。其最初佛。號法海。雷音光明王。時有轉輪王。名離垢光明。於彼佛所。守護正法。聞持正法。脩多羅海。佛滅度後。出家學道。正法欲滅。於大劫中。有惡劫起。煩惱熾盛。眾生恚怒。忿毒交諍。諸比丘。眾背功德利。心樂放逸。常好王論。

賊論女論國論海論世間之論樂如是等種種諸論
時王比丘作如是念。如來無量阿僧祇劫修習妙法
云何此諸比丘而共毀滅。彼王比丘卽升虛空放大
光明雲。無量種色普照十方一切世界。除滅一切眾
生煩惱。立無量眾生無上菩提。復令正法於六萬五
千歲而得興盛。時有比丘尼名法輪化光。是彼轉輪
王女。十萬比丘尼以爲眷屬。見父王比丘光明神變。
卽發阿耨多羅三藐三菩提心。得一切佛燈明三昧。

甚深妙德自在音聲法門。得已身心柔輒。法海雷音。光明王佛神力自在一切功德悉現在前。佛子。時轉輪王隨彼如來轉正法輪與隆法者。豈異人乎。今普賢菩薩摩訶薩是也。法輪化光比丘尼者。我身是也。我於爾時守護佛法。建立十萬比丘尼眾。得不退轉地。又令攝取一切如來法門三昧。法輪光明三昧。又復建立入一切法海方便般若波羅蜜。佛子。次有如來出興於世。名離垢法山。我得值遇。次有如來名法。

圓滿光明周羅。次有如來名法日妙德雲。次有如來名法海分別妙音聲王。次有如來名法日圓滿燈。次有如來名法化幢雲。次有如來名法燄山幢王。次有如來名甚深法妙德月。次有如來名法智普光明藏。次有如來名普智境界覺悟眾生。次有如來名妙德山王。次有如來名普門普賢須彌山。次有如來名一切法精進幢。次有如來名寶華妙德雲。次有如來名寂靜甚深光明周羅。次有如來名法燄大慈光明月。

次有如來名光燄妙德海。次有如來名智慧日普照一切。次有如來名圓滿普智。次有如來名無上智覺明王。次有如來名功德燄華燈。次有如來名智慧師子幢王。次有如來名普日光明王。次有如來名須彌相莊嚴。次有如來名勇猛日普光明。次有如來名法網覺妙德月。次有如來名法蓮華敷善德妙音。次有如來名相日普光明。次有如來名普光妙德正法音聲。次有如來名無畏妙德那羅延師子。次有如來名

普智健幢。次有如來名敷法蓮華身。次有如來名功德華妙法海。次有如來名道場覺妙德月。次有如來名法炬妙德月。次有如來名普照光明周羅。次有如來名法幢燈。次有如來名妙德海幢雲。次有如來名稱山妙德雲。次有如來名栴檀妙德月。次有如來名明淨普妙德華。次有如來名普照眾生光明王。次有如來名鉢頭摩華妙功德藏。次有如來名香燄光明王。次有如來名鉢頭摩因。次有如來名明淨相山。

次有如來名普稱功德幢。次有如來名普門光明須彌山。次有如來名妙德法城光明。次有如來名明淨功德山。次有如來名勝相妙德。次有如來名法力勇猛幢。次有如來名法輪光明妙音。次有如來名功德光燄樓閣智光。次有如來名無上妙法輪月。次有如來名明淨法鉢頭摩覺幢。次有如來名寶鉢頭摩光來名明淨法鉢頭摩覺幢。次有如來名智覺華。次藏。次有如來名寶尸棄雲燈。次有如來名智覺華。次有如來名種種燄妙德須彌山藏。次有如來名圓滿。

燄妙德王。次有如來名功德雲莊嚴光明。次有如來名法山雲幢。次有如來名普明淨功德山。次有如來名法日雲燈王。次有如來名法雲名聲自在王。次有如來名法圓滿雲。次有如來名善覺明淨智幢。次有如來名法圓滿善覺妙德月。次有如來名金色山賢法。次有如來名明淨賢妙德須彌山。次有如來名普智慧雲妙聲。次有如來名法力妙德樓閣。次有如來名香燄妙德王。次有如來名金色摩尼山妙聲。次有

如來名白毫藏一切法圓滿光明。次有如來名明淨法輪。次有如來名無上清淨尸羅山。次有如來名普精進炬光照雲。次有如來名廣三昧海天冠光明。次有如來名寶燄妙德王。次有如來名法炬寶帳妙聲。次有如來名法雲空光明師子。次有如來名相好莊嚴幢月。次有如來名光明燄山電雲。次有如來名無礙虛空法光。次有如來名樂智華敷。次有如來名世間主光明妙聲。次有如來名法三昧光明妙音。次有

如來名法音真實藏。次有如來名法光明燄妙聲海。次有如來名普照三世相幢。次有如來名法圓滿山光明。次有如來名法界師子光明。次有如來名法界師子燄。次有如來名明淨妙德須彌山。次有如來名一切三昧海師子。次有如來名普智光明燈。佛子。於離垢光明劫中。如是等須彌山微塵等如來。出興於世。其最後佛名法界城明淨智燈。彼諸如來。我悉恭敬供養。聞法受持。出家學道。守護佛法。於彼諸佛所。

種種方便入此甚深妙德自在音聲法門以種種方便化眾生海復次佛子復有佛刹微塵等劫中諸佛出世我亦皆悉恭敬供養是故佛子一切眾生長寢生死唯我獨覺復能覺悟一切眾生守護心城離三界城入一切智無上法城善男子我唯成就此甚深妙德自在音聲法門除滅眾生兩舌口過令淨實語諸大菩薩決了眾生諸語言道於一念中覺悟一切眾生之心深入眾生語言音海善知眾生施設語法

分別了知一切法海。深入攝取一切諸法陀羅尼海。善巧方便爲眾生出一切法雲。究竟度脫一切眾生。攝取眾生立無上業。隨順淨智。分別業藏。能師子吼。法施一切。得諸法地。圓滿陀羅尼。我當云何能知能說彼功德行。善男子。此佛眾中有一夜天。名開敷樹華。汝詣彼問云。何菩薩學一切智。安立眾生於薩婆。若爾時妙德守護諸城。夜天欲重明此法門義。以偈頌曰。

佛子深法門 虛空如如性 分別三世佛
無量諸法界 出生無量門 不思議諸法
長養無礙智 了達三世法 過轉剎塵劫
劫名離垢光 世界妙德雲 城名寶華光
彼劫次第有 須彌塵等佛 初佛號法海
雷音光明王 後佛法界城 明淨智慧燈
我皆悉供養 聞法大歡喜 見法海雷音
光明王如來 眾妙相莊嚴 猶如須彌山

見佛卽發心	專求一切智	心大如虛空
其性同如如	充滿於三世	諸佛菩薩眾
大悲心普覆	一切刹眾生	清淨妙法身
充滿諸佛刹	隨其所應化	悉爲顯現身
我初發心時	震動一切刹	教化諸羣生
悉令大歡喜	次值第二佛	聞法而供養
卽時得覩見	十刹海塵佛	如是次第值
須彌塵等佛	恭敬供養彼	一切諸如來

聞法悉受持 逮得此法門 廣度一切眾
究竟到彼岸 轉刹塵等劫 諸佛興出世
我亦悉詣彼 恭敬而供養 聞法悉受持
清淨此法門

爾時善財得此甚深妙德自在音聲法門入菩薩無
量無邊諸三昧海。出生無量無邊陀羅尼海。得菩薩
神通諸明光曜。入諸辯海。長養一切甚深法海。欲讚
歎彼妙德守護諸城。夜天以偈頌曰。

了達其眞性	種種巧方便	了衆生無性	無量大悲心	無量無有邊	無礙清淨慧	普照於十方	智慧海成滿
修習薩婆若	化度諸羣生	深入佛法門	度脫衆生海	一切諸境界	究竟於三世	了達內外法	永度生死海
令衆悉清淨	普於一切法	窮盡其源底	明淨智慧眼	而心無所著	念念能分別	皆悉如虛空	長壽智慧藏

天是調御師	究竟一切智	充滿於法界
說法化眾生	順盧舍那願	無礙度眾生
安住至處道	普見十方佛	天心甚深妙
除滅煩惱熱	清淨如虛空	離垢無染著
攝取於三世	佛刹諸如來	一切菩薩眾
一切羣生類	一念分別智	刹那及羅婆
晝夜月半月	乃至無量劫	十方諸羣生
有色及無色	有想無想等	知死此生彼

除滅一切眾 虛妄顛倒想 善知語言法

顯現菩提道 出盧舍那願 一切佛法海

無礙法身心 隨應現眾生

時善財童子以偈讚歎彼夜天已頭面禮足繞無數
帀敬心辭退爾時善財童子正念思惟增廣甚深妙
德自在音聲法門往詣開敷樹華夜天所見彼夜天
在眾寶香樹樓閣之內處寶樹下師子法座百萬諸
天眷屬圍繞爾時善財頭面敬禮彼夜天足繞無數

而恭敬合掌於一面住。白言。天神。我已先發。阿耨多
羅三藐三菩提心。云何菩薩學菩薩行。修菩薩道。趣
薩婆若。唯願天神爲我解說。答言。善男子。我於日沒
優鉢羅鉢曇摩華皆悉還合。若諸人眾遊園觀者。廢
捨縱逸。歸其家時。爲放光明。在險徑者。照示平路。令
彼專求一切智道。若於山巖深水曠野。在如是等種
種難處。悉放光照。令免眾苦。得安隱樂。又善男子。若
諸眾生放逸五欲。爲其顯現老病死苦。悉令覩見。捨

離放逸修習善根。爲慳貪者讚歎。布施。若犯戒者安立淨戒。爲瞋恚者讚歎。大慈安立忍辱。若懈怠者教令修行菩薩精進。若亂心者教令修習諸禪三昧。若愚癡者令其深入般若波羅蜜。樂小法者教以大乘。著三界者令住菩薩圓滿。無著諸波羅蜜。若諸眾生功德羸弱爲眾結業之所逼迫。令住菩薩力波羅蜜。順無智者令住菩薩智波羅蜜。捨離癡闇。善男子。我已成就無量歡喜知足光明法門。善財白言。天神。此

法門者境界云何。答言。善男子。如來方便光明攝取
眾生。佛子。若有眾生受快樂者。悉蒙佛力。諸光明力。
隨如來教。佛威神力。隨順佛道。聞佛正法。入佛善根。
如來圓滿明淨智日。如來性淨業力。普照一切。悉蒙
如是功德力。故普令眾生受諸快樂。佛子。我入此法
門時。正念思惟。深入盧舍那如來應供等正覺過去
所行菩薩行海。善男子。我知菩薩本發菩薩地心時。
見諸眾生著我我所。無明覆蔽。入諸邪見。隨順貪愛。

欲恚所縛。心亂顛倒。慳嫉所纏。貧窮逼切。於生死中。受眾苦惱。不值諸佛。見如是已。發大悲心。攝取眾生。除諸苦患。普饒益之。令得一切無染著心。於諸施物。不求果報。分別了知一切因緣諸法實相。具足成就。大慈大悲。圓滿法蓋。普覆眾生。以知足法。養智慧力。摧散一切諸煩惱山。安樂眾生。隨所應化。雨甘露法。以聖法利。等施眾生。得十力果。無上快樂。成就菩薩。通力自在。充滿法界。悉現一切諸眾生前。雨一切物。

悉令歡喜充足其意。救護眾生。滅生死苦。不求恩報。
嚴淨一切眾生心寶。悉同一切諸佛善根。增長薩婆
若。教化成熟一切眾生。以無上淨法淨諸佛刹。於念
念中滿一切法界。以明淨智分別三世。充滿虛空。於
一切時轉淨法輪。教化眾生。令諸眾生。生一切智。清
淨諸持覺悟。一切諸佛菩提。分別一切未來諸劫。於
一切劫行菩薩行。心無有二。悉能徧遊一切世界。其
身容受一切刹海。悉皆攝取一切世界。分別解說一

切世界種種形色。種種莊嚴。種種依住。或不淨淨。或淨不淨。或純清淨。或純垢穢。或廣或狹。或大或小。或覆或仰。如是等諸世界海中。生菩薩行。證菩薩行。於念念中。出生菩薩。諸自在行。於念念中。爲眾生現三世諸佛清淨法身。佛子。盧舍那佛於過去世行菩薩行時。見諸羣生無智功德。愚癡所覆。著我我所。無明瞋障。不正思惟。入諸邪見。不識因果。順煩惱業。不修聖道。得無作法。常於生死險道流轉。受種種苦。發起

大悲令諸眾生出生菩薩無量諸行修習一切諸波羅蜜安立堅固勝妙善根除滅眾苦長功德藏了知因果不違業報知法真實悉分別知眾生欲樂及一切刹守護受持一切佛法令不斷絕滅不善法滿薩婆若佛子以如是等無量法施攝取眾生令一向求薩婆若法修行菩薩諸波羅蜜具賢聖利長薩婆若滿善根海顯現如來無量自在以如是等種種方便攝取眾生顯現如來無量功德安立眾生於菩薩諸

攝智慧。善財白言。天神發阿耨多羅三藐三菩提心。其已久如。答言。佛子。此事難知。難信。難入。難說。難得。一切諸天。聲聞緣覺。所不能知。除佛神力。依善知識。成滿善根。淨正直心。遠離諂曲。滅諸染汙。逮得普照。智慧光明。哀愍眾生。降伏諸魔。拔煩惱樹。必欲成就。一切種智。除滅生死憂悲惱海。得如來樂。入佛功德。精進之海。安住佛地。滿足如來一切智力。究竟十力。如此人者。乃能信解。能知能入。能說能得。何以故。此

佛境界一切眾生及諸菩薩所不能知。我當承佛神力爲調伏眾生直心清淨廣修善根得甚深心樂聞此法爲如此等隨其所應分別解說爾時夜天欲重明此義觀察三世諸佛境界以偈頌曰。

佛子此法門	甚深佛境界	不思刹塵劫
說之無窮盡	貪欲瞋恚癡	高慢眾生等
皆悉不能知	最勝寂靜法	慳嫉心諂曲
煩惱業覆者	一切不能知	甚深佛境界

普覆諸眾生	慧燈除癡闇	聞此法歡喜	親近善知識	諸佛常守護	依住生死者	不知佛境界	著諸陰入界
等心觀一切	是彼之境界	心淨離虛妄	滿足白淨法	奉持佛法藏	皆悉不能知	清淨離虛妄	及起吾我見
是彼之境界	以大慈悲心	猶如虛空性	究竟諸佛力	慧眼之境界	出生如來家	如來深境界	心想見顛倒

其心大歡喜 等觀眾生類 捨離於一切
離垢之境界 淨心離諸惡 乃至畏微罪
隨順諸佛法 離垢之境界 安住忍辱法
其心不可動 知實不違業 無盡心境界
勇猛勤精進 安住不退心 究竟薩婆若
調伏之境界 入於寂定心 除滅煩惱熱
深入智慧海 寂靜起境界 了達羣生類
諸法眞實相 深法之境界 是慧燈法門

覺悟眾生性	不著諸有海	普照一切心
是導師法門	悉從三世佛	清淨願性生
普於一切刹	窮盡未來劫	修習菩薩行
是普賢法門	入諸方便海	徧觀諸刹海
無礙深智慧	悉知刹成敗	一一塵中見
諸佛坐道場	成佛化眾生	無礙眼法門
善財至我所	親近善知識	聞此甚深法
精進勤修習	此盧舍那境	甚深難思議

我承佛神力 爲汝分別說

佛子。乃往古世過世界海微塵等劫。有一世界海名
明淨山。彼有如來出興於世。號智慧法界山。諸方寂
靜。普照王如來應供等正覺。彼佛爲菩薩時。淨彼世
界海。彼世界海中。有佛刹微塵等世界性。彼一一世
界性中。有世界微塵等佛出興於世。一一如來說世
界微塵等脩多羅。一一脩多羅中。授佛刹微塵等諸
菩薩記。顯現如來種種神力。無量方便種種諸乘。教

化眾生佛子。彼世界海中有一世界性。名普門莊嚴。彼世界性中有一世界名曰一切寶色妙德。普照一切寶華海。以爲莊嚴。眾寶爲體。狀若天城。清淨嚴飾。普照一切諸佛道場。顯現諸佛變化光明。彼世界中。有須彌山。微塵等四天下。彼四天下中有一四天下。名寶山幢。彼四天下有閻浮提。縱廣十萬由旬。彼閻浮提內有十萬大城。彼諸城中有一王都。名堅固寶莊嚴雲燈。有一萬城周帀圍繞。人壽萬歲。時有大王。

名一切法師子吼圓蓋妙音。有五百大臣六萬彩女。七百王子。端正勇健。爾時彼王威德。普被一閻浮提。無有怨敵。彼大劫中。有惡劫起。五濁熾然。爾時人民。行十惡業。遠離十善。死入惡道。壽命短促。形色鄙陋。貧窮下賤。多苦少樂。更相諍訟。互相謗毀。離他眷屬。深入邪見。以諸貪著。行非法故。風雨不時。卉木叢林。百穀苗稼。皆悉枯槁。彼時人民。饑饉病瘦。悉詣王都。高聲大呼。時諸人眾。無量無數。圍繞王城。或舉兩手。

或復合掌。或號天扣地。或舉身自撲。或右膝著地。或著弊衣。眼無光色。悲聲大叫。咸言大王。我等今者大苦大苦。飢渴寒凍。疾病危困。無所歸依。無救濟者。如在牢獄。種種苦逼。轉趣死路。作如是等無量楚毒。悲聲上訴。求自全濟。安隱快樂。大王則是眾生寶藏。清涼之池。善正治法。大智大乘。爲大寶洲。真實利益。能與眾生天人之樂。時彼大王聞此悲苦楚毒音聲。卽得百萬阿僧祇大悲法門。一心思惟。卽發十大悲語。

何等爲十。所謂嗚呼痛哉。一切眾生墜於無底生死深坑。無所歸依。我當爲彼作歸依者。悉令逮得如來之地。哀哉眾生。爲煩惱亂。無有救濟。我當爲彼作救護者。悉令安立一切善業。哀哉眾生。生老病死。無有救護。我當爲彼作救護者。除滅一切身心痛苦。哀哉眾生。有諸恐怖。無有救護。我當爲彼作救護者。令住一切智安隱之處。哀哉眾生。爲身見疑之所覆蔽。我當爲彼作明淨燈。普照一切。現明淨智。哀哉眾生。爲

愚癡覆。我當爲彼作大明炬。現一切智正法之城。哀哉眾生。爲諸慳嫉諂曲。幻僞濁亂其心。我當令彼悉得無上清淨法身。哀哉眾生。爲生死長流之所漂溺。我當令彼度生死海。到佛彼岸。哀哉眾生。從生盲瞽。我當令彼見真實義。同一切佛。哀哉眾生。根不調伏。我當令彼調伏。諸根除滅。障礙得一切智。時彼大王發如是等十大悲語。擊鼓宣令一切眾生安隱勿怖。隨汝所須。我皆資給。卽時班下閻浮提內大小諸城。

都邑聚落。悉開庫藏。金銀珍寶。衣服肴饌。香華纓絡。牀席被褥。宮殿宅舍。諸妙寶幢。夜光寶幢。摩尼寶幢。醫師湯藥。種種諸器。盛眾雜寶。諸金剛器。盛眾妙香。種種香器。盛諸衣服。種種車乘。旛彩幢蓋。又復擊鼓。宣令天下一切諸城都邑聚落。今施汝等國土城邑。聚落妻子頭目齒舌心肝血肉腸胃手足一切枝節。時城東門外有大會處。名曰明淨摩尼妙德。其地平正。廣博清淨。無諸雜穢。眾寶爲地。散雜寶華。熏以眾

香。一切香雲充滿虛空。寶樹圍繞。無量華網及諸寶網。羅覆其上。自然演出無量億那由他娛樂音聲。有如是等無量珍妙而莊嚴之。皆是菩薩淨業果報。於彼會中王所住處。十寶爲地。十寶欄楯。十種寶樹。周帀圍繞。形色金剛不可沮壞。眾寶莊嚴。懸諸寶旛。白淨寶網。金鈴寶網。眾華寶網。摩尼寶網。雜衣寶網。羅覆其上。熏以名香。自然演出無量微妙歌頌音聲。時彼大王處師子座。端嚴姝妙。具大人相。肢節周備。那

羅延身不可沮壞。王姓中生。以正治國。於財心法。悉得自在。功德無量。無違命者。眾妙寶蓋。以覆其上。其蓋常出無量光明。閻浮金色。覆以淨妙摩尼寶網。金寶諸鈴。出和雅音。宣揚善行。爾時閻浮提內無量阿僧祇眾生。悉來歸命。讚言。大王。王是智人。天下第一。功德須彌。功德明淨。猶如滿月。得菩薩心。等觀眾生。普施一切。時王見已。歡喜無量。於彼大眾。發大悲心。善知識心。隨所求者。悉令充足。而攝取之。時王卽得。

無量快樂。釋提桓因乃至化自在天王無量百億那由他劫受諸快樂。所不能及。他化自在天王不思議劫受諸快樂。亦所不及。大梵天王不可說劫住梵住樂。亦所不及。乃至淨居天無分齊劫住寂靜樂。亦所不及。復次善男子。譬如有人仁慈至孝。遭世事難。違離父母。經歷年歲。後忽遇會。瞻奉親顏。欣慰踊悅。不能自勝。時彼大王見來求者。心大歡喜。亦復如是。信心堅固。長養菩提。何以故。此菩薩專求一切智。饒益

安樂一切眾生。成滿大願。遠不善法。修行諸善。救護
眾生。開薩婆若門。攝一切智。滿眾生願。入一切佛諸
功德海。壞一切煩惱魔業障山。隨順一切諸如來教。
入深智流。不違正道。出諸法流。成滿大願。住大人法。
滿足普門善根之藏。離一切惡心無所染。了達諸法。
猶如虛空。復次佛子。時彼大王見諸眾生發一子想。
父母想。福田想。難報恩想。師想。佛想。大慈悲心。悉普
覆之。隨其所須。衣服飲食。華香末香塗香鬘蓋幢旛。

諸莊嚴具。牀座被褥。舍宅宮殿。園觀浴池。車乘輦輿。象馬眾寶。所住宮殿。及其眷屬。內諸庫藏。城邑聚落。如是一切。悉施眾生。普令充足。時彼會中。有一女童。名寶光明。端正姝妙。顏容無倫。身如真金。目髮紺色。口演妙音。身出名香。眾寶莊嚴。常懷慚愧。正念無亂。威儀庠序。於諸師長。恭敬尊重。諸根寂定。念慧現前。所聞諸法。能持能解。宿世長養。無量善根。諸妙善法。潤澤其身。近善知識。好樂大乘。心如虛空。自安安彼。

常樂見佛求薩婆若。與六十童女俱。去王不遠。一心恭敬合掌而住。作如是念。我得善利。見善知識。遇善知識。於彼王所。起大師想。善知識想。慈悲人想。生此念時。歡喜無量。脫莊嚴具。置彼王前。發如是願。今此大王安隱無量無邊眾生。願我來世亦復如是。大王智慧。大王正道。大王所乘。大王相好。大王財寶無能壞者。願我來世亦復如是。隨所生處。我亦隨生。時彼大王告此女言。我今悉捨內外所珍恣汝取之。時彼

女人倍增歡喜以偈頌曰。

大王未興世	猶如餓鬼處	兩舌不實語	瞋恚懷害心	如是眾生等	天旱不降澤	草木皆枯槁
堅固莊嚴都	眾生相殘害	無義麤惡言	邪見不善行	愚癡所覆蔽	以無時雨故	泉流亦乾竭
一切不可樂	竊盜縱淫泆	貪利他財物	命終墮惡道	種種行諸惡	百穀悉不生	大王未興世

一切諸河池 皆悉乾枯涸 猶如大曠野
大王初生時 天興慶重雲 降雨普流澤
河池悉盈溢 除滅一切惡 遠離諸恐怖
人民皆歡喜 大王生世故 往昔諸羣生
各各相殘害 飲食人血肉 今悉修慈心
百穀昔不生 卉木皆枯燥 飢渴所逼迫
種種受苦惱 大王旣興世 粳米自然生
樹出妙衣服 王世所歸故 昔日競微利

強弱相陵奪	今種種莊嚴	如釋難陀園
昔日貪欲重	種種放逸行	侵犯他妻色
而共相危害	今日諸人民	眾寶妙莊嚴
貞潔無邪淫	猶如兜率天	昔日諸眾生
妄言非法語	縱口無義言	諂曲取人意
今日羣生類	遠離諸惡語	愛眼視眾生
口發柔和音	昔日諸眾生	種種行邪見
合掌恭敬禮	牛羊犬豕類	今聞王正法

遠離諸邪見	善知苦樂法	悉從因緣起
大王演妙音	無不愛樂者	梵釋等音聲
皆悉不能及	大王眾寶蓋	懸處虛空中
覆以諸寶網	普出妙香熏	金鈴自然出
如來和雅音	宣揚甚深法	除滅眾煩惱
次復廣演說	十方諸佛刹	一切諸劫中
如來及眷屬	又復次第說	過去十方刹
一切諸劫中	如來及眷屬	又出微妙音

充滿於天下	梵王諸羣生	悉聞業果報
眾生聞音已	自知諸業藏	離惡修眾善
專求無上道	王父名淨光	母曰蓮華光
父於五濁世	正法治天下	五百蓮華池
寶樹悉圍繞	底布以金沙	寶華悉敷茂
於彼池岸上	有諸妙法堂	眾寶爲欄楯
種種寶莊嚴	末世惡法起	積年不降雨
池流皆枯竭	卉木悉焦然	七日王當生

先降靈瑞相 諸人見歡喜 救護出世間
彼時於中夜 大地六種動 自然演妙光
猶如明淨日 浴池有五百 功德水充滿
一切諸寶樹 如本悉榮茂 河流諸泉源
一切皆盈滿 靈澤普津液 沾洽閭浮提
樹木諸叢林 雜卉眾藥草 百穀苗稼等
生長普滋茂 巖嶠諸高山 幽邃深險谷
普及一切地 自然悉平正 山陵諸卉木

沙礫雜穢等	悉於一念中	變成眾寶玉
人見此奇特	歡喜而發言	快哉大善利
我得清涼池	時彼淨光王	與內眷屬俱
一切大臣等	歡喜遊園觀	五百浴池中
有池名歡喜	池上妙法堂	王眷屬遊止
時王語夫人	我願悉成滿	國土還豐樂
人民普安隱	時彼浴池中	千葉寶華生
普放清淨光	明曜須彌頂	明淨金剛莖

眾寶爲華葉 閻浮檀金臺 諸妙香爲鬚
於彼蓮華中 出生一童子 相好莊嚴身
諸天悉敬禮 王見大歡喜 入池撫掬之
安置后膝上 汝子應欣慶 寶藏普涌出
寶樹生妙衣 天樂奏妙聲 充滿虛空中
時彼諸人民 合掌恭敬禮 歡喜如是言
此是世歸依 身放大光明 普照於一切
若有遇斯光 諸漏悉除滅 一切惡鬼神

毒害眾生類	悉捨不善心	自然生慈愍
惡名失善利	疾病鬼所持	如是眾苦滅
一切皆歡喜	天下諸羣生	相視如父母
離惡修慈心	專求一切智	遠離諸惡趣
廣開天人路	顯現無上道	度脫諸羣生
我等得善利	遇斯大施主	眾生失正路
導師今出世		

爾時寶光明童女偈讚王已。頭面禮足繞無數而恭

敬合掌於一面住。王讚女言善哉善哉。乃能信知他人功德。是爲希有。若有愚癡。不知報恩。無有智慧。濁心邪見。具如是等非法。眾生不知不信。諸佛菩薩。清淨功德。一切智境。汝今專求無上菩提。修菩薩行。攝取安隱。饒益眾生。王讚女已。以無價衣。手自授與。而告之曰。汝自著之。時彼女人。以膝著地。敬禮合掌。頂受而著。時王復有六十女衣。彼著衣已。與眷屬俱繞畢辭退。諸女衣中。普出一切星宿光明。眾人見已。咸

歎之曰。此諸女等皆悉端正。如淨夜天星宿莊嚴。善男子。爾時一切法師子。吼圓蓋妙音王者。豈異人乎。今盧舍那如來應供等正覺是也。淨光王者。今淨飯王是也。蓮華光夫人者。摩耶夫人是也。時國人者。今大眾是也。悉於阿耨多羅三藐三菩提得不退轉。或住初地乃至十地。大願成就。住諸法門。修方便道。求一切智。住諸解脫。爾時開敷樹華。夜天欲重明。此義以偈頌曰。

諸刹海塵劫	自身及他人	了眾生心海	我有無二智	境界一切音	得道轉法輪	眾生常流轉	我有清淨眼
諸佛及菩薩	分別悉了達	我得宿命智	一一無等等	諸佛所說法	化度諸羣生	見諸佛菩薩	悉見世界海
五道眾生類	我於一念知	念一切劫海	能於一念中	悉聞歡喜持	我以淨天耳	往詣菩提樹	生死五趣中

彼佛初發願 專求佛菩提 究竟悉滿足
無量菩薩行 覺了等正覺 種種巧方便
轉淨妙法輪 顯現諸乘海 爲眾演說法
度脫於一切 乃至遺法住 我悉一念知
我於無量劫 修習此法門 眞佛子應速
究竟此法門

佛子。我唯知此菩薩無量歡喜知足光明法門。諸大菩薩於一切佛所修行一切諸佛行海求一切智清

淨滿足一切大願。於一菩薩地修行一切菩薩地。海於一菩薩行。攝取一切菩薩行。海於一法門。自在修攝一切法門。我當云何能知能說彼功德行。佛子。於此道場。有一夜天。名願勇光明守護眾生。汝詣彼問云何菩薩學菩薩行。修菩薩道。成就眾生無上菩提。淨諸佛刹。值一切佛。修習一切如來正法。時善財童子頭面敬禮。彼夜天足繞畢。辭退。爾時善財童子往詣願勇光明守護眾生夜天所。見彼夜天在大眾中。

處於普照摩尼王藏師子之座。摩尼王網羅覆其身。光明普照一切法界。一切日月星宿光明以爲其身。一切眾生形類色像悉於中現。又現一切諸色海身。諸威儀身。諸方面身。應現一切眾生前身。遊行十方自在力身。於一切時現眾生前不失時身。詣諸佛所敬禮之身。長養一切諸善根身。受持一切佛法雲。不忘失身。滿足一切菩薩願身。普照一切諸世界身。除滅癡暗。普照一切明淨燈身。知法如幻。離垢深慧。

了諸法身覺悟一切普現意身離熾然身不可壞身
無所依住佛行持身無有染汙清淨法身善財見已
五體投地起佛世界微塵等念念彼天身良久乃起
恭敬合掌一心諦觀於善知識得十種心何等爲十
所謂得自己心勇猛精進求薩婆若能受持故得具
一切智法心隨順一切正教道故得自受生心安住
無上正法門故得同行心共普賢菩薩諸行願故得
具一切功德藏心長養一切白淨法故得勇猛心長

養諸佛大精進故得具一切諸善根心。成滿一切諸大願故得辦一切大利益心。具足菩薩自在力故。是爲於善知識得十種心。爾時善財一心觀察彼夜天已得世界微塵等菩薩共法。所謂正念共法。念十方三世一切佛故。大慧共法。分別了知一切法海故。諸趣共法。一切佛法輪不可壞故。覺悟共法。智如虛空。普照三世一切方便海故。諸根共法。以明淨慧普照眾生一切根海故。淨心共法。修菩薩道得一切智無

礙功德莊嚴故。境界共法。明淨智慧照佛境故。隨順
方便共法。究竟一切智方便海普照一切故。知義共
法。知一切法真實性故。法無畏共法。壞散一切諸怨
敵故。清淨色身共法。隨其所應現淨身故。諸力共法。
於薩婆若不退轉故。無畏共法。淨正直心如虛空故。
精進共法。於一切劫行菩薩行不退轉故。辯才共法。
明淨智慧深入諸法。照一切故。無比共法。一切眾生
無能勝故。語言共法。於大眾中說淨妙法。無所畏故。

妙聲其法能師子吼出微妙聲滿一切法海故淨音
其法一切眾生悉樂聞故淨德其法令一切眾生悉
清淨故智地其法於一切佛受法輪故梵行其法安
住一切佛境界故大慈其法於念念中普覆一切眾
生海故大悲其法雨甘露法救一切眾生故身業其
法於一切眾生隨所作故口業其法分別一切語言
法故意業其法立一切眾生薩婆若心故莊嚴其法
嚴淨一切諸佛刹故詣一切佛其法見一切佛出興

世故。勸請共法。請諸如來轉法輪故。供養共法。供養一切諸如來故。教化共法。度脫一切諸眾生故。光明共法。照一切法故。三昧共法。於一切眾生心海。得不動故。充滿共法。諸菩薩等自在神力滿。諸佛刹故。菩薩法門共法。出生菩薩自在力故。眷屬共法。樂與菩薩共同止故。深入共法。分別一切諸世界故。了心共法。廣淨佛刹故。隨順共法。入一切佛世界海故。充滿方便共法。分別了知一切世界故。無上共法。普現一

切諸佛刹故。不退其法。遊行十方無障礙故。除滅一切愚癡其法。得一切佛圓滿智故。不生其法。與一切佛爲眷屬故。滿一切佛刹網其法。恭敬供養一切佛故。決定智其法。分別了知諸法海故。如說修行其法。順入一切諸法門故。專求其法。欲求一切諸淨法故。清淨其法。諸佛功德莊嚴身口意故。淨意其法。於一切法智滿淨故。勇猛其法。究竟一切事滿善根故。淨行其法。滿足一切菩薩行故。無礙其法。分別了知諸

法相故方便其法具足自在智法門故淨入其法隨其所應現境界故菩薩門其法修行一切諸佛法故護持其法一切諸佛所護持故離生其法次第逮得菩薩地故安住其法安住一切菩薩住故演說其法了知諸佛授記法故禪定其法於一念中悉入一切諸三昧故三昧起其法一切佛事種種相故淨念其法知一切念故菩薩行其法盡未來劫行菩薩行不斷絕故淨信其法歡喜增長佛智慧故長養其法除

滅一切諸障礙故。不退智其法。與一切佛智慧等故。
受生其法。隨時應化一切眾生故。住其法。住一切智
故。境界其法。法界境界故。無著其法。心不染著一切
有故。善知法相其法。等心觀察一切法故。容受其法
於己身內受持一切諸佛法故。通明其法。分別了知
一切世間故。神力其法。以少方便遊行一切佛刹海
故。陀羅尼其法。普照一切陀羅尼海故。持一切佛法
輪其法。悉能受持一切脩多羅法故。深入其法。解一

切法如虛空故。淨光其法普照一切諸世界故。明淨其法隨其所應現。眾生故震動其法。動諸佛刹爲諸眾生現自在故。不虛其法。見聞念者悉不虛故。聖道其法滿一切願。十力智故。得如是等佛刹微塵等菩薩其法。爾時善財入如是等菩薩其法於善知識得無量無邊淨正直心。偏袒右肩恭敬合掌。以偈讚歎彼夜天曰。

我以無上心 專求佛菩提
今於善知識

而起自己心	遠離諸惡業	成就清淨行
由見善知識	得無盡白法	我見知識已
功德莊嚴心	盡未來剎劫	修行菩薩道
惟願善知識	哀愍攝取我	爲我悉顯現
正教眞實法	閉塞諸惡趣	廣開天人路
佛一切智道	爲我悉顯現	念彼善知識
一切功德藏	我於念念得	虛空功德海
授我波羅蜜	不思議功德	長養諸善福

智繒速冠頂 我念善知識 一切種智道
依止善知識 滿足白淨法 具足眾善利
功德普成滿 究竟一切法 成就薩婆若
知識爲大師 安立無上法 無量無數劫
不能報其恩


大方廣佛華嚴經卷第五十五

誦補闕真言

南無三滿哆。沒馱喃。阿鉢囉帝。喝多折。折捺彌。唵。雞
彌雞彌。怛塔葛塔喃。末瓦山。斫鉢囉帝。烏怛摩怛摩。
怛塔葛塔喃。末瓦吽。發莎訶。舉字母讚
華嚴字母。眾藝親宣。善財童子得真傳。秘密義幽玄。

功德無邊。唱誦利人天。

娑	頰	娑	迦	也	娑
○	○	○	○	○	○
思	思	思	思	思	思
蘇	蘇	蘇	蘇	蘇	蘇
甝	甝	甝	甝	甝	甝
彌	彌	彌	彌	彌	彌
○	○	○	○	○	○
桑	桑	桑	桑	桑	桑
僧	僧	僧	僧	僧	僧
蝶	蝶	蝶	蝶	蝶	蝶
甦	甦	甦	甦	甦	甦
腮	腮	腮	腮	腮	腮
西	西	西	西	西	西
辛	辛	辛	辛	辛	辛
珊	珊	珊	珊	珊	珊
心	心	心	心	心	心
三	三	三	三	三	三
鞞	鞞	鞞	鞞	鞞	鞞
娑	娑	娑	娑	娑	娑



時普願法界眾生入般若波羅蜜門
四十二字妙陀羅字字包含義理多。
婆功德大法界沐恩波。

娑 也 迦 娑 頗 娑

梵韻滿娑

四生九有同登華藏玄門。八難三塗共入毘盧性海。
南無華嚴海會佛菩薩

三稱

大方廣佛華嚴經卷第五十六

東晉天竺三藏佛陀跋陀羅等譯

入法界品第三十四之十二

爾時善財說偈讚已。白言。天神。向所顯現。不思議法。此法門者。名爲何等。發道心來。爲幾時耶。久如當成。無上菩提。答言。善男子。此法門者。名隨應化覺悟眾。生長養善根。善男子。我入此法門。覺悟一切諸法平等。知一切法真實之相。遠離世間無所染著。解一切

色非一非異。了色非色。而能顯現無量諸色。所謂種種色。清淨色。莊嚴色。放一切莊嚴色。普現色。同一切眾生色。一切世間現前色。普照色。見無厭色。相好淨色。離惡色。現勇猛色。甚深色。一切世間無能盡色。歎無盡色。種種雲色。諸形像色。顯現無量自在力色。可愛樂色。一切善起色。隨應現前色。隨應度眾生色。普照無礙色。離垢色。不壞淨身色。不思議法方便光明色。非比非無比妙絕色。非明闇色。滅一切闇色。積集

一切白淨法色。功德大海之所生色。過去修行恭敬
生色。淨直心生如虛空色。勝廣大色。無斷無盡色。海
光明色。一切世間無所依止不可壞色。充滿一切十
方無礙色。念念色。海色。令一切眾生大歡喜色。攝取
一切眾生堅固色。一切毛孔中如來功德師子吼色。
淨一切眾生深心色。顯現一切法義色。圓滿光明無
礙色。離垢虛空等色。不依垢無著色。普照離垢法界
色。不可稱色。隨眼見色。照諸方色。隨時顯現應眾生

色寂靜色滅一切煩惱色一切眾生功德福田光明色見不虛色大智光色無礙法身滿一切色顯現威儀不虛色積集大慈海色具足功德須彌山色普照一切趣色淨大智色正念一切世間色一切寶光色淨寶藏色不壞淨眾生色趣薩婆若色悅眾生眼色一切寶莊嚴勝光明色不取不捨一切眾生色無決定無究竟色顯現自在諸持力色一切自在神足色佛種姓色遠離眾惡滿法界色悉詣一切諸佛大眾

照一切色。成諸海色。善行依果色。隨化授色。一切世
間見無厭色。種種光明普照色。顯現三世一切色。顯
現一切海色。放一切光明海色。種種光色。過一切世
間一切香光色。顯現圓滿諸日雲色。持圓滿淨月雲
色。放須彌山妙華雲色。出種種鬘雲色。顯現一切鉢
曇摩華雲色。一切香像雲。充滿法界色。散一切末香
雲色。現一切佛淨願身色。一切音聲出師子吼法界
海色。普賢菩薩清淨身色。於念念中。現如是等色。充

滿十方教化眾生。或見或念而得度脫。或現轉法輪。或現隨時應。或現親近。或現覺悟。或現自在神力。或現種種變化。或現不可思議自在神力變化度脫眾生。滅不善法。安立善法。滿足大願。一切智勢力。菩薩法門勢力。具足成就大慈大悲。佛子。我住此法門。現無量色身。分別了達一切色海。放無量無邊法雲。普照一切諸佛世界。現無量無邊諸佛。現無量無邊自在神力。覺悟眾生。長養善根。於念念中。令不可思議。

眾生於阿耨多羅三藐三菩提得不退轉。佛子。如汝所問。得此法門爲幾時者。我今承佛神力爲汝解說。佛子。菩薩圓滿智慧離一切虛妄。本性清淨。一切種智超出一切諸障礙山。隨所應化。皆悉普照。佛子。譬如日性無有闇冥。但日沒已。天下則闇。出則大明。菩薩圓滿明淨智日。亦復如是。離一切虛妄。普照一切教化眾生。佛子。譬如淨日出闇。淨提普照天下。眾寶山樹影現一切大海河池。眾生之類莫不對見。日亦

不來入此池流。菩薩智日亦復如是。出三有海。於佛
實法虛空中行。住於寂滅。應現一切趣。趣生處。同眾
生身而化度之。實不生死。無所染著。離一切虛妄。無
修短想。何以故。佛子。菩薩摩訶薩離諸顛倒。了一切
世悉如夢幻。解真實法。無有眾生。圓滿大悲。皆悉對
現一切眾生而教化之。佛子。譬如大船不依此岸。不
樂彼岸。不著中流。於大海中。濟度眾生。菩薩摩訶薩
亦復如是。以波羅蜜力。船於生死海。濟度眾生。不依

此岸不樂彼岸而度眾生。於一切劫修菩薩行。不起劫想。亦不見劫。有修短相。佛子。譬如虛空出過法界。一切世界有成有敗。而彼虛空本性清淨。無所染污。不可沮壞。遠離恐怖。一切障礙。而能普持未來諸劫。一切佛刹。菩薩摩訶薩心亦復如是。以虛空等圓滿智慧莊嚴其心。發起一切大願。風輪持一切眾生。令滅惡道。生諸善趣。心無憂喜。安立眾生。一切智道。除滅煩惱。生死過患。佛子。譬如化人無有實形。生老病

死飢渴等苦。菩薩出生如化。智慧不可沮壞。妙色法身亦復如是。於一切劫諸生死中。化度眾生而無所著。亦無恐怖。無貪無恚。除滅一切熾然煩惱。心不貪樂。一切趣生。佛子。菩薩智慧雖復如是甚深難測。我當承佛神力爲汝解說。令未來世諸菩薩等滿足大願。成就諸力。佛子。乃往古世過世界海微塵等劫。復過是數有劫名善光。彼有世界名曰寶光。於彼劫中有萬如來出興于世。最初如來號法輪音聲虛空燈。

彼閻浮提中有寶莊嚴王都。彼有大林名善光明。於此林中。有一道場名曰善華。彼道場上有寶蓮華師子之座。時彼如來於此座上成阿耨多羅三藐三菩提。爾時人民壽十千歲。殺盜淫泆妄言兩舌惡口綺語貪恚邪見。行如是等十不善道。時彼如來於百歲中坐於道場。爲諸菩薩及諸天王并閻浮提宿殖德者。而爲說法。其餘眾生待善根熟。爾時國王名曰勝光。時彼人民行十不善。貪著五欲。作種種惡。遠離善

法不孝父母。不敬沙門。婆羅門。有無量眾生犯王治法。囚執囹圄。受諸楚毒。爾時彼王有一太子名曰善伏。端正殊特。成就妙色。具二十八大人之相。處在中宮。嫫女圍繞。聞彼獄人楚毒音聲。聞已憂惱。起大悲心。入彼獄中。見諸罪人裸形亂髮。繫縛榜笞。悲呼流淚。苦毒無量。太子見已。發大悲心。慰喻之曰。莫恐莫怖。我今能令汝等解脫。於是太子往詣王所。白言。大王。獄中罪人。願施無畏。大王哀愍。幸垂矜赦。時彼大

王召諸羣臣而共參議。此事云何。羣臣答言。彼諸罪人竊盜官物。謀殺大王。侵犯宮人。有如是罪。必應刑戮。若救彼者。罪應至死。時彼太子大悲深至。救護彼。故作如是言。我代獄囚受諸楚毒。願苦治我。我爲救彼。不惜身命。欲令罪囚悉得解脫。所以者何。若我不救此眾生者。云何能濟三界牢獄。諸在生死牢獄眾生。悉爲貪愛之所纏縛。愚癡所蔽。受種種苦。身形鄙陋。心常放逸。而不能知出要之道。無智慧光。著諸蘊。

界。無有福慧。遠離實智。染縛結垢。幽閉苦獄。隨順惡魔。生老病死。常爲憂惱之所逼迫。我當云何令彼解脫。我今應當捨自身命而拔救之。爾時五百大臣咸發聲言。大王當知。如太子意放獄囚者。毀壞王法。危及我等。不治太子。國不久立。王聞此言。卽發威怒。令誅太子。王后聞之。毀容降服。與千姝女。馳詣王所。頭面禮足。如是請言。大王當知。太子有罪。願垂慈恕。賜其壽命。時彼大王卽召太子。太子旣至。復白王言。願

垂哀赦獄囚苦人。若不矜赦。我代受苦。王言。隨意。爾時太子卽入獄中。放諸罪人。代受楚毒。曾無中悔。一向正念。一切種智。大悲爲首。饒益眾生。夫人白王。願聽太子在外半月。布施修福。然後隨王如法苦治。王卽聽許。時彼都城北有一大林。名曰日光。太子詣彼。設大施會。須食與食。須衣與衣。乃至車乘華鬘塗香末香幢旛繒蓋。及餘一切寶莊嚴具。期旣限滿。爾時國王及諸羣臣長者居士男女大小并諸外道皆悉

雲集爾時法輪音聲虛空燈如來。知諸眾生應化時。至與大眾俱。天王圍繞。龍王供養。夜叉王守護。乾闥婆王讚歎。阿修羅王禮侍。迦樓羅王以清淨心散諸雜寶。緊那羅王歡喜讚歎。供養過去諸佛。摩睺羅伽王悲泣正觀。與如是等無量大眾前後圍繞。來詣彼會。爾時太子及諸大眾遙見佛來。端嚴殊特。諸根寂定。如大象王。神心澄明。淨若淵海。顯現如來自在境界。勝妙功德。相好嚴身。圓滿光明。普照一切。震動十

方無量世界。一切毛孔。普出如來微妙香雲。普雨種種諸莊嚴雲。行佛威儀。除滅一切眾生煩惱。爾時太子既見如來。歡喜無量。五體投地。合掌白言。善來世尊。念哀取我。唯願世尊處摩尼座。諸菩薩眾皆就寶座。周而圍繞。時佛坐已。除滅一切眾生苦患。離諸障蓋。堪聖法器。爾時如來知諸眾生應受化者。而爲演說圓滿因緣。脩多羅。時彼大眾聞正法已。八十那由他眾生皆起。離垢清淨法眼。得無學地。一萬眾生得

大乘道滿足。普賢菩薩行願。見十方佛轉正法輪。現自在力。百佛世界微塵等眾生具摩訶衍滅十方世界無量眾生惡道苦難。生天人趣。時彼太子得隨應化覺悟眾生。長養善根法門。佛子。爾時太子豈異人乎。我身是也。我於一切眾生起大悲心。普饒益之。不著三界。又亦不求名譽果報。捨離憍慢。不輕他人。不加彼惡。不貪財利。遠離三有。莊嚴大乘。開一切智門。普行菩薩無量諸行。佛子。我於爾時得此法門。時諸

大臣今五百惡人調達眷屬是也。彼諸人等佛皆教
化。令發阿耨多羅三藐三菩提心。過未來世須彌山
微塵等劫。成等正覺。所住世界同名寶光。國界莊嚴。
父母種姓。受胎出生。棄家學道。往詣道場。轉正法輪。
說脩多羅。語言音聲光明。眷屬壽命法住。及其名號。
皆悉不同。其最初佛號饒益月。第二佛號大悲師子。
第三佛號救護眾生。最後如來號大醫王。佛子。當知
本諸罪人。我所救者。卽拘樓孫等賢劫千佛及百萬。

阿僧祇諸大菩薩。於無量精進妙德慧佛所發阿耨
多羅三藐三菩提心。今悉現在十方國土行菩薩行
修習增廣。此隨應化覺悟眾生。長養善根法門者是
也。佛子。時王勝光者。今薩遮尼搥子大論師是也。時
王宮人諸眷屬者。卽彼尼搥六萬弟子與師俱來。其
佛論義悉降伏之。授阿耨多羅三藐三菩提記者是
也。此諸人等當成正覺。世界劫號皆悉不同。佛子。我
於爾時救罪人已。父母聽我捨離國土妻子眷屬於

法輪音聲虛空燈佛所出家學道。五百歲中淨修梵行。於此中間得一萬三昧。一萬陀羅尼門。一萬諸明。一萬法藏。一萬薩婆若勇猛精進。一萬清淨忍門。一萬寂滅禪定。一萬方便般若波羅蜜。各於十方現前對見一萬如來。出生一萬菩薩大願。長養菩薩一萬諸力。又得菩薩一萬神通。於念念中各遊十方一萬佛刹。於念念中各憶十方一萬佛海。見彼如來一萬化海。普遊十方教化眾生。於念念中見十佛世界眾。

生於諸趣中死此生彼。或好或醜。或之善處。或入惡道。知彼眾生諸心心法。心意所行。及諸根海行業善根。皆悉明達。佛子。我於爾時命終之後。卽復於彼閻浮提中王宮受生。作轉輪王。彼法輪音聲虛空燈。如來滅度之後。我於爾時守護正法。次值法虛空妙德王佛。次爲釋王。卽彼道場值天藏佛。次爲炎摩天王。卽彼世界值大地功德山佛。復值法輪光音聲王佛。次爲化樂天王。卽彼世界值虛空燈智王佛。次爲阿

脩羅王。卽彼世界。值一切法雷震王佛。次爲他化自在天王。卽彼世界。值不可壞力幢佛。次爲梵王。卽彼世界。值法輪化普光音佛。佛子。於彼寶光世界。善光劫中。一萬如來。出興于世。我悉值遇。次復有劫。名曰日光。六十億佛。出興于世。時我爲王。名大智慧。值最初相好功德山佛。復值妙音聲佛。次爲大臣。值離垢童子佛。次爲阿脩羅王。值勇猛精進佛。復值究竟相好佛。次爲商人。值離垢臂佛。次爲城天。值師子行佛。

次爲毗沙門天王。值天周羅佛。次爲乾闥婆王。值法
上名稱佛。次爲鳩槃荼王。值光明天冠佛。恭敬供養
佛子。我諸趣受身供養如是等六十億佛。於一一佛
所教化無量無邊眾生。我於一一佛所得種種三昧
門。種種陀羅尼。門具足諸辯。種種智慧。種種法光照
十方海。諸佛刹海。見諸佛海。如一劫中。值遇諸佛。恭
敬供養。於世界微塵等劫。一切世界中。諸佛興世。我
悉值遇。恭敬供養。聞法受持。守護正法。亦復如是。於

諸佛所修此法門。爾時願勇光明守護眾生。夜天欲
重明此義。以偈頌曰。

歡喜恭敬心	能問甚深法	我當承佛力
爲汝分別說	過於不思議	世界海塵劫
爾時有一劫	名曰爲善光	彼時有世界
名曰爲寶光	於彼世界中	十千佛興世
我值彼諸佛	恭敬悉供養	於彼如來所
修習此法門	爾時有王都	名曰可愛樂

廣博悉平正 種種妙莊嚴 眾生雜行起
世界有淨穢 時彼諸眾生 多行不善法
爾時有大王 號曰爲勝光 正法治天下
等心於一切 彼王有太子 號名曰善伏
端嚴甚殊妙 相好莊嚴身 時彼諸人民
有犯王法者 幽閉在牢獄 太子悉救之
爾時諸臣等 俱白大王言 太子欲危王
宜應加苦治 時王用臣言 如法治太子

諸臣送太子	往彼刑戮處	王后聞此已
來白大王言	願聽十五日	布施修功德
時王卽聽許	令其修福業	肴膳車乘等
隨欲悉給之	所斯日已盡	將至刑戮處
彼時一切眾	悲感悉號泣	時法輪音聲
虛空燈如來	知眾生根熟	往詣大眾所
顯現自在力	演說圓滿經	無量諸眾生
悉受菩提記	爾時王太子	卽發菩提心

願我悉度脫	一切諸羣萌	供養彼如來
卽隨佛出家	勇猛精進力	專求無上道
具足此法門	大悲念眾生	如法真實相
劫海修菩提	一切諸導師	次第興出世
我皆悉恭敬	供養護持法	刹海微塵等
一切諸劫中	如來出興世	恭敬悉供養
善伏我身是	修習大悲心	不惜身壽命
救護彼苦人	逮得此法門	劫海常修習

念念悉增長	無量諸功德	所見諸最勝
方便爲我說	聞已卽修習	此寂滅法門
無量劫修此	不思議法門	佛雨甘露海
我已悉飲之	依止此法門	普遊十方界
一念悉分別	三世諸佛刹	依此法門故
見三世佛海	於諸最勝所	現身如電光
依此法門故	徧詣十方佛	各現大神力
勝妙威儀法	依此法門故	能爲問難海

不思議諸佛	所說聞受持	依此法門故
於十方世界	諸佛大眾中	自在顯神變
依此法門故	種種現色身	能於一身中
顯現諸佛身	依此法門故	一一毛孔中
放大光明海	除眾生煩惱	依此法門故
一一毛孔中	出化無量身	法雨濟眾生
此法難思議	菩薩所修學	依住此法門
盡來劫修行	除滅諸邪見	隨應化眾生

悉令得安住 一切種智地 不可思議趣

顯現種種身 隨其所應化 而爲演說法

佛子。我唯成就此法門。諸大菩薩。超出世間。普照諸趣。悉能究竟一切境界。壞障礙山。了達法相。善巧方便。分別諸法。解法無我。攝取教化。度脫眾生。皆悉了知三世法界。善知一切語言道海。我當云何能入。如是大智慧海。大智境界。三昧解脫法門。自在善男子。此閻浮提有一園林。名流彌尼。彼有天名妙德圓滿。

汝詣彼問云何菩薩行菩薩行。生如來家爲世間燈。盡未來劫修菩薩行。心無疲倦。時善財童子頭面敬禮。彼夜天足繞畢辭退。爾時善財童子正念思惟。彼夜天教修習增長。隨所應化覺悟眾生。長養善根。法門漸漸遊行。至彼林中。周徧推求妙德圓滿。林天見坐眾寶樓閣之上。二萬那由他諸天圍繞。爲說菩薩受生海經。生如來家長養菩薩功德。爾時善財頭面禮足白言天神。我已先發阿耨多羅三藐三菩提心。

云何菩薩行菩薩行。生如來家爲世間燈。答言佛子。菩薩有十種受生法。若有菩薩行是法者。生如來家。於念念中長養善根。不退不怖不惱不亂不懈不悔。至一切智。順知法界修解脫道。於一念中長養一切諸波羅蜜。捨離世間具足佛地。智慧猛盛。佛法現前。順真實義。滿薩婆若。何等爲十。所謂供養一切佛。方便虛空願藏菩薩受生法。滿菩提心枝藏菩薩受生法。現前方便觀察寂滅虛空藏菩薩受生法。以淨直

心普照三世藏菩薩受生法。普照一切藏菩薩受生法。生如來家藏菩薩受生法。佛光明力藏菩薩受生法。具足分別薩婆若門藏菩薩受生法。一切法界化莊嚴藏菩薩受生法。勇猛精進至佛地藏菩薩受生法。佛子。何等爲供養一切佛方便虛空願藏受生法。此菩薩摩訶薩發如是願。我當恭敬供養一切諸佛。無量喜心見佛無厭。具不壞信。積集功德。供養諸佛。心無厭足。佛子。是爲初受生法。薩婆若初門。長養善

根故。佛子。何等爲滿足菩提心枝藏受生法。此菩薩摩訶薩發阿耨多羅三藐三菩提心。起大悲心。救護一切眾生故。值遇佛心常見佛故。求正法心無所惜故。大莊嚴心。向薩婆若故。發大慈心。普覆攝取一切眾生故。不捨一切眾生心。薩婆若莊嚴不可壞故。離諂曲心。得實智故。如說行心。得菩薩道故。不欺一切佛心。滿足諸佛大誓願故。爲薩婆若發大願心。教化未來一切眾生故。如是等佛刹微塵等菩提心枝滿

足生如來家佛子。是爲第二受生法。佛子。何等爲現
前方便觀察寂滅虛空藏受生法。此菩薩摩訶薩觀
察寂滅一切法海心。究竟滿足一切智道。不疲倦心。
正念善法業海心。一切菩薩諸三昧海清淨心。具一
切菩薩諸功德心。出生一切菩薩莊嚴道心。於無量
劫勇猛精進不休息心。出生普賢行化一切眾生心。
善學威儀住菩薩德一切諸有悉非有心。佛子。是爲
第三受生法。佛子。何等爲以淨直心普照三世藏受

生法。此菩薩摩訶薩淨直心界。照佛菩提。深入菩薩方便法海。深心不壞。猶如金剛。背一切有諸生死趣。向一切佛具自在力。趣諸勝道。增長菩薩根。離垢淨心。不可動轉。長養大願。常爲諸佛之所護念。壞散一切諸障礙。山悉爲眾生而作歸依。佛子是。爲第四受生法。佛子。何等爲普照一切藏受生法。此菩薩摩訶薩具足方便。教化眾生。不貪財利。以清淨心。悉捨一切。持無量淨戒。住佛境界。具足忍法。得一切佛忍光。

明法勇猛精進究竟一切智境界修習諸禪具足清
淨圓滿普門三昧智慧以明淨慧日普照法界得無
礙眼見一切佛海深入一切諸法源底智者所讚令
眾生歡喜修習正法見真實相佛子是爲第五受生
法佛子何等爲生如來家藏受生法此菩薩摩訶薩
生如來家隨諸佛教具足一切甚深法門同三世一
切諸佛大願同三世一切諸佛善根同三世一切諸
佛法身遠離世間向離世間趣長養白淨法住大功

德法門得佛持定見諸如來隨所應化淨諸眾生不
捨大願聞法受持佛子是爲第六受生法佛子何等
爲佛光明力藏受生法此菩薩摩訶薩深入佛力徧
遊十方供養諸佛心無疲倦知一切法如幻如夢色
如電光成就如化自在通明知一切有生趣如影知
一切佛所轉法輪皆悉如響悉究竟說一切法界佛
子是爲第七受生法佛子何等爲具足分別薩婆若
門藏受生法此菩薩摩訶薩以童子身住菩薩住觀

薩婆若於無量劫觀察一一諸智慧門。劫猶可盡。諸智慧門不可窮盡。究竟菩薩自在境界。諸三昧門。念念悉詣十方佛所。入不可壞三昧境界。不可壞法。不可壞智。無邊境界。得非境界。境界於少境界。悉具足。得不可說地。於無量中。得有量法。知諸世間名假施設。分別一切語言之法。佛子。是爲第八受生法。佛子。何等爲一切法界化莊嚴藏受生法。此菩薩摩訶薩。種種莊嚴無量佛刹。究竟眾生諸變化身。佛應化身。

無所依止清淨法化。悉行一切無礙法界。應受化者。爲彼現身教示種種諸菩薩行。善能出生離諸障礙。一切智門。淨智慧藏。教化眾生未曾失時。佛子。是爲第九受生法。佛子。何等爲勇猛精進至佛地藏受生法。此菩薩摩訶薩。悉於三世諸如來所受灌頂法。一切世界境界無障礙。菩薩悉知三世眾生死。此生彼修菩薩行。知諸眾身心次第起。知三世佛次第成正覺。善巧方便。知法次第。知一切劫次第成敗。隨應眾

生顯現莊嚴成等正覺。顯現次第轉正法輪。教化無量無邊眾生。佛子。是爲第十受生法。菩薩摩訶薩住是法。已種種莊嚴一切佛刹。無量億劫。無量法海。無量境界。教化眾生。覺悟無量諸法界流。顯現諸佛不可思議如虛空等深法境界。無量諸行。攝取眾生。現轉法輪於一切世界。護持佛法。悉於一切境界。以微妙音說不可說佛正法雲。住諸法門。趣無礙道。以一切法莊嚴道場。隨所應度。成佛與世。教化成熟無邊。

眾生時彼林天欲重明此義以偈頌曰。

清淨正直心	先發如是願	普見一切佛
供養無厭足	皆悉淨莊嚴	三世諸佛刹
以願莊嚴心	度脫諸羣生	修習寂滅法
其心無厭足	三世無障礙	身心如虛空
深入大悲海	直心如須彌	窮盡大智海
是爲人中雄	大慈覆一切	增廣諸度海
教化諸羣生	此是無上人	知法眞實相

三世佛家生	究竟諸法海	是爲智慧者
清淨妙法身	其心無障礙	己身滿十方
具足如來力	甚深智慧中	逮得自在力
專求一切智	究竟三昧海	嚴淨諸佛刹
教化一切眾	顯現自在力	是爲稱莊嚴
淨入最勝力	長養薩婆若	法界無障礙
此是真佛子		

佛子。菩薩摩訶薩具此十法。生如來家。爲世間燈。佛

子。我成就此無量境界自在法門。爾時善財白言。天神。此法門者境界云何。答言。佛子。我已具足一切菩薩受生大願。是故我來生此林中。本願力故。正念菩薩受生之法。於後百年菩薩從彼兜率陀天降神下生。時此林中有十種瑞相。何等爲十。一者此林忽然廣博。地平如掌。二者土石雜穢變爲金剛。眾妙莊嚴。三者寶娑羅樹周布行列。四者時此林中沈水末香出過諸天種種莊嚴。五者諸妙華鬘寶莊嚴具皆悉。

充滿。六者諸寶樹中自然流出種種妙寶。七者諸池水中出芙蓉華。八者時此林中娑婆世界欲色諸天龍夜叉乾闥婆阿脩羅迦樓羅緊那羅摩睺羅伽恭敬作禮。合掌而住。九者天女乃至摩睺羅伽女齎供養具。合掌恭敬於一面住。十者十方一切佛齋中放光明。名曰菩薩受生自在燈。普照此林。於彼一一諸光明中。現一切佛受生自在。出家自在。一切菩薩功德自在。又出如來微妙音聲。佛子。是爲林中十種瑞

相。此相現時。諸天王等。知必當有菩薩下生。我見此瑞。歡喜無量。佛子。摩耶夫人出迦毗羅城。入此園林。生太子時。自然而有十種光明。因此光故。一切眾生得法光明。何等爲十。所謂寶牙藏光。一切香光。鉢曇摩光。出微妙聲讚善生光。十方菩薩初發心光。一切菩薩得入諸地自在法光。一切菩薩諸波羅蜜大智。慧光。出生菩薩無量大智願光。方便化度眾生智光。普照一切法界諸佛受胎出生棄家學道成正覺光。

佛子。是爲十種光明。此光普照無量無邊諸眾生心。佛子。摩耶夫人於此林中。在畢利叉樹下坐時。現菩薩十種受生自在。何等爲十。爾時欲界一切天王天子。天女。色界諸天及龍夜叉。乾闥婆。阿脩羅。迦樓羅。緊那羅。摩睺羅伽。並其眷屬。皆悉雲集。爲欲供養彼菩薩故。爾時摩耶夫人放大功德妙色光明。普照一切。其餘光明悉蔽不現。猶如聚墨。除滅眾生一切煩惱。一切惡道苦。又於一切諸毛孔中。放大光明。普照

十方無所障礙。是爲菩薩第一受生自在。復次佛子。摩耶夫人腹內。悉能容受三千大千世界。又能顯現百億四天下。於彼百億閻浮提中。王都京邑所住園林。名字各異。摩耶夫人徧坐彼處。諸天圍繞。悉爲顯現。不可思議智慧自在。是爲菩薩第二受生自在。復次佛子。摩耶夫人一一毛孔中。顯現如來於過去世。爲菩薩時。恭敬尊重。供養諸佛。彼諸如來所說正法。於毛孔中。皆悉得聞。譬如明鏡淨池水中。見日月像。

摩耶夫人諸毛孔中顯現如來於過去世爲菩薩時
恭敬尊重供養諸佛。彼諸如來所說正法皆悉得聞。
亦復如是。是爲菩薩第三受生自在。復次佛子。摩耶
夫人一一毛孔中顯現如來於過去世諸世界中城
邑聚落山林河池。一切諸處行菩薩行。隨彼諸劫所
值諸佛清淨善根壽命名號及善知識。如是等事皆
悉顯現。菩薩於彼諸受生時。摩耶夫人常爲其母。是
爲菩薩第四受生自在。復次佛子。摩耶夫人一一毛

孔中顯現如來於過去世爲菩薩時。其身色相行業威儀所受苦樂。是爲菩薩第五受生自在復次佛子。摩耶夫人一一毛孔中顯現如來於過去世爲菩薩時所行布施身體手足眼耳鼻舌骨齒髓腦心血皮肉妻子眷屬城邑聚落宮殿寶物一切內外並諸受者。皆悉顯現。又聞求者所言音聲。是爲菩薩第六受生自在復次佛子。摩耶夫人身中普出過去諸佛本爲菩薩最後生時莊嚴佛刹。眾生樹林華鬘諸香塗

香末香摩尼寶王娛樂讚歎如是等事充滿此林皆
悉聞見是爲菩薩第七受生自在復次佛子摩耶夫
人身中又出諸天宮殿龍夜叉乾闥婆阿脩羅迦樓
羅緊那羅摩睺羅伽及人宮殿眾寶莊嚴妙香普熏
無能壞者出過諸天爲欲供養彼菩薩故充滿此林
是爲菩薩第八受生自在復次佛子摩耶夫人身中
又出十不可說億那由他世界微塵等菩薩其身色
像相好莊嚴光明自在及其眷屬皆悉同彼盧舍那

佛。是諸大士從彼出已讚歎菩薩。是爲菩薩第九受
生自在。復次佛子。菩薩生時於摩耶夫人前地金剛
輪中生大蓮華。金剛爲莖。有十世界微塵等寶葉。摩
尼寶王以爲其臺。眾寶香鬘以阿僧祇寶網羅覆其
上。一切天王所共執持。一切乾闥婆王普雨香雲。讚
歎過去諸佛功德。一切夜叉王圍繞守護。自然出生
眾妙寶華娛樂音聲。一切阿脩羅王皆悉降伏。頭面
敬禮。一切迦樓羅王以寶繒旛莊嚴虛空。一切緊那

羅王歡喜諦觀心無厭足讚歎歌頌菩薩功德一切
摩睺羅伽王歡喜踊躍普雨種種莊嚴雲是爲菩薩
第十受生自在佛子摩耶夫人生菩薩時如虛空中
現明淨日如雷電光如山起雲如闇中燈菩薩爾時
雖現出生而悉解達一切諸法如電夢幻不來不去
不生不滅佛子我一念中悉知菩薩此閻浮提受生
自在出生自在亦知百億閻浮提受生自在出生自
在亦知三千大千世界微塵等佛刹十佛世界微塵

等佛刹乃至悉知一切世界微塵等佛刹菩薩受生自在出生自在亦復如是爾時善財白圓滿妙德林天言天神得此菩薩受生自在法門其已久如答言佛子乃往古世過億佛刹微塵等劫有劫名可悅樂彼有世界名一切寶彼劫世界中有八十那由他佛出興於世其最初佛號不可壞自在幢王彼世界中一閻浮提有一王都名莊嚴幢王名寶燄眼光第一夫人名善喜光如此世界摩耶夫人爲盧舍那佛母

彼世界中善喜光夫人爲最初如來母亦復如是善喜光夫人生菩薩時與二百萬那由他諸姝女眾詣金色園林攀寶樹枝生彼如來時有乳母名離垢光諸天王等以雜香湯洗浴太子抱授乳母乳母敬受歡喜無量卽得菩薩普眼境界三昧得三昧已見十方佛無所障礙復得菩薩受生自在法門佛子譬如初受胎識速疾無礙得此法門知一切佛受生自在亦復如是佛子於意云何彼乳母者豈異人乎我身

是也。我從是來。念念常見菩薩受生自在法海。盧舍那佛教化眾生自在神力。佛子。我念念中悉得三千大千世界微塵等淨智慧眼常見一切世界微塵等刹。及彼諸佛。知彼如來自在受生。又復了知盧舍那佛初發大願。乃至悉知十方諸佛初發大願。亦復如是。亦恭敬供養彼諸如來。彼佛說法。我悉得聞受持修行。時彼林天承佛神力觀察十方。欲重明此一切境界菩薩受生自在法門義故。以偈頌曰。

佛子汝所問 最勝寂滅境 一心善諦聽
我今說因緣 過億刹塵劫 劫名可悅樂
八十那由他 如來出興世 最初如來名
無壞自在幢 我時見彼佛 金色林中生
乳母離垢光 今則我身是 太子金色身
天王抱授我 敬受無上人 觀察不見頂
圓體難思議 視之無厭足 離垢清淨身
相好自莊嚴 我見妙寶像 歡喜心無量

思惟難思議	長養功德海	見彼自在力
我發菩提心	專求佛功德	具足諸願海
嚴淨諸世界	遠離三惡道	於諸世界中
供養一切佛	專求大願海	除滅眾生苦
聞彼初佛法	成就此法門	我於億刹塵
一切諸劫中	修習菩薩行	嚴淨此法門
彼劫中諸佛	我已悉供養	守護其正法
淨修法門海	億刹塵等劫	諸佛出興世

持彼正法輪 修難議法門 一念悉了知
一切刹微塵 一一微塵中 見無量刹海
彼佛初生時 顯現自在力 我於一念中
皆悉分別見 不可思議刹 見彼諸菩薩
或處兜率天 專求佛菩提 無量刹海中
見彼生自在 無量眾圍繞 而爲其說法
一念中悉見 無量諸刹海 一切諸菩薩
出家詣道場 不可思議刹 得成最正覺

顯現諸方便	除滅眾生苦	一一微塵中
轉無盡法輪	無盡妙音海	普雨甘露法
念念中悉見	一一微塵中	億刹塵等佛
示現般涅槃	見無量刹海	如來初受生
一一諸佛所	無量身供養	不思議刹海
無量諸羣生	我以諸方便	爲說甘露法
佛子我知此	不思議法門	無量諸劫數
稱讚不可盡		

佛子。我唯知此。菩薩受生自在法門。諸大菩薩能以諸劫爲一念藏。顯現一切諸妙方便。供養諸佛。滿足大願。覺了一切諸佛正法。示現一切諸趣受生。生諸佛所。教化眾生。未曾失時。爲眾生現受生自在。於諸佛刹。現自在雲。常生一切諸如來家。我當云何能知能說彼諸功德。佛子。迦毗羅城有釋迦女。名曰瞿夷。汝詣彼問。云何菩薩遊生死中。教化眾生。時善財童子。頭面接禮。彼林天足。繞畢辭退。向於彼城。正念思

惟增廣明淨菩薩受生自在法門。漸漸遊行。至菩薩會莊嚴講堂。離憂妙德天所。爾時彼天一萬諸天。以爲眷屬。來迎善財。白言。善來。大智慧人。修不思議菩薩法門。以淨直心。滿足大願。廣菩薩行。向正法城。究竟菩薩無量方便。我觀仁者勇猛精進。修菩薩道。心無懈倦。威儀庠序。諸根調伏。不久必當逮得無上清淨莊嚴佛身口意相好嚴身。十力智慧莊嚴其心。遊行十方教化眾生。我觀仁者修行勇猛精進力故。必

當得見三世諸佛。受諸如來一切法雲。修習菩薩禪定法門寂滅之法。入於甚深如來法門。何以故。詣善知識親近供養。正念思惟善知識教。無有退轉疲倦之心。除滅障礙降伏諸魔。無能壞者。令一切眾生得歡喜故。善財答言。如天所說。我願如是。欲令一切眾生歡喜。除滅煩惱諸不善法。具足善法。得安隱樂。一切眾生。以眾惡業煩惱結故。入三惡道。受無量苦。菩薩見已。起憂悲心。譬如有人。唯有一子。愛念情重。忽

有人來割截其身肢節手足。慈父見之。悼惻悲念。菩薩若見眾生造惡業緣煩惱結故。入三惡道受無量苦。見如是已。痛心悲念。亦復如是。菩薩若見眾生具身口意諸善業故。生天人中受身心樂。見如是已。歡樂無量。何以故。菩薩摩訶薩不自爲故。求薩婆若。不貪生死五欲快樂。不隨心想諸見顛倒結。使纏縛貪愛邪見。不著眾生種種樂想。不著禪味。不爲結礙。流轉生死。菩薩但見諸有海中一切眾生受無量苦。發

大悲願而攝取之。常以大悲大願力故。行菩薩行。供養諸佛。求薩婆若。欲令眾生遠離煩惱。淨佛世界。調伏一切惡心眾生。悉令具足清淨身心。行菩薩行。而無疲倦。若有菩薩如是行者。悉能莊嚴一切眾生。出生長養。天人樂故。爲父母。皆令安立。菩提心故。爲養育。皆令究竟。菩薩道故。爲衛護。皆令遠離三惡道故。爲大船師。皆令得度。生死海故。爲歸依。令捨諸魔煩惱怖故。爲導師。皆令逮得清涼處故。爲知津濟。皆令

得度佛刹海故。爲主藏臣皆令得入法寶洲故。爲淨妙華令開一切佛功德華故。爲大光明普放功德智慧光故。爲歡喜皆令端嚴勝殊妙故。爲所尊遠離一切諸惡業故。爲普賢具足一切諸功德故。爲燈明常放智慧淨妙光故。爲慶雲常雨一切甘露法故。天神菩薩摩訶薩如是行者。一切眾生悉皆愛念樂正法故。爾時善財將升法堂。彼離憂妙德天與百萬眷屬各各齋持妙香華鬘及諸雜寶。散善財上。以偈頌曰。

無量無數劫 世燈或出世 普爲眾生故
正求佛菩提 無量億諸劫 難見難值遇
功德日今出 照除世間闇 見諸眾生類
愚惑癡所覆 廣發大悲心 專求無師道
清淨正直心 不惜身壽命 親近善知識
專求佛菩提 一切無所依 不著於世間
離垢清淨心 無礙如虛空 行諸菩薩行
具滿妙功德 放大智慧光 普照一切世

不離於世間 亦不著世間 行世無障礙
如風遊虛空 譬如火災起 一切無能滅
勇猛精進火 求道亦如是 勇猛大精進
一切莫能壞 金剛慧師子 遊行無所畏
一切法海中 一切諸佛海 親近善知識
速見彼諸佛


大方廣佛華嚴經卷第五十六

誦補闕真言

南無三滿哆。沒馱喃。阿鉢囉帝。喝多折。折捺彌。唵。雞
 彌雞彌。怛塔葛塔喃。末瓦山。斫鉢囉帝。烏怛摩怛摩。
 怛塔葛塔喃。末瓦吽。發莎訶。舉字母讚
 華嚴字母。眾藝親宣。善財童子得真傳。秘密義幽玄。
 功德無邊。唱誦利人天。

室香 ○室室東東室室室室瑟室瑟室室室
 左香 ○臧增宗租遭災賁津錢浸簪噉左

陀 ●唐滕彤圖韜駘醍田驪 ○曇骰陀
 侘 ○葛儉躡攄超攄絺獅脰琛覘抽侘




時普願法界眾生入般若波羅蜜門

四十二字妙陀羅字字包含義理多。

婆功德大法界沐恩波。

四生九有同登華藏玄門。入難三塗。其入毘盧性海。

南無華嚴海會佛菩薩三稱



梵韻滿娑

大方廣佛華嚴經卷第五十七

東晉天竺三藏佛陀跋陀羅等譯

入法界品第三十四之十三

爾時離憂妙德天偈讚歎已恭敬法故俱升法堂升法堂已周徧推求彼釋迦女卽見坐於寶蓮華藏師子之座八萬四千眾女圍繞皆是貴族王者之女悉於過去彼菩薩所修行諸行同彼菩薩一切善根常以布施愛語攝取眾生求薩婆若利益一切令諸眾

生同佛菩提。大悲爲首。普念衆生。如一子想。修習大
慈。普覆一切。過去已曾於菩薩所。修不思議勝妙智
慧。於阿耨多羅三藐三菩提。得不退轉。具足成滿諸
波羅蜜。心無所著。直心智慧。皆悉清淨。求薩婆若。離
障蓋網。超出諸難。得淨法身。行普賢行。長養菩薩一
切諸力。成就圓滿淨智慧日。爾時善財五體投地。敬
禮瞿夷。禮已合掌。於一面住。白言。大聖。我已先發阿
耨多羅三藐三菩提心。而未知菩薩云何行生死中

而無所染覺了一切諸法實相超出聲聞緣覺之地。住如來地而不捨離菩薩所行修菩薩行不離佛地。超出世間法身圓滿應世受生普現種種諸方便身。知法無性示現一切眾生之身解甚深法以妙音聲而爲說法知眾生空而能不捨化諸世間知一切佛不生不滅而能供養心無退轉知無業報而行善業無有休息爾時瞿夷作如是言善哉善哉善男子能問諸菩薩摩訶薩所行之法修習普賢諸行願者能

如是問。諦聽。諦聽。善思念之。我當承佛神力。爲汝解說。善男子。若有菩薩成就十法。則能滿足。因陀羅網。普智光明菩薩之行。何等爲十。所謂依善知識。廣發無量諸弘誓願。修淨勝妙。正真希望。集一切智功德。聞佛出世。歡喜無量。心常樂住。三世佛所。隨順一切。諸大菩薩。悉爲一切佛所護持。清淨大悲。遠離生死。是爲十法。若有菩薩成就此法。則能滿足。因陀羅網。普智光明菩薩之行。佛子。若諸菩薩勇猛精進。心無

退轉。出生修習佛無盡法。值善知識。故佛子。菩薩有十法。值善知識。何等爲十。所謂不惜身命。不求世樂。知諸法相。而不捨離一切智願。觀察法界。離三有海。無所依住。深入一切菩薩諸願。普照一切諸佛世界。淨修菩薩圓滿智慧。是爲十法。值善知識。爾時瞿夷承佛神力。觀察十方。欲重明此義。以偈頌曰。

無諂於知識 智慧廣無量 專求佛菩提
利益諸眾生 恭敬善知識 其心如佛想

勇猛精進力	具因陀網行	解脫心增廣
其量均虛空	攝取於三世	佛刹及眾生
直心如虛空	遠離煩惱垢	出生佛功德
是爲身雲行	不思議智慧	積集功德海
清淨福業藏	不染於世間	一切諸佛所
聞法無厭足	智慧燈普照	是爲照世行
一念皆能詣	十方刹海佛	聞法分別知
是爲隨順行	見佛眷屬海	究竟三昧海

滿足諸大願 是因陀網行 未來劫修行
諸佛所護念 普照諸世界 是爲法光行
大悲見眾生 智日出世間 法光除癡闇
是爲智日行 見諸趣眾生 回流生死中
爲轉淨法輪 是爲普賢行 智慧身無量
隨應而示現 普於一切趣 度脫諸羣生
發起大慈悲 普覆於一切 徧照諸羣生
令得佛菩提

善男子。我已成就分別觀察一切菩薩三昧海法門。善財白言。大聖。此法門者境界云何。答言。善男子。我入是法門。知此娑婆世界眾生佛刹微塵等劫中。死此生彼。作善惡業。受諸果報。在生死道。出生死者。正定邪定及不定聚。有使善根。無使善根。具足善根。不具足善根。不善根。善根。攝不善根。不善根。攝善根。善根所起。不善根所起。一切善惡皆悉了知。彼諸劫中。佛興于世。我悉了知。知彼諸佛初發道心。行菩

薩行。出生一切諸大願海。知彼供養一切諸佛。具菩薩行。成等正覺。轉正法輪。現自在力。化度眾生。知彼眷屬聲聞緣覺之所修行。過去修習一切善根。得明淨智。成就寂滅自在法門。顯現種種自在神力。教化眾生而般涅槃。知彼眷屬諸菩薩眾。初發道心。修習善根。出生種種諸大願行。成就滿足諸波羅蜜。種種莊嚴菩薩之道。菩薩諸地自在之力。菩薩諸地住分。別修習諸菩薩地。淨菩薩地。修菩薩地。菩薩諸地相。

菩薩諸地智。菩薩諸攝智。菩薩善巧方便教化眾生。
菩薩諸住。菩薩圓滿淨行。菩薩自在行。菩薩三昧海。
菩薩方便。於念念中。悉知菩薩諸三昧海。一切種智。
電光法雲。得諸法忍。盡一切智底。知彼菩薩諸佛刹。
海。究竟法海。知眾生海。修習一切菩薩法門。滿足大。
願。顯現種種自在神力。如是等事。我悉了知。如此娑。
婆世界。知十方世界。世界性。世界海。世界輪。世界圓。
滿。世界分別。世界旋。世界轉。世界蓮華。世界須彌世。

界相中事亦復如是。盧舍那佛本願力故。我悉深入
分別念知。何以故此法門者。悉知一切眾生心海。知
一切眾生積集善根。知一切眾生有垢有淨。知一切
眾生性。知一切聲聞三昧自在法門。知一切緣覺菩
薩諸佛三昧自在法門。如是等事悉分別知。善財白
言。大聖發阿耨多羅三藐三菩提心來。其已久如。答
言。佛子。乃往古世過世界微塵等劫。有劫名勝光明
時。有世界名離恐怖。彼世界中有四天下。彼閻浮提

中有一王都名妙德樹須彌山。於八十王都最爲殊勝。彼有王名一切寶主。有六萬姝女。五百大臣。五百王子。端正勇健。摧伏怨敵。其王太子名增上功德主。顏貌殊勝。相好嚴身。與萬姝女俱持妙幢。散諸寶華。作諸妓樂。乘妙寶車。詣香牙山。遊戲園林。時彼道路坦然平正。種種莊嚴。散眾妙華。寶樹行列。眾妙寶帳。以覆其上。於彼路側。積眾寶聚。雜種種衣。諸莊嚴具。肴膳飲食。如是等事。隨其所須。皆給施之。時有母人。

名曰善現。將一童女名曰離垢。妙德端嚴。姝妙修短得所。顏容無倫。目髮紺色。脣齒丹素。口出梵音。才能巧妙。言論聰辯。修習慈心。見者無厭。少貪恚癡。常懷慚愧。心無詔曲。乘妙寶車。姝女圍繞。從母遊觀。先太子前。至香牙園。太子見已。生染愛心。語其母言。欲娉賢女。以爲我妻。母語女言。太子今欲求汝爲妃。於意云何。女白母言。若欲使我爲彼妃者。當自殞滅。母報女曰。勿作此言。所以者何。今此太子。悉已具足轉輪。

王相必爲聖主。有玉女寶。汝當爾時不堪給使。此處尊勝。莫生難心。時彼園外有一道場。名法雲光。有勝日光如來。應供等正覺。出興於世。於彼道場成無上道。時女夢見彼如來身。於夢覺已。空中有天而告之曰。汝夢所見是勝日光佛。成道已來。始經七日。今在道場。無量菩薩大眾圍繞。彼佛眾會一切天龍八部鬼神。乃至無量淨居諸天地神風神海神火神山神樹神叢林藥草城郭等神。皆悉雲集奉覲。世尊聽受。

正法時彼女人聞是語已詣太子所合掌而立以偈
白言。

我色世間最	智慧無倫匹	才妙善言論
觀者無厭足	太子應當知	我心善貞潔
志尙心端直	清淨無所染	遠離於瞋恚
貪欲及愚癡	以真淨直心	饒益諸羣生
我見太子身	相好自莊嚴	見已喜無量
諸根悉調伏	妙體猶淨金	髮美紺青色

額廣目明徹	必爲自在王	其身踰金山
相好自嚴飾	我今太子所	合掌恭敬住
其目淨修廣	方臆如師子	觀者無厭足
妙音應納我	舌相廣長妙	猶如赤銅色
演出梵音聲	聞者踴躍喜	口方牙深固
齒白而齊密	若有覩見者	一切皆歡喜
離垢清淨身	具相三十二	成就此妙相
必爲轉輪王		

爾時太子語彼女言。汝是誰女。爲誰守護。若先屬他。我則不宜起染愛心。爾時太子說偈問曰。

清淨功德身	見者無厭足	誰爲汝父母
爲誰所守護	若先有所屬	我不起欲想
非分生姪心	命終墮惡道	不應爲豪貴
種種富樂故	發起如是等	放逸貪亂心
種種生邪見	幻誑諸詔曲	如是造諸惡
流轉於世間	父母知識所	應起恭敬心

慈悲廣覆護	一切諸羣萌	若於一切處
所從聞法者	能生諸善故	應起恭敬心
一切諸導師	正法菩薩眾	聖僧功德海
皆悉應恭敬	修習諸功德	遠離一切惡
安住於正法	廣行菩薩道	若無歸依者
應起大慈心	諸在三惡道	應發大悲念
一切諸法界	有成必有敗	捨心平等觀
莫隨煩惱魔	應發菩提心	覺悟諸羣生

無量劫修行 不起疲倦想

時彼女母說偈白言

唯願太子聽 此女從生來 乃至今長成

一切諸因緣 太子所生日 女從蓮華生

其目淨修廣 肢節悉具足 我曾於春月

遊觀娑羅園 覩見諸卉木 種種華榮茂

同遊八百女 容儀悉端嚴 皆已具足知

諸巧技能法 彼園有浴池 名曰眾莊嚴

我於池岸坐	姝女眾圍繞	時彼浴池中
千葉蓮華生	寶葉瑠璃莖	閻浮檀金臺
眾妙寶香鬚	普放淨光明	徧照閻浮提
猶若日初出	時見此玉女	從彼蓮華生
觀者皆念言	此則善業報	目髮紺青色
其身如紫金	眾寶以莊嚴	觀者心無厭
離垢淨無穢	肢節悉具足	猶如真金像
安處寶蓮華	毛孔旃檀香	普熏於一切

口出蓮華香	演妙梵音聲	此是玉女寶
世間所希有	身相悉具足	種種妙莊嚴
一切諸技術	世間言論法	究竟悉縷練
願爲哀納受	此是玉女寶	身分悉圓滿
功德具莊嚴	宿行之所得	善知眾生病
起患之所由	又知對治法	除滅眾疑惑
一切閻浮提	眾生語言法	種種妓樂音
無不善通達	此女修功德	遠離女人法

能轉眾生心	唯願哀納受	捨離嫉妬心
不醉於五欲	不起瞋恚心	修習忍智慧
精進持淨戒	能辦一切事	專求諸功德
太子願納受	若見諸貧窮	老病眾苦逼
無所歸依者	大悲普慈念	常欲利眾生
不求自安樂	功德莊嚴身	饒益於一切
於諸威儀中	常修不放逸	修習諸善法
見者無不悅	功德普莊嚴	遠離染汙心

當求善知識 恭敬樂供養 修習大慈法

棄捨怨結心 智慧無與等 唯願哀納受

爾時太子答言。善女。我已先發阿耨多羅三藐三菩提心。欲無量劫行菩薩行。積習一切功德智慧。淨修一切諸波羅蜜。恭敬供養一切諸佛。護持正法。嚴淨一切諸佛世界。令如來種相續不斷。教化眾生。滅生死苦。住究竟樂。欲令眾生淨智慧眼。住菩薩道。修菩薩行。具足一切菩薩諸地。令一切眾生心大歡喜。我

當盡未來劫行檀波羅蜜悉捨一切國城妻子肢節
手足頭目髓腦。或在家布施出家修道。汝於爾時莫
作障礙壞我道心。爾時太子重爲彼女而說偈言。

哀愍眾生故 我發菩提心 無量無數劫

積集智功德 無量劫海中 修習諸大願

廣修菩薩行 具足一切地 三世諸佛所

學六波羅蜜 聞法能修行 專求菩薩道

十方垢濁刹 我悉令嚴淨 除滅諸羣生

三惡道苦患 以諸方便力 廣度一切眾
除滅愚癡闇 住一切智道 供養諸佛海
淨修一切地 發起大慈悲 內外一切捨
若我施來求 妻子諸眷屬 在家及出家
汝莫作障礙 若能如是者 我則納受汝
時女答言敬從來教乃至出家不敢有礙卽說偈言
一切劫海中 地獄火燒身 若能眷納我
甘心受此苦 一切生死身 碎末如微塵

若能眷納我	甘心受此苦	無量劫頂戴
一切金剛山	若能眷納我	甘心受此苦
一切生死海	以我施無悔	若得法王處
願令我亦然	無量無數劫	修行菩薩道
有來求我者	歡喜願施與	太子見眾苦
發起菩提心	無量大慈悲	攝眾生及我
我不求豪富	不貪五欲樂	但願共行法
而爲太子妻	修廣明淨眼	慈愍觀眾生

不起染汙心 必成菩提道 太子遊行時
地出眾寶華 此相無有疑 必爲轉輪王
我昔於夢見 正覺勝日光 菩提樹下坐
大眾悉圍繞 夢中見彼佛 以手摩我頂
覺已大歡喜 踊躍無有量 空中時有天
名曰清淨身 彼天爲我說 道場佛興世
我發如是願 若見太子者 當爲分別說
勝日光佛興 我昔所志願 於今悉成滿

唯願俱往詣 供養彼如來

爾時太子聞彼如來出興於世。心大歡喜。踊躍無量。欲見彼佛。以五百寶。散彼女人。又與妙德。光藏。淨周羅寶。並妙衣服。時彼女母。卽爲太子而說偈言。

今此玉女寶 功德莊嚴身 我昔所志樂

此願今成滿 持戒不放逸 智慧諸功德

普於一切世 最勝無倫匹 此女蓮華生

種姓無譏嫌 遠離諸不善 太子同志願

此女身柔軟 猶如天繒纈 蒙彼手摩者
眾患悉除滅 毛孔所出香 芬馨無倫比
眾生若聞者 悉住於淨戒 其身淨無垢
譬如真金像 若有覩見者 離害具慈心
口出微妙聲 無不樂聞者 若有聽斯音
遠離諸惡業 心淨無瑕穢 質直無諂曲
隨其所聞法 如說能修行 恭敬善知識
及所尊重者 遠離貪欲心 專求於正法

此女心不恃 妙色蓮華生 世間諸榮樂
唯求無上道

時彼太子與此女俱並一萬姝女出香牙園各乘寶
車往詣道場下車步進遙見如來相好嚴身其心澄
淨如鏡淵淳諸根調伏猶如象王心大歡喜踊躍無
量與姝女眾往詣佛所頭面禮足恭敬供養繞無數
而各持五百眾妙寶華供養彼佛爲彼如來興立五
百眾香樓閣雜寶嚴飾時彼如來爲說普門燈明脩

多羅聞說經已於一切法中得三昧海。所謂諸佛願海三昧。普照三世光藏三昧。對見一切諸佛三昧。普照一切眾生三昧。普照世界海淨智燈光光明三昧。普照眾生根海智光明三昧。救護眾生光雲三昧。教化眾生現前智燈明三昧。聞持諸佛法輪三昧。具普賢行淨雲三昧。於一切法中得如是等諸三昧海。時彼玉女於諸法中得不可壞寂靜法門。於阿耨多羅三藐三菩提得不退轉。時彼太子與諸眷屬禮彼如來。

繞無量帀。辭退還宮。詣父王所。頭面敬禮。白言。大王。彼道場上。勝日光佛。始成正覺。王問太子。從誰聞乎。答言。從彼離垢妙德女聞。時王聞已。歡喜無量。猶如貧人得大寶藏。作如是念。佛無上寶。難值難遇。能滅眾生惡道。貧苦爲無上醫。善對治法。除滅眾生諸煩惱。患爲善導師。於生死海。濟度眾生。置涅槃處。作是念。已。召諸小王及諸羣臣。並婆羅門刹利居士。皆悉集會而告之。曰。我聞太子無上吉語。云勝日光佛出。

興於世。我聞是已。歡喜無量。無以酬報。今捨王位。授與太子。王捨位已。與諸眷屬。往詣道場。勝日光佛所。頭面禮足。退坐一面。爾時如來觀察彼王及諸眷屬。白毫相中。放大光明。名曰一切眾生心燈。普照十方。無量世界。一切諸王。顯現如來不可思議自在神力。應受化者。令彼心淨。具足不可思議功德。超出世間。其身清淨。以微妙音。爲大眾說離癡翳法。真實燈陀羅尼門。佛刹微塵等陀羅尼。以爲眷屬。彼王聞已。卽

得廣大智慧光明。閻浮提微塵等菩薩得此陀羅尼。六十那由他人得諸漏盡。一萬眾生皆得離垢清淨。法眼無量。眾生悉發阿耨多羅三藐三菩提心。又以不可思議自在神力。於十方刹。以三乘法化度眾生。爾時彼王作如是念。此諸功德。若不出家。則不能辦。我今應當於如來所出家修道。前白佛言。今從世尊出家學道。佛答王言。宜知是時。時王卽與一萬眷屬出家修道。皆得離癡翳法。真實燈陀羅尼。門及世界。

微塵等陀羅尼。又得菩薩十明及無量辯淨無礙身。詣諸佛所。悉聞受持佛正法輪。爲大法師。以神通力徧諸世界。隨所應化。爲彼現身讚歎佛法。並諸過去菩薩所行菩薩本生。又讚歎佛無量無邊自在神力。守護正法。爾時太子月十五日。王得道時。於其正殿。姝女圍繞。七寶自至。一金輪寶。名勝自在。二象寶。名曰青山。三紺馬寶。名勇疾風。四神珠寶。名光藏雲。五主藏臣寶。名曰大財。六玉女寶。名淨妙德。七主兵臣。

寶名離垢眼。得是七寶。於閻浮提作轉輪王時。有千子。端正勇猛。能伏怨敵。時彼人民熾盛。豐樂自在。八萬王城。城各建立五百樓閣。大僧伽藍。眾寶莊嚴。一僧伽藍起廣大塔。一切眾寶。以爲莊嚴。香華繒蓋。而供養之。一一王城。次第請佛。以不思議眾妙供具。供養如來。時佛入城。無量眾生皆大歡喜。長養善根。發菩提心。以廣大悲。饒益眾生。正求佛法。知真實義。平等觀察三世諸法。明淨智慧。普照三世。知三世佛。

次第出世。攝取眾生。向菩薩道。行菩薩行。安住菩薩平等正法。逮得如來法輪智光。深入法海。能於已身見一切刹。善知諸根。弘誓願海。得一切智。爾時如來次第受彼諸王請時。如是饒益無量眾生佛子。爾時太子增上功德主。豈異人乎。今釋迦牟尼佛是也。爾時王寶主寶華佛是也。寶華如來。今在東方過世界海微塵等世界海。有一世界海名法界虛空光雲。中有世界名佛圓滿光妙德燈。彼有道場名曰一切天。

王光幢。彼佛始成正覺。與不可說佛刹微塵等菩薩
大眾圍繞說法。彼寶華佛爲菩薩時。淨彼刹海。彼刹
海中三世諸佛出興世者。皆寶華佛爲菩薩時教化
令發阿耨多羅三藐三菩提心。爾時女母善現者。今
我母善目是也。王眷屬者。彼如來所大眾是也。皆悉
具足普賢諸行。成就大願清淨法身。普照世間。其心
無壞。逮得菩薩諸三昧門。以清淨眼。皆悉對見一切
諸佛。一切如來。以虛空等妙音聲雲。轉正法輪。悉聞

受持於諸法中。得自在力。出入息頃。徧遊一切諸佛
世界。以微妙音。爲眾生成說法。而未曾離一切佛所。盡
未來劫。修菩薩行。隨所應化。悉爲現身。爾時離垢妙
德寶女。其增上功德。主轉輪王四事。供養勝日光佛。
者。我身是也。彼佛滅後。其世界中有六十百千億那
由他佛。出興於世。其最初佛號明淨身。次名淨月普
照智。次名智觀幢。次名廣智光明王。次名精進金剛
那羅延。次名不壞智。次名智普緣。次名淨德智雲。次

名師子智光。次名周羅光明。次名功德光幢。次名智
日幢。次名開寶蓮華身。次名功德光。次名智光雲。次
名普明淨月。次名莊嚴蓋妙音。次名師子勇猛智照
次名法界慧月。次名覺眾生心虛空電光。次名善鼻
妙香。次名寂滅響。次名甘露山。次名法海雷音。次名
無壞智音。次名覺空電光周羅。次名月光白毫相雲。
次名圓面淨慧。次名善覺智華光。次名寶燄山妙德
王。次名廣德夜光。次名妙寶月幢。次名具三昧身。次

名勝寶光王。次名現普智光。次名燄海門燈。次名離垢妙音王。次名無等功德。次名勝幢。次名修臂。次名本願淨月。次名真實智燈。次名法上妙音。次名明淨妙德藏王。次名乘幢。次名法海蓮華。佛子。彼一劫中如是次第六十百千億那由他佛出興於世。我悉親近恭敬供養。其最後佛名廣解脫光。於彼佛所得淨智眼。佛子。爾時彼佛初成正覺。入城教化。我時爲王夫人。與彼大王恭敬供養。聞彼佛說如來性起燈脩。

多羅聞已得淨智眼。又得觀察菩薩三昧海法門。佛子。我得此法門已。於世界微塵等劫受持修習。是諸劫中。值無量佛出興於世。我悉恭敬供養。佛子。我或一劫。值一如來出興於世。恭敬供養。或二。或三。或不可說。或於一劫。值世界微塵等佛出興於世。我悉恭敬供養。而未能知諸大菩薩身量像貌及其身業。心行智慧三昧境界。佛子。我若見修菩薩行者。歡喜無量。恭敬供養。以諸方便而攝取之。令於阿耨多羅三

藐三菩提得不退轉。佛子。我於世界微塵等劫。值遇諸佛恭敬供養。彼佛說法。悉聞受持。時彼諸佛各以種種脩多羅爲我說此法門。我聞是已。悉於三世佛刹海中。諸如來所。佛眷屬所。修此法門。又行菩薩行。菩薩大願海。種種法門中。修此法門。猶未能知。普賢菩薩所行法門。何以故。佛子。普賢法門。猶如虛空無量無邊。又如眾生及三世海。十方刹海及諸法界。無量無邊。佛子。普賢菩薩法門。與諸佛身境界齊等。我

於世界微塵等劫觀菩薩身心無厭足。何以故。我於菩薩一一毛孔中。念念悉見無量無邊莊嚴世界。佛坐道場。成正覺。於大眾中以微妙音轉正法輪。說種種脩多羅種種諸乘種種清淨。復次佛子。我於菩薩一一毛孔中。念念悉見諸眾生海。各有所住。及其境界。諸根不同。於三世中發菩提心。行菩薩行。具大願海。淨諸菩薩無量無邊波羅蜜海。及諸菩薩本生之海。無量無邊大慈悲海。攝取眾生。悉令歡喜。乃至

悉見一切菩薩現處中宮。姝女圍繞佛子。我於菩薩
一一毛孔中皆悉覩見如是等事。佛子。我唯知此法
門。諸大菩薩皆悉究竟諸方便海。顯現一切眾生等
身。隨順世間於一切毛孔普放一切相海光明。了法
無性。諸眾生類等如虛空。一切至處皆悉如如。顯現
神變於諸法界得自在力。遊戲普門一切諸地法門
海中。我當云何能知能說彼功德行。爾時瞿夷語善
財言善男子。此迦毗羅城摩耶夫人。汝詣彼問云何

菩薩修習諸行。不染世法。供養諸佛。於菩薩行。得不退轉。除滅障礙。不由他悟。入諸法門。常能應現。一切佛所。攝取眾生。盡未來劫。修菩薩行。而不退轉。究竟滿足。大乘諸願。長養一切眾生善根。爾時瞿夷承佛神力。欲重明此義。以偈頌曰。

我見樂修行 菩薩諸行者 歡喜心無量
皆悉攝取之 乃昔久遠世 過百刹塵劫
有劫名清淨 世界名光明 爾時彼劫中

六十百千億 那由他諸佛 出興於世間
最後等正覺 號名法幢燈 彼佛滅度後
有王名智山 以大自在力 王領閻浮提
悉能廣降伏 一切諸怨敵 王子有五百
端正身姝妙 其體淨圓滿 見者無厭足
深信諸佛法 恭敬而供養 守護正法藏
受持樂修習 彼王有太子 名曰善光明
三十相嚴身 饒益諸羣生 五百億人俱

出家行學道	勇猛精進力	護持彼佛法
王都名智樹	一億城圍繞	有林名靜德
眾寶樹莊嚴	善光住此林	廣說佛正法
辯才無窮盡	令眾悉清淨	或爲乞食故
入彼王都城	庠序有威儀	見者莫不欣
遊步如師子	志意常安諦	諸根悉調伏
念慧現在前	爾時有長者	名曰歡喜幢
我爲長者女	名曰隨順光	時我於城中

遇見善光明 相好莊嚴身 歡喜心無量
次乞至我門 我以染心施 摩尼莊嚴具
投彼善光鉢 雖以染愛心 供養彼佛子
二百五十劫 不經三惡道 常於天人中
尊貴王家生 恆見善光明 妙相莊嚴身
於後所過劫 二百有五十 善現女家生
名離垢妙德 我見勝自在 發起供養心
不惜身壽命 隨其所施與 時與太子俱

覲佛勝日光	歡喜心無量	發起菩提心
彼劫最後佛	名廣解脫光	出與於世間
我值悉供養	從彼最後佛	得淨智慧眼
了知諸法相	除滅虛妄倒	得觀察菩薩
三昧海法門	一念悉覩見	不可思議刹
見彼諸佛刹	或淨或垢穢	於淨不貪樂
於穢不憎惡	普見諸世界	如來坐道場
一念見諸佛	不思議光海	亦見佛眷屬

諸佛出興世	眾生身差別	種種所依住	阿僧祇劫刹	無量劫修行	一念悉了知	又知彼業行	一切三摩提
說法度眾生	又見世界海	世界形類相	風輪水火輪	一切莫能測	我於菩薩身	隨其所住地	一切諸法門
我於無量劫	一切諸世界	諸妙莊嚴具	一切大地輪	一一毛孔見	見諸菩薩等	及諸大願海	皆悉無障礙

修習菩薩行 猶未知菩薩 身業心智慧

時善財童子頭面敬禮彼瞿夷足繞畢辭退爾時善財童子作如是念我當云何見善知識善知識者遠離世間住無所住不著諸入超出障礙趣無礙道具淨法身善業化身以明淨智觀諸世間大願成滿持佛法身如意法身非生滅身非來去身非虛實身非聚散身一切諸相卽一相身離邊見身無所著身無窮盡身滅眾虛妄如電光身如幻夢身如鏡像身如

淨日身。充滿一切諸方化身。於三世中無壞法身。非身之身。如是等身。一切世間所不能見。唯是普賢菩薩所見。彼善知識行無礙行。我當云何能見親近。知其相貌。聞法受持。作是念已。時有城天名曰寶眼。眷屬圍繞。在虛空中。爲善財現妙莊嚴身。以天寶冠寶莊嚴具。供養善財。作如是言。善男子。應守護心城。離生死故。應莊嚴心城。得十力故。應淨心城。遠離慳嫉諸諂曲故。應滅熾然猛焰心城。諸禪三昧法門相續。

得自在故。應照心城。常以般若波羅蜜光照如來海。及眷屬故。應長養心城。攝取諸佛方便道故。應堅固心城。出生普賢諸行願故。應修心城。諸魔魔民及餘怨敵。莫能壞故。應明心城。得諸如來智光明故。應修無壞心城。能受如來正法雲故。應具足心城。已心悉受一切如來功德海故。應廣心城。大慈普覆一切眾生故。應蓋心城。以法普覆障不善故。應進心城。無量大悲救一切眾生故。應開心城門。正念一切三世佛。

故應達心城。悉知諸佛轉正法輪脩多羅法門因緣起故。應知心城道開示顯現一切智道故。應持心城具三世佛諸願海故。應知心城力長養法界功德力故。應放心城普照光明。知一切眾生諸根欲性結業習氣諸垢淨故。應知心城自在力。攝取一切諸法界故。應瑩心城住佛念故。應知心城實相。了達諸法無實性故。應知心城如幻。入一切智正法城故。菩薩摩訶薩若如是知諸心城者。則能積集一切善根。何以

故。蠲除無量諸障礙。故。所謂見佛障。聞法障。供養佛障。攝眾生障。淨佛刹障。佛子。菩薩摩訶薩。若有如是無障礙心。以少方便。能見一切諸善知識。究竟成就一切種智。爾時有天名法妙德。在虛空中。妙聲讚歎摩耶夫人。又放種種色光明網。廣照無量諸佛世界。爾時善財見光明網。照諸佛身。繞一匝已。然後還來入善財頂。充滿其身。爾時善財即得離垢淨光明眼。除滅一切愚癡闇障。得離翳眼。了知一切眾生實性。

得離垢眼。觀一切法性。得淨慧眼。觀一切刹性。得淨光眼。見佛法身。得普明眼。觀不思議如來色身。得無礙光眼。觀察一切世界成敗。得徧光眼。見一切佛轉正法輪。出生脩多羅。得普境界眼。觀察無量諸佛神力。教化眾生。得普見眼。觀一切世界。隨因緣起。諸佛與世時。有守護菩薩法堂羅刹鬼王。名曰善眼。與妻子俱。一萬羅刹眷屬。圍繞在虛空中。散眾妙華。語善財言。善男子。若有菩薩成就十法。則能親近諸善知。

識何等爲十。所謂直心清淨。遠離諂曲。不壞大悲。攝取眾生。觀察眾生。非真實性。於薩婆若。心不退轉。於佛大眾。得堅信力。以淨慧眼。觀諸法性。無壞大悲。普覆眾生。明淨慧光。了諸法界。善對治法。雨甘露雲。除生死苦。順善知識。以明淨眼。觀諸法性。相續不斷。菩薩成就此十法者。則能親近諸善知識。復次佛子。菩薩成就十三昧門。則能覩見諸善知識。何等爲十。所謂淨法虛空圓滿三昧。觀察一切方海三昧。分別一

切境界三昧對見十方諸佛三昧。長養功德藏海三昧。念念不捨善知識三昧。現前見一切如來功德善知識三昧。詣善知識三昧。常得不離一切善知識三昧。恭敬供養善知識無過失三昧。善男子。菩薩成就此十三昧門。則能覩見諸善知識。又得諸善知識微妙音聲轉正法輪三昧法門。若有菩薩住此法門。悉知一切諸佛平等。常能覩見諸善知識。爾時善財答羅刹言。善哉善哉。以哀愍故。方便教我見善知識。願

爲我說云何往詣善知識所。於何方處城邑聚落求善知識。答言。善男子。敬禮十方求善知識。正念思惟一切境界求善知識。勇猛自在徧遊十方求善知識。知身知行如夢如電詣善知識。爾時善財隨順其教。卽時覩見大寶蓮華從地涌出。金剛爲莖。摩尼爲葉。淨寶爲臺。眾妙香鬚以阿僧祇摩尼寶網羅覆其上。蓮華臺上有一樓觀名曰攝取法界方藏。金剛爲地。樓有千柱。一切摩尼眾寶合成種種莊嚴。懸阿僧祇

妙寶纓絡。阿僧祇寶以爲欄楯。爾時善財見樓觀中
有摩尼寶師子之座。眾寶莊飾。雜寶欄楯。敷眾妙衣。
寶網覆上。建寶幢蓋於金鈴中。出妙音聲。雨妙香華。
諸寶鈴中。出諸菩薩願行音聲。寶月幢中。出佛化身。
淨摩尼中。顯現如來次第受生。日摩尼中。放無量光。
照十方刹。摩尼寶王光明幢中。放一切佛圓滿光明。
明淨寶中。出眾供具。一切眾生燈。佛正法雲。如意寶
中。念念出生普賢自在。充滿法界。須彌幢中。出天妙

聲讚歎如來。爾時善財見此不可思議莊嚴高座。不可思議眷屬圍繞。見摩耶夫人處彼座上。端正殊妙。具淨色身。出三世間色身。一切世間對現色身。遠離一切有趣色身。隨其所應教化色身。一切眾生不染色身。起廣大色身。與一切眾生等色身。一切眾生無等色身。一切眾生見不虛色身。種種色身。隨所應化顯現色身。無量形像色身。普門形像色身。一切眾生對現色身。廣大自在門莊嚴色身。教化一切眾生色

身一切眾生對現垂形色身一切時現種種不壞色
身一切眾生究竟不究竟住持色身不去色身於一
切趣無所滅故不來色身於一切趣無所生故不起
色身不起不現故不滅色身離一切世間語言道故
不虛色身隨所得故不斷色身隨應世間故無所至
色身不生不死故不壞色身法性無壞故無相色身
三世語言斷故一相色身無相善說相故如電色身
隨應一切眾生心故如幻色身智幻滿故如燄色身

持眾生想故。如影色身。一切眾生本願相續不斷故。
如夢色身。隨應眾生不可壞故。究竟法界色身。淨如
虛空故。現大悲色身。成就一切眾生故。顯現無礙門
色身。於念念中滿法界故。無量無邊色身。淨一切世
間離語言道故。無所依色身。教化眾生究竟願故。住
持色身。能辦一切眾生事故。不生色身。幻願滿故。無
比色身。出世間故。隨應色身。隨應度故。不雜色身。隨
業相續故。如意珠色身。滿足一切眾生願故。離虛妄

色身。一切眾生虛妄起故。離覺觀色身。一切眾生不能思察故。不究竟色身。除滅生死故。清淨色身。離如來覺觀故。如是色非色。色如電故。受非受。除滅世間苦受故。離一切想分別。一切眾生想故。出生行非行。諸業如幻故。離識境界。滿足菩薩智慧願故。空無所有。一切眾生語言斷故。色身成就。妙色不滅故。爾時善財見摩耶夫人。隨應眾生示現。如是種種無量色身。眾生或見過他化自在天王女身。乃至過四天王。

女身。或見過龍王女身。乃至過人王女身。爾時善財見如是等種種色身。長養一切眾生善根。行不可壞。檀波羅蜜。大悲普念一切眾生。出生如來無量功德。勇猛精進。求薩婆若。知一切法皆寂滅相。入深忍海。具足一切無壞禪定。修習一切三昧境界。逮得如來圓滿禪定。滅一切眾生諸煩惱海。皆悉嚴淨一切法界。分別了知諸佛法輪。以明淨智觀一切法海。見一切佛心無厭足。次第觀察三世如來。開一切佛門。見

三世佛次第興世淨佛道戒如如空攝一切眾生而教化之得淨法身淨一切佛刹諸大誓願究竟化度一切眾生一念充徧諸佛境界出生菩薩自在神力顯現無量清淨色身降一切魔力增長功德力生善法力得一切佛力具菩薩力生一切智力如來智慧普照一切悉知無量眾生心海了知眾生諸根欲性一身充滿十方無量無邊佛刹悉分別知佛刹成敗開淨智眼見三世海諸佛法海出生一切如來功

德。知一切菩薩所修功德。從初發心乃至究竟。長養一切眾生善根。於一切世間讚歎一切諸佛功德。成滿一切菩薩母願。爾時善財見摩耶夫人。有如是等閻浮提微塵等。未曾有事。卽變化已身。悉與摩耶夫人身等。合掌敬禮。五體投地。卽得無量無邊諸三昧門。正念修習。分別觀察。隨順出生。卽證證已。從三昧起。起已。敬繞摩耶夫人及諸眷屬。恭敬合掌於一面。住。白言。大聖文殊師利菩薩。往昔教我發阿耨多羅

三藐三菩提心。求善知識。親近供養。我已漸求至大
聖所。願爲演說。云何菩薩學菩薩行。修菩薩道。答言。
佛子。我已成就大願智幻法門。得此法門故。爲盧舍
那如來母。於此閻浮提迦毗羅城淨飯王宮。從右脇
生。悉達太子。顯現不可思議自在神力。善男子。菩薩
於兜率天命終時。一一毛孔放大光明。名一切如來
受生圓滿功德。顯現不可說不可說。佛刹微塵等菩
薩受生莊嚴。普照一切世界。照已來。觸我頂。徧入我

身一切毛孔。入已。普見菩薩受生自在莊嚴。又見出家往詣道場。成等正覺菩薩天人大眾圍繞恭敬供養。轉正法輪。彼諸如來於過去世行菩薩行。於諸佛所恭敬供養。發菩提心。淨諸佛刹。無量化身。充滿法界。教化眾生。乃至示現大般涅槃。如是等事皆悉親見。又善男子。彼妙光明來入我身。我身爾時超出世間。與虛空等。亦不過人身。悉能容受十方菩薩莊嚴宮殿。

誦補闕真言

南無三滿哆。沒馱喃。阿鉢囉帝。喝多折。折捺彌。唵。雞
彌。雞彌。怛塔葛塔喃。末瓦山。矻鉢囉帝。烏怛摩。怛摩。
怛塔葛塔喃。末瓦吽。發莎訶。舉字母讚
華嚴字母。眾藝親宣。善財童子得真傳。秘密義幽玄。
功德無邊。唱誦利人天。

阿上聲後同○快鞞翁烏。爍衰醫因安音。諳謳阿

多○當登東都。刀鑿低顛單○耽兜多
波○幫崩○逋褒碩卑賓般○○○波
唱
阿 多 波
字

時普願法界眾生入般若波羅蜜門
 四十二字妙陀羅。字字包含義理多。
 婆功德大法界沐恩波。

[
波
]
多
]

梵韻滿娑

四生九有。同登華藏玄門。八難三塗。共入毘盧性海。
 南無華嚴海會佛菩薩

三稱

大方廣佛華嚴經卷第五十八

東晉天竺三藏佛陀跋陀羅等譯

入法界品第三十四之十四

爾時菩薩從兜率天降神下時。與十佛刹微塵等菩薩俱。皆悉同行大願善根莊嚴法門。智慧自在。一切諸地清淨法身。無量色身。究竟普賢諸大願行。悉皆同等。如是菩薩眷屬圍繞。又與八萬諸龍王俱。娑伽羅龍王等及諸夜叉八部神等恭敬供養。降神下時。

放大光明普照世界現自在力除滅一切諸惡道苦。以巧方便教化不可思議眾生皆悉令知宿世業行。令諸菩薩修不放逸無所染著救護眾生令悉覩見。此菩薩身現如是等諸奇特事與大眾俱來處我胎。彼諸菩薩於我胎內遊行自在或以三千大千世界以爲一步。或不可說不可說佛刹微塵等世界以爲一步。又念念中十方一切世界一切佛所不可說不可說菩薩眷屬及四天王忉利天王乃至梵王如是。

等一切天王皆入我胎。欲見菩薩恭敬供養。聽受正法。悉皆容受。如是等眾。而胎不廣大。亦不迫迮。於此世界示現。如是神變受生。十方一切閻浮提中。亦復如是。亦不分身。種種現化。隨其所應。爲菩薩母。何以故。修此大願智幻法門故。善男子。我爲盧舍那佛母。拘樓孫佛。拘那含牟尼佛。迦葉佛。彌勒佛。師子佛。法幢佛。善眼佛。淨華佛。妙德華佛。提舍佛。弗沙佛。歡喜意佛。自在佛。離垢佛。明淨月佛。執炬佛。樂靜佛。金剛

楯佛。清淨義佛。阿私陀佛。度彼岸佛。高峽山佛。執燈佛。寶蓮華佛。功德稱佛。無量德持佛。妙德燈佛。莊嚴身佛。善威儀佛。妙德慈佛。善幢佛。智盛佛。無量音佛。無諍佛。散疑佛。清淨佛。廣光佛。速淨佛。妙德雲佛。莊嚴頂髮佛。樹王佛。莊嚴寶冠佛。智海佛。淨寶佛。堅天冠佛。具諸願佛。大自在佛。妙德王佛。勝妙德佛。旃檀雲佛。廣淨眼佛。殊勝慧佛。修習智佛。高王佛。自在慧佛。離色佛。師子喜佛。無上王佛。妙德頂佛。金剛智山

佛。妙德藏佛。寶網嚴身佛。善慧佛。自在天佛。大地天
佛。無著功德佛。眾牙佛。慧光佛。妙德天佛。無上座佛。
無上德佛。仙人伏根佛。隨順語佛。自在德幢佛。明淨
幢佛。分別支佛。毗舍佉佛。放一切眾生香光明佛。金
剛寶嚴佛。歡喜眼佛。滅欲塵佛。高大身佛。善天佛。無
上天佛。向寂滅佛。覺智佛。離塵垢佛。光燄王佛。安住
佛。毗舍佉天佛。金剛山佛。智燄盛妙德佛。安隱佛。優
波提舍佛。具淨德佛。樂賢德佛。第一義勇佛。百光燄

佛。一增上佛。深音聲佛。大地王佛。白淨佛。山音聲佛。
殊勝佛。不可壞佛。無上醫佛。功德月佛。不違逆佛。功
德聚佛。月出佛。功德天佛。光明盛佛。娑羅陰佛。藥王
佛。勝寶佛。金剛慧佛。八十妙德佛。一切無壞佛。大名
稱王佛。勇健進持佛。無量光佛。大莊嚴燄佛。法王不
虛佛。不退地佛。明淨天佛。苦行佛。淨天佛。同意佛。解
脫音佛。無壞王佛。滅諂僞佛。淨瞻蔔光佛。善勝月佛。
執明炬佛。莊嚴身佛。不可說佛。觀眾生佛。無量光佛。

無畏音佛。最勝天佛。無畏智盛佛。妙德華佛。月光燄
佛。不退慧佛。離愛佛。不著慧佛。長養德聚佛。滅惡道
佛。無量化佛。師子吼佛。義不退佛。見無礙佛。降眾魔
佛。不著相佛。離虛妄海佛。清淨海佛。不可沮壞須彌
山佛。無著智佛。無量座佛。與魔戰佛。隨師行佛。無上
調佛。常月佛。饒益王佛。不動陰佛。饒益名佛。饒益慧
佛。壽持佛。壽名佛。滿稱佛。無壞盛佛。色明淨佛。無相
智佛。勇無動佛。難思妙德佛。同月行佛。無量身佛。隨

順王佛增壽天佛佛子。如是等賢劫一切佛於此世界成等正覺。我悉爲母。亦於十方一切世界教化眾生。爾時善財白言。大聖。得此法門。其已久如。答言。佛子。乃往古世過不可思議非諸菩薩通明境界不可數劫。有劫名淨光。彼有世界名曰妙德須彌山王。其土清淨。無諸垢穢。眾寶合成。種種嚴飾。見者無厭。彼世界中有千億四天下。諸四天下中有一四天下。彼一四天下中有八十億大王之都。彼王都中有一王

都名曰智幢。有轉輪王名曰勇盛。彼王都北有一道場。名月光明。其道場神名慈妙德。時有菩薩名離垢幢。坐於道場。成正覺。時有惡魔名金剛光明。與眷屬俱。至菩薩所。壞其道行。時勇盛王具足菩薩神力。自在化作兵眾。多彼魔軍而摧伏之。時彼菩薩得成正覺。時道場神見此事。已歡喜無量。發如是願。此轉輪王乃至成佛。我爲其母善男子。我曾於彼道場供養十那由他佛善男子。彼道場神豈異人乎。我身是

也。轉輪王者。盧舍那佛是也。善男子。我從爾時發願已來。盧舍那佛於一切有行菩薩行教化眾生乃至最後受生。我常爲母。復次善男子。現在過去十方無量無邊諸佛。放大光明來照我身宮殿住處者。彼最後生。我悉爲母。善男子。我唯知此大願智幻法門。諸大菩薩具大悲藏。教化眾生心無厭足。得自在法。一一毛孔現一切佛自在神力。我當云何能知能說。彼功德行善男子。於此世界三十三天。有王名正念王。

有童女名天主光。汝詣彼問云何菩薩學菩薩行。修菩薩道。時善財童子敬受其教。頭面作禮。繞無數而戀慕瞻仰。卻行而退。遂往天宮。見彼童女禮足圍繞。合掌前住。白言。聖者。我已先發阿耨多羅三藐三菩提心。而未知菩薩云何學菩薩行。修菩薩道。我聞聖者善能誘誨。願爲我說。天女答言。善男子。我得菩薩解脫名無礙。念清淨莊嚴。善男子。我念過去有最勝劫。名青蓮華。我於彼劫中。供養恆河沙等諸佛如來。

彼諸如來從初出家。我皆瞻奉。守護供養。造僧伽藍。營辦什物。又彼諸佛從爲菩薩住母胎時。誕生之時。行七步時。大師子吼時。住童子位在宮中時。向菩提樹成正覺時。轉正法輪。現佛神變。教化調伏眾生之時。如是一切諸所作事。從初發心。乃至法盡。我皆明憶。無有遺餘。常現在前。念持不忘。又憶過去劫名善地。我於彼供養十恆河沙等諸佛如來。又過去劫名爲妙德。我於彼供養一佛世界微塵等諸佛如來。又

劫名無所得。我於彼供養八十四億百千那由他諸
佛如來。又劫名善光。我於彼供養閻浮提微塵等諸
佛如來。又劫名無量光。我於彼供養二十恆河沙等
諸佛如來。又劫名精進德。我於彼供養一恆河沙等
諸佛如來。又劫名善悲。我於彼供養八十恆河沙等
諸佛如來。又劫名勝遊。我於彼供養六十恆河沙等
諸佛如來。又劫名妙月。我於彼供養七十恆河沙等
諸佛如來。善男子。如是憶念恆河沙劫。我常不捨諸

佛如來應正等覺從彼一切諸如來所聞此無礙念
清淨莊嚴菩薩解脫受持修行恆不間斷隨順趣入
如是先劫所有如來從初菩薩乃至法盡一切神變
我以淨嚴解脫之力皆隨憶念明了現前持而順行
曾無懈廢善男子我唯知此無礙念清淨解脫如諸
菩薩摩訶薩出生死夜朗然明徹永離癡冥未嘗惛
寐心無諸蓋身行輕安於諸法性清淨覺了成就十
力開悟羣生而我云何能知能說彼功德行善男子

迦毗羅城有童子師名曰徧友。汝詣彼問云何菩薩
學菩薩行。修菩薩道。時善財童子以聞法故。身心徧
悅。不思議善根流派。增廣頭面敬禮。天主光足。繞無
數匝。戀仰辭去。從天宮下。漸向彼城。至徧友所。禮足
圍繞。合掌恭敬。於一面立。白言。聖者。我已先發阿耨
多羅三藐三菩提心。而未知菩薩云何學菩薩行。修
菩薩道。我聞聖者善能誘誨。願爲我說。徧友答言。善
男子。此有童子名善知眾藝。學菩薩字智。汝可問之。

當爲汝說。爾時善財卽至其所。頭頂禮敬於一面立。白言。聖者。我已先發阿耨多羅三藐三菩提心。而未。知菩薩云何學菩薩行。修菩薩道。我聞聖者善能誘。誨。願爲我說。時彼童子告善財言。善男子。我得菩薩。解脫名善知眾藝。我恆唱持入此解脫根本之字。唱。阿字時入般若波羅蜜門。名菩薩威德各別境界。唱。羅字時入般若波羅蜜門。名平等一味最上無邊。唱。波字時入般若波羅蜜門。名法界無異相。唱者字時。

入般若波羅蜜門。名普輪斷差別。唱多字時。入般若
波羅蜜門。名得無依無上。唱邏字時。入般若波羅蜜
門。名離依止無垢。唱茶徒假反字時。入般若波羅蜜門。
名不退轉之行。唱婆字時。入般若波羅蜜門。名金剛
場。唱茶字時。入般若波羅蜜門。名曰普輪。唱沙字時。
入般若波羅蜜門。名爲海藏。唱他字時。入般若波羅
蜜門。名普生安住。唱那字時。入般若波羅蜜門。名圓
滿光。唱邪字時。入般若波羅蜜門。名差別積聚。唱史

吒字時入般若波羅蜜門。名普光明息諸煩惱。唱迦
字時入般若波羅蜜門。名差別一味。唱娑字時入般
若波羅蜜門。名霈然法雨。唱摩字時入般若波羅蜜
門。名大流湍激眾峯齊峙。唱伽字時入般若波羅蜜
門。名普上安立。唱娑他字時入般若波羅蜜門。名眞
如藏徧平等。唱社字時入般若波羅蜜門。名入世間
海清淨。唱室者字時入般若波羅蜜門。名一切諸佛
正念莊嚴。唱柁字時入般若波羅蜜門。名觀察圓滿。

法聚。唱奢字時。入般若波羅蜜門。名一切諸佛教授。
輪光。唱佉字時。入般若波羅蜜門。名淨修因地現前。
智藏。唱叉字時。入般若波羅蜜門。名息諸業海藏蘊。
唱娑多字時。入般若波羅蜜門。名蠲諸惑障開淨光。
明。唱壤字時。入般若波羅蜜門。名作世間了悟因。唱
頗字時。入般若波羅蜜門。名智慧輪斷生死。唱婆字
時。入般若波羅蜜門。名一切宮殿具足莊嚴。唱車字
時。入般若波羅蜜門。名修行戒藏各別圓滿。唱娑摩

字時入般若波羅蜜門。名隨十方現見諸佛。唱訶娑
字時入般若波羅蜜門。名觀察一切無緣眾生方便
攝受令生海藏。唱訶字時入般若波羅蜜門。名修行
趣入一切功德海。唱伽字時入般若波羅蜜門。名持
一切法雲堅固海藏。唱吒字時入般若波羅蜜門。名
十方諸佛隨願現前。唱拏字時入般若波羅蜜門。名
不動字輪聚集諸億字。唱娑頗字時入般若波羅蜜
門。名化眾生究竟處。唱娑迦字時入般若波羅蜜門。

名諸地滿足無著無礙解光明輪徧照。唱闍字時。入
般若波羅蜜門。名宣說一切佛法境界。唱多娑字時。
入般若波羅蜜門。名一切虛空法雷徧吼。唱侘字時。
入般若波羅蜜門。名曉諸迷識無我明燈。唱陀字時。
入般若波羅蜜門。名一切法輪出生之藏。善男子。我
唱如是入諸解脫根本字時。此四十二般若波羅蜜
門爲首。入無量無數般若波羅蜜門。善男子。我唯知
此善知眾藝菩薩解脫。如諸菩薩摩訶薩能於一切

世出世間善巧之法。以智通達到於彼岸。殊方異藝。咸綜無遺。文字算數。蘊其深解。醫藥呪術。善療眾病。有諸眾生鬼魅所持。怨憎呪詛。惡星變怪。死屍奔逐。癩癘羸瘦。種種諸疾。咸能救之。使得痊愈。又善別知金玉珠貝。珊瑚瑠璃。摩尼碑磔。雞薩羅等。一切寶藏。出生之處。品類不同。價直多少。村營鄉邑。大小都城。宮殿苑園。巖泉藪澤。凡是一切人眾所居。菩薩咸能隨方攝護。又善觀察天文地理。人相吉凶。鳥獸音聲。

雲霞氣候年穀豐儉國土安危如是世間所有技藝莫不該練盡其源本又能分別出世之法正名辯義觀察體相隨順修行智入其中無疑無礙無愚暗無頑鈍無憂惱無沈沒無不現證而我云何能知能說彼功德行善男子此摩竭提國有一聚落彼中有城名婆坦那有優婆夷號曰賢勝汝詣彼問云何菩薩學菩薩行修菩薩道時善財童子頭面敬禮眾藝之足繞無數而戀仰辭去向聚落城至賢勝所禮足圍

繞合掌恭敬。於一面立白言。聖者。我已先發阿耨多
羅三藐三菩提心。而未知菩薩云何學菩薩行。修菩
薩道。我聞聖者善能誘誨。願爲我說。賢勝答言。善男
子。我得菩薩法門。名無依處道場。旣自開解。復爲人
說。又得無盡三昧。非彼三昧法有盡無盡。以能出生
一切智性。眼無盡故。又能出生一切智性。耳無盡故。
又能出生一切智性。鼻無盡故。又能出生一切智性。
舌無盡故。又能出生一切智性。身無盡故。又能出生

一切智性意無盡故。又能出生一切智性種種慧明無盡故。又能出生一切智性周徧神通無盡故。又能出生一切智性如海波濤無量功德皆無盡故。又能出生一切智性徧世間光無盡故。善男子。我唯知此無依處道場法門。如諸菩薩摩訶薩一切無著功德行。而我云何盡能知說。善男子。南方有城名爲沃田。彼有長者名堅固解脫。汝可往問云何菩薩學菩薩行。修菩薩道。爾時善財禮賢勝足。繞無數而戀慕瞻

仰辭退南行。到於彼城。詣長者所。禮足圍繞。合掌恭敬。於一面立。白言。聖者。我已先發阿耨多羅三藐三菩提心。而未知菩薩云何學菩薩行。修菩薩道。我聞聖者善能誘誨。願爲我說。長者答言。善男子。我得菩薩解脫。名無著清淨念。我自得是解脫。已來法願充滿。於十方佛所。無復希求。善男子。我唯知此淨念解脫。如諸菩薩摩訶薩。獲無所畏。大師子吼。安住高廣。福慧之聚。而我云何能知能說。彼功德行。善男子。卽

此城中有一長者名爲妙月。其長者宅常有光明。汝詣彼問。云何菩薩學菩薩行。修菩薩道。時善財童子。禮堅固足。繞無數匝。辭退而行。向妙月所。禮足圍繞。合掌恭敬。於一面立。白言。聖者。我已先發阿耨多羅三藐三菩提心。而未知菩薩云何學菩薩行。修菩薩道。我聞聖者善能誘誨。願爲我說。妙月答言。善男子。我得菩薩解脫。名淨智光明。善男子。我唯知此智光解脫。如諸菩薩摩訶薩。證得無量解脫法門。而我云

何能知能說彼功德行。善男子。於此南方有城。名出生。彼有長者名無勝軍。汝詣彼問云何菩薩學菩薩行。修菩薩道。是時善財禮妙月足繞無數匝。戀仰辭去。漸向彼城。至長者所。禮足圍繞。合掌恭敬。於一面立。白言。聖者。我已先發阿耨多羅三藐三菩提心。而未知菩薩云何學菩薩行。修菩薩道。我聞聖者善能誘誨。願爲我說。長者答言。善男子。我得菩薩解脫。名無盡相。我以證此菩薩解脫。見無量佛。得無盡藏。善

男子。我唯知此無盡相解脫。如諸菩薩摩訶薩。得無
限智。無礙辯才。而我云何能知能說彼功德行。善男
子。於此城南有一聚落。名之爲法。彼聚落中有婆羅
門名尸毘最勝。汝詣彼問云何菩薩學菩薩行。修菩
薩道。時善財童子禮無勝軍足。繞無數而戀仰辭去。
漸次南行。詣彼聚落。見尸毘最勝禮足圍繞。合掌恭
敬。於一面立。白言。聖者。我已先發阿耨多羅三藐三
菩提心。而未知菩薩云何學菩薩行。修菩薩道。我聞

聖者善能誘誨。願爲我說。婆羅門答言。善男子。我得菩薩法門。名誠願語。過去現在未來菩薩。以是語故。乃至於阿耨多羅三藐三菩提。無有退轉。無已退。無現退。無當退。善男子。我以住於誠願語故。隨意所作。莫不成滿。善男子。我唯知此誠願語法門。如諸菩薩摩訶薩。與誠願語行止無違。言必以誠。未曾虛妄。無量功德。因之出生。而我云何能知能說。善男子。於此南方有城名妙意華門。彼有童子名曰德生。復有童

女名爲有德。汝詣彼問云。何菩薩學菩薩行。修菩薩道。時善財童子於法尊重。禮婆羅門足。繞無數匝。戀仰而去。漸次南行。至於彼城。見童子童女。頂禮其足。圍繞畢。已於前合掌而作是言。聖者。我已先發阿耨多羅三藐三菩提心。而未知菩薩云何學菩薩行。修菩薩道。唯願慈悲。爲我宣說。時童子童女告善財言。善男子。我等證得菩薩解脫。名爲幻住。以斯淨智。觀諸世間。皆幻住。因緣生故。一切眾生。皆幻住。業煩惱。

所起故。一切法皆幻住。無明有愛等展轉緣生故。一切三界皆幻住。顛倒智所生故。一切眾生生滅生老病死憂悲苦惱皆幻住。虛妄分別所生故。一切國土皆幻住。想倒心倒見倒無明所現故。一切聲聞辟支佛皆幻住。智斷分別所成故。一切菩薩皆幻住。能自調伏教化眾生殊勝智心及諸行願之所成故。一切菩薩眾會變化調伏諸所施爲皆幻住。願及智所攝成故。善男子。幻境自性不可思議。善男子。我等二人。

但能知此菩薩解脫。如諸菩薩摩訶薩善入無邊諸事幻網。彼功德行。我等云何能知能說。時童子童女說自解脫已。諸善根力不思議。故令善財身柔輭光澤。自說本願。又作是言。善男子。於此南方有一國土名曰海澗。彼有園林名大莊嚴。藏於彼林中有大樓觀名嚴淨藏。菩薩往昔善根所起。菩薩諸願自在。諸通智力巧妙。方便功德。大悲法門所起。彼園中有菩薩摩訶薩名曰彌勒。常化父母親戚眷屬及同行者。

又復長養其餘無量眾生善根。令住大乘。亦欲爲汝
顯現菩薩方便法門。欲明菩薩受生自在。欲對現教
化一切眾生。令厭諸有。宣明菩薩大慈悲力。覺悟菩
薩無相法門。明諸有趣。悉無自相。汝詣彼問。云何菩
薩淨菩薩道。云何菩薩學菩薩戒。云何菩薩淨菩薩
心。云何菩薩發諸大願。云何菩薩積功德具。云何菩
薩得菩薩地。云何菩薩滿足一切諸波羅蜜。云何菩
薩得諸忍法。云何菩薩住功德行。云何菩薩近善知

識何以故。彼菩薩摩訶薩。究竟一切諸菩薩行。分別了知眾生心行。以巧便智而教化之。滿足一切諸波羅蜜。住菩薩地。得諸忍門。證於菩薩離生之法。於諸佛所而得受記。於菩薩法自在遊戲。持諸佛持無量諸佛。以一切智甘露正法而灌其頂。善男子。彼菩薩摩訶薩能示導汝真善知識。堅菩提心。長養善根。住正直心。現菩薩根。說無礙法。平等諸地。讚歎菩薩所出生道。具諸菩薩願行功德。能廣演說普賢所行善。

男子。汝不應於一善根中。生知足想。一光明法。一行一願。一受記。前得法忍門。六波羅蜜。菩薩諸地所淨。佛刹。近善知識。於是事中。生知足想。何以故。善男子。菩薩摩訶薩。應一向求無量善根。積集無量菩提具。積集無量菩提因緣。修習無量諸大回向。教化成熟。無量眾生。了知無量諸眾生心。諸根欲性。眾生諸行。除滅無量眾生煩惱結業習氣。除滅無量眾生邪見。諸染汙心。令發無量諸清淨心。拔出無量諸苦惱刺。

消竭無量愛欲之海。遠離無量愚癡闇冥。壞散無量
大憍慢山。解散無量生死繫縛。越度無量煩惱有流。
煎竭無量受生海源。拯拔無量愛欲淤泥。於三界獄
免濟苦難。悉令安立。八聖道支。普令除滅。三毒熾然。
斷絕無量諸魔鉤餌。遠離無量諸惡魔業。淨修無量
菩薩直心。長養菩薩無量方便。出生菩薩無量諸根。
淨修菩薩無量欲性。深入菩薩無量等法。修行菩薩
無量勝行。清淨菩薩無量功德。淨修菩薩無量威儀。

示現菩薩無量隨順世間。發起無量不壞信心。發起
無量大精進力。淨修無量諸正念力。成滿無量諸三
昧力。開發無量諸大慧力。堅固無量諸欲性力。積聚
無量諸功德力。長養無量諸淨智力。發起無量菩薩
諸力。成滿無量諸如來力。悉分別知無量法門。普入
無量諸法方面。淨修無量法門。發起無量法明。照無
量法。無量諸根。了知無量諸煩惱病。積集無量諸妙
法藥。以善方便。療眾結病。修習無量甘露正法。詣諸

佛刹恭敬供養無量如來。徧入菩薩大眾源底。護持無量如來正法。不譏無量眾生罪咎。除滅無量惡道諸難。令無量眾生天人中。總攝無量諸眾生類。淨修無量陀羅尼門。成滿無量諸大願行。修習無量大慈願力。不惜壽命求無量法。修習無量寂滅法力。出生無量淨智通明。知無量眾生諸趣受生。而爲應現無量化身。知無量心諸語言法。悉入菩薩無量諸行。修菩薩法。觀察菩薩甚深法門。覺悟菩薩難知境界。

到諸菩薩難至之趣。攝持菩薩勇猛功德。證於菩薩
離生淨妙難證之法。覺悟菩薩諸莊嚴行。於一切處
顯現菩薩自在神力。受持菩薩無壞法雲。增廣菩薩
無量無邊淨智慧行。究竟無量諸波羅蜜。受於菩薩
無量記前。深入菩薩無量忍門。修治菩薩不思議地。
諸正法門。於無量劫以大弘誓而自莊嚴。供養諸佛。
淨不可說諸佛世界。發不可說菩薩願行。善男子。略
說菩薩教化一切眾生。於一切劫行菩薩行。於一切

趣應現受生。以明淨智。了一切三世淨。一切剎。滿一切願。供養一切佛。與一切菩薩同修願行。親近一切諸善知識。是故善男子。應一向求諸善知識。若見聞法恭敬供養。於善知識勿生嫌疑。身心懈厭。令一切善知識心大歡悅。何以故。因善知識究竟一切諸菩薩行。成滿一切菩薩功德。一切菩薩大願。一切菩薩善根。一切菩薩助道法生。一切菩薩法明。淨一切菩薩法門。淨修一切菩薩禁戒。一切菩薩禪定。三昧。一

一切菩薩堅固無上菩提之心。一切菩薩總持辯才。淨
一切菩薩功德藏。同一切菩薩大願解。一切菩薩密
法。一切菩薩法寶。長養一切菩薩諸根。積集一切菩
薩智聚。護一切菩薩功德法藏。清淨一切菩薩受生。
聞持一切菩薩法雲。出生一切菩薩正道。發起一切
菩薩道心。成就一切諸佛菩提。一切菩薩諸行。了知
十方一切法界。讚一切菩薩直心功德。起一切菩薩
大慈悲力。攝一切菩薩無量善根。得一切菩薩道支。

得一切菩薩饒益眾生心。遠離惡道。安住大乘。修菩薩行。遠惡知識。於菩薩法。心不退轉。超出凡夫聲聞緣覺一切世間心。無惑亂。無有染著。廣修菩薩無量諸行。長養一切諸善功德。除滅煩惱。一切諸魔莫能沮壞。因善知識。悉能成辦如是等事。何以故。善知識者。能令除滅諸障礙。故遠不善法。離惡知識。滅無明闇。諸邪見縛。超出生死一切世間。斷魔鈎餌。拔苦惱刺。出無智險難。邪惑山澗。越度有流。諸惡邪徑。示導。

清淨菩提正道。教菩薩法。修習四道。明淨慧眼。安立
薩婆若。增長菩薩心。廣大慈悲。修波羅蜜。住菩薩地。
得深法忍。淨一切善根。積集一切菩薩功德。施與一
切菩薩功德。見一切佛。心大歡喜。護持淨戒。解真實
義。出正法門。離諸邪道。現明法門。普照一切。聞持無
量諸佛法雲。滅一切煩惱。增益一切智。住一切佛法。
復次善男子。善知識者。則爲慈母。生佛家故。善知識
者。則爲慈父。以無量事益眾生故。善知識者。則爲養

育守護不爲一切惡故。善知識者則爲大師。教化令學菩薩戒故。善知識者則爲導師。教化令至彼岸道。故善知識者則爲良醫療治一切煩惱患故。善知識者則爲雪山長養明淨智慧藥故。善知識者則爲勇將防護一切諸恐怖故。善知識者則爲牢船。悉令越度生死海故。善知識者則爲船師。令至一切智法寶洲故。是故善男子。應當如是正念思惟。諸善知識。又善男子。詣善知識。發大地心。持一切事。無疲倦故。發

金剛心堅固正直不可壞故。發金剛山心一切苦患不能壞故。發無自心隨彼意故。發弟子心不違一切教故。發僮僕心一切苦役不疲厭故。發養育心不畏煩惱所汙染故。發傭作心隨所受教不違逆故。發卑下心遠離自大憎上慢故。發成熟心善知時非時故。發寶馬心離慵悞不調故。發大車心載一切故。發大象心伏諸根故。發大山心一切惡風不能動故。發小犬心離瞋恚故。發旃陀羅心離憍慢故。發折角心離

威勢故發大風心無所著故發大船心於彼此岸往
反不疲故發橋梁心度善知識教故發孝子心見善
知識無厭足故發王子心順君教故又善男子應於
自身生病苦想於善知識生醫王想於所說教生良
藥想又於自身生遠行想於善知識生導師想於所
說教生正路想又於自身生趣彼岸想於善知識生
知濟想於所說法生涼池想又於自身生農夫想於
善知識生龍王想於所說法生時澤想於隨說行生

成熟想。又於自身生貧窮想。於善知識生毗沙門寶
天王想。於所說教生珍寶想。又於自身生弟子想。於
善知識生大師想。於所說法生修學想。又於自身生
怯劣想。於善知識生勇健想。於所說法生器械想。又
於自身生商人想。於善知識生導師想。於所說法生
珍寶想。隨聞說行生勝寶想。又於自身生子息想。於
善知識生慈父想。於所說法生立家想。又於自身生
王子想。於善知識生大臣想。於所說法學王教想。善

男子。詣善知識。應正思念。發如是想。何以故。因直淨心。見善知識。隨順其教。增長善根。如依雪山。出眾藥草。爲佛法器。如海吞流。生諸勝德。如海出寶。淨菩提心。如鍊真金。超出世間。如海須彌。不染世間。如水蓮華。不沒諸惡。如海死屍。長白淨法。如月盛滿。普照法界。如日迴曜。長菩薩身。如母養子。善男子。略說菩薩摩訶薩。若能隨順善知識。教得十不可說百千億那由他諸功德。明十不可說百千億那由他淨直深心。

增長十不可說百千億那由他菩薩諸根淨十不可說百千億那由他菩薩諸持滅十不可說百千億那由他諸障礙法超十不可說百千億那由他諸惡魔業入十不可說百千億那由他菩薩法門滿十不可說百千億那由他諸妙功德修十不可說百千億那由他菩薩所行具十不可說百千億那由他菩薩大願善男子略說菩薩因善知識究竟一切菩薩行一切菩薩波羅蜜一切菩薩地一切菩薩忍一切菩薩

陀羅尼。一切菩薩三昧門。一切菩薩通明智自在。一切菩薩回向。一切菩薩大願。善男子。如是等一切法。善知識爲本。依善知識起。依善知識生。依善知識取。依善知識發。依善知識長。依善知識住。依善知識得。爾時善財聞如是等讚善知識諸菩薩行如來正法。心大歡喜。踊躍無量。正念思惟菩薩所行。漸漸遊行。向海澗國。以過去際修身業力及清淨心。遠離惡行。超出世間虛妄惑倒。求佛法實義。長養諸根。滿足大。

願具精進力。不惜身命。饒益眾生。修菩薩行。積集佛法。見諸如來。淨一切刹。供養法師。護持正法。成就菩薩。諸淨願身。善知緣起。修習不可思議善根。作是念。已淨心信敬一切菩薩。如是尊想。修習諸根心不顛倒。正念恭敬。離世間想。滿足諸願。出生無量菩薩化身。讚歎三世一切諸佛菩薩法門。智慧覺悟如來菩薩一切至處自在神力。乃至一毛孔中佛菩薩身皆悉充滿。無礙智眼觀十方世界及虛空界三世諸法。

爾時善財如是恭敬供養具諸願忍。以無量智觀境界地。爾時善財五體敬禮彼嚴淨藏高大樓觀。作如是念。此是諸佛菩薩諸善知識。是諸佛塔。是如來像。諸佛菩薩法寶住處。是聲聞緣覺。亦是其塔。此是眾聖。亦是父母。亦是福田。此是一切法界境界。作是念已。又復等觀。猶如虛空。等觀如法界。無有障礙。等觀如實際。至一切處。等觀如如來。除諸虛妄。無所染著。等觀如影。如夢。如電。如響。悉從緣起。非有非無。深心。

信解隨諸業因而受果報。知從信心成等正覺。因解
佛功德供養諸佛。因恭敬心出佛化身。因修善根起
諸佛法。因般若波羅蜜起一切波羅蜜。因堅固願起
諸佛法。因諸回向起一切菩薩行。一切智境界法界。
解了回向非常非斷非生非滅非無因作。捨離有見
諸顛倒惑。謂從自在而生諸法。本有實性次第而出。
離我所。深達緣起。入諸法界。見有爲法猶如鏡像。
離有無見。不生不滅。滅邪癡惑。了諸法空。悉無自在。

超出諸相。入無相際。而亦不違種生芽法。悉知一切。從因緣生。知因印故。而生印像。如鏡中像。如電如夢。如響如幻。各隨因有。一切諸法。亦復如是。隨業受報。以善方便。潤澤諸法。爾時善財。禮未起間。知法如是。得不思議善根。柔軟身心。稽首禮畢。敬繞十匝。合掌諦觀。復作是念。此是解空無相願者之所住處。離虛妄者之所住處。住法界者。了知眾生非實有者。知不生者。知一切世間無所著者。方便分別一切眾生者。

一切無所依者。離一切相者。知一切法無自性者。不
虛妄取一切業者。了知一切心意識相者。知一切道
非出非不出者。住一切甚深大智度者。方便充滿普
門法界者。寂滅一切眾煩惱者。智慧斷除見愛慢者。
一切禪定解脫三昧神通遊戲者。修一切菩薩三昧
境界者。安住一切如來所者。以一劫爲一切劫。以一
切劫爲一劫者。以一切刹爲一刹。以一刹爲一切刹。
而亦不壞諸刹相者。以一法爲一切法。以一切法爲

一法而亦不壞諸法相者。以一眾生爲一切眾生。以一切眾生爲一眾生。而解眾生無差別者。以一佛爲一切佛。以一切佛爲一佛。而解諸佛無有二者。以三世爲一念。以一念爲三世者。於一念中。詣一切剎者。普照饒益一切眾生者。得一切入者。出過眾生爲教化。故而不捨離者。不依一切剎而遊行莊嚴一切世界。供養佛者。詣一切佛。無染著者。依善知識。不味法者。住一切魔宮。不樂欲者。入一切相。而不捨離一切。

智者了一切眾生身無我無眾生無二觀者自身容
受一切世界而不壞法性者。盡未來劫修諸願行而
不取劫長短相者。不離一毛端處而現一切世界。普
爲眾生說正法者。可尊重者。解甚深法者。達無二者。
了無性者。善對治者。體法空者。住慈悲者。遠離一切
聲聞緣覺地者。超出一切魔境界者。不染一切世間
境界者。究竟一切菩薩法門者。隨順一切佛法門者。
厭一切生死而不證聲聞離生法者。知一切法無生

而亦不起不生見者。觀不淨法。不證離欲法。不染愛者。修習大慈。不爲除滅瞋恚法者。觀於緣起。一切法中無愚癡者。住於四禪。不隨生者。住四無量。不生無色爲教化者。修習止觀。不證明脫。化眾生者。住空三昧。滅無見者。住無相三昧。爲化眾生。不捨相者。住無願三昧。不捨菩薩一切願者。一切煩惱業中得自在力。爲教化。故示現隨順煩惱業者。離於生死而現受生爲教化者。離一切趣。現入諸趣。化眾生者。修大慈。

悲不隨愛者。修習喜心。見眾生苦。常憂感者。修習捨心。而不捨離利他事者。得九次第定。而不厭離欲界生者。離於諸受。而不證實際者。住三脫門。而不證聲聞解脫法者。觀四真諦。而不證諸果者。觀於緣起。離邊見者。修八正道。而不永出生死難者。超凡夫地。而不墮於二乘地者。觀陰熾然。而不永滅於五陰者。離四魔道。而不永捨諸魔覺者。捨六入障。而現受者。觀眞如相。而不證於實際法者。現學一切乘。而不捨離。

摩訶衍者。如此樓觀。住一切功德者之所住處。爾時
善財以偈頌曰。

安住大慈心	彌勒摩訶薩	具足妙功德
饒益諸羣生	住於灌頂地	諸佛之長子
思惟佛境界	安住此法堂	一切諸佛子
常履大乘行	遊行諸法界	安住此法堂
施戒忍精進	禪智方便願	究竟彼岸者
安住此法堂	無礙智如空	普照三世法

了知一切者 安住此法堂 解了一切法

真實無生相 如鳥遊空者 安住此法堂

除滅貪恚癡 一切諸顛倒 常樂寂靜者

安住此法堂 三脫門道觀 陰入界緣起

遠離惡道者 安住此法堂 深入無礙智

等觀眾生刹 知法無性者 安住此法堂

三世法無礙 猶如空中風 無所染著者

安住此法堂 見眾生受苦 無有歸依處

安住此法堂	深入生死海	漂溺生死海	悲心醫王者	安住此法堂	見諸有爲中	捨正入險路	大悲普濟者
願地慈悲眼	摧滅煩惱龍	大悲船度者	安住此法堂	見眾生結患	生老病死逼	爲示正道者	安住此法堂
觀海出眾生	採佛智寶者	安住此法堂	見無量眾生	積集智慧藥	令免恐怖者	安住此法堂	見盲冥眾生

安住此法堂	安住此法堂	安住此法堂	安住此法堂	安住此法堂	安住此法堂	安住此法堂	安住此法堂
爲一一眾生	盡未來際劫	荷負諸苦者	猶如淨日月	慧光普照者	安住此法堂	法界空中行	如金翅鳥者
安住此法堂	一一諸刹中	盡來劫修行	安住此法堂	安住此法堂	安住此法堂	安住此法堂	安住此法堂
金剛精進者	安住此法堂	一坐處聞持	諸佛法無厭	大智慧海者	安住此法堂	安住此法堂	安住此法堂
徧遊世界海	及諸大眾海	供養佛海者	安住此法堂	一切劫海中	修諸願行海	安住此法堂	安住此法堂

佛刹劫眾生	無礙眼見者	安住此法堂	一一毛孔中
一念中徧入	不可說諸劫	安住此法堂	知念無礙者
安住此法堂	一切刹微塵	安住此法堂	眾生水滴等
生此等願者	安住此法堂	安住此法堂	無量劫修行
總持禪定願	解脫法門者	安住此法堂	安住此法堂
一切諸佛子	出生無量德	安住此法堂	饒益眾生者
安住此法堂	成就無礙智	安住此法堂	通明巧方便

隨應現生者	安住此法堂	從初發道心
究竟一切行	化身滿法界	顯現自在力
一念成正覺	入無量智業	莫能測量者
安住此法堂	無礙淨慧力	遊行諸法界
無垢智觀者	安住此法堂	成就無礙足
一切無所著	了刹無二者	安住此法堂
觀諸寂滅法	皆悉如虛空	離垢境界者
安住此法堂	大悲觀眾生	諸苦所逼迫

拔濟饒益者	安住此法堂	不離一坐處
普現眾生前	如明淨日月	除滅魔鈎餌
佛子住此堂	哀愍諸羣生	出無量化身
充滿諸法界	佛子住此堂	徧遊諸世界
一切如來所	無量無數劫	無依入此堂
稱量佛境界	無量無數劫	其心無厭倦
佛子住此堂	念念入諸定	一一三昧門
顯現佛境界	佛子住此堂	覺了一切刹

三世一切劫	眾生佛名號	佛子住此堂
諸劫爲一念	遠離妄想惑	隨順於眾生
佛子住此堂	修習諸三昧	一一心念中
了達三世法	佛子住此堂	一處加趺坐
普現一切刹	一切諸趣中	佛子住此堂
悉飲佛法海	深入智慧海	超度功德海
無礙智思量	三世無數刹	諸劫諸如來
無數眾生類	佛子住此堂	常於一念中

了知於三世 諸佛刹成敗 善知諸最勝
所修諸行願 并眾生諸根 修習佛境界
一一微塵中 見一切劫刹 諸佛及眷屬
一切眾生類 佛子住此堂 常觀一切法
眾生刹世劫 皆悉無自性 觀察眾生等
法等如來等 願等世界等 三世悉平等
佛子住此堂 教化諸羣生 供養諸如來
思惟諸法界 無量智慧業 滿足諸大願

無數劫演說 不可得窮盡 一切諸佛子

具足無量德 安住此法堂 我合掌敬禮

諸佛之長子 彌勒無礙行 我今合掌禮

唯願慈矜憫

大方廣佛華嚴經卷第五十八


音釋

吒陟駕切 柁徒我切 慵力董切 悞郎計切

誦補闕真言

南無三滿哆。沒馱喃。阿鉢囉帝。喝多折。折捺彌。唵。雞
彌。雞彌。怛塔葛塔喃。末瓦山。矻鉢囉帝。烏怛摩怛摩。
怛塔葛塔喃。末瓦吽。發莎訶。舉字母讚
華嚴字母。眾藝親宣。善財童子得真傳。秘密義幽玄。
功德無邊。唱誦利人天。

左○臧增宗租遭災賫津錢浸簪叟左
那○囊能濃奴孫痴泥年難証南窈那
邏○郎楞籠盧勞來黎隣闌林藍婁邏



時普願法界眾生入般若波羅蜜門
 四十二字妙陀羅。字字包含義理多。
 婆功德大法界沐恩波。

左	那	邏
---	---	---

梵韻滿娑

四生九有同登華藏玄門。八難三塗共入毘盧性海。
 南無華嚴海會佛菩薩

三稱

大方廣佛華嚴經卷第五十九

東晉天竺三藏佛陀跋陀羅等譯

入法界品第三十四之十五

爾時善財讚歎樓觀諸菩薩已。合掌恭敬供養禮訖。於門下立。欲見彌勒菩薩。爾時遙見彌勒菩薩與無量天龍夜叉乾闥婆阿脩羅迦樓羅緊那羅摩睺羅伽人非人等大眾圍繞。從外而來。威德特尊。普照一切。不染世法。超出一切世間眾魔境界。滅諸障礙。深

入如來菩薩境界。供養諸佛。等諸佛法。冠解脫繒淨妙天冠。住大智網。於諸佛所得一切智。甘露灌頂。生諸佛法。得薩婆若。爾時善財頭面敬禮。一心合掌。白言。大聖。云何菩薩學菩薩行。修菩薩道。既修學已。具一切佛法。隨所請眾生。悉令度脫。成就大願。究竟一切菩薩所行。安慰一切諸天世人。不負本心。不違三寶。不欺天人。不罔眾生。不斷佛種。持菩薩家。如來正法。如是等事。唯願演說。爾時彌勒觀察大眾。指善財

言汝等見是童子。問菩薩行。具足一切功德者。不此童子者。勇猛精進。專求實義。以正直心。得不退轉。常修勝法。心無厭足。如救頭然。求善知識。親近供養。聞法受持。此童子者。昔於頻陀伽羅城。受文殊師利教。求善知識。展轉經由一百一十諸善知識。問菩薩行。心無疲倦。次來我所。如是童子學大乘者。甚爲希有。成滿大願。能辦大事。具大莊嚴。常以大慈救護眾生。起大精進。波羅蜜。示導大眾。乘大法船。度生死海。令

住大道得大法寶長養大智。如是之人難得聞見親
近共住。同行亦難。何以故。此童子者發心救護一切
眾生。除滅眾苦惡道諸難。邪見險路愚癡之闇。超出
生死。壞一切趣輪。度魔境界。於一切世間無所染著。
出欲泥。解貪縛。除邪倒。摧慢幢。拔使刺。發諸蓋。裂愛
網。滅無明。竭有流。離諂幻。淨心垢。釋疑惑。度無智海。
厭生死苦。乘大法船。濟四使流。於大愛河。造智慧橋。
愚癡闇中。然智慧燈。於生死路。示以正道。煩惱病者。

令服法藥。生老死者。授甘露法。三毒盛者。滅以定水。令得清涼。諸憂怖者。施以無畏。三有獄者。開以智門。邪見縛者。斷以慧劍。住三界城。開解脫門。在危險者。示安隱處。懼結賊者。施以無畏。墜三惡漸者。俯接令出。爲陰賊害者。置涅槃城。著眾生者。示八正道。住六入空聚者。拯以慧明。失津要者。示以正濟。近惡知識者。令親善友。樂童蒙者。誘以聖法。樂住生死宅者。普令超入一切智城。救護一切眾生之類。不捨清淨求。

菩提心。積集大乘心。無疲倦。飲正法雨。而無厭足。勇
猛究竟諸功德事。淨諸法門。修菩薩行。心無疲懈。不
退方便。出生大願。見善知識。心樂無厭。奉給所爲。隨
順其教。不以爲苦。諸善男子。世間有能發起無上菩
提心者。甚爲希有。若發心已。如是精進求佛法者。亦
甚希有。如是樂欲淨菩薩道。具菩薩行。不惜身命。求
善知識。不違其教。集菩提分。不貪利養。不捨菩薩正
直之心。不著家業。不染五欲。不戀父母。及諸親族。但

樂專修一切種智。如是之人倍復希有。諸善男子。若有菩薩如是學者。則能究竟菩薩所行。成滿大願。近佛菩提。淨一切刹。教化眾生。深入法界。具足一切諸波羅蜜。廣菩薩行。畢本意性。出於魔業。值遇一切諸善知識。於一生中能具普賢菩薩諸行。此童子者。入威儀海。諸智慧海。修菩提海。菩薩行海。成滿一切諸佛願海。詣諸刹海。見諸佛海。入眷屬海。行供養海。聞正法海。飲妙法海。成滿一切菩薩力海。顯現一切自

在力雲。一切眾生無不見者。滅一切煩惱處。入一切佛處。入諸法門處。入諸三昧處。住諸通明處。遊行法界處。如日月出照一切眾生處。不依諸相。如虛空中鳥。常樂寂靜。無壞法門。徧遊因陀羅網世界。諸佛世界。如風無礙。深入法界。現諸世間。見三世佛。心大歡喜。踊躍無量。隨諸佛教。爲聖法器。得諸法門。具菩薩行。現自在力。善財。汝今得最大利。於無量劫難聞見者。汝悉聞見。知彼功德。所謂得見文殊師利。積無量

德遠離一切險難惡道。安住正法。過童蒙地。住諸菩薩功德之地。具智慧地。得諸佛地。菩薩行海。成滿虛空等諸佛智藏。專求無量諸妙功德。心無厭倦。若能如是堅直心者。則能樂求諸善知識。具菩薩行教化。眾生具不思議清淨之信。諸妙功德正法義者。悉得覩見一切佛子。善財。汝今獲大善利。次第覩見諸佛真子。隨彼自說願行所得。汝從聞已。皆悉具得。如是行者。於無量劫之所難辦。以是因緣。諸佛子等次第。

爲說難聞見者。汝悉聞見。從彼聞法。現自在力。爲一切佛之所護念。菩薩所攝。隨順彼教。得大善利。長養一切諸菩薩性。學諸功德。不斷佛種。常爲諸佛甘露灌頂。不久當與諸佛子等。隨前眾生。因其修善。皆悉令獲勝妙果報。善財。汝應發大歡喜。不久當得大果報。故無量菩薩於無數劫修菩薩行。汝今一生皆悉具得。皆由直心精進力故。其有欲得如是法者。當如善財之所修學。便得究竟諸菩薩行。滿一切願。達一

切法。譬如慶雲隨所覆處。能降甘澤。隨智慧願。具菩薩行。亦復如是。善財當知。我所顯說。皆是普賢菩薩所行。應當了知。近善知識。過去諸佛。專求菩提。修習此行。於無量劫。諸有爲中。受無量苦。猶不值遇。過去諸佛。不具是行。善財。汝今皆得成就。聞諸佛法。行菩薩行。其有眾生。聞是行者。得大善利。成滿大願。親近諸佛。爲佛眞子。必成佛道。清淨解脫。除滅諸惡。遠離眾苦。積集功德。清淨法身。遊行十方。見諸如來菩薩。

大眾長養善根。如水蓮華。值遇諸佛。聞持正法。安住
佛道。具諸佛願。究竟諸佛功德彼岸。爾時彌勒告善
財言。汝可往詣文殊師利。問諸法門智慧境界。普賢
所行。彼當爲汝分別演說。爾時善財聞是語已。悲泣
流淚。文殊師利卽時伸臂。遙授善財華寶纓絡。善財
得已。歡喜供散。彌勒菩薩。彌勒菩薩卽以右手摩善
財頂。讚言善哉。善哉。佛子。汝亦不久當與我等。爾時
善財踊躍無量。以偈頌曰。

無量無數劫 難得見聞者 我今得奉覲
無上善知識 文殊我所尊 究竟功德岸
蒙見善知識 願速還親近

爾時善財五體敬禮彌勒菩薩合掌白言大聖我已
先發阿耨多羅三藐三菩提心而未知菩薩云何學
菩薩行修菩薩道大聖今者已爲諸佛授一生記證
於菩薩離生正法住菩薩住究竟一切諸波羅蜜具
足一切諸法忍門成就菩薩一切諸地自在遊戲一

切法門。得一切三昧。到於菩薩隨所至趣。逮得一切陀羅尼辯才方便光明。具足成就菩薩自在。積集一切助菩提分遊戲巧方便慧。得一切通明。隨所修學。悉已究竟菩薩諸行。具一切願。知諸乘門。持如來持。攝佛菩提。守護一切諸佛法藏。出生智寶菩薩功德。如來密教。常爲菩薩大眾上首。爲煩惱賊所逼迫者。以勇猛力。能爲推滅。令得安隱。生死曠野迷正路者。示以正道。煩惱患者。治以良醫。諸眾生尊。爲天中天。

爲無上聖勝。出二乘。生死海者。爲作導師。而度脫之。
張大教網。縲生死海。諸調伏者。攝而取之。長養善根。
安立菩薩。於無礙乘。究竟一切諸菩薩事。住諸佛所。
唯願大聖。爲我演說。云何菩薩學菩薩行。修菩薩道。
爾時。彌勒菩薩摩訶薩。觀察善財。指示大眾。歎其功
德。以偈頌曰。

善財童子者 淨直心智慧 專求菩薩行
而來至我所 善來大悲雲 能雨甘露法

具足三淨眼	菩薩行無厭	善來正直心
精進無懈怠	諸根悉調伏	專求菩薩行
善來無壞行	常求善知識	了達一切法
教化諸羣生	善來清淨道	安住功德路
勇猛精進力	逮得最勝地	善來難見者
諸佛功德子	增長諸善根	深入無量境
善來平等者	利衰及毀譽	苦樂世間法
其心無所染	善來安樂者	直心離諂曲

除滅於憍慢 瞋恚放逸法 善來最勝藏
觀察一切眾 長養功德藏 其心無疲倦
善來三世智 圓滿諸法界 了佛功德藏
其心無疲倦 善來妙蓮華 增長名稱雲
諸佛子教來 我示無礙趣 成就智慧網
了達不思議 廣修菩薩行 教化諸羣生
專求佛菩提 修習離垢行 聞持諸大願
至此無疲倦 去來現在佛 所成諸行業

善財欲修學	故來至我所	志求真法師
演說正道法	善教菩薩者	故來至我所
佛子修智慧	具足於菩提	親近善知識
故來至我所	眾生慈父母	長養諸功德
究竟菩提道	故來至我所	生老病死者
無上良醫王	眾生之釋天	雨甘露法藥
眾生明淨日	普照諸正道	眾生之淨月
功德圓滿故	譬如須彌山	怨親心不動

猶如大海水 未曾有增減 猶如海導師
度脫無量眾 一切無所著 故來至我所
勇猛精進力 拯救諸眾生 悉令得安樂
專求善知識 建立正法幢 顯現佛功德
除滅惡道苦 開諸善趣門 能詣諸導師
覩見佛妙身 聞持彼密教 專求黠慧師
欲具妙智色 託生種姓家 究竟諸功德
故來至我所 無比正直心 親近善知識

聞其所說教	皆悉能奉行	因昔無量德
文殊令發心	隨順其教命	專求佛菩提
捨天宮家屬	父母諸親戚	世間一切樂
謙苦求知識	如是清淨行	於此命終已
得諸勝妙果	升入佛法堂	善財見眾生
生老病死苦	爲發大悲心	專求佛菩提
見五道輪轉	眾苦所逼迫	修智金剛輪
壞散苦趣輪	眾生田荒穢	貪恚邪見刺

普照眾生類	善財爲一切	造立大法船	除滅諸恐怖	摧滅煩惱賊	忍辱爲密鎧	盲冥失正路	爲淨修治故
善財爲覺月	法界中淨日	越度爾燄海	令置安隱處	善財勇猛力	執持慧利劍	善財爲導師	專求利智犁
妙法悉圓滿	以願智慧光	令住淨寶洲	善財爲海師	普爲三界眾	乘於三脫門	慧光示正道	眾生處癡闇

慈定清涼光	滅諸煩惱熱	善財智海依
直心金剛地	菩薩行漸深	出生妙法寶
菩提心龍王	升於法界空	興雲雨甘露
長養白淨果	淨信心爲炷	慈悲爲香油
正念爲寶器	然彼耀世燈	道心迦羅邏
慈悲爲胞胎	菩提分肢節	長養如來藏
增益功德藏	清淨智慧藏	熾盛智慧藏
成滿諸願藏	如是大莊嚴	救護諸羣生

一切天人中	難聞難得見	如是智慧樹
根深不可動	方便爲敷茂	饒益諸羣生
欲聞一切法	除滅諸疑惑	具足妙功德
專求善知識	摧滅煩惱魔	消滅邪愛垢
悉令得解脫	專求智慧者	安住功德道
究竟滅三塗	開示諸善趣	令具涅槃道
顯現八正路	除滅諸邪見	壞裂煩惱網
消竭愛欲海	善財明淨日	普照羣萌類

能爲調御師	拯濟三有眾	覺悟於一切
永出五欲泥	除滅虛妄想	爲開解脫門
分別諸法界	嚴淨如來刹	究竟一切法
善財應歡喜	勇猛修方便	信心不可壞
積集妙功德	成滿諸大願	不久見諸佛
了達一切法	嚴淨諸佛刹	成就佛菩提
隨順威儀海	究竟諸行海	度脫於一切
無量眾生海	出生諸善法	具足妙功德

與諸佛子等	圓滿解脫法	成滿諸大願
降伏一切魔	具足清淨業	除滅諸煩惱
成就一切智	了達甚深法	除滅諸羣生
煩惱眾苦患	一切眾生輪	回流生死輪
為轉淨法輪	除滅眾苦輪	守護佛種姓
淨修法種姓	攝取僧種姓	了三世種姓
成滿大願網	壞散邪見網	斷裂諸愛網
決破眾苦網	成就直心性	具足智慧性

嚴淨世界性	度脫眾生性	善財令一切
無量諸羣生	諸佛及菩薩	皆悉大歡喜
善財淨慧光	普照諸刹法	一切眾生類
皆見無量佛	照明諸世界	清涼眾生界
遠離於惡道	除滅三有苦	令眾離邪道
顯現諸善道	修習八正道	安立解脫道
普令諸羣生	度脫生死海	除滅諸煩惱
安住功德海	消竭煩惱海	令度三有海

諸根悉調伏 不染於世間

爾時彌勒菩薩以如是等讚歎善財諸妙功德。令無量眾生發道心。已告善財言。善哉善哉。童子。乃能發阿耨多羅三藐三菩提心。專求一切佛法。饒益一切世間救護一切眾生善男子。汝得善利。人身壽命。值遇諸佛。得見文殊師利大善知識。汝爲法器。善根潤澤。長清白法。淨勝欲性。爲善知識之所總攝。諸佛護念。何以故。菩提心者。則爲一切諸佛種子。能生一切

諸佛法故。菩提心者則爲良田。長養眾生白淨法故。
菩提心者則爲大地。能持一切諸世間故。菩提心者
則爲淨水。洗濯一切煩惱垢故。菩提心者則爲大風。
一切世間無障礙故。菩提心者則爲盛火。能燒一切
邪見愛故。菩提心者則爲淨日。普照一切眾生類故。
菩提心者則爲明月。諸白淨法悉圓滿故。菩提心者
則爲淨燈。普照一切諸法界故。菩提心者則爲淨眼。
悉能覩見邪正道故。菩提心者則爲大道。皆令得入。

一切智城故。菩提心者則爲正濟。悉令得到出要處。故菩提心者則爲大乘容載。一切諸菩薩故。菩提心者則爲門戶。令入一切菩薩行故。菩提心者則爲宮殿。安住修習三昧法故。菩提心者則爲園觀。於中遊戲受法樂故。菩提心者則爲勝宅。一切眾生所歸依故。菩提心者則爲依止。因修一切菩薩行故。菩提心者則爲守護。能滿菩薩諸大願故。菩提心者則爲慈母。增長一切諸菩薩故。菩提心者則爲養育。守護一

切諸菩薩故菩提心者則爲善知識離一切惡諸恐
怖故菩提心者則爲大王勝諸聲聞緣覺心故菩提
心者則爲最勝成滿一切無比願故菩提心者則爲
大海悉能容受諸功德故菩提心者則爲須彌山王
等觀眾生心不動故菩提心者則爲金剛圍山攝持
一切諸眾生故菩提心者則爲雪山長養智慧清涼
藥故菩提心者則爲香山出生一切功德香故菩提
心者則爲虛空諸妙功德無邊際故菩提心者則爲

蓮華不染一切世間法故。菩提心者則爲寶象。悉能調伏一切根故。菩提心者則爲寶馬。遠離諸惡。懽悵法故。菩提心者則爲調御師。悉能守護摩訶衍故。菩提心者則爲良藥。療治一切煩惱病故。菩提心者則爲沃焦。消盡一切不善法故。菩提心者則爲金剛。壞散一切諸惡法故。菩提心者則爲和香。出生一切功德香故。菩提心者則爲妙華。一切世間所愛樂故。菩提心者則爲白梅檀。除滅五欲諸熱病故。菩提心者

則爲樂器。微妙音聲。聞法界故。菩提心者則爲勇健。
摧滅煩惱。諸怨敵故。菩提心者則爲善鑷。拔出一切。
煩惱刺故。菩提心者則爲尊主。於餘一切莫能勝故。
菩提心者則爲毗沙門天王。捨離一切諸貧苦故。菩
提心者則爲妙德。莊嚴一切諸功德故。菩提心者則
爲莊嚴具。嚴飾一切諸菩薩故。菩提心者則爲火災。
焚燒一切有爲法故。菩提心者則爲無壞藥。王樹根。
長養一切諸佛法故。菩提心者則爲龍珠。除滅無量。

煩惱毒故。菩提心者則爲水珠淨諸心垢煩惱濁故。
菩提心者則爲如意珠具足一切功德利故。菩提心
者則爲天德瓶滿足一切所欲樂故。菩提心者則爲
劫初樹出生一切莊嚴具故。菩提心者則爲恆娑相
衣不受一切諸塵垢故。菩提心者則爲正業本性淨
故。菩提心者則爲利犁修治一切眾生田故。菩提心
者則爲那羅延箭悉能鑿徹身見鎧故。菩提心者則
爲厭離決定了知苦患相故。菩提心者則爲利稍能

刺一切煩惱賊故。菩提心者則爲甘露雨。能滅一切煩惱火故。菩提心者則爲利劍。斬除一切煩惱惡故。菩提心者則爲金槌。壞散一切憍慢山故。菩提心者則爲利刀。斬截七使煩惱鎧故。菩提心者則爲勇健幢。傾倒一切諸魔幢故。菩提心者則爲鉞斧。斫伐無知諸苦樹故。菩提心者則爲器械。防護一切諸艱難故。菩提心者則爲善手。防護一切諸度身故。菩提心者則爲妙足。安立一切諸功德故。菩提心者則爲眼。

藥除滅一切無明翳故。菩提心者則爲善拔刺。悉能
拔出身見刺故。菩提心者則爲安隱牀。除滅一切生
死苦牀故。菩提心者則爲善友。度脫無量生死難故。
菩提心者則爲善利。遠離一切衰耗法故。菩提心者
則爲天人師。善知菩薩出要道故。菩提心者則爲寶
藏。無量功德不可盡故。菩提心者則爲涌泉。清冷智
慧無窮盡故。菩提心者則爲淨鏡。顯現一切諸法門
故。菩提心者則爲淨池。洗濯一切諸垢穢故。菩提心

者則爲大河流引諸度四攝法故。菩提心者則爲龍
王。悉能普雨甘露法故。菩提心者則爲命根。任持菩
薩大悲法故。菩提心者則爲甘露。能令安住不死法
故。菩提心者則爲羅網。網取一切所應化故。菩提心
者則爲善罽。攝取一切諸眾生故。菩提心者則爲鉤
餌。鈎出生死淵居眾生故。菩提心者則爲阿伽陀藥。
除滅一切諸惡患故。菩提心者則爲波羅提毗叉藥。
悉能療治五欲毒故。菩提心者則爲大池。消滅無量

邪想水故。菩提心者則爲大風輪壞散一切諸障蓋。故菩提心者則爲寶洲。出生道品功德寶故。菩提心者則爲種姓。長養一切白淨法故。菩提心者則爲居宅。納受一切功德寶故。菩提心者則爲大城。菩薩商人所住處故。菩提心者則爲金藥。消煩惱垢令清淨故。菩提心者則爲香蜜。具足一切功德味故。菩提心者則爲正道。令人一切智城故。菩提心者則爲寶器。容受一切白淨法故。菩提心者則爲時澤。悉能除滅。

煩惱塵故。菩提心者則爲安住。出生菩薩之所住故。菩提心者則爲壽行。不取聲聞諸解脫故。菩提心者則爲瑠璃寶。其性淨妙不受垢故。菩提心者則爲伊尼羅寶。勝諸聲聞緣覺智故。菩提心者則爲法鼓。覺悟煩惱長寢眾生故。菩提心者則爲淨水。其性清淨無垢濁故。菩提心者則爲閻浮檀金。令有爲善如聚墨故。菩提心者則爲山王。超出一切諸世間故。菩提心者則爲歸依。悉能救護諸眾生故。菩提心者則爲

實義遠離一切虛妄法故。菩提心者則爲無上寶。悉令歡喜得滿足故。菩提心者則爲大會隨彼所須。令充悅故。菩提心者則爲尊長。於諸眾生無倫匹故。菩提心者則爲寶藏。受持一切諸佛法故。菩提心者則爲因陀羅網。攝諸煩惱阿脩羅故。菩提心者則爲毗樓那風。震動教化眾生心故。菩提心者則爲因陀羅火。焚燒一切煩惱習故。菩提心者則爲無上塔。一切天人應供養故。佛子。菩提心者如是無量功德成就。

悉與一切諸佛菩薩諸功德等。何以故。因菩提心。出生一切諸菩薩行。三世諸佛成正覺故。善男子。譬如有人得自在藥。離五恐怖。何等爲五。所謂火不能燒。水不能漂。毒不能中。刀不能傷。熏不能害。菩薩摩訶薩亦復如是。發菩提心。攝薩婆。若離五恐怖。何等爲五。所謂不爲欲火所燒。諸有流水所不能漂。瞋恚惡毒所不能中。煩惱利刀所不能傷。邪覺觀煙熏不能害。善男子。譬如有人得解脫藥。終不橫死。菩薩摩訶

薩亦復如是。得菩提心妙智慧藥。生死過患所不能害。善男子。譬如有人得龍王藥。若有毒蟲聞其藥氣。卽避遠去。菩薩摩訶薩亦復如是。得菩提心大龍王藥。一切煩惱諸惡毒蟲。聞其藥氣。皆悉散滅。善男子。譬如有人得不可壞藥。一切怨敵不得其便。菩薩摩訶薩亦復如是。得菩提心不壞法藥。一切煩惱諸魔怨敵所不能壞。善男子。譬如有人得頻伽陀藥。能出毒刺。菩薩摩訶薩亦復如是。得菩提心頻伽陀藥。能

出三毒諸邪見刺。善男子。譬如有人得善見藥王。滅一切病。菩薩摩訶薩亦復如是。得菩提心。善見藥王。滅一切眾生諸煩惱病。善男子。譬如刪陀那大藥王樹。其有眾生在彼樹蔭。身諸惡瘡皆得除愈。菩薩摩訶薩亦復如是。得菩提心。刪陀藥樹。其有眾生依蔭此樹。一切煩惱不善業瘡皆得除愈。善男子。譬如藥王樹。名無壞根。以其力故。長養一切閻浮提樹。菩提心樹亦復如是。以其力故。長養一切學無學菩薩善

根善男子。譬如藥草名阿藍婆。若用塗體身得柔澤。意離諸惡。菩薩摩訶薩亦復如是。得菩提心阿藍婆。藥長身口意諸善行業。善男子。譬如有人得念力藥。有所聞法終不忘失。菩薩摩訶薩亦復如是。得菩提心念力藥者。聞持一切佛法不忘。善男子。譬如有人有藥名曰蓮華。其有服者。住壽一劫。菩薩摩訶薩亦復如是。服菩提心蓮華藥者。阿僧祇劫而得自在。善男子。譬如有人執翳身藥。一切眾生所不能見。菩薩摩訶

薩亦復如是。得菩提心翳身藥者。一切諸魔所不能見。善男子。譬如大海有摩尼寶。名積眾寶。若不至他方。設火災起。乃至消滅海水。一滴無有是處。菩提之心。積眾寶珠。亦復如是。處於菩薩直心海中。乃至以一善根。回向薩婆。若有忘失者。無有是處。而薩婆若無所染著。不離善根。善男子。譬如摩尼名淨光明。有人以此纓絡身者。蔽於寶光。悉如聚墨。菩薩摩訶薩亦復如是。以菩提心摩尼寶珠。纓絡其身。映蔽聲聞。

緣覺心寶善男子。譬如水珠置濁水中。水卽澄清。菩提心珠亦復如是。除滅一切煩惱垢濁。善男子。譬如有人得住水寶珠。纓絡其身。入深水中而不沒溺。菩薩摩訶薩亦復如是。得菩提心住水寶珠。入生死海而不沈沒。善男子。譬如有人得大龍寶珠。往到龍所。龍不爲害。菩薩摩訶薩亦復如是。得菩提心大龍寶珠。入欲界中。煩惱惡龍所不能害。善男子。譬如帝釋有摩尼寶。纓絡其身。於天中尊。菩薩摩訶薩亦復如

是著菩提心寶纓絡者。悉於一切三界中尊。善男子。譬如有人得隨意珠。除滅一切貧窮困苦。菩薩摩訶薩亦復如是。得菩提心隨意寶珠。除滅一切邪命貧苦。善男子。譬如火珠。因日光發。能出猛燄。得菩提心明淨火珠。亦復如是。因大慧光所感發。故出智慧火。善男子。譬如月珠。因月光發出清涼水。得菩提心淨月寶珠。亦復如是。因彼同向善根月光所感發。已出生善根諸大願水。善男子。譬如龍王著如意寶冠。遠

離恐怖。菩薩摩訶薩亦復如是。著菩提心。大悲如意。寶冠遠離一切惡道諸難。善男子。譬如莊嚴一切眾生藏。摩尼寶悉能成滿一切所願。無所損滅。得菩提心。妙莊嚴藏。摩尼寶珠成滿。菩薩及餘眾生所欲願樂。無所損滅。善男子。譬如轉輪王有摩尼寶。普照宮殿。滅一切闇。菩薩摩訶薩亦復如是。得菩提心。摩尼寶者。悉能普照五趣宮殿。滅一切闇。善男子。譬如有人爲紺色寶。光明所觸。卽同其色。菩薩摩訶薩亦復

如是得菩提心紺色寶光觀察諸法善根回向同薩婆若色善男子。如瑠璃寶於百千歲處不淨中不爲所染。菩提之心淨瑠璃寶亦復如是。於百千劫住欲界中不爲五欲之所染汙。其性淨故善男子。如離垢光淨摩尼寶。出一切寶。菩提之心離垢光寶亦復如是。出生凡夫聲聞緣覺菩薩諸佛功德珍寶。善男子。譬如大摩尼寶。悉能除滅一切諸闇。菩提心寶亦復如是。除滅一切無知闇冥。善男子。譬如大海有無價

寶商人船車載之入城。餘摩尼寶無與等者。菩提之心無價寶珠亦復如是。處生死海。菩薩摩訶薩以大願船載入解脫城。聲聞緣覺諸功德寶所不能及。善男子。譬如離垢大摩尼寶。處閻浮提。能照四萬由旬。日月宮殿皆悉顯現。菩提之心離垢寶珠亦復如是。住於生死。照法界空。佛境宮宅悉令顯現。善男子。譬如摩尼風王能持日月所照境界。所有香華一切品類。菩提之心摩尼風王亦復如是。悉能攝持一切種。

智所照境界一切天人聲聞緣覺諸佛菩薩及諸有漏無漏善根善男子譬如海中有摩尼寶名曰海藏顯現海中諸莊嚴事菩提之心海藏寶珠亦復如是顯現一切智境界諸莊嚴事善男子譬如閻浮檀金除如意寶勝一切寶菩提之心閻浮檀金亦復如是除一切智勝諸功德善男子譬如有人善能呪龍於諸龍中而得自在菩薩摩訶薩亦復如是得菩提心善呪術法於一切煩惱龍中而得自在善男子譬如

勇士被執鎧杖。一切怨敵所不能壞。菩薩摩訶薩亦復如是。被菩提心大莊嚴具。一切煩惱諸魔怨敵所不能壞。善男子。譬如曼陀伽婆羅梅檀。若燒一銖。香氣普熏小千世界。三千大千世界珍寶所不能及。菩提心香亦復如是。以妙功德普熏法界。一切聲聞緣覺功德所不能及。善男子。譬如白梅檀。以塗其身。除諸惱熱。得清涼樂。菩提心香亦復如是。除滅覺觀貪恚癡熱。令智慧身悉得涼樂。善男子。譬如須彌山眾。

生品類近彼山者悉同其色。菩提心山亦復如是。若有近者皆得同彼薩婆若色。善男子。譬如波利質多樹華香。閻浮提中諸婆斯華。瞻蔔華等所不能及。菩提心香亦復如是。妙功德香。聲聞緣覺無漏戒定智。慧解脫。解脫知見所不能及。善男子。譬如波利質多樹華未開敷時。其香普熏閻浮提內。一切華香所不能及。菩提心華亦復如是。一切天人有漏無漏功德。華香所不能及。善男子。譬如波利質多樹華一日熏

衣瞻蔔華婆師華雖千歲熏所不能及。菩提心華亦復如是。一日所熏功德香徹十方佛所一切聲聞緣覺以無漏心熏諸功德於百千劫所不能及。善男子。譬如那利羅樹根莖枝葉及其華果悉益眾生。菩提心樹亦復如是。因於菩薩大慈悲生。從初發心乃至究竟一切佛法常能饒益一切眾生。善男子。譬如一兩阿羅娑藥變千兩銅以爲真金。於彼藥分無所損減。菩提心藥亦復如是。攝回向智除滅一切煩惱業。

障淨一切法。同薩婆若色。煩惱惡業不能損滅。譬如
小火。隨所焚燒。其燄轉盛。菩提心火亦復如是。隨所
緣法。慧火猛盛。譬如一燈燃百千燈。無所損滅。菩提
心燈亦復如是。悉然三世諸佛。慧燈無所損滅。譬如
明燈入大闇室。悉能照除一切闇冥。菩提心燈亦復
如是。入心闇室。於無量劫。積集癡闇。悉能除滅。具足
菩薩明淨智慧。譬如燈炷。隨其精麤。光明亦爾。若益
膏油。光明轉增。菩提心炷亦復如是。隨其本願。出智

慧光普照法界。增大悲油。教化眾生。淨佛世界。行諸佛事。無有窮盡。譬如他化自在天王冠。閻浮檀金自然天冠。欲界諸天所不能壞。菩薩摩訶薩亦復如是。冠菩提心大願天冠。聲聞緣覺所不能壞。譬如大師子吼。小師子聞皆悉勇健。一切禽獸遠避竄伏。佛師子吼。諸菩薩等若聞讚歎菩提心聲。長養法身。妄見眾生潛伏退散。譬如有人用師子筋以爲琴弦。音聲旣奏。餘弦斷絕。一切如來波羅蜜身出菩提心功德。

音聲若樂五欲二乘法者聞悉斷滅譬如牛馬羊乳
合在一器以師子乳投彼器中餘乳消盡直過無礙
如來師子菩提心乳著無量劫所積諸業煩惱乳中
皆悉消盡不住聲聞緣覺法中譬如迦毗伽鳥在殼
中時有大勢力餘鳥弗及菩薩摩訶薩亦復如是於
生死殼發菩提心功德勢力聲聞緣覺所不能及譬
如金翅鳥初始生時其目明淨有大勢力大小諸鳥
所不能及菩薩摩訶薩亦復如是生如來家發菩提

心慧眼明淨有大勢力。聲聞緣覺於百千劫修習智
慧所不能及。譬如健士以那羅延金剛利箭射堅密
鎧直過無礙。菩薩摩訶薩亦復如是。以菩提心智慧
利箭射諸邪見煩惱密鎧。徹過無礙。譬如摩訶那伽
大力勇士奮威怒時。閻浮提人無能壞者。菩薩摩訶
薩亦復如是。發大慈悲修菩提心。一切世間諸魔眷
屬及煩惱業所不能壞。譬如有人學大技術。雖未究
竟。諸餘巧能所不能及。菩薩摩訶薩亦復如是。學菩

提心願。雖未究竟。聲聞緣覺諸餘眾生所不能及。譬如有人學善射術。先自安立。菩薩摩訶薩亦復如是。學一切智地。先自安立菩提之心。必得一切佛法。譬如幻師先讀幻術。然後示現一切幻事。菩薩摩訶薩亦復如是。發菩提心。然後顯現一切諸佛菩薩正法。譬如幻術非色現色。菩提心相亦復如是。顯現法界功德莊嚴。譬如有人著閻浮檀金莊嚴之具。映蔽一切悉如聚墨。菩薩摩訶薩亦復如是。以菩提心莊嚴。

之具蔽諸眾生聲聞緣覺所有功德譬如阿夜犍多鐵此鐵少分悉能毀壞一切餘鐵諸鈎鎖縛菩提之心亦復如是斷諸邪見煩惱愛縛譬如疾風隨去無礙菩提心風亦復如是隨所行處除諸煩惱悉無障礙不住聲聞緣覺解脫譬如有人善入大海而不沒溺摩伽羅魚所不能害菩薩摩訶薩亦復如是以菩提心入生死海不爲生死之所染汙亦不證實際聲聞緣覺摩羅伽魚所不能害譬如有人服食甘露一

切眾患所不能害。菩薩摩訶薩亦復如是。服菩提心
甘露法藥。不墮聲聞緣覺之地。修習大悲。滿足願行。
譬如有人用翳身藥。以塗其目。自在遊行。無能見者。
菩薩摩訶薩亦復如是。得菩提心。滿足大願。自在遊
行。入魔境界。一切眾魔所不能見。譬如有人依恃大
王。不畏餘人。菩薩摩訶薩亦復如是。依菩提心。大力
法王。除滅障蓋。不畏惡道。譬如有人居深水內。不畏
火焚。菩薩摩訶薩亦復如是。居菩提心善根水內。聲

聞緣覺解脫之火所不能燒。譬如有人依恃猛將。不
畏怨敵。菩薩摩訶薩亦復如是。依菩提心。不畏諸惡。
譬如釋天執持金剛。降伏一切諸阿脩羅。菩薩摩訶
薩亦復如是。執菩提心。摧滅諸魔及餘外道。譬如
有人服阿羅娑藥。不瘦不老。延壽無窮。菩薩摩訶薩亦
復如是。服菩提心阿羅娑藥。於無量劫。在生死中。修
菩提行。無所染著。譬如阿羅娑藥。初用淨水。菩提心
藥亦復如是。一切菩薩所修行中。最爲先首。譬如

人諸根法中。命根爲首。菩薩摩訶薩亦復如是。諸佛正法菩提之心。最爲其首。譬如有人命根斷。故不能利益父母親族。菩薩摩訶薩亦復如是。離菩提心不能饒益一切眾生。譬如大海無能壞者。菩提心海亦復如是。聲聞緣覺不能沮壞。譬如日光。諸星宿光所不能蔽。菩提心日亦復如是。圓滿大願智慧日光。聲聞緣覺無漏慧光所不能蔽。譬如太子初生。已爲大臣之所尊重。菩薩摩訶薩亦復如是。發菩提心已爲

一切聲聞緣覺所共尊重。修大悲故。譬如王子年雖幼小。一切大臣皆悉敬禮。菩薩摩訶薩亦復如是。發菩提心。聲聞緣覺皆悉敬禮。譬如王子雖未自在。已具成就國王儀相。菩薩摩訶薩亦復如是。雖爲煩惱業障所覆。已具成就菩提心相。譬如目瞽見真淨寶。謂爲不淨。菩提心寶亦復如是。無智不信。起不淨想。譬如呪藥。若有眾生見聞共住。一切眾病皆悉除愈。菩提心藥亦復如是。長養善根。攝智慧藥。滿足大願。

菩薩慧身。若有眾生見聞共住。修正念者。皆悉除滅煩惱諸病。譬如恆娑相衣不受塵垢。菩提心衣亦復如是不受一切生死塵垢。譬如有人常持甘露。專念不散。而能分別一切諸法。菩薩摩訶薩亦復如是。持菩提心甘露正法。正念不散。而能教化一切眾生。令具大願。成智慧身。譬如犁無有軛。則不堪用。菩提之心亦復如是。離正直心。於如來法無有實義。譬如轉輪王有妙天冠。名曰象藏。洗彼冠時。四種兵眾遊行。

虛空菩提心冠亦復如是。淨諸菩薩一切善根遠離。三有如來智慧無爲境界。虛空中行。譬如金剛從金性生。非餘寶生。菩提心寶亦復如是。大悲救護眾生。性生非餘善生。譬如有樹不從根生而能長養枝葉。華果菩提心樹亦復如是。無所依止而能長養一切種智。通明大願普覆世間。譬如金剛非一切器盡能發明。亦非諸器盡能容持。菩提心寶亦復如是。小心慳結無智者器不能發明。諂曲邪見眾生器中不能。

容持。譬如金剛能壞眾寶。菩提之心亦復如是。決定
了知一切諸法。譬如金剛能壞眾山。菩提之心亦復
如是。壞散一切諸邪見山。譬如金剛雖破不全。一切
眾寶猶不能及。菩提之心亦復如是。雖小懈怠。聲聞
緣覺諸功德寶所不能及。譬如破金剛猶能除滅諸
貧困苦。菩提之心亦復如是。雖復小失威儀。趣法猶
能除滅諸貧窮苦。譬如小金剛悉能破壞一切諸物。
菩提之心亦復如是。緣小境界能破一切無知癡惑。

譬如金剛非常人所得。菩提之心亦復如是。非小心
眾生之所能得。譬如金剛無智術者所不能識。菩提
之心亦復如是。無智眾生所不能識。譬如金剛無能
消滅。菩提之心亦復如是。一切諸法不能消盡。譬如
金剛器械。一切眾生乃至摩訶那伽不能執持。除那
羅延力。菩提之心亦復如是。聲聞緣覺不能受持。除
諸菩薩摩訶薩。譬如金剛器械無不鑿徹。非餘器械
之所能爲。菩提之心亦復如是。觀察三世教化眾生。

阿僧祇劫受無量苦聲聞緣覺所不能及。譬如金剛
餘不能持。除金剛地。菩提之心亦復如是。出生菩薩
行願功德聲聞緣覺所不能持。除薩婆若。正直心者。
譬如金剛器中盛水。不可燒盡。菩提之心亦復如是。
安住勝妙。向向善根。入生死趣。諸不善法不能消盡。
譬如金剛能持大地。不令墜沒。菩提之心亦復如是。
持諸菩薩一切願行。不令墜落。沒於三界。譬如金剛
於百千劫處於水中。而不爛壞。亦無變異。菩提之心

亦復如是。於無量劫處生死中。諸煩惱業不能斷滅。亦無損減。譬如金剛一切大火不能燒熱。菩提之心亦復如是。一切生死貪恚癡火不能燒熱。譬如金剛道場之座能持菩薩降伏諸魔成等正覺。餘不能持。菩提之心亦復如是。能持一切菩薩願行諸波羅蜜。諸忍諸地。回向受記。修菩提道。供養諸佛。聞法受行。一切諸心所不能持。善男子。菩提之心成就如是無量功德。若有眾生發菩提心。則具如是無量功德。是

故善男子。汝得善利。發阿耨多羅三藐三菩提心。修菩薩行。具足如是無量功德。善男子。汝先所問云何。菩薩學菩薩行。修菩薩道者。汝今入是明淨莊嚴藏大樓觀者。則能了知學菩薩行。修菩薩道。具足成就無上功德。

大方廣佛華嚴經卷第五十九


音釋

顰裂顰居縛切
裂良傑切

誦補闕真言

南無三滿哆。沒馱喃。阿鉢囉帝。喝多折。折捺彌。唵。雞
彌。雞彌。怛塔葛塔喃。末瓦山。矻鉢囉帝。烏怛摩。怛摩。
怛塔葛塔喃。末瓦吽。發莎訶。舉字母讚
華嚴字母。眾藝親宣。善財童子得真傳。秘密義幽玄。
功德無邊。唱誦利人天。

●唐騰同徒陶臺啼田檀○覃頭施
●傍朋蓬蒲袍脾毗頻槃○薺哀婆
●長澄重除桃婢池陳獅沉憾儔茶



時普願法界眾生入般若波羅蜜門

四十二字妙陀羅。字字包含義理多。

婆功德大法界沐恩波。

四生九有同登華藏玄門。八難三塗共入毘盧性海。

南無華嚴海會佛菩薩三稱



梵韻滿娑

大方廣佛華嚴經卷第六十

東晉天竺三藏佛陀跋陀羅等譯

入法界品第三十四之十六

爾時善財童子敬繞彌勒菩薩。合掌白言。唯願大聖
開樓觀門。令我得入。爾時彌勒菩薩卽彈右指。門自
然開。善財卽入。入已還閉。爾時善財觀察樓觀廣大
無量。猶如虛空。眾寶爲地。有阿僧祇窗牖。卻敵欄楯。
七寶合成。阿僧祇旛幢蓋莊嚴。阿僧祇寶纓絡垂帶。

阿僧祇大師子幢半月寶像諸寶繒綵。又阿僧祇天冠寶衣而以莊嚴。阿僧祇寶網羅覆其上。阿僧祇金鈴自然演出微妙音聲。又雨無量寶華鬘雲諸妙香雲。雨阿僧祇細末金屑。放阿僧祇勝妙光明。普照一切。有阿僧祇異類眾鳥出和雅音。雨阿僧祇優鉢羅鉢曇摩分陀利華。出阿僧祇摩尼寶光普照一切。於樓觀內具有百千諸妙樓觀。不相障礙。莊校嚴飾。亦如上說。爾時善財覩見樓觀不可思議。眾妙莊嚴。心

大歡喜。踊躍無量。其心柔軟。離諸妄想。除滅一切愚
癡闇障。正念思惟。專求妙趣。以無礙身。恭敬作禮。禮
已。彌勒菩薩威神力。故諸樓觀中。自見其身。又見無
量自在神力。不思議事。或見彌勒隨本種姓壽命。知
識長養善根。諸劫世界。一切佛所及諸眷屬。因諸大
願。初發阿耨多羅三藐三菩提心。或見初得慈心三
昧。因以爲名。或見彌勒行菩薩行。滿足一切諸波羅
蜜。諸忍諸地。淨佛世界。見諸如來。聞法受持。守護正

法爲大法師。得無生忍。知某方處某如來所劫數多。少而得受記。或見彌勒爲轉輪王十善化世。或爲四天王。饒益一切眾生。或爲帝釋。訶責五欲。或爲夜摩天王。讚不放逸。或爲兜率天王。讚歎一生菩薩功德。或爲化樂天王。讚自在法。或爲魔王。說無常法。或爲他化自在天王。讚歎菩薩莊嚴化身。或爲梵王。讚歎四無量心。或爲阿脩羅王。調伏眷屬。入大智海。了達諸法。悉如幻化。或爲閻羅王。放大光明。普照地獄滅。

一切苦。或以肴饍飲食施與諸餓鬼。或爲畜生受種種身而爲說法。除其癡闇。或爲四天王眷屬說法。乃至爲諸梵天王眷屬說法。或爲諸龍眷屬說法。乃至爲人非人等眷屬說法。或爲聲聞緣覺及諸菩薩大眾說法。或爲發心菩薩乃至十地菩薩說法。或見讚歎初發心菩薩乃至十地菩薩功德。或見滿足一切波羅蜜。入於平等諸法忍門。廣三昧門。樂深法門。修禪三昧。出生通明。充滿一切行菩薩行。隨順世間。成。

就大願。或見與同行菩薩俱饒益眾生。或見與一生
菩薩諸佛現前受記者俱。或見彌勒於百千劫經行
誦念書寫經卷。無有懈怠。或觀法門。思惟實義。或入
諸禪。四無量心。解脫三昧。一切入等。或見出生菩薩
通明。或見正受變化三昧。一一毛孔出化身雲。所謂
天身雲。諸龍夜叉。乃至摩睺羅伽身雲。四天王身雲。
乃至梵王身雲。轉輪聖王。王子。大臣。長者。居士。聲聞。
緣覺。如來身雲。復見一一毛孔中。出一切眾生等化

身雲。或出菩薩法門。所謂讚歎菩提心功德門。檀波羅蜜門。乃至願波羅蜜門。四攝諸禪無量三昧通明。總持諸諦諸辯止觀解脫緣起念處正勤神足根力覺道聲聞緣覺二乘所行菩薩大乘諸地諸忍菩薩願行。現如是等一切法門。或於樓觀見諸如來大眾圍繞。又知諸佛家族不同。種姓不同。其身壽量劫刹教授無量法門。正法住世分別了知。皆悉不同。爾時善財諸樓觀中見一樓觀高廣嚴飾勝妙於前。包容

三千大千世界百億閻浮提百億兜率天菩薩命終
降神受胎出生遊行七步觀察十方大師子吼帝釋
梵王恭敬奉侍現童子身處宮殿中出遊園觀以薩
婆若心出家苦行現受乳糜往詣道場降伏眾魔觀
菩提樹轉正法輪升天宮殿方土劫數眷屬壽量行
菩薩行滿足大願演說正法教化眾生現分舍利皆
悉不同爾時善財自見己身在諸佛所見如是等諸
奇特事又聞樓觀諸金鈴中出不思議微妙音聲所

謂初發菩提心聲。菩薩所行諸度願聲。恭敬供養不可思議諸佛音聲。淨佛刹聲。佛法雲聲。諸莊嚴具。亦出如是微妙音聲。又聞某菩薩在某世界於某劫中。某知識化。回向善根。出生大願。於某佛所大眾之中。發菩提心聲。又聞菩薩修習諸行。劫數多少。於某刹中。成正覺聲。如是名號壽量長短。滿足大願。化眾生聲。於諸菩薩聲聞緣覺大眾之中。現般涅槃法住世聲。又聞菩薩於某世界。悉能廣行檀波羅蜜。淨持禁

戒修習忍辱發行精進入諸禪定習應智慧爲求法
故捨諸珍寶國城妻子頭目手足守護正法爲大法
師施清淨法設大法會建大法幢擊法鼓吹法螺雨
法雨興立塔廟種種莊嚴安樂眾生護佛法藏又聞
某佛在某世界於某劫中成等正覺眷屬多少壽命
長短滿足大願教化眾生聞如是等不可思議微妙
音聲身心柔軟歡喜無量卽得無量陀羅尼門辯才
門忍門精進門大願門通明門智慧門解脫門波羅

蜜門。三昧門。爾時善財於寶鏡中見諸如來及其眷屬。諸大菩薩。聲聞緣覺。淨世界。不淨世界。雜世界。或世界有佛。或世界無佛。或上中下世界。或有世界如因陀羅網。或有翻覆仰伏世界。又復覩見平正世界。悉分別知五道別異。又見無量阿僧祇諸大菩薩。經行禪定。觀察諸法。發大悲心。普覆眾生。造種種論辯。眾義趣。或書經卷。或問或答。或見出生三種回向。及諸大願。悉皆覩見如是等事。又見諸寶柱中普放無

量青黃赤白淨玻瓈色。因尼羅寶。閻浮檀金。諸光明網。又見珠纓絡中。出八功德香水。瑠璃寶中。出無量光明。又見優鉢羅。鉢曇摩。分陀利。中生諸妙華。大如車輪。華中悉見男女大小。釋梵四王。諸龍夜叉。乃至人非人等。及諸象馬。聲聞菩薩。一切眾生。種種形類。皆悉供敬。合掌禮佛。又寶樹中。悉見種種妙色之身。所謂如來身。菩薩身。天龍八部等身。釋梵天身。轉輪王身。四部眾身。各各執持眾供養具。尊重讚歎恭敬。

禮拜。又見半月像中放阿僧祇日月光明。又見彌勒於過去世修菩薩行。布施頭目髓腦手足肢節一切身分。國城妻子種種諸物。隨其所須。盡給施之。又見彌勒讚歎諸佛。恭敬供養。或爲醫王。療治眾病。失正路者。示以正道。或爲大船師。導至寶洲。或爲馬王。荷負眾生。令離鬼難。或爲論師。造諸經論。或爲轉輪王。十善化世。或見孝順父母。近善知識。不違其教。或現聲聞緣覺菩薩如來形色。教化眾生。或爲法師。讚歎

佛法禪師誦念。與諸福業。造立塔廟。諸妙形像。以香華鬘。恭敬供養。或教眾生。三歸五戒。八齋十善。出家學道。聞法受持。正念思惟。住菩提心。又見彌勒於無量劫。行六波羅蜜。化眾生事。又見彌勒無量劫中。諸善知識。爾時彌勒菩薩告善財言。善來童子。汝見樓觀諸大菩薩。不可思議。自在力不。唯然。已見。譬如有人。夢中覩見山林河池。大海須彌。諸天宮殿。四天下中。一切像類。見如是已。歡喜無量。爾時善財亦復如

是以大菩薩威神力故。遠離虛妄。見三界法皆悉如夢。菩薩智慧無礙法門。入諸菩薩莊嚴法門。究竟菩薩不可思議諸妙方便。顯現菩薩神力。自在譬如有人當命終時。見中陰相。所謂行惡業者。見於地獄畜生餓鬼。受諸楚毒。或見閻羅王持諸兵杖。囚執將去。或見刀山。或見劒樹。或見利葉。割截眾生。或見鑊湯。煮治眾生。或聞種種悲苦音聲。若修善者。當命終時。悉見一切諸天宮殿。或見天女。種種莊嚴遊戲快樂。

見如是等諸妙勝事。而不自覺死此生彼。但見不可思議行業境界。善財童子亦復如是。於樓觀內見諸菩薩不可思議勝業境界。譬如有人爲非人所持。見種種形類。若有問難。悉能應答。善財童子亦復如是。以大菩薩威神力故。悉能分別正念思惟一切諸法。譬如有人入於龍宮七日半月一歲百歲。謂爲須臾。善財童子亦復如是。入彌勒菩薩神力宮殿於百千劫。謂如須臾。譬如梵宮名莊嚴藏於中。悉見三千世

界異類形像。善財童子亦復如是。於樓觀中悉見一切未曾有事。譬如比丘得一切入定。行立坐臥。隨彼境界。悉現在前。善財童子亦復如是。於樓觀中隨彼境界。悉分別知。譬如人見乾闥婆城。無有障礙。善財童子亦復如是。於樓觀中見一切法。無有障礙。譬如有人升天宮殿。見人住處。無有障礙。譬如大海。於中悉見三千世界一切品類。譬如幻師。悉能顯現一切形色。善財童子亦復如是。於樓觀中彌勒菩薩威神。

力故悉見一切未曾有事無有障礙爾時彌勒菩薩
攝威神力卽時彈指告善財言善男子汝從定起從
定起已而告之言汝覩見此菩薩神力自在大願功
德依果菩薩莊嚴修習奇特諸深妙行出生死道一
切法門無量莊嚴諸佛大願不可思議菩薩三昧如
是等事汝悉見不善財答言唯然已見蒙善知識威
神力故爾時善財白言大聖此何法門答言入三世
智正念思惟莊嚴藏法門善男子一生菩薩得如是

等不可說不可說法門。大聖此諸奇特妙莊嚴法從何所來。答言。菩薩神力之所出生。而亦不在神力之中。不來不去。無積聚處。譬如龍雨不從身心。但以發意欲雨則雨。然彼境界不可思議。善男子。此諸奇特妙莊嚴法亦復如是。無所從來。但以菩薩神力出生。善男子。譬如幻師現種種事。無來去處。但以幻力現種種事。此諸奇特妙莊嚴法亦復如是。無來無去。無住無著。不生不滅。但學菩薩智願力故。現如是事。爾

時善財白言。大聖從何所來。答言。佛子。菩薩無來趣。無行住趣。無所著趣。不生不死趣。不住不至趣。不離不起趣。不捨不著趣。無業無報趣。無起無依趣。不常不斷趣。善男子。菩薩但爲教化救護眾生。從大慈悲來。滅眾生苦故。從菩薩淨戒道來。隨其所樂自在。生故。從菩薩大願道來。本發意故。從菩薩神通道來。滅眾生苦。住佛所故。從菩薩無增損趣來。不失身心諸善業故。從菩薩慧方便來。隨順一切眾生類故。從菩

薩化身趣來。如電鏡像故。善男子。汝所問我何所來者。我從生處摩離國來。彼有聚落名曰樓觀。有長者子。名瞿波羅。我爲說法。令立菩提。我本生處。諸羣生等。隨所應化而爲說法。亦爲父母及諸親屬。隨應說法。安立大乘。而來至此。善財白言。大聖。何等爲菩薩生處。答言。善男子。菩薩有十種生處。何等爲十。所謂菩提心是菩薩生處。生菩薩家故。正直心是菩薩生處。生善知識家故。安住諸地是菩薩生處。生諸波羅

蜜家故。出生大願。是菩薩生處。生菩薩行家故。大悲
是菩薩生處。生四攝家故。真實觀法。是菩薩生處。生
般若波羅蜜家故。摩訶衍。是菩薩生處。生方便波羅
蜜家故。教化眾生。是菩薩生處。生菩提家故。智慧方
便。是菩薩生處。生無生法忍家故。隨順諸法。是菩薩
生處。生三世諸佛家故。善男子。菩薩摩訶薩。以般若
波羅蜜爲母。大方便爲父。檀波羅蜜爲乳。尸波羅蜜
爲乳母。羸提波羅蜜爲莊嚴具。毗梨耶波羅蜜爲養

育者。禪波羅蜜爲潔淨。善知識爲師。菩提分爲朋友。一切善根爲親族。一切菩薩爲兄弟。菩提心爲家。如說修行爲家地。菩薩所住爲家處。菩薩忍法爲豪尊。出生大願爲巨富。具菩薩行爲順家法。讚摩訶衍爲紹家法。甘露灌頂。一生菩薩爲王太子。能淨修治三世佛家。佛子。如是菩薩超凡夫地。證離生法。生如來家。住佛種姓。不斷三寶。守護一切菩薩種姓。淨所生處。離諸惡道。悉爲一切天人釋梵沙門婆羅門恭敬。

供養。以生佛家。滿足一切大願藏故。佛子。菩薩摩訶
薩。生如是家。知一切法。悉如電光。一切趣中。受生無
厭。了趣如化。雖現處中。而無所著。達一切法。悉無有
我。心無憂悔。以大慈悲。教化眾生。而不疲倦。了達生
死。皆悉如夢。於一切劫。行菩薩行。而不疲懈。了知五
陰。皆悉如幻。不畏生死。知諸法界。心無所著。了一切
法。如熱時。燄於一切行。不生倒惑。遊戲幻法。超魔境
界。得淨法身。離煩惱業。於諸趣中。而得自在。無顛倒

惑善男子。我淨法身充滿一切法界。現一切眾生等色。一切眾生等音聲。一切眾生等名號。一切眾生等威儀。現一切眾生等隨順世間。現一切眾生等受生。現一切眾生等童子身。一切眾生等想。出生一切菩薩大願。爲變化身。與眾生等充滿法界。若諸同行失道心者。還令發起菩提心故。我於此閻浮提南界摩離國內。拘提聚落婆羅門家種族中生。爲欲滅彼憍慢心故。化度父母及親族。故於中受生。善男子。我於

南方隨諸眾生所應示現而化度之。於此命終生兜率天。爲欲化度彼諸天故。顯現勝妙智慧功德。消欲渴愛。令知諸行皆悉無常。天趣壽命盛必有衰。入摩訶衍。一生菩薩皆悉雲集。爲欲教化諸同行故。欲開釋迦牟尼世尊所化蓮華。現彼受生善男子。我於彼中壽終下生成正覺時。汝及文殊師利。俱得見我善男子。汝今往詣文殊師利。問云何菩薩學菩薩行。修菩薩道。具足成就普賢所行。彼當爲汝分別演說。何

以故。文殊師利滿足無量億那由他菩薩願行。常爲
無量億那由他諸佛之母。又爲無量億那由他諸菩
薩師。勇猛精進教化眾生。名稱普聞十方世界。常於
一切諸佛眾中爲大法師。悉爲諸佛之所讚歎。安住
甚深智慧法門。分別了知一切法界。於無量劫修諸
法門。究竟普賢菩薩所行。善男子。文殊師利是汝善
知識。能令汝得生如來家。長養善根。積功德聚。能示
語汝諸善知識。滿足大願。顯現一切菩薩不可思議。

功德。是故善男子。汝應一心尊重恭敬。往詣其所。何以故。汝先所見諸善知識。修菩薩行。滿足大願。得諸法門。皆由文殊師利威神力故。時善財童子頭面敬禮彌勒菩薩。繞無數而辭退而行。爾時善財童子如是經遊百一十城。到普門城邊。思惟而住。觀察十方。一心專求文殊師利。何當會遇。面奉慈顏。作是念時。文殊師利遙伸右手。過百一十由旬。至普門城。摩善財頂。而作是言。善哉善哉。善男子。若離信根。憂悔心。

沒功行不具。退失精勤。於少功德。便以爲足。於一善根。心生住著。不善發起菩薩行。不爲善知識之所攝護。不爲如來之所憶念。是等皆悉不能了知。如是法性。如是理趣。如是所行。如是所住。若周徧知。若種種知。若盡源底。若漸趣入。若解說。若分別。若證知。若獲得。皆悉不能。是時文殊師利爲善財童子。示教誨已。慰喻令其歡喜踊躍。令得成就阿僧祇法門。得無量大智光明。無量菩薩陀羅尼。無量大願。無量三昧。無

量神通。無量智慧。皆得成就。復令得入普賢所行道場之內。既置善財自所住已。文殊師利還攝不現。爾時善財得見三千大千世界微塵等諸善知識。不違其教。增長薩婆若大慈悲藏。以淨慧眼普觀眾生。安住菩薩寂靜法門。分別了知諸法境界。入佛甚深大功德海。具解脫道。長養精進。爲薩婆若修正直心。入於三世甚深法海。隨順諸佛清淨法輪。現入諸趣。於一切劫修菩薩行。滿足大願。明淨慧光照一切智境。

淨菩薩根。以淨慧光。除愚癡翳。照一切法。了達法界。一切佛刹。及諸眾生。壞障礙山。住無礙法。具足成就。諸地法藏。修習普賢菩薩所行。善財童子得聞普賢菩薩名號。行願功德。諸地地具地法地得地次第地。修地住地境界地持地共地正道。一心欲見普賢菩薩。爾時善財正念起。如來金剛藏道場。一切寶蓮華藏。師子座心。虛空界等心。一切無著心。淨一切刹無障礙心。於一切法境界無障礙心。充滿一切十方心。

得薩婆若境界無量心。莊嚴道場心。深入分別法海心。教化成熟一切眾生廣大心。於一切劫行菩薩行。究竟如來十力心。爾時善財起是心時。自善根力。佛威神力。普賢菩薩諸善根力。卽見十種瑞相。何等爲十。所謂見一切淨刹莊嚴菩提。見一切刹無諸惡道。見一切刹淨如蓮華。見一切刹一切眾生身心柔軟。見一切刹無量莊嚴。見一切刹一切眾生三十二相莊嚴其身。見一切刹莊嚴雲覆。見一切刹一切眾生。

成就慈心。見一切刹莊嚴道場。見一切刹一切眾生
皆悉修習念佛三昧。是爲十。又見十種光相。見一切
世界微塵。一一微塵中放一切如來光明網雲。與一
切世界微塵等。一一微塵中放一切佛種種色光。與
一切世界微塵等。普照法界。一一微塵中放一切寶
雲光明。與一切世界微塵等。普照法界。一一微塵中
放如來光燄輪雲。普照法界。一一微塵中出一切香
雲。普熏法界。讚歎普賢菩薩諸行。一切大願諸功德。

海。一一微塵中放一切日月光雲。放普賢菩薩光明。
普照法界。一一微塵中出一切眾生等身雲。相好莊
嚴。放佛光明。普照法界。一一微塵中出一切菩薩身
雲。究竟一切行。充滿法界。一一微塵中出一切寶形
像雲。充滿十方一切世界。一一微塵中出一切如來
身雲。與一切世界微塵等。普雨一切甘露正法。充滿
法界。是爲十。爾時善財見十種瑞相已。卽作是念。我
今必見普賢菩薩增長善根。究竟菩薩妙行。見一切

佛若見普賢菩薩得一切智想。一心恭敬欲見普賢菩薩。爾時善財卽見普賢菩薩在金剛藏道場。於如來前處蓮華藏師子之座。大眾圍繞。心如虛空。無所染著。除滅障礙。淨一切刹。以無礙法。充滿十方。住一切智。入諸法界。教化眾生。於一切劫行菩薩行。恭敬供養一切諸佛。心無退轉。於眾生中最勝最上。一切世間無能壞者。一切菩薩不能察其智慧境界。具不思議諸妙功德。普觀三世等諸如來。爾時善財見普

賢菩薩一一毛孔放一切世界微塵等光明普照一
切虛空法界等世界除滅一切眾生苦患悉能長養
菩薩善根。一一毛孔出種種香雲普熏十方一切如
來及諸眷屬。一一毛孔出一切世界微塵等華雲。一
一毛孔出一切世界微塵等諸香樹雲。出眾妙香莊
嚴法界。一一毛孔出一切世界微塵等妙寶衣雲。莊
嚴虛空。一一毛孔出一切世界微塵等種種寶樹充
滿虛空以爲莊嚴。兩種寶供佛大眾。一一毛孔出

一切世界微塵等色界天身。充滿一切法界一切眾
生界。讚歎菩提。一一毛孔。出一切梵王身雲。勸請如
來轉妙法輪。一一毛孔。出一切欲天身雲。皆悉護持
諸佛法輪。一一毛孔。念念中。出一切世界微塵等三
世諸佛。充滿虛空。無依眾生。爲作歸依。一一毛孔。念
念中。出一切世界微塵等清淨佛刹。諸佛菩薩。充滿
其中。教化成熟。無量眾生。一一毛孔。念念中。出一切
世界微塵等淨不淨佛刹。充滿虛空。令染汙者皆悉

清淨。一一毛孔念念中出一切世界微塵等不淨淨。
刹。調伏不淨眾生。一一毛孔念念中出一切世界微
塵等一切眾生身雲。隨順世間教化眾生。一一毛孔
念念中出一切世界微塵等菩薩身雲。讚歎諸佛長
養一切眾生善根。一一毛孔念念中出一切世界微
塵等初發心菩薩身雲。於一切刹示現初發菩提之
心。一一毛孔念念中出一切世界微塵等菩薩身雲。
於一一刹讚一切佛功德願海普賢菩薩所行妙行。

一一毛孔念念中出一切世界微塵等普賢所行雨
甘露法令一切眾生修薩婆若。一一毛孔念念中出
一切世界微塵等佛初成正覺出興於世爾時善財
見如是等不可思議自在神力見已歡喜踊躍無量。
重觀普賢一一身分。一一肢節。一一毛孔中悉見三
千大千世界風輪水輪火輪地輪大海寶山須彌山
王。金剛圍山。一切舍宅諸妙宮殿眾生等類。一切地
獄餓鬼畜生閻羅王處諸天梵王乃至人非人等欲

界色界及無色界。一切劫數諸佛菩薩教化眾生。如是等事皆悉顯現。十方一切世界亦復如是。如此娑婆世界盧舍那如來應供等正覺所現自在力。東方蓮華妙德世界賢首佛所顯現神力亦復如是。如賢首佛所如是。東方一切世界一切佛所顯現神力亦復如是。如東方南西北方四維上下一切世界一切佛所顯現神力亦復如是。於一切世界一切微塵。一微塵中現自在力亦復如是。爾時善財見普賢菩薩

薩不可思議自在神力。卽得十不可壞智慧法門。何等爲十。所謂於念念中能以一身徧一切刹。於念念中詣一切佛所。於念念中恭敬供養一切諸佛。於念念中一切佛所聞持正法。得一切佛法輪智波羅蜜門。得不思議佛自在智波羅蜜門。得無盡辯智慧法門。得般若波羅蜜觀諸法門。得一切法界海大方便波羅蜜門。得知一切眾生欲性智慧波羅蜜門。得普賢所得智慧波羅蜜門。爾時普賢菩薩卽伸右手摩

善財頂摩已善財復得一切世界微塵等諸三昧門。
一一三昧門各有一切世界微塵等三昧以爲眷屬。
一一三昧中見一切世界微塵等諸如來海長養一
切世界微塵等諸功德具生薩婆若滿大願海安住
正道究竟一切諸菩薩行發薩婆若勇猛精進爲一
切佛光明所照如此娑婆世界盧舍那佛所普賢菩
薩摩善財頂令得具足一切世界微塵等三昧門諸
妙功德普賢菩薩在於十方一切世界諸如來所摩

善財頂所得功德亦復如是。爾時普賢菩薩告善財言。善男子。汝今見我自在神力奇特事。不答言。唯然已見。此不思議莫能測者。唯除如來善男子。我於過去不可說不可說世界海微塵等劫。修菩薩行。專求菩提。一一劫中見不可說不可說世界海微塵等佛。修菩提心。一一劫中於一切世界設不可說不可說廣大施會。給施一切。或施妻子城邑聚落頭目髓腦肢節血肉一切身分。不惜壽命。一向專求一切種智。

於一一劫恭敬供養不可說不可說世界海微塵等
佛。於彼佛所出家學道受持正法。未曾生於貪恚癡
心。我我所心。樂著生死虛妄之心。輕慢他心。諸障礙
心。修不可壞佛菩提心。未曾忘失善男子。我所修行
菩薩諸行。淨佛世界。教化眾生。長養大悲。供養諸佛
及善知識。護持正法。悉捨一切內外諸物。修習世間
出世間智。令一切眾生背生死苦。讚歎一切諸佛功
德。如是等事於不可說不可說劫中演說。劫猶可盡。

此諸功德不可窮盡。善男子。我得如是功德具力。諸善根力。樂勝法力。修功德力。觀察諸法寂滅性力。淨慧眼力。佛威神力。諸大願力。大慈悲力。淨通明力。善知識力。得是力故。逮得本性清淨法身。三世不壞。又得無上清淨色身。超出一切世間。隨應化者。莫不覩見。遊一切刹。無處不至。現自在力。見者無厭。善男子。汝且觀我清淨法身。無量劫海行菩薩行之所成就。無量劫中難聞難見。種少善根。聲聞菩薩猶尙不得。

聞我名字。況見我身。善男子。若有眾生聞我名者。於阿耨多羅三藐三菩提不復退轉。若見。若觸。若迎送。若隨順。若見光明。若見震動。諸佛世界。乃至夢中見聞我者。亦復如是。若思惟念我。若一日。一夜。若七日。七夜。若半月。若一月。若一歲。若百歲。若一劫。若百劫。乃至不可說不可說世界微塵等劫。若一生念我。若百生乃至不可說不可說世界微塵等生念我。亦復如是。以如是等世界微塵等諸妙方便。令一切眾生

發阿耨多羅三藐三菩提心住不退轉善男子若有
眾生聞我修習淨佛刹者必得往生清淨世界若有
眾生見聞我身必得生我清淨身中善男子汝復觀
我清淨法身爾時善財於普賢菩薩相好肢節諸毛
孔中見不可說不可說世界海諸佛充滿一一如來
以不可說不可說大菩薩眾以爲眷屬見彼一一如
來刹海所依不同形色各異金剛圍山大雲彌覆佛
興世間所轉法輪如是等事皆悉不同又見普賢菩

薩於十方刹出一切世界微塵等如來化身教化眾生令發阿耨多羅三藐三菩提心。爾時善財童子經由親近一佛世界微塵等諸善知識所得功德。於見普賢菩薩所得功德百分不及一。百千萬分乃至算數譬喻所不能及。何以故。善財童子於念念中入不可說不可說佛世界海。得不可說不可說微塵等諸功德藏。知諸佛海次第興世菩薩眾海眷屬圍繞。了眾生根現自在力而化度之。或一世界於一劫中修

菩薩行乃至不可說不可說世界微塵等劫修菩薩行。不此世界沒。不彼世界生。而能教化無量無邊世界眾生。令發阿耨多羅三藐三菩提心。爾時善財童子能自究竟普賢所行諸大願海。不久當與一切佛等。一身充滿一切世界。刹等。身等。行等。正覺等。自在力等。轉法輪等。諸辯才等。妙音聲等。方便等。無畏力等。佛所住等。大慈悲等。不思議法門自在力等。爾時普賢菩薩欲重明此義。以偈頌曰。

汝等離煩惱	清淨心諦聽	說佛一切行
眞實波羅蜜	超出諸世間	無上調御士
遠離煩惱垢	清淨如虛空	圓滿智慧日
除滅煩惱闇	普照一切法	安樂諸羣生
如來無量劫	時乃出興世	譬如優曇華
難見難值遇	普爲諸羣萌	苦行無量劫
隨順諸世間	其心無染著	時諸菩薩眾
既聞普賢教	敬心聽如來	自在眞實義

普賢眞佛子 究竟一切行 常爲佛所歎
言必不虛妄 普賢功德華 不染三界法
勸發大衆聽 無盡智慧海 諸佛微妙智
清淨如虛空 明了一切行 其心無所著
一念悉了達 三世一切法 善知衆生根
隨其所應化 衆生心煩惱 諸業善不善
所樂皆悉知 而爲說正法 或見如來坐
充滿十方界 衆生罪所障 雖近而不見

或見初發心	遠離諸放逸	無量無數劫
修習菩薩行	或聞諸最勝	妙音演說法
罪垢眾生等	不聞佛名號	或見大菩薩
充滿三千界	究竟普賢行	如來爲說法
或見盧舍那	無量無數劫	嚴淨此世界
得成最正覺	或見賢首佛	普賢大菩薩
斯等悉充滿	蓮華妙德刹	或見阿彌陀
觀世音菩薩	灌頂受記者	充滿諸法界

或見阿閼佛 香象大菩薩 斯等悉充滿
妙樂淨嚴刹 或見月慧佛 金幢大菩薩
斯等悉充滿 明淨鏡妙刹 或見日藏佛
智灌大菩薩 斯等悉充滿 清淨光明刹
或見十方界 諸佛放光明 爲眾轉法輪
除滅愚癡闇 或見一毛孔 不可說佛刹
諸佛莊嚴身 佛子眾圍繞 爲轉正法輪
度脫諸羣生 或於一毛孔 普見諸佛子

無數億劫中	修習菩薩行	或於一一塵
悉見無量刹	或淨或垢穢	諸行業所起
或見盧舍那	於彼轉法輪	顯現自在力
方便入涅槃	觀察眾生類	一切業煩惱
顯現自在力	化之令解脫	如是諸法王
十方世界中	顯現自在力	我今說少分
或見釋迦文	初成等正覺	饒益諸羣生
一切莫能測	或見爲菩薩	供養一切佛

或住童子地 顯現自在力 或見行施戒
忍辱勤精進 深入諸禪定 住慧方便地
或見究竟住 一切種智地 三昧陀羅尼
出生諸通明 或見無量劫 修習菩薩行
逮得不退轉 甘露灌頂記 或見爲梵身
帝釋四天王 刹利婆羅門 示現此等身
或見從兜率 命終降神生 或見住宮殿
捨欲而出家 或見坐道場 降魔成正覺

轉淨妙法輪	涅槃後起塔	或見無量壽
最勝天人尊	爲授灌頂記	成無上導師
或見十力尊	教化已周訖	般涅槃已來
無量無數劫	或見論師月	現處梵王宮
亦現大自在	魔王宮殿中	或見兜率宮
諸天眾圍繞	爲彼說正法	悉令大歡喜
或見處夜摩	帝釋四天王	諸龍夜叉王
八部宮殿中	定光如來所	供養得受記

如是等方便 教化諸羣生 光明身壽命
淨慧及眷屬 教化威儀聲 皆悉不可數
見佛同眾生 或身如須彌 或現加趺坐
充滿於世界 或見光一尋 或百千由旬
或現照法界 或照一切刹 或現壽百歲
百千萬億歲 無量那由他 不可思議劫
無礙清淨慧 一念知三世 悉從因緣起
而實無自性 一刹成正覺 普現諸世界

能現一世界	而作無量刹	示現無量刹
而爲一世界	安住無上道	具足無畏力
無礙智慧轉	十二行法輪	知苦集盡道
十二支緣起	四辯無礙智	演說一切法
無我無我所	亦無有自性	無生亦無滅
無來亦無去	皆悉如虛空	而不壞諸業
如來爲眾生	方便分別說	轉此法輪時
震動一切刹	大海金剛山	無有恐怖者

如來一音說	各隨所應解	滅諸煩惱垢
令住薩婆若	如來一音說	或聞施戒忍
精進禪智慧	慈悲及喜捨	四念四正勤
如意諸根力	覺道止觀念	神通諸法門
如來一音說	八部人非人	梵釋四天王
隨類音聲解	若多貪恚癡	憍慢慳嫉結
八萬四千垢	各聞對治法	未修淨業者
聞說十善道	已修施戒者	聞說般涅槃

染著於生死	懈怠諸羣生	聞說解脫門
除滅生死苦	少欲知足者	樂處於閒靜
如是等眾生	聞說二乘音	或修廣大心
具諸功德藏	親近諸佛者	聞說大乘聲
或有一世界	聞說一乘音	或二三四五
乃至無量乘	智慧行有異	解脫無差別
猶如虛空性	無有若干相	如來微妙音
其性亦如是	隨所應化者	所聞各不同

佛以過去行 得一微妙音 無心於彼此
而能應一切 佛口放妙光 八萬四千數
普照諸世界 除滅眾煩惱 具足智功德
三種順眾生 離世如虛空 常現於世間
雖復隨世現 生老病死苦 或復現住壽
其性如虛空 如來分別知 一切眾生類
諸根及性欲 令住薩婆若 諸佛尊導師
示入於大眾 隨其所應化 善現威儀法

爲諸聲聞現	出家威儀法	常樂修寂滅
無餘涅槃證	婆羅門眾中	示現羸老身
縈髮而苦行	語論無窮盡	服氣或斷食
五熱以炙身	如是現苦行	降伏諸異學
或持異道戒	善算多方術	星厯地動相
種種眾生相	深入諸禪定	三昧及解脫
種種現嬉戲	令得薩婆若	示現樂衣服
種種莊嚴身	勇健善兵法	降伏刹利故

現知治正法	時節諸義利	輒語攝眾生
降伏大臣故	或詣四天王	八部鬼神所
方便爲說法	皆令大歡喜	或現爲帝釋
安住善法堂	諸天眾圍繞	爲彼演說法
夜摩或兜率	化樂化自在	梵王至淨居
爲彼演說法	如是現無數	種種威儀法
無量方便力	度脫諸羣生	譬如工幻師
能現種種事	佛爲化眾生	示現種種身

如月遊虛空	觀者謂增損	影現諸河池
映蔽螢火光	如來淨智月	示現有增損
處於直心水	映蔽二乘光	譬如深大海
珍寶不可盡	於中悉顯現	眾生形類像
甚深因緣海	功德寶無盡	清淨法身中
無像而不現	譬如明淨日	照除世間闇
如來淨智日	悉除三世闇	如龍興慶雲
普雨於一切	身心不降雨	除熱得清涼

如來亦如是 興起大悲雲 普雨甘露法
除滅三毒火 此法亦不從 如來身心出
如來淨法身 三界無倫匹 超出諸世間
非有亦非無 其實無所依 不去而徧至
譬如夢所見 亦如空中畫 非色非無色
非相非無相 非有亦非無 其性如虛空
如海摩尼寶 能出種種寶 眾生諸光明
而光無所有 導師亦如是 雖有而非有

不於一處中 積集功德寶 大仙現虛空
如自性實際 涅槃離欲滅 皆悉是一性
眾生心微塵 海水滴可數 虛空亦可量
佛德說無盡 聞此法歡喜 信心無疑者
速成無上道 與諸如來等

大方廣佛華嚴經卷第六十

本經謹依華嚴探玄記徐蔚如居士精校歷朝
諸家藏本刊定正文鋟板流通比丘智度恭校

誦補闕真言

南無三滿哆。沒馱喃。阿鉢囉帝。喝多折。折捺彌。唵。雞
 彌。雞彌。怛塔葛塔喃。末瓦。山。矝鉢囉帝。烏怛摩怛摩。
 怛塔葛塔喃。末瓦。吽。發。莎訶。舉字母讚

華嚴字母。眾藝親宣。善財童子得真傳。秘密義幽玄。
 功德無邊。唱誦利人天。

沙◎霜生春疎稍唼詩申山深衫搜沙
 嘯●忘○聲無○○微文橘○瓊雲嘯
 哆○鎗燈冬都明惶堤顛殫○擔佞哆

唱

哆	嘯	沙
---	---	---

字

時普願法界眾生入般若波羅蜜門

四十二字妙陀羅。字字包含義理多。

婆功德大法界沐恩波。

四生九有同登華藏玄門。八難三塗共入毘盧性海。

南無華嚴海會佛菩薩 三稱

多	嚕	沙
梵韻滿娑		

賢首五教斷證句頌

不兼發心五教齊初二位未見功用故五教俱齊雖云不兼偏異及發取滅心等不通各隨當教宗起立義不必隨宗立義不須疑

小教齊種伏粗見實種齊存心至總相初代見或粗分。以以此疑其異也。

細分伏除加行提見或細分於境頂世第一位中分伏除當五位中加行位也。

初果通達斷見盡初果斷三界見或重者通達位。

二三修習分斷惡二果斷欲惡前六品三果僅三品直達斷上惡七十一品此二善修習位。

無學三位羅思盡無學三位中羅漢斷盡七十二品辟支更修習辟支優習佛無餘。

辟支優習佛無餘氣帶深斷習故無餘也。

始教十向與四加二種煩惱斷所知分別約執分現指現行十向位伏四加位除狀約向加以明伏除指此二位於二障中但能伏除分別現障也。

小教齊加位正齊小教齊始十向四加速齊四加。

種子遷餘地初斷上位但除別現的餘種子入地分斷。

俱生種現斷一分俱生約細分指斷斷分別現種復斷俱生種現初地與小初果同。

初地與小初果同一分初地滿與小初果同。

三五七八九地分三地至九地斷俱生種現三分至九分。

小教後五位齊平小教後五請初果二果三果四果辟支佛采華上三五七八九地相對狀云齊平。

自後小教便不知至始十地小教則無名字故云不知。

十一分至等覺難難亦斷也俱生種現十一分必至等覺位中乃能盡斷。

妙覺直斷十二分俱生種現十二分直在淨化土感應佛現空勝應空相轉小機。

勝應空相轉小機相法令小教等轉小成大也。

終七信齊始十向分別俱生各有現行現行之中復分粗細終七信始十向於二障中初代現行粗分與小教總相念齊。

二位同伏二執障分別俱生各有現行現行之中復分粗細終七信始十向於二障中初代現行粗分與小教總相念齊。


分別俱生粗現行伏此位齊小總相。

伏此位齊小總相至十信位速伏二障分別俱生知現若約初教方當初信若均小始二教俱同加行故云同齊及云齊也。

頓教初信速同齊終教十信止齊頓之初信不入圓位十信以前并亦不入頓位故自七信以來且約當教以頓洵終初住至圓頓中俱有住次故復還均圓頓終三以明伏斷之差別也。

圓初頓七信相同圓初等攝圓初信頓七信也終教初住同此故云齊功。

終教初住速齊功





大方廣佛華嚴經（六十華嚴）《上中下冊》功德主名錄

法印文號：103049

四一〇、〇〇〇元：往生者Phu Chi Lan。

五一、四五〇元：De Tu Tam Bao。

一四、七〇〇元：GD Tran Tinh Hoa。

五、八八〇元：Andrew Thai。[張珊珊、張仕鴻、張玉蓮]。

二、九四〇元：GD An Tran。Tran Tinh Xuan。GD Linh Thai。

一、四七〇元：Hanh Chau。

一一、八〇〇元：佛陀教育基金會。

以上共計新台幣：五一〇、〇〇〇元，恭印一、〇〇〇套。

回向：天下和順，日月清明，風雨以時，災厲不起，國豐民安，兵戈無用，

崇德興仁，務修禮讓，國無盜賊，無有冤枉，強不凌弱，各得其所。

祝願法界一切有情，所有六道四生，宿世冤親，現世業債，咸憑法力，悉得解脫。

祝願現生者增福延壽，發菩提心，常隨佛學，勤修精進，利濟群生。

祝願已故者往生淨土，同出苦輪，共登覺岸。

附記：本會接受善信委託，代印經書、佛像，其必要之費用，均經本會審慎評估；若有結餘，均續作本會之印（購）經書及運費使用，為施主廣積陰德，歡迎十方大德善加利用。

普為出資及讀誦受持
輾轉流通者回向偈曰

願以此功德
消除宿現業
增長諸福慧
圓成勝善根
所有刀兵劫
及與饑饉等
悉皆盡滅除
人各習禮讓
讀誦受持人
輾轉流通者
現眷咸安樂
先亡獲超昇
風雨常調順
人民悉康寧
法界諸含識
同證無上道

佛曆二五五八年／西元二〇一四年十月

恭印：一〇〇〇套

流水號：12642
書號：CH341-01

大方廣佛華嚴經（六十華嚴）《下冊》

發行人：簡豐文

出版者：財團法人佛陀教育基金會

地址：100 台北市杭州南路一段五十五號十一樓

網址：<http://www.budaedu.org>

E-mail：budaedu@budaedu.org

電話：(02) 2395-1198 傳真：(02) 2395-1341-5

劃撥戶名：財團法人佛陀教育基金會 郵局劃撥帳號：〇七六九四九九

銀行名稱：台灣銀行城中分行（請於電匯或轉帳後告知本會用途）

銀行帳號：〇四五〇〇四五九七五〇三

本會經書免費結緣之請取方式如下：

(一) 親臨本會三樓講堂。(二) 利用傳真：(02) 23965959

(三) 撥打電話：(02) 23951198 分機：11、12

(四) 網址：<http://www.budaedu.org/books/>。(五) 寫信指定：本會法寶流通股。

為提高服務效率，請您嚴謹考量，慎選所需經書；儘量少用電話，多利用文字方式請取，並請詳寫經書名稱、冊數及收件人姓名、地址、電話、郵遞區號，以減少本會之處理時間；若大量申請，請註明用途，且避免姓名、地址等文字上書寫之錯誤。

◎本會經書，歡迎翻印（請勿增刪），贈送流通，功德無量。

◎本會交通：

※捷運：善導寺站5號出口，至杭州南路右轉，過兩個紅綠燈。

※公車站牌：審計部站→212、299、232、205、276、605、257、262

台北商業技術學院→253、297、237 仁愛路一段→253、297 開南商工→208

仁愛路、杭州南路(紹興街)口→630、270、263、245、621、651、37、261



行政院新聞局出版事業登記證局版臺業字第三八六九號

